

გიგი ხორნაული

ცხოვრება ვაჟა-ფშაველასი

მესამე შეესებული გამოცემა



თბილისი, 2008
„ეროვნული მწერლობა“

გამოცემის რედაქტორი: ვაჟა ოთარაშვილი
რედაქტორი: ნანა კოტეტიშვილი
კომპიუტერული დიზაინი: გიორგი ქადაგიშვილი
ოპერატორი: თამარ ტყაბლაძე

ნახატი ტიტულზე (დაჭრილი არწივი) ეკუთვნის
ვაჟას შვილთაშვილს (ლევანის შვილის, ლუკას ქალს) ექიმ
ნინო რაზიკაშვილს.

გამომცემელი: ფონდი
„თანამედროვეობა და მემკვიდრეობა“
თბილისი,
2008 წელი.

ISSN 978-9941-0-1004-0

ვაჟა-ფშაველას ცხოვრებისა და შემოქმედების შესასწავლად „ბევრის-ბევრი“ რამ არის გაკეთებული, მაგრამ, ვფიქრობთ, ქართველი მკითხველისათვის ინტერესმოკლებული არ იქნება იმ კაცის მონათხრობი, ვინც გაიზარდა იმავე მთებში (ჩემი სოფელი, კანალხევი, ჩარგალს გასცქერის) და თითქმის იმავე გარემოში, როგორშიც ვაჟა-ფშაველამ გაატარა მთელი ცხოვრება.

ამას გარდა, ვიცნობდი და ურთიერთობა მქონდა ვაჟას თანამედროვეებთან, მის ჩამომავლებთან, რომელთაგან ბევრი რამ მომისმენია და ჩამინერია ვაჟას შესახებ. თვით ჩვენ ოჯახშიც ხსოვნა იყო შემონახული ვაჟა-ფშაველას ხშირი სტუმრობისა პაპაჩემთან, გიორგი ხორნაულთან, ვაჟას მტერ-მოყვარესთან, ფშავ-ხევსურეთის პირველ და იმ დროს ერთადერთ მეტყვევესთან („აბეშიკთან“), „ბლოელ აფშინას“ პროტოტიპთან.

ვაჟა-ფშაველას შემოქმედება ნასაზრდოებია მთიელთა მითოსითა და ზეპირსიტყვიერებით. ამიტომ არის მისი პოეზია ზედროული და ამასთან ერთად ყველასათვის გასაგები. მას ღრმა ფილოსოფიური ნააზრევისა და ზოგადსაკაცობრიო პრობლემების ხორცშესხმისათვის გამოყენებული აქვს მთიელთა ყოფის ამსახველი ეპიზოდები, ადათ-წესები, რომელთა ცოდნის, თვით ვაჟას ცხოვრების გაცნობის გარეშე, ბევრი რამ გაუგებარი რჩება მისი შემოქმედების შესწავლისას.

რა თქმა უნდა, სრულიადაც არ მიგვაჩნია, რომ ჩვენ ყველაფერი ისა ვთქვით და ისე ვთქვით, როგორც ვაჟას ეკადრება. ხევსური ხმითმოტირლისა არ იყოს: „შენ შენფერნ გინდან მატირალნიო, შენის კაცობის დამფასავნიო“. ეს ჩვენი მხრიდან. მკითხველს კი, ეჭვიც არ გვეპარება, კიდევ მეტი შენიშვნა თუ სურვილი გაუჩნდება, რასაც დიდი სიამოვნებით გავითვალისწინებთ წიგნის შემდგომი სრულყოფისათვის.

ავტორი

არწივთა საბუდარები

„რუსთველის შემდეგ ასეთი პოეტი არ გვეყოლია“

ილია ჭავჭავაძე

„პირიქით ხევსურეთში მუცოს ციხის სანახებში ერთი უზარმაზარი ლოდი იცავს ხეობის ყელს..

ბინდისას თუ მიეახლებით იმ ლოდს მუცოს ციხიდან, ასე იტყვი, ლოინიო, მამალი აქლემი საომარი. დაუჩოქნიაო ამ აქლემს, მუხლს ასვენებსო, რათა აღდგეს მერე და უდაბნოს ეახლოს ისევ. თუ მეორე მხრიდან მიუახლოვდი, ფრთიანი ლომი გეგონება, ლომისტანიანი; ფრინველის ჯანგიანი და ნისკარტიანი ქიმერა და ყოველ დროში, ყოველ პოზაში, ყოველი მხრიდან სხვადასხვა აღნაგობისა მოგეჩვენება იგი.


ვაჟა-ფშაველა მომაგონა ამ უტოლო ლოდმა.“

კონსტანტინე გამსახურდია

„ვაჟა არ იყო არც ლამაზი, არც მოხდენილი. იყო ახოვანი. მთელი ფიგურა – არქაული. იგი კი არ დადიოდა – იზღაზნებოდა, როგორც ჰერალდური ნადირი. და ფსევდონიმი კი ცოტას ამბობს? – ვაჟა-ფშაველა! ამ მაგარ სიტყვაში და უფრო ა-ნით დაბოლოებაში სჩანს დედამიწის ძალა“.

ვახტანგ კოტეტიშვილი

ქართველი მთიელები განცალკევებით მდგარ მთას, სხვებისგან მკვეთრად გამოყოფილს, „მარტომთას“ ან „სამარტოს“ ეძახიან. ვაჟა-ფშაველა სწორედ ასეთი მარტომთაა, სხვაგვარი მწვერვალია ნარსულისაკენ გადაჭიმული ქართული მწერლობის კავკასიონზე. „რაც დრო გავიდა, რაც უფრო ამაღლდა საზოგადოება, ამაღლდა ვაჟაც. ის იმ მთასა ჰგავს, რომელიც ახლოდან სრულად არ აღიქმება, გახვალ მოშორებით და სხვადასხვა ფორმით გამოჩნდება“



არაგვის ხეობა

(34,90). ყველაზე დიდი მწვერვალები ცირალაცა გარკვეული მანძილიდან მოჩანს. „მწვერვალ“ ვაჟა-ფშაველას დანახვა მსოფლიოს თითქმის ყველა კუთხიდან შეიძლება და ყველას განსაკუთრებულად, თავისებურად ელამაზება. გამოჩნდა აგრეთვე

მისი პატარა, მანამდე უჩინარი სოფელი ჩარგალი, რომელსაც ზვიადად წამოსდგომიან თავს დონიისა თუ სასოვეთავის, ახუნისა თუ საშუბის მწვერვალები; შუაზე კი შეუპოვარი სიმ- შვიდით, „სვით გაბმული მურყნებითა და კალმახიანის წყლით“ მოსჩქეფს ჩარგლულა.

ეს სოფელიცა და ეს მთებიც საქართველოს მთის ერთ- ერთ ულამაზეს კუთხეში – ფშავშია, არაგვის ხეობაში. ამავე ხეობის სათავეშია ხევსურეთი. ეს ორი მცირე სამკვიდრებელი მთიელებისა, ერთი წყალ-ჭალის არემარე, შუა საუკუნეებამდე ფხოვად წოდებული, ერთიანი იყო. შემდგომში გაიყო, ელფერიც სხვადასხვაგვარი შეიძინეს, მაგრამ ერთობა მათი არ გაყრილა, ერთად მოიხსენიებოდნენ (ფშავ-ხევსურეთი) და ლაშქარშიც ერთად გამოდიოდნენ. ვაჟასათვისაც არ იყო ეს კუთხეები გაყო- ფილი. ამიტომაც არის, რომ ხევსურებზეც ისევე წერს, როგორც ფშავლებზე.

ფშავიცა და ხევსურეთიც მოსახლეობის რაოდენობით ბარის ზოგი სოფლისოდენიც ძლივს იქნებოდნენ, მაგრამ ისეთი გმირული, ისეთი ლამაზი ცხოვრებით უცხოვრიათ, რომ ბევრ დიდ სახელმწიფოსაც შეშურდებოდა მათი. რა ჯურის მტერი არ შესევია, ვის არ უცდია მათი დაპყრობა, მაგრამ ყველასათვის სამკვდრო-სასიცოცხლო ბრძოლა გაუმართავთ და თავის- უფლება არ დაუთმიათ. როგორც კი მტრის ხმას გაიგონებდნენ, ფუტკარივით გამოიშლებოდნენ და თავდაუზოგავად აკვდებოდნენ ზედ, რადგან სამშობლოს მტერთან ბრძოლაში სიკვდილი „სათემოდ შესამღერი“ იყო.

ვაჟა-ფშაველას თავის ერთ-ერთ სტატიაში „ფშავლები“ მოჰყავს ფშაველ-ხევსურთა წინაპრების ქვეყნისა და მეფისათვის თავგანწირვის ასეთი ფაქტი: „როდესაც პომპეიმ გამოიარა ურიცხვის ჯარით, მაშინ „ფხოველნი“ რიცხვით სამასი კაცი დაუხვდნენ წინ ანანურში და გზა შეუკრეს. პომ- პეის გაუკვირდა ამ ერთი მუჭა ხალხის გამბედაობა, მიიწვია თავისთან, გამოჰკითხა ვინაობა: ვინა ხართ? გყავთ მეფე თუ არაო? ფხოველთ უპასუხეს, რომ თვით მეფისაგან არიან ისინი დაყენებულნი მეფის კარის მცველად. როგორ იომებდითო, ჰკითხავდა პომპეი, რომ ვინიცობაა მომესია თქვენთვის ჩემი ჯარიო? მაშინ ფხოველთ გაიძვრეს ხმლები, იფარეს ფარები და

დაერივნენ ერთმანეთს. პომპეი გაკვირვებული დარჩა მათის ხელმარჯვეობით, იარაღის ხმარებით, დაასაჩუქრა, აღუთქვა თავისუფლება და გაისტუმრა მშვიდობით”. (15,8).

ისტორიიდან ცნობილია, რა ბევრმა დამპყრობმა სცადა არაგვის ხეობაში შესვლა ქართლისა და კახეთის დაპყრობის შემდეგ და იქ გადამალული განძის ხელში ჩაგდება, მაგრამ ხეირი არავისთვის დაუყრიათ.

ერთი ასეთი ისტორიული ფაქტი ფშავშიც არის შემონახული გადმოცემის სახით და იოანე ბატონიშვილსაც მოჰყავს თავის „კალმასობაში“. ამ თხზულების მთავარი პერსონაჟები იოანე ხელაშვილი და ზურაბა ლამბარაშვილი ლალისყურისაკენ მიემართებოდნენ, წინ შემოხვდათ ორი ფშაველი, რომელთა საამებლადაც იოანე იხსენებს ფშაველთა გმირობის ამბავს: „წყეულმან შააბას რომ კახეთი მოაოხრა, მერეთ თქვენზედ გამოგზავნა ჯარი. პირველად ბაჩალზედ წამოვიდნენ (ივრის ხეობიდან, თიანეთის მხრიდან – გ.ხ.) და თქვენ იმ ფშავის გადასასვლელში დახვდით და გამოაბრუნეთ. და მერე გაჯავრებულმან კიდევ ფშავის არაგვის წყალზედ ასი ათასი კაცი გამოგზავნა თქვენ წასახდენად. და ის ჯარი მოვიდნენ, შუაფხოვს ქვევით რომ წყლის პირზედ დიდი კლდის ქვაბია (იგულისხმებანანწვეთა, ვინრო კლდიანიჭალაორწყალს, ფშავისა და ხევსურეთის არაგვების შესართავს, ქვემოთ – გ.ხ.), იქამდის მოაწია იმათმან მხედრობამან და თქვენ, წმინდანის ლაშარის ჯვრისა და წმინდის ქეთევან დედოფლის მადლით, სძლიეთ და გააქციეთ იქილამ ის მტერი, და ესოდენი კაცი განყვიტეთ, რომელ მთლად ის წყალი სულ სისხლმან ისე შეღება, რომ აღარ დაილეოდა, და სულ ხოცით მოჰყევით ჟინვალის ხიდამდისინა. და მას აქეთ თქვენთან ველარავის შემოუბედნიო”. (23,431).

ფშავ-ხევსურეთში განსაკუთრებით მრავლად არის შემონახული ზურაბ ერისთავის ლაშქრობის ამბები.

მეჩვიდმეტე საუკუნის დასაწყისში ირანის ამაოხრებელმა ლაშქრობამ ძალზე დაანწქვეშევრდომი თავისუფალი მთიელები თავის ყმებად გაეხადა. სისხლისმღვრელი ომებით ხევი და მთიულეთი დაიმორჩილა და ახლა ფშავსა და ხევსურეთს მიადგა, მაგრამ მის ლაშქარსაც ისეთივე დღე დააყენეს, რაც თათრე- ბისას. ეს ამბები ასახულია საგმირო-ისტორიულ ლექსებში:

**„აკი გითხარა, ზურაბო, არაგვზე შავლა ძნელია!
დაგიხვდენ ფშაველ-ხევსურნი, დღე დაგაყენეს ცხელია,
სირბილით ჩამოგავლიეს არაგვის ჭალა გრძელია.
კართანას გადასეისა, მსახურთ გიკიდეს ხელია,
თვალის ყელში რო მიხველ, იქ მოგაგონდა ცხენია!“**

ზურაბს ამ დამარცხების შემდეგაც არ აუღია ხელი ფშავ-ხევსურეთზე: „ზურაბს ჯავრი ჰკლავს ორისა: ხევსურეთისა, ფშავისაო“. კიდევ უფრო დიდი ლაშქარი შეუგროვებია და რაკი ხეობით ვერ შეუღწევია ხევსურეთში, სათავიდან წამოუვლია. მთიულეთის მხრიდან, ფხიჭურზე გადავლით, დასცემია ხევსურეთს. ამ მოულოდნელი ზურგში დარტყმით პირველ ხანებში რალაც წარმატებისათვის მიუღწევია. ლაშარის გორზე ფშაველთა ძლიერების სიმბოლო – „ბერმუხაც“ მოუჭრია, მაგრამ ბოლოს მაინც სირცხვილნაჭამი გაბრუნებულა. კრაზანების ბუდეში მოხვედრილივით გასჭირვებია მის ლაშქარს. ყოველ წუთს საიდანღაც ისარი მოფრინავდა თურმე და ხმალი მოელავდა. ზოგი მარტოდმარტო ეკვეთებოდა შემოფეთებულ მტერს. გუდანის მთაზე, მაგალითად, გუროელი გმირი ქალუნდაური ჩამოსწევია და ხმალდახმალ მისულს თორმეტი მოუკლავს: „ბეგენ-გორ ჩამაენივა, ყმან ჩაჭრნა ზურაბისანი“, მეთორმეტე ყირამალა გადასულა, რაც თურმე ღვთისგან გაფრთხილების ნიშანი იყო: მეტის მოკვლა აღარ შეიძლებოდა, ცოდვა მოგეკიდებო. იმასაც ჩაუგია ხმალი და უკან გაბრუნებულა.

მერე ლიქოკის ხეობაში შეუთხელებიათ ზურაბის ლაშქარი ხევსურებს:

**„კვათეს ჩაყარნეს ისარნი, დილა რო ცამა ნამიო,
კიბეს ჩანურეს ლაშქარი, რო საკალმახე წყალიო“. (48,1).**

რაც ხევსურებმა დააკლეს ზურაბის ლაშქარს, ის ფშავლებმა დაუმატეს:


**„ზურაბ, რა უყვენ ლაშქარნი, ნაკრეფნი შვიდის თვისანი?
დაგიხვდენ ფშავლის შვილები, არწივნი მალლის მთისანი,
შამოგენივნეს მთაზედა, განითებინეს ქვიშანი“.**
ფშაველ-ხევსურნი ერეკლე მეფის „უნჯნი ყმანი“

იყვენენ, მისი თავდაუზოგავად ერთგულნი. მტრის შემოსევისას ისინი ყოველთვის მთის ზეგვივით ჩამოდიოდნენ ბარად, ყველაზე მეტად ირჯებოდნენ. ამას მემატიანეც აღნიშნავს, ამასვე ამტკიცებს კრწანისის ველზე სპარსელებთან სამკვდრო-სასიცოცხლო ბრძოლაში სამასი არაგველის თვალ-დაუხამხამებელი სიკვდილი, ამასვე ამბობს ქართველი პოეტი:

**„მთიდან ჩამორბოდნენ, მტრის ჟლეტა ნებავდათ –
და ბარში რჩებოდნენ სამარის ჯვრებადა.
ბარში მოდიოდნენ „ვოჟები“ კერკეტა –
მთაში ბრუნდებოდნენ ზღაპრად და ლეგენდად“.**

(შოთა ნიშნიანიძე, „ხევსური“).

ან თუნდაც რად ღირს შატილიონთა უმაგალითო გმირობის ამბავი... 1843 წელს შატილს მოადგა შამილის ერთ-ერთი სახელოვანი ნაიბი ახვერდი-მაჰმადი ხუთი ათასი კაცით. მისი მიზანი იყო საქართველოში შემოჭრა, ქართველთა გადაბირება რუსეთის წინააღმდეგ და თურქეთთან შეკავშირება. შატილიონთ გზის მიცემაზე უარი უთხრეს და სამოცი შატილიონი ხუთათას კაცს შეება. ქმრებსა და მამებს თოფებს ქალები უტენიდნენ, ისინი კი ზუსტი სროლით მტერს მუსრს ავლებდნენ. სარკმლიდან შემოვარდნილი ერთი ტყვია თავხემ აისხლიტა და აკვანში მწოლიარე ბავშვი შუაზე გაგლიჯა. დედამ კვლავ თოფების ტენვა გააგრძელა, ქმარს არაფერი აგრძნობინა – ნიშანში სროლას ვეღარ შეძლებსო. სამი დღის ბრძოლის შემდეგ შატილიონთ ტყვია თვით ახვერდი-მაჰმადს მიაწვდინეს და ბელადმოკლული ლეკის ჯარი უკან გაბრუნებულა. ამ გმირობისათვის შატილიონებს მეფის რუსეთის მთავრობისაგან საჩუქრად ჯვარ-მედლები, უამრავი ხორბალი და ტყვია – ნამალი მიუღიათ. მთავრობის განკარგულებით აქვე აუგიათ პატარა ეკლესია ამ გამარჯვების აღსანიშნავად, რომლის კედელშიც ჩაუსვამთ მარმარილო ქართული და რუსული წარწერით: „უმაღლესისა ბრძანებისამებრ ჯილდოდ შატილელთად დამარცხებისათვის ახვერდი-მაჰმადის და მისთა შეყრილთა ჯართასა ჩყმე (1843) წელსა შინა, აღშენებულ არს ჩყმთ (1849) წელსა



ვაჟა ლაჭაურას მუზარადით

განკარგულებითა კნიაზის ნამესტნიკისათა”.

გარდა ასეთი შემოსევებისა, ფშაველ-ხევსურთ, სხვა მთიელთამსგავსად, უხდებოდათ ჩრდილოეთ კავკასიის ტომების მეკობრული თავდასხმების მოგერიება, ჩრდილოეთიდან დაცვა საქართველოს სამეფოსი. ერთი ასეთი თავდასხმის ამბავი უშუალოდ ჩარგალზე, ვაჟას წინაპრებზე, გადმოცემულია ხალხურ ლექსში:

**„ვინა თქო ჩარგალელთადა, აფხუშოს, ცუდნი ყმანია,
აფხუშოთ ჭიჭახევამდე სამოც ლეკს მაშჭრეს თავია”.**

აფხუშო ჩარგლის ფუძე სოფელია, ახლანდელი ჩარგლიდან სამიოდე კმ-ით მოშორებული, ჭიჭახევა კი იმ პატარა ნაკადულს ჰქვია, ვაჟას სახლის გვერდზე რომ ჩამოდის.

ფშაველ-ხევსური კაი ყმები მარტოდაც სდევდნენ მეკობრეებს, უდარაჯდებოდნენ მთის საყელებში, ვიწროებში, ქისტეთამდე და დაღესტნამდე ჩასდევდნენ ტყვეების გამოსახსნელად, შურის საძიებლად. ასეთი კაი ყმები იყვნენ პროტოტიპები ვაჟას პერსონაჟებისა: ალუდა ქეთელაურისა, ზვიადაურისა, გიგლიასი და სხვების. ერთი იმ კაი ყმათაგანი ყოფილა ჩარგლელთა წინაპარი ლაჭაურა, თათრებთან ომის გმირი. მისი მეთაურობით ფშავლები შებრძოლებიან მტრის დიდ ლაშქარს, უეცარი თავდასხმებით დაუფრთხიან და ასე უდევნიანთ ჟინვალამდე, ფშავის არაგვის ბოლომდე. იქ კი მთელი ძალით დაურტყამთ საბოლოოდ და სულ ერთიანად გაუ-ჟლეტიათ. უთქვამთ – „ჟინიც მოვიკალით და ვალიც მოვიხადეთო”. – აქედან დაერქვა „ჟინვალიო”, – გადმოგვცემს ხალხური თქმულება.

ამ ომში ლაჭაურას პირადად მოუკლავს თათრების წინამძღოლი: ხმლით გაუჩეხია მისთვის ოქროთი მოვარაყებულ მუზარადი – „ჩაუხედვებია”. ეს „ჩახედვებული” მუზარადი აფხუშოს ადგილის დედისთვის შეუწირავს. ხალხმა კი ამ მუზარადს ლაჭაურას მუზარადი შეარქვა; ჩაჩეხილი ადგილი სანთლით ამოუგოზავთ და აფხუშოობას ლუდის სასმელად დაუწესებიათ. მესამე დღეს გამოიტანდნენ დასტურ-ხევისბრები და დაიძახებდნენ: აბა, ლაჭაურას შესანდობარი უნდა დაილიოსო!

ვინც კარგი ვაჟკაცი იყო, ლუდით სავსეს ცლიდა ამ მუზარადს. ერთ-ერთ ფოტოზე ვაჟას ეს მუზარადი უძევს მუხლზე. ჩანს, თვითონაც ელოლიავენობდა ლაჭაურას მსგავს გმირობას, ლაჭაურაობაზე ოცნებობდა; თვითონაც ენადა ისევე მძლავრად დაკვესება ხმლისა თათარზე არანაკლები მტრის თავზე.

ჯიშჩამომავლობა

ერთი ლეგენდის თანახმად, ვაჟას შორეული წინაპრები მოხევეები ყოფილან, სოფელ სნოდან. ამის შესახებ ცნობას თვით ვაჟას მამა პავლეც გვანვდის თავის ავტობიოგრაფიულ ჩანაწერში – „მოკლე მოთხრობა ჩემი წინაპრების ჩამომავლობაზედ, მათ ზნე-ჩვეულებებზედ“. იგი ამ ჩანაწერს ასე იწყებს: „ჩვენის გვარის მომდინარეობის დასაწყისი, როგორც ბებისჩემის და მამისჩემისაგან გამიგია, სუ ძველისძველათ ხევიდან მოსულან ცაბაურთას. ლუდუშაურები ვართო და მართლაც სნუში მე თვითონაც მოხევისაგან გავიგონე ჩვენის გვარისები ხართო – გოგოჭურებივო“. (46,7)

ამ ლეგენდის გამეორებაა იაგორ ლუდუშაურის ჩანაწერებში აღმოჩენილი ვაჟას მონათხრობი.

იაგორ ლუდუშაური აღ. ყაზბეგის ნათლული და აღზრდილი ყოფილა. თვითონაც ლექსებს ბეჭდავდა თურმე და ვაჟას გაცნობას ნატრობდა. 1896 წელს ახდომია ეს ნატვრა – დუშეთში შეხვედრია. ვაჟას უთქვამს: „მოხარული ვარ, რომ ჩვენი სანდროს შემდეგ კიდევ გავიგონე მოხეურ კილოზე ვაჟკაცური ლექსებიო“. მერე დუქანში შეუპატიჟნია. იქ სხვებიც შემოსწრებიან და ლექს-კაფიობაც გამართულა. იაგორს ექსპრომტად მიუძღვნია ვაჟასთვის ლექსი, რომელიც ასე მთავრდებოდა:

„...სხვა ვინ შეგვიმკობს მთის კალთებს, თუ არ თქვენებრი მწერალი!“

ვაჟას ამის საპასუხოდ უთქვამს:

„მოხევეს ლექსი უხდება, შეამკობს მხატვრულ ფერადა; მე მიტომ მიყვარს მოხევე, რომ სნოველი ვარ ძირადა,

წინაპარ მყვანდა მოხევე, ვეკუთვნი შვილიშვილადა! გამოჰქცევია სიკვდილსა, ფშავი რგებია წილადა“.

თავის მეზობელ ფშავლებთან საუბრისას მამაჩემისაგან გამიგონია, რომ ჩემი წინაპარი ყოფილა ხუცესი, სოფ. სნოდან გამოქცეული, რომელსაც რაღაცა ავკაცობა ჩაუდენია, საგვარეულოს განუძრახია მისი იქიდან გაძევება, თვითონვე დაუსწრია, გაუტენია სამლოცველო, გამოუტანია ხატი, ჩაუსვამს გუდაში, მოუპარია ვისიმე ცხენი, შემჯდარა და ხევესურეთს მიბრძანებულა. ის იქ დამკვიდრებულა თავის ხატით ისევე ხუცესის ადგილზე. ის ყოფილა მოუსვენარი ავი კაცი. იქაც ავკაცობა ჩაუდენია და შემდეგ გადმოსულა ფშავში. მამაჩემი იტყოდა – „ხუცესობა მოგვიდისო“.

ვაჟა-ფშაველას მოხევეურ წარმოშობას უჭერს მხარს ქართული ლიტერატურის ცნობილი მკვლევარი, მოხევეების სიძე პროფ. დიმიტრი ბენაშვილი თავის ვრცელ მონოგრაფიაში „ვაჟა-ფშაველა“. ვაჟას მამის ცნობას იგი ავსებს ხევეში მოპოვებული ხალხური გადმოცემით: „რაზიკაშვილების გვარი, როგორც ვაჟას მამა პავლე გადმოგვცემს, მოხევეური წარმოშობისაა. თავდაპირველად რაზიკაშვილები ლუდუშაურები ყოფილან და ცხოვრობდნენ სოფელ სნოში. სნოდან ლუდუშაურების ერთ-ერთი შტო ფშავში, სოფელ ცაბაურთაში გადასახლებულა, ცაბაურთიდან აფხოშოში (აფხუშოში - გ.ხ.), აფხოშოდან კი ჩარგალში. ხევიდან ფშავში მოსვლის დროს ლუდუშაურებს გვარი გამოუცვლიათ, ერთ-ერთი მათი წინაპრის სახელი რაზიკა გვარად გამოუყენებიათ და რაზიკაშვილებად დაწერილან.

თქმულების თანახმად, სოფელ სნოს სახელწოდება მომდინარეობს ლუდუშაურების წინაპრის სახელისაგან. პირველი ვაჟი სნოს მაშინ შეეძინა თურმე, როდესაც ოსების სარდალმა ბაყათარმა დაარღვია საქართველოს საზღვარი და თავისი ჯარით დარიალში შემოვიდა. სნო ვინრო ბილიკებით მცხეთაში ჩამოსულა და მომხდარი ამბავი მეფე ვახტანგ გორგასლისათვის მოუხსენებია. მეფე ჯარით შესულა თერგის ხეობაში და ოსები სასტიკად დაუმარცხებია. ამ ბრძოლაში განსაკუთრებული სიმამაცე გამოუჩენია სნოს. მადლობის ნიშნად მეფეს სნოს ვაჟიშვილი მოუწადა და ნათლულისათვის ლუდუშაური დაურქმევია”...

შემდეგ საუბარია იმ ლუდუშაურის (სახელად და არა გვარად) ჩამომავლობაზე და სამი საუკუნის წინანდელ ტრაგიკულ ამბებზე, რის შემდეგაც განაგრძობს: „ამავე პერიოდს ემთხვევა სამუკეთ მეორე წარმომადგენლის, რაზიკა ლუდუშაურის გაქცევა ხევიდან და მისი დასახლება ფშავში. ამ გარემოებამ ხელი შეუწყო ახალი შტო-გვარის – რაზიკაშვილის წარმოქმნას. უკვე ცნობილი რაზიკაშვილების გენეალოგიის მიხედვით, ვაჟა-ფშაველა რაზიკადან მეშვიდე თაობის წარმომადგენელია, ხოლო ვაჟას შვილი ვახტანგი მერვე თაობად ითვლება. თუკი მეცნიერებაში უკვე დადგენილი წესის მიხედვით თაობათა დისტანციას 35 წელს ვიანგარიშებთ, მაშინ რაზიკაშვილების გვარს სამი საუკუნის ისტორია უნდა ჰქონდეს.” (4, 47–50).

ვაჟა-ფშაველას წინაპრები რამდენად იყვნენ ლუდუშაურები, ეს კიდევ საკვლევ-საძიებია და გადაჭრით რაიმის თქმა არ შეიძლება, მიუხედავად იმისა, რომ რალაცა ცნობა ვაჟას მამასაც ჰქონია, მაგრამ იმის თქმა კი თამამად შეიძლება, საქმე ხალხურ ლეგენდასთან რომ გვაქვს. შეუძლებელია ლუდუშაურთა გვარის გორგასლის დროიდან მომდინარეობაზე და მამიშვილობა-განაყოფობაზე ლაპარაკი თხუთმეტი საუკუნის მანძილზე, როცა რეალურად სამი-ოთხი თაობის იქითა წინაპარი თითქმის აღარავის ახსოვს. დიმიტრი ბენაშვილი საერთოდ არ ახსენებს იმავე ვაჟას მამის ნათქვამს: „სწოში მე თვითონაც მოხვევისაგან გავიგონე ჩვენის გვარისები ხართ –გოგოჭურებივო”. ჩანს, ველარსაიდან შეათავსა ერთმანეთთან მეხუთე საუკუნის „ლუდუშაური” გოგოჭურთან.

თავისი გვარისა თუ წინაპართა სხვა კუთხიდან, უცხო ქვეყნიდან მომდინარეობაზე შეთხზული ლეგენდების სინამდვილედ წარმოჩენა რატომღაც ეამაყებოდათ ჩვეს წინაპრებს. იშვიათი იყო ქართველი თავად-აზნაური, ვინც თავის ჯიშ-ჩამომავლობას ებრაელებს, თათრებს, სომხებს, ჩერქეზებს და ვილას არ უკავშირებდნენ, რათა ამით თავი სხვებზე მაღლა დაეყენებინათ. ხშირად ასევე იყო დაბალ ფენებშიც და მათ შორის ფშავსა და ხევსურეთშიც. შესაძლოა ასეთი ტრადიციით იყოს ნაკარნახევი ვაჟას მამის პავლეს მონათხრობიც – მოხვევები ვართო. სამისოდ კი, მოხვევებსაც და პავლესაც ბიძგს მისცემდა ის, თუკი ლუდუშაურების თემში ვინმეს სახელად რაზიკა ერქმეოდა.

სავარაუდოა, ლუდუშაურთა მამიშვილობა ხევში გადმოსულიყო ხევსურეთიდან, გოგოჭურთ თემიდან. ისევე როგორც არიან მთიულეთში გადასული ბუჩუკურები, თუშეთში – სულაკაურები (სულაკანი), ფშავში – რაზიკაშვილები (რაზიკანი), პირქუშაშვილები – (პირქუშანი) და სხვა. როგორც ჩანს, რალაცა დანაშაულის გამო გაუდევნიათ თემიდან ვაჟას წინაპარი, გადასულა სწოში თავისიანებთან, მამიშვილობით ლუდუშაურებთან, იქაც რალაცა დაუშავებია – მოუსვენარნი ვყოფილვართო, გვიყვება ვაჟას მამა – და გადმოსულა უკანაფშავში, სოფელ ცაბაურთაში, ფშავლებისაგან დაცლილ ადგილში პირიქით ხევსურეთიდან, კერძოდ, სოფ. ხანაბოდან გადმოსულ გოგოჭურებთან. იქ შეუქმნიათ გოგოჭურთ თემის ხალხს ფშავის ერთ-ერთი ძლიერი თემი. შემდეგში მათ ჩარგალში შეუსყიდიათ ადგილი და იქ ჩამოსახლებულა ჭარბი მოსახლეობა. ამას მოწმობს ჩარგლის ფერდობზე შემორჩენილი ნასახლარები, რომლებსაც ხალხი „გოგოჭურებს” უწოდებს. საერთოდ, როცა ფშავლები ერწოთიანეთისაკენ ან ბარისაკენ დააპირებდნენ გადასახლებას, თავის სახლ-კარსა და ადგილ-მამულს ხევსურებს ასყიდებდნენ. ასე შეუსყიდიათ ბლოს ხეობიდან ჩამოსულ ხორნაულებს სოფ. კანალხევი, ასე შეუსყიდიათ გოგოჭურთ თემის ხალხს მიგრიანულთის, შარახევისა და ჩარგლის ადგილები. ჩარგალში დასახლებულ გოგოჭურთა თავკაცის ნათქვამია:

„ხევსური ამბობს ლანიშა: „ადგილ არ მამწონ ბარისა, ჩარგალს ავიღე მამული სამოცდასამის ხარითა, შარის თაობა ჩემია, შარის ძირობა ფშავლისა”.

იგულისხმება ჩარგლის სამოსახლო, მზისპირის ფერდობზე გამავალი შარა. ამ შარის თავზეა გოგოჭურთ ნასოფლარიცა და მათი გამოჩენილი გმირების სულა და კურდღელას ნაციხვარიც. გადმოცემით, ეს გმირი ძმები ისე გაამაყებულან, ისე შეუშინებიათ ხალხი, რომ ჭალაზე მგზავრად მიმავალნი ჩუმად დაიპარებოდნენ, ჯორებს საპირეებს უკეთებდნენ: არ დაიყოყნონ და სულამ და კურდღელამ არ გაიგონონო. მათი შიშით ჩარგლის წყალ-ჭალაზე მზე-წვიმის მეტი ვერა გაიჭაჭანებდაო.

ერთხელ კურდღელა თურმე თავის ციხის გვერდითა ზის

და ქალამნებს ისხამს, ხელში ხის სადგისი უჭირავს. ამ დროს ისრით დაჭრილმა ირემმა ჩამოურბინა და იქვე ახლოს წაიქცა. მოჰყვნენ მონადირეებიც კვალდაკვალ. კურდღელს ირემი წაურთმევი – მე მოვკალი გვერდზე რომ ჩამომირბინა, სადგისი ვკარიო. ეს ამბავია ასახული ერთ „ისრის“ დროინდელ გვრინში, ალბად იმ მონადირეზე ხმით ნატირალში:

**„ძალის მჭამელმა გოგოჭურმა
ბევრი რიალი ჩაიდინა,
ხარსა ირემსა ნაისრალსა
ნასადგისარი მამიქვივნა“.**

ასეთი გაამაყების გამო, თუ სულაც იმიტომ, რომ ხევსურები ადგილში შეეჭრნენ, ჩარგლელებს ერთ დღესაც სათიბეზე გასული ძმები მიპარვით დაუხოცავთ. ამასაც ძველი ხმით ნატირალიდან ვიგებთ:

**„შვილნი ნავლალენ თიბაზედა,
ჩემი სულაი-დ კურდღელაი,
თვალით დავხრიტენ ახუნგორი,
არცად აჩინდა ნამხრევებიო.
– ბერო, რად სტირი შვილთა შენთაო,
ჩარგლის კართ იყვნენ შენნი შვილნიო,
შამონოლილნი ვეძაზედაო.
ბრუნევედეს სისხლის მორევეჩიო,
ხელში ეჭირათ შიშველ ხმლები,
ერთმანეთს ყორნებს ულაღევედესო“.**

ვაჟამ ეს გადმოცემა თავის პოემა „სულა და კურდღელას“ დაუდო საფუძვლად, მაგრამ იმ განსხვავებით, რომ ნანარმოებში ფშავის მფარველი გმირები სამშობლოს მტრებს, თათრებს, შეაკლა უთანასწორო ბრძოლაში. ჩანს, ვაჟას ასეთი გმირები უაზრო სიკვდილისათვის არ ემეტებოდა. ამ სიმპატიებს უთუოდ ისიც აძლიერებდა, რომ ისინი თავის უშუალო წინაპრებად მიაჩნდა. ამით ამაყოფა და ერთ-ერთ ფსევდონიმად „უშულაკა გოგოჭურსაც“ აწერდა თავის წერილებს. მათ დადებით გმირე-

ბად გამოყვანას ხელს უწყობდა აგრეთვე ისიც, რომ ისინი მართლაც იყვნენ მტერთან მებრძოლნი. ეს მხარე წამოსწია ვაჟამ, ეს იყო მისთვის მთავარი. ეს მთავარი არც ხალხმა დაუკარგა და მათი ფუძენაცხვარი და მათი სახელები სალოცავად აქციეს. მათ სულს შესთხოვდნენ მფარველობას. ასეთი რამ ფშავში ბევრგან გვხვდება.

„... ირკვევა, რომ სულა და კურდღელა გოგოჭურები იყვნენ. გოგოჭურთა ჩარგალში მოსახლეობის შესახებ ხალხშიც არის დარჩენილი გადმოცემები. გოგოჭურები ფშავის სოფელ ცაბაურთაშიც ცხოვრობდნენ. მაგრამ გოგოჭურთა გვარი ხევსურეთის ძირითად გვართაგანია. როგორც ცნობილია, არაბულები, ჭინჭარაულები და გოგოჭურები ე.წ. სამაგანძუროს ქმნიდნენ ხევსურეთში და ხსენებული კუთხის უძველეს გვარებად ითვლებოდნენ“. (35,121).

სოფელ აფშოში ხევისბერმა სოლომან გოგნელაშვილმა მიამბო: „ერთ თუშათ ქალი რაიმ იყვის ემა ჩარგალსა, მკითხაობდის, ქადაგობდის. იმან იძახის, რომეო ხევსურნ დაფშავლდებიანო, ფშაველნ დაკახდებიანო, ისითა დრო მუალისო. მართლა ისრე აცხადდა“.

მთიდან ბარისკენ თანდათან მიგრაციის პროცესის დამადასტურებელი დოკუმენტი დაგვიტოვა XIX საუკუნის შუა წლების თიანეთის მაზრის (სადაც შედიოდა მაშინ ფშავ-ხევსურეთი) უფროსმა მ.ვ. მაჩაბელმა, ალბათ, საანგარიშო მოხსენებაში „თბილისის გუბერნიის, თიანეთის მაზრის სახელმწიფო გლეხების ეკონომიური ყოფა“. იგი წერს: „დიდი მიგრაცია ბარისაკენ ყველაზე მეტად თუშეთიდანა და ფშავიდან ხდება. ხევსურები თითქმის უძრავად არიან. ამიტომ შემაშფოთებელია ის ფაქტი, რომ ისინი დიდ გაჭირვებას განიცდიან. მთავრობამ უნდა მიიღოს გადამჭრელი ზომები, თორემ ეს ხალხი შეიძლება ამოწყდეს. ფშავში თავისუფლდება ადგილები და ხევსურები იქით მოინევენ ნელნელა, ბარს ვერ ენდობიან...“

...ჩარგლის თემში შედის ოთხი სოფელი: ბუჭყინტა, გუდარახი, ჩარგალი და შარახევი - 2 (ზემო შარახევი - გ.ხ.) ყველა ზემოხსენებულ სოფლებში ცხოვრობს გოგოჭურთა თემის ხალხი. ეს სათემო გვარი იყოფა რამდენიმე ცალკე შტოდ: პირქუშანი,

შავერდანი, რაზიკანი, ბაიანი, გორზამაულნი და გურასპაულნი.” (37,385).

ამ დოკუმენტიდან კარგად ჩანს, რომ ფშავის დაცლილი ოთხი სოფელი შეუვსია ხევსურეთიდან ჩამოსულ, (ალბათ, ნანილობრივ ცაბაურთიდანაც, ადრე გადმოსული გოგოჭურებისაგან) გოგოჭურებს და რომ გოგოჭური თემის სახელი ყოფილა, ხოლო პირქუშანი, რაზიკანი და სხვა - მამისშვილობები. ისინი რომ გვარები ყოფილიყო, მაჩაბელი დაწერდა პირქუშაშვილებიო, რაზიკაშვილებიო... ეს მამისშვილობის სახელები შემდგომში გვარებადაც გაფორმდა ფშაველთაგან მიღებული პრინციპის მიხედვით – „შვილით“. დღეს ჩარგლის ძირითადი გვარებია: პირქუშაშვილი, რაზიკაშვილი, ბაიაშვილი, გორზამაული, გურასპაული. შავერდაშვილი ბუჭყინტაში იყო, ზემო შარახევში. სოფ. მიგრიაულთის მკვიდრს, კარგ ფშაველ მოხუცს, ეფრემ ბუთხაშვილს, რომელიც ამ რამდენიმე წლის წინ გარდაიცვალა 90 წლის ასაკში, ჩემთვის ბევრჯელ უთქვამს: „შვილო გიგი, მე არ ვიცი ვინ რას ამბობს და ვინ რად ამბობს, მაგრამა ჩვენ ძირად ხევსურები ვართ, გოგოჭურები. ვაჟა-ფშაველა ჩვენს ხშირად მოდიოდის სტუმრად, მამაჩემ მამუკაი და ის ძმობილნი იყვნენ. იმათ იცოდნენ ამაზე ლაპარაკი, ჩვენ ერთნი ვართო.“

ვაჟა-ფშაველას, რაზიკათ დიდი წინაპარი იმედა, ერეკლეს დროინდელ ერთ დოკუმენტში გოგოჭურად, ე. ი. იმჟამინდელი თემის სახელით, არის მოხსენებული. ამ დოკუმენტზე ყურადღება გაუმახვილებია პროფ. დავით გოგოჭურს: „იმედას, ანუ როგორც თურმე მას მამა ეძახდა, მამისიმედს, ხშირად ვხვდებით ხალხურ პოეზიასა და თქმულებებში, როგორც უშიშარ მეომარსა და დარბაისელს, ხოლო ვაჟა-ფშაველას მამა პავლე კი ამის შესახებ წერს, რომ „ამ იმედის შვილი იყო მამისჩემის მამა ბერო“. (ასე, რომ ვაჟა-ფშაველა მამისიმედის ჩამომავალი მეოთხე თაობა იყო: ბერო–გივი–პავლე–ვაჟა-ფშაველა). მამისიმედზე სხვათაშორის ასეთი გადმოცემაც არის დარჩენილი: „მეფე ერეკლეს ის ხშირად ეტყოდა ხოლმე: „ორი შენი ბრძანე, ბატონო, მაგრამ მესამე კი ჩემი გაიგონეო!“ ეს ლამაზი გადმოცემა შეიძლება ხალხის ფანტაზიის ნაყოფად ჩაგვეთვალა, რომ არ მოგვეპოვებოდეს წერილობითი საბუთი მამისიმედისა და ერეკლეს ურთიერთობის შესახებ. არსებობს 1750 წლის 6 ივლი-

სით დათარიღებული დოკუმენტი, რომელიც მოურავ გ. ჩოლოყაშვილსა და ფშავ-ხევსურთა შორის ატეხილ დავასა და ამ დავასთან დაკავშირებით თუშეთში ერეკლეს მიერ გამართულ ხალხურ სასამართლოს (თემურ „რჯულს“) ეხება. მამისიმედ გოგოჭური ამ „რჯულის კაცთა“ (მსაჯულთა) შორის იხსენიება“ (10,47).

დავით გოგოჭურსაც და სხვასაც იმდროინდელი „გოგოჭური“ გვარად მიაჩნია. სინამდვილეში კი მაშინდელი სათემო სახელები (ხევსურეთშიც და ფშავშიც) გვარებად არ გაიზარებოდა, გვარები არ არსებობდა. ხევსურეთში უფრო გვიან ეს სათემო სახელები გაიფორმეს გვარებად, ფშავში კი, რაკი ფშაველა უფრო ადრე იწყო რღვევა, უპირატესობა მამისშვილობასა და მამის სახელებს მისცეს.

რაზიკაშვილი რომ XIX საუკუნის შუა წლებამდე გვარად არ იყო ჯერ გაფორმებული, ამას მოწმობს კიდევ სხვა დოკუმენტიც. ეს არის საქართველოს ცენტრალურ არქივში დაცული „ფშავის საეკლესიო წიგნები“, 1843 წლიდან მოყოლებული 1900-იან წლებამდე, რომლებშიც ჩანერილია ახალდაბადებულთა, ახალჯვარდანიერილთა და გარდაცვალებულთა „გვარები“. მათზე მხოლოდ პირობითად თუ ითქმის გვარები. საამისოდ ისინი იმჟამად „წედლ“ მასალას წარმოადგენდნენ, რადგან მთაში გვარების ფორმირება მაშინ იწყებოდა. კერძოდ, 1843 წლის წიგნში რაზიკათ მამისშვილობის წარმომადგენელნი ჩანერილნი არიან ამგვარად: ნადირა ბეროს ძე რაზიკანი, ბერი ბესიას ძე რაზიკანი, ხოლო ვაჟას მამა პავლე, როგორც განათლებული კაცი რაზიკოვად ეწერებოდა: „პავლე რაზიკოვი – ჩარგლის ეკლესიის პრიჩეტნიკი“. თვით ვაჟა-ფშაველაც მოსწავლეობის დროს რაზიკოვად ეწერებოდა.

1850 წლის ამავე საეკლესიო ჩანაწერებში გვარის ფორმირებაში უკვე საგრძნობი პროგრესია. მეტინილი გვარებისა უკვე სრულყოფილად არის გაფორმებული, მათ შორის „რაზიკაშვილიც“: ბერიძე ბერის ძე რაზიკაშვილი, პავლე გიორგის ძე რაზიკაშვილი, გიორგი იონას ძე რაზიკაშვილი... თუმცა მათ გვერდით ჯერ კიდევ გვხვდება ცომცხვარა გვარები: რაიბულ გოდერძის ძე გოგნელათი, იმედა მამუკას ძე ჭუბათი, მაჩხურა გამიას ძე ლოსეურათა, კურდღელა ფოცხვერას ძე ჭიჩოელი, ლევა გამი-

ხარდის ძე მათურელი, მარაულ ლომის ძე მარაული, პატარკაცი მლუდლის წონკურაულის ძე, ბერიძე გოგოლაუროვის ასული მარიაში, იმედა ქავთარის ძე გოგოჭურიშვილი და სხვა (41).

ამ დოკუმენტიდან გამომდინარე, შეიძლება ვთქვათ, რომ გვარი რაზიკაშვილი XIX საუკუნის 40-50-იან წლებში ჩამოყალიბდა გვარად ხევსურეთიდან ჩამოსახლებულ გოგოჭურთა თემის ერთ-ერთი მამიშვილობიდან – „რაზიკანი“. თვით ვაჟა-ფშაველამ და მისმა ძმებმა კი 80-იან წლებში დაიმკვიდრეს „რაზიკაშვილობა“.

ჩარგალში გოგოჭურთა ხევსურეთიდან ჩამოსახლების შესახებ ცნობებს ხალხიც გვანვდის. დავით გოგოჭურს მოჰყავს გუროელი ძაღლიკა გოგოჭურის ნაამბობი, რომ, „ჩარგალ თავისუფალ ალაგ ყოფილას. ნეფეს საკარგყმოდ მიუცავ თავის მეომრებისად. ისეები ზოგ ჴევსურ ყოფილ, ზოგ მშაველი, ზოგ მთიულ-მაჴევეები, ზოგ ოსი. სოფლის სათავე გუდან-ჭორმეშა-ვიდან ჩამოსულებს დაუჭერავის“... (10,54). ჩარგალში მართლაც სხვადასხვა გვარის ხალხი ცხოვრობს (გოგოჭურთა მამიშვილობების გარდა), ვინც თავს შორეული ტომებიდან მოსულებად თვლიან. ეს თქვა ერთხელ ჩემთან საუბრისას ვაჟას ქალიშვილმა გულქანმაც. ცული ვილაცას მოეპარა და ძალიან გაბრაზებული დამხვდა. მე რომ გაკვირვება გამოვხატე, ცული ვინლა მოგპარა, ეს როგორ ჩაიღინესო? „ესენი? – კითხვა შემომიბრუნა, – ამათ გაუკეთო აღარაფერია! შენ ესენ ფშაველებ ხვარა გგონიან? საცა ვინ მაიმუნ გამააგდეს, ყველა ჩარგალს არი შამოყრილი!“

აი ეს სხვადასხვა თემ-ტომის ხალხი გაფშავლდა, ისევე როგორც გაფშავლდა გოგოჭურთა თემის ხალხი, ფშავში ასე ბევრია გაფშავლებული. იშვიათია გვარი თავის წინაპრებს ხევსურეთიდან, ქისტეთიდან, დაღესტნიდან და საიდან აღარ მოსულებად არა თვლიდნენ. დღეს ველარავინ იტყვის მათზე რომ ისინი ფშავლები არ არიან*.

*პირველი წიგნის გამოსვლის შემდეგ ზოგიერთი „ფშაველი ინტელიგენტისაგან“ წამოვიდა ცილისწამება, თითქოს მე ვცდილობდე ვაჟას გახევსურებას. არადა, მე იმაზე მეტი არაფერი მითქვამს, რასაც ვაჟას მამა და თვით ვაჟა ამბობენ, დოკუმენტებშია შემონახული და ხალხი გადმოგვცემს.

იშვიათია ქართველი მწერალი, გამოჩენილი ადამიანი, ვი-

სი წარმომავლობაც სხვა კუთხეს, ან სულაც სხვა ქვეყანას არ უკავშირდებოდეს. მაგალითად, გამოჩენილი ქართველი მწერლისა და უბრწყინვალესი ქართველი თავადის (იმ დროისთვის უპირველესი ქართველის) ალექსანდრე ჭავჭავაძის ბიოგრაფიაში, ქართული ლიტერატურის ისტორიის აკადემიური გამოცემის III ტომში, აკ. კენჭოშვილი წერს: „გადმოცემით, ჭავჭავაძეთა შორეული წინაპრები ხევსურეთიდან კახეთში ჩამოსახლებული გლეხები ყოფილან“. უნახავს ვინმეს „ცისკარში“ გამოქვეყნებული სტატია რომელიმე კახელისა, აკ. კენჭოშვილს ალ. ჭავჭავაძის გახევსურება უნდაო?

საბედნიეროდ, ჩემი წიგნით კმაყოფილი უფრო ბევრი აღმოჩნდა თვით იმავე ფშაველთა შორისაც. განსაკუთრებით ძვირფასი იყო ჩემთვის ბაჩანას შვილის (ვაჟა-ფშაველას ძმის შვილის), გიგლა რაზიკაშვილის მიერ თავისთან, შინ მიწვევა: ის ბოლო წლებში თბილისში იყო თავის გათხოვილ ქალიშვილთან, ლამარასთან. ასევე გულში ჩამწვდომი იყო ჩემთვის ვაჟა-ფშაველას ნამდვილი შვილიშვილების მადლიერებით სავსე, ცრემლიანი გამოსხმარება გორიდან.*

ასეა ვაჟა-ფშაველაც. ის უკვე, შეიძლება ითქვას, ძირძველი ფშაველი იყო და აკი ამიტომაც წერდა: „ასეა, ბატონებო, თუ ვისმე გეპრიანებათ ჩემი ვინაობის გაგება და გაცნობა, არ დავიზარებ, მოგახსენებთ: მე ვარ წმინდა ფშაველი ჩამომავლობით, როგორც დედით, ისე მამით“.

შეიცვალა ზოგიერთი რამ სულა-კურდღელას ჩამომავლების ცხოვრებაში, მაგრამ უცვლელი დარჩა მათში სულიერი და ფიზიკური სიძლიერე, ცხელი სისხლი, სიამაყე და ჭკუა-გონება.

როგორც უკვე ვთქვით, ვაჟაკაცობითა და გონიერებით ყოფილა განთქმული ქუმისის ვაჟი იმედა, რომელსაც მამა „მამის იმედსაც“ ეძახდა თურმე მოფერებით. იმედა მარტო მამის კი არა, მთელი ფშავის ხევის იმედი ყოფილა. ის შიშის ზარს სცემდა თურმე მოთარეშე ლეკებს, ქისტებს. მთებზე თეთრი ცხენით მქროლავი ხან სად გაიეღვებდა და ხან სად, ღრუბლებში მავალ მთვარესავით. ფშაველნი, მისი თვალის მკიდენი, წმინდა გიორგისავით ლოცულობდნენ მის სახელზე, ლეკებს კი თავზარი ეცემოდათო.

იმედა რომ მართლაც თემ-სოფლის საყვარელი ვაჟკაცი,

ჭკვასაკითხავი კაცი და იმედია დამცველი ყოფილა, კარგად ჩანს ლექსიდან:

**„იმედო რაზიკაშვილო, ღმერთმა გაცხონოს მკვდარია!
რად დაგვაობლენ სოფელნი, თავზე რად დაგვცენ ცანია?
ვინლა მაუფლის სოფელსა, ვისლა აქვ იმის თავია?
ვილას შავარტყათ წელზედა შენი ნარტყამი ხმალია?
გაგვილალდება დუშმანი, და უფრო დაღესტანია,**

**წამოვლენ სამეკობროდა, უნდა გადმოვლონ მთანია,
ბევრსა აქვ სისხლი საძებნი, უნდა იყარონ ჯავრია,
ბევრი გამოხრეს ყორნებმა შენგან მოკლული მკვდარია;
ბევრ მონადირე შახდება, სადაც შენ ნაომარია,
შანდობით მოგიხსენებენ: „სულით იალიმც არია!“
ლიამც დაგხვდება, იმედო, დიდი სამოთხის კარია,
ბევრის ტყვის დედას შააშრე ცრემლით ნაბანი თვალია,
სოფელი დაგვინამუსე, არ მააყივლე გვარია!“**

გვარის „მამყივლენი“ არც იმედას შვილები ყოფილან. მისი ერთ-ერთი შვილი, ბერო, არანაკლები ვაჟკაცი დამდგარა: სოფლის დაბრწყვებას თუ ვინმე შეეცდებოდა, ან მამულს თუ ვინმეს შეეცილებოდნენ, ან – ცოლს, ყველას თურმე ესარჩლებოდა და ყველგან თავისი გაჰქონდა. ამიტომ სოფელში, თემში ძალიან ჰყვარებიათ.

ამაყი ყოფილა ბერო, თავმოყვარე. უკანაფშაველი ფილაშვილისათვის მარჯვენა მხოლოდ იმისთვის წაუცლია ხანჯლით, რომ ბეროს ცოლს ფაფანაგზე წაჰპოტინებია.

ბეროს ჩამომავლები, ვაჟას პაპა და პაპის ძმანიც, გამორჩეულად ძლიერნი ყოფილან. პავლე რაზიკაშვილი თავის მოგონებაში წერს: „ჩემი მამა-ბიძებიც ვაჟკაცები იყვნენ ღონითაც და გულადობითაც. მარტო ჩარგალში კი არა, მთელ ფშავის ხევში კაცი ხელს ვერ შეუქცევდა, მაგრამ თავის სოფელში ამაცობა სათაკილოდ მიაჩნდათ. წინაპირველად მიზეზს არავის მისცემდნენ ჩხუბისას და, თუ ვინმე ძალით წაეკიდებოდა, თავს არავის გაუყადრებდნენ. თვითონ ჩვენ, უნცროსებს, გვარიგებდნენ: ვაჟკაცობას ორის ხელით ქერა უნდაო. ვაჟკაცს სანამ არ გაუჭირდება, თავი არ უნდა გამოაჩინოსო და, თუ შეუძლიან, როცა დრო

მოითხოვს, მაშინ დაიცდებო...

ოჯახში ესეთი წესი და რიგი ჰქონდათ. მართალია, მამაჩემი მეცხვარე იყო, ცხვრის შემოსავლით ოჯახს ესარჩლებოდა. ჩემი ბიძები შინაკაცები იყვნენ – ხნავდნენ, თესავდნენ. მართალია, მამაჩემი უფროსი იყო, ძმები იმას ეკითხებოდნენ, მაგრამ მამაჩემიც ძმების უკითხავს და უნებულს თავიანს საქმეს არაფერს დაიჭერდა. როდესაც ისეთი რაიმე სამძიმო საქმე გაუჩნდებოდა ან საოჯახო, ან სამტრო და ან სამოკეთეო, ყველანი ერთად თავს მოიყრიდნენ, დედასაც თავისთან დაისომდნენ, ჯერ დედას ეკითხებოდნენ, მერე ერთმანეთსა და ერთის პირით რაღაცას დააწყობდნენ, ყველანი იმაზე დადგებოდნენ და უფრო კი დედის რჩევას ასრულებდნენ“.

მთაში მაშინ განუყოფელი ოჯახები იყო. ძმების გაყრა სირცხვილად ითვლებოდა. ზოგ ოჯახში მთელი ჩამომავლობა ცხოვრობდა – შვილები, შვილიშვილები – თხუთმეტი, ოცი სული და მეტიც. დიდ მიწურ სახლში, სანახევროდ ბნელსა და გამომჭვარტლულში, კედელ-ყურეს ჩარიგებული თითო ტახტი ედგა თითო ოჯახს, ტახტის ქვეშ შეყრილი იყო ტარ-ხოკერი და წვრილმანი ხარახურა. კერის თავში, შუაცეცხლის ზემოთ, მამაკაცები სხდებოდნენ – სამამაცო იყო, შუაცეცხლის ქვემოთ, კერის ბოლოში სადიაცო იყო – ქალ-დიაცები და ბავშვები სხდებოდნენ.

რაზიკათ ოჯახიც გაუყოფელი ყოფილა, მრავალრიცხოვანი, ცნობილი თავის სიკეთითა და სიტკბოებით, ერთურთის დიდი სიყვარულით. ძმებს, რძლებს დიდი პატივისცემა და სიყვარული ჰქონიათ ერთურთისა, დიდი ნდობა. ყველანი თავდაუზოგავად შრომობდნენ, საქმეს ინანილებდნენ და შემოსავალიც საერთო იყო – ერთად ჭამდნენ და ერთად ხარჯავდნენ. განანილებით მხოლოდ მატყლს ინანილებდნენ ქალები. ჯერ დედას მისცემდნენ, რამდენსაც ინებებდა, მერე რძლები გაინანილებდნენ, რადგან ქმარ-შვილისათვის ტანსაცმლის ქსოვა და შეკერვა პირადად ცოლის საქმე იყო. დანარჩენ საოჯახო საქმეს დედა განაგებდა, რძლებს კი თანაშემწეებად თითო წლობით იყენებდა მორიგეობით. რძლები ვალდებულნი იყვნენ უხმოდ დამორჩილებოდნენ დიასახლისს, თორემ, თუ ქმრები გაუგებდნენ, არ აპატიებდნენ.

მშობლები

არც ვაჟა-ფშაველას მამა პავლე ყოფილა გვარ-ჩამომავლობის მომცივნებელი. ყოველმხრივ ღირსეული მემკვიდრე იყო თავის სახელოვანი, ჯიშინი წინაპრებისა. ბავშვობიდანვე გამოამჟღავნა ხასიათის სიმტკიცე, გაუტეხლობა. ამის შესახებ თავით პავლეს მიერ დაწერილი, დაუმთავრებელი ბიოგრაფიული მონათხრობიდან ვიგებთ.

„ერთხელ, ერთის ჩვენის მეზობლის სახლში შევიგულე თხილით სავსე ტომარა. რადგან სახლი თავდანებებული იყო და კარებს კლიტე არ ედო, მეც მივეჩვიე, იქვე დავუჯდებოდი და, რაც მინდოდა ვამტვრევდი და რაც ჯიბეში ჩამივიდოდა, ჩავიყრიდი. რასაკვირველია, ეს ამბავი პატრონს შეუნიშნავ, იქვე სახლში დამალულა. მე ჩვეულებისამებრ მივედი და ისევ ტომარას მაუარე, მაუჯექ გვერდით. როდესაც გული დავიღინჯე, ცეცხლი შევანთე. მციოდა, შემოდგომა იყო. ბოჩოლებს თავი დავანებე, ცეცხლთან თობა დავინყე და თხილსაც მტვრევა დავუნყე. მანამდე კაცი ზედ არ დამეცა, ვერაფერი გავიგე. არა, ახლა წარმოიდგინეთ, რა სიამოვნებით გამამიყვანდა კარში. ახლა იქაც დაინახა, ხბუებს ძნა დაეშალა, ახლა იმაზედ გამიმეორა და როდესაც გული მაიჯერა, თავი დამანება, მარამ მე კი ისეთ დაბეჟვილი ვიყავი, რო ერთ კვირას ველარ მოვსულიერდი. უბედურება ის იყო, იმას ხომ არ დამაჯერეს, ახლა ცოლი შემხვდა, იმანა მცემა. ზევიდან რო დამანვა, ძუძუები დაუჭირე, იმან კივილი შექმნა. ახლა დედამთილი. მტერს დაადგეს ის დღე რაც მე დღე დამაყენეს. როცა გული მაიჯერეს, მიმკვდარებული დამაგდეს, მაგრამ ამით რომ არ გათავდა ეს უბედურება! ახლა მაზლი შემხვდა, ახლა იმან უარესი დღე დამაყენა. მერე ვიფიქრე, ესლა სხვები, ვინც სახლში კაცი და დედაკაცია, ალბად ისე თუ აქვთ პირობა, რო ყველათვე უნდა მცემონ. ამისი წამალი ეს მოვიგონე: ავდექი, ერთხელ, როდესაც შინ არავინ იყო, სახლს ცეცხლი წაუკიდე და გადავბუგე. გახდა დიდი დავიდარაბა, მამაჩემმა თოფით დამდია მოსაკლავადა, თუ ტყეში არ დავმალულიყავ, მანამდე მორიგდებოდენ და დამშვიდდებოდენ“. (46,20)

ამისთანა ოინებს სხვებსაც იგონებს ვაჟას მამა. ამ მოგონე-

ბებიდან კარგად ჩანს რაზიკანთ ხასიათი. ეს ხასიათი ჭაბუკობაში კიდევ უფრო მეტად გამომჟღავნდა.

... პავლესთვის ცხერის მოვლა-პატრონობა მიუნდვიათ თავის უფროს ძმა ბეროსთან ერთად. მეცხვარეობა კი, გარდა იმისა, რომ ძნელი საქმეა, ხიფათებითა და ფათერაკებით არის სავსე. განსაკუთრებით მაშინ, ყოველ ფეხის ნაბიჯზე ქურდი და ყაჩალი იყო ჩასაფრებული. ჩვეულებრივი ამბავი იყო მწყემსების დახოცვა და ცხერის გარეკვა, გატაცება. ჩანს ასეთი ბევრი შემთხვევა ჰქონიათ. ამიტომაც ამბობს პავლე, ყველას მოყოლის დრო არა მაქვს, ერთ ამბავს გავიხსენებ, რის შემდეგაც მეცხვარეობას თავი მიმანებებინესო.

იმ ზამთარს იორზე ჩარეკეს ცხვარი გამოსაზამთრებლად, თავად ჩერქეზიშვილის ადგილში. ერთ დღესაც თავადის მწყემსები, ოთხი-ხუთი კაცი, ქინძის საკრეფად წამოსულნი, ცხვარში შეცვივნენ და მოტაცება დაუპირეს. პავლეს ძახილს ყურიც არ ათხოვეს, პირიქით, შემოუტიეს კიდევ – იფიქრეს ხუთ კაცს ერთი ფშაველი ბაღლი რას გაგვიხდებო. ველარ მოითმინა პავლემ, მიეჭრა და ერთერთ მათგანს დაეტაკა. „მე ხელზედ ზალტის საცერული მედვა და გაუსვი ფშაურათ, სარმა და კისრული დაავინყდა, ცხვირიდან სისხლი დახეთქა. ეს რო ამხანაგებმა დაინახეს, ყველანი ჯოხებით ერთპირად მომესივნენ და დამიშინეს ზოგმა ფეხებში და ზოგმა თავში და ზოგმა ბეჭებში“. ძალიან რომ გაუჭირდა პავლეს, ხანჯალი იშიშვლა და დაიფრინა.

სალამოს, როცა ცხვარი ბინაზე მირეკა, ძმამ და ნამგალებმა გალანძღეს – ყველა შენ რატომ გეჩხუბებო. შენი მოუთმენელი ხასიათის გამო ჩვენც ხათაბალაში გვყრი. ისინი ალბად ჩერქეზიშვილის მწყემსები იქნებოდნენ და არ შეგვარჩენსო.

„მართლაც, როდესაც შეუტყვია ჩერქეზიშვილს ეს ამბავი, მეოთხე-მეხუთე დღეს შემჯდარა ცხენზედ, წინ ის გამაუმძღვარებია, რომელსაც ძალიან ვცემე. ვნახოთ, სადაც ცხვარი მყვანდა, ზედ მომატანა. შორითვე დაიყვინა: „შე მამაძალლო, როგორ გაბედე ჩემი ყმის ცემა. ესლა შენის მიზეზით საქონი ნადირს დაუღუპნია, რადგანაც ნაცემობით მწყემსი სამი-ოთხი დღე შინა გდებულა, ახლა ის ზარალი თქვენ უნდა მამცეთო!“

უბრძანა ბიჭს: ცხვარი გადასხლიტეო! ბიჭი ცხვარს მიესია და დაუნყო სხლეტა. მე თოფი მხრიდან მოიხადე და დაუძახე:

– თუ სიცოცხლე არ მოგწყინდათ, თავი დაანებეთო, იცოდეთ, თოფი შნოსათვის არ დამაქვსო. მე მაქვ იმისთვის, ვინც ძალით მოინდომებს წართმევას ან მოპარვას. მართალია დღეს შენს მამულში ვარ, მაგრამ დღესდღეულად ვადამდინ ჩემია, რადგანაც საბალახე მოგეცით. დალოცვილო, თავადის შვილი ხარ, დიდი ხართ, მაშ ქვავაც დიდი უნდა გქონდესთ. ჯერ ეს ერთი, რომ პირდაპირ მოდიხარ და ძალით გინდა, რისიც ყარაული ვარ და რისთვისაც წუთისოფელს ვიმნარებ, ცოლ-შვილს ვაკლივარ, დედ-მამას და ტოლსა და ამხანაგს. თქვენ გეფერებით, რასაც მთხოვთ, გაძლევთ, ხელმწიფესაც, თემსაც და სოფელსაც, სიკვდილ-სიცოცხლესაც ამითი უნდა გავუძღვე, ამათაც შენ მართმევ და, აბა, შინ რიდასთვის წავიდე ცოცხალი. გეფიცებით ღმერთსა და ჩემს დიდ სალოცავებს – თამარ დედოფალს და ლაშარის ჯვარს, უსისხლოდ არ მოგცემთ!”

თავადმა ჩერქეზიშვილმა იკადრა და მოეშვა ცხვარს, მაგრამ პავლეს უფროს ძმასთან მივიდა ბინაზე. პირველად არ ჰყავდა ბეროს ცხვარი მის ადგილში და კარგი ნაცნობობა ჰქონდათ. ბერო ხშირად ნანადირევს, ბატკნებს, ყველს უგზავნიდა ხოლმე. მივიდა თავადი და შესჩივლა: „ეგ კერპის ნაგლეჯი რა ჩამოგიყვანია, კინალამ დაგვხოცაო”. ბეროსაც შეეჩივლა, ჩემთანაც ეგეთი არის, შიშით ხმა ვერ ამომიღიაო. იმ დღესაც ერთს ცოტას საქმეზედ, ბატკნის წოვებაში, ბატკანს ფეხები დასტაცა და იმითი მცემაო. რა ვქნა, ველარც დამითხოვნია, უკაცურადა ვარ და ვერც-რა მითქომ შიშითაო. რას ვიზამთ უნდა მაპატიოთ და მაგიერს სიკეთეს გადაგიხდითო.

– ბერო ყველაფერი შეიძლება, მარტო იმ პირობით, რომ ეგ კერპი აქ აღარ წამოიყვანოთ, თორო, იცოდე ან შააკვდება ვისმე და ან მოჰკლავს ვისმე.

– ო, ბატონო, მეც აგრე ვფიქრობ”.

ბერომ და ბეროს ამხანაგებმა იმ საღამოს კიდევ უარესად გალანძლეს პავლე, მაგრამ ის არც მაშინ გატეხილა: აბა, მაშ რალას ნიშნავს ცხვარს კარგად მოუარეო რომ მეუბნებით, თუკი ვისაც რამდენი მოუნდება, იმდენი გავატანეო.

მიუხედავად ასეთი შეუპოვრობისა, თავისი მამა-პაპების მცნების თანახმად, პავლე თავისიანებთან, სოფელში, ძალიან მომთმენი იყო. იმის ჩხუბსა და აყალმაყალს ვერავინ გაიგო-

ნებდა. ამიტომ იყო, რომ თავის სოფელს, მეზობელს რასაც მოუთმენდა, სხვას არ შეარჩენდა. მკლავიც უჭრიდა და ჭკუაც, მაგრამ რა როგორ მოეხმარა, არ იცოდა – ასპარეზი არა ჰქონდა.

მეორე წელს, მართლაც, ცხვარში აღარ წაუყვანია ბეროს – უბედურებას შემამთხვევს, შინ იყოს და ხვნა-თესვაში მოგეხმაროთო.

პავლეს გარჯა არ ეზარებოდა, მაგრამ ვერ აკმაყოფილებდა ერთფეროვანი გლეხური შრომა, არსებობისთვის ზრუნვა და შუაცეცხლით აკვამლებულ, მინურ სახლში ჯდომა. უნდოდა, როგორმე უკეთესად, საინტერესოდ აენყო თავის ცხოვრება, მაგრამ როგორ, არ იცოდა. ამის გამო სულ დაფიქრებულ-დაღონებული დადიოდა.

მონყენილობამ უფრო მეტად დარია ხელი, როცა დაზამთრდა და ცხვარსა და ველს მიჩვეული ახალგაზრდა კაცი სხვებთან ერთად თავგვივით შეემწყვდია ნახევრად ბნელ მინურში. ამ დროს საქმე იმდენი აღარაფერია მთაში. საქონელს თივას ქალებიც იოლად უყრიან, კაცები კი ურთიერთთან მიდი-მოდიან საფიხვნოდა და სახინკლაოდ. მაგრამ გრძელ ზამთარში ესეც მოსაბეზრებელია.

მეზობლად ბიძაშვილი ცხოვრობდა და პავლე ხშირად იმასთან დაიარებოდა, რადგან ისიც მონყენილობით იტანჯებოდა. მას კოლოფში რაღაც წერილები ჰქონდა და ასეთ დროს იმათ ამოქექავდა და კითხულობდა ხოლმე. უკითხავდა პავლესაც. წერა-კითხვის სწავლებაც დაუწყო. პავლეს სწავლის დაუოკებელი სურვილი გაუჩინა, მაგრამ არც საწერ-კალამი იშოვებოდა და არც წიგნები. სიპებზე და ხარის ბეჭზე წერდნენ ნახშირით. პავლემ თითქოს მიაგნო თავის წადილს, მაგრამ მისი შესრულება ძნელი საქმე იყო.

ერთხელაც ცხვრის ტყავების შესასყიდად წავიდა მღვდელთან: თავისთვისა და მეუღლისათვის უნდოდა ქურქების შეკერვა. მღვდლებს საკლავების დაკვლის დროს თითო მხარი და ტყავი ეკუთნოდათ და ამიტომ ბევრი უგროვდებოდათ. მაღაროსკარში, მაშინ ფშავის ცენტრში, იდგა ერთადერთი ეკლესია. პავლეს მანამდე სულ რამდენჯერმე ჰყავდა მღვდელი ნანახი; ისიც კი არ იცოდა როგორ მისალმებოდა. იცოდა მხოლოდ, რომ

მღვდლისთვის „გამარჯობის“ თქმა არ შეიძლებოდა – მკვდრების სიმრავლე იცისო.

პავლე ძალზე მოხიზლა მღვდლის სუფთად მონყობილმა, კედლებშელესილმა სახლმა, მღვდლისა და მისი ოჯახის წევრების თავაზიანმა ურთიერთობამ. ამის გამო კიდევ უფრო მეტად მოუნდა ცოდნის შეძენა და ისეთივე კულტურული ცხოვრება.

პავლემ იმ წელს ტყავების შესაძენად ცალკე დაამზადა „თივა“, მღვდელს „თივებზე“ მოურიგდა და ერთი „თივაც“ უფეშქაშა. ნასიამოვნებმა მღვდელმა შინ შეიპატიჟა კარგი ახალგაზრდა და ცოლ-შვილს გააცნო – ჩემი ნათლული არისო. მერე, რაკი პავლეს წერა-კითხვით დაინტერესება გაიგო, მეფის მანიფესტები და რალაც ხელნაწერები მისცა. იმ დღიდან პავლესთვის ყველაზე საინტერესო და საყვარელი რამ ამ ხელნაწერების კითხვა გახდა, ძილი აღარა ჰქონდა და სიმშვიდე. ოჯახში კი არ მოსწონდათ პავლეს ასეთი „ემმაკთად ჩახედვა“, საქმეს მოცდენა. პავლეს მამამ, გვიმ, რომ შეიტყო მისი შვილი საქმეზე კი არ ფიქრობდა, რალაც ქალაქებს ჩასცქეროდა, ახლა ამის გამო წამოავლო თოფს ხელი. მოსაკლავად გაიმეტა „თემგვარის მომყივლე“ შვილი. მთიელთა შეხედულებით, წიგნი კაცს ვერ აცხოვრებსო, საქმეს მოაცდენსო, ვერც ვაჟკაცობას იზამსო, დადედაჭუავდებაო. ვაჟიშვილისაგან კი ყველა სავაჟკაცო საქმეს მოელოდა, ვაჟკაცად გაზრდა უნდოდათ. წიგნის „ჩამხედვარე“ კაცს დასცინოდნენ. ამიტომ იყო, რომ შემდეგაც კარგა დიდხანს მთიელნი სკოლაში არ უშვებდნენ ბავშვებს. ვაჟსა თუ ქალს ოჯახზე უნდა ეფიქრა, ოჯახის საქმე ეკეთებინა, რადგან საქმეს ვერ აუდიოდნენ, ჯაფა დიდი ჰქონდათ და, მართლაც, ვის ეცალა წიგნისთვის, ანდა მუქთამჭამლებს ვინ შეინახავდა.

პავლეს მოკვლით დამუქრებამაც ვერ შეუცვალა გუნება. ნამდვილი წიგნის შოვნა და მისი წაკითხვა ენატრებოდა. მიუხედავად ოჯახის ასეთი წინააღმდეგობისა, უფრო მოუხშირა მღვდელთან სიარულს, მაგრამ იმას თვითონ „ჟამნისა“ და „დავითნის“ მეტი არაფერი ჰქონდა, პავლესათვის რა უნდა მიეცა.

მღვდელს დედა ჰყავდა საღმრთო წერილის კარგი მცოდნე. იმან რაკი შეატყო ახალგაზრდას სწავლის წყურვილი, ნიჭი, ძალიან შეიყვარა. მოისვამდა გვერდით და წაკითხულს უხსნიდა. მაშინ გაიგო პავლემ, რომ მღვდლის მოვალეობა ღვთის მსახურ-

რება ყოფილა და საღმრთო წიგნებს უფრო გულისყურით მოეკიდა. მანამდე მასაც, ისევე, როგორც ყველა მთიელს, სხვაგვარი შეხედულება ჰქონდა მღვდელზე. მთიელებს ნამდვილ ღვთის მსახურებად მხოლოდ ხევისბერები მიაჩნდათ. მღვდლებს კი უცქერდნენ, როგორც მეფისა და მთავრობის მორჩილების მქადაგებლებს, ჯაშუშებს, ცხოვრებას დახარბებულ, მსუნაგ, გაიძვერა, ხალხის მყვლეფავ არაადამიანებს. სამწუხაროდ, ხშირ შემთხვევაში ეს, მართლაც, ასე იყო და სახელის გატეხაც აქედან მოდიოდა, თორემ ვინ არ იცის, რომ სამღვდელოებამ დიდი როლი შეასრულა ქართველი ხალხის გადარჩენის საქმეში. ქრისტიანობამ, ქრისტეს რჯულის მტკიცე რწმენამ და მისმა მტკიცედ დამცველმა ეკლესიამ შემოგვინახა ქართველობა. მათი თავგანწირვის ფასად ბევრჯერ გადაურჩა საქართველო მოთხრასა და განადგურებას. სასულიერო პირები იყვნენ იაკობ ხუცესიცა და გრიგოლ ხანძთელიც, არსენ იყალთოელიცა და იოანე პეტრიწიც, მღვდელი იყო თევდორე და მრავალნი სხვანი, ვინც ფუტკრებივით თავდაუზოგავად შრომობდნენ, იღწვოდნენ, ქმნიდნენ და ეწირებოდნენ.

ეს არ იცოდნენ მთაში. ქრისტეს რჯულს იქაც ფიცავდნენ, მფარველობას ეხვეწებოდნენ „საქრისტიანოს გამჩენს“, მაგრამ ხევისბრის პირით და არა მღვდლის; ქრისტიან-ურჯულოთ სალოცავი ლაშარი იყო და იახსარი, მათი ნება-სურვილის მქადაგებელნი კი დასტურ ხევისბრები და ქადაგნი იყვნენ.

და, აი, პავლემ მთიელთა შეხედულების საწინააღმდეგოდ და თავისდა გასაოცრად, აღმოაჩინა, რომ მღვდელიც ღვთის მსახური ყოფილა.

მართლაც, პავლეს, თავისი მტკიცე ნებისყოფის წყალობით, საკმაოდ კარგი თვითგანათლება მიუღია. კარგად სცოდნია ქართველ კლასიკოსთა შემოქმედება. თვითონაც კარგი მოლექსე ყოფილა, ცოტ-ცოტა რალაცას წერდა კიდევ. ისედაც ჭკუაგონებიან კაცს ამ განათლების წყალობით უფრო მეტი ავტორიტეტი მოუპოვებია. ისა ყოფილა ფშავ-ხევსურეთში დიდი თუ პატარა საქმეების გარჩევის დროს ერთ-ერთი მთავარი სიტყვის მთქმელი სისხლ-მესისხლეობით დაწყებული – მეზობლურ კინკლაობამდე. ამ ავტორიტეტის, ამ ჭკუა-გონებისა და განათლების შედეგი იყო ის, რომ პავლე რაზიკაშვილი ბოლოს და ბოლოს

ჩარგალში გაამწესეს მღვდლად. მანამდე კი ჯერ ხევსურეთში მღვდლობდა, შემდეგ მთავარ დიაკვნად იყო სოფ. მაღაროსკარში.

პავლეს კარგი ცხოვრების მოწყობაზე მაინცადამაინც არ უზრუნია, ზოგიერთი მღვდელივით ნამუსზე ხელი არ აუღია, მეზობლების ყველფა არ დაუნყია. მაღალი ზნეობისა და შეგნების კაცად დარჩა. იყო ნამდვილი მღვდელი, ნამდვილი მოძღვარი თავის მრევლისა, გულიანად შემსრულებელი თავის მოვალეობისა, იმდენი კი შეძლო, რომ სოფლის დახმარებით ახალი სახლი აიშენა, კრამიტით გადახურა, რაც იშვიათი იყო ფშავში, მაგრამ სახლი უფანჯრო იყო და იატაკიც მიწისა ჰქონდა. ამ სახლს ერთი ფანჯარა დიდი ხნის შემდეგ ვაჟა-ფშაველამ ჩაუსვა: თბილისში გააკეთებინა თურმე და დაშლილი მოიტანა ხურჯინით.

პავლეს კარგკაცობის შესახებ ჩარგლელი მჭედელა ბუკუკიშვილი იგონებს: „ჩვენებს და ვაჟას მამას სამ წელს გვება ერთად გუთანი. პავლე მღვდელმა ძალიან კარგი გუთნის გამართვა იცოდა.

პავლესთანა ნამუსიანი და ხალხის დამრიგებელი ფშაველი მე არ მახსოვს. ხშირად გვარიგებდა: კაცი უნდა იყო გამრჯე მუშა, წესიერი, ცუდი ენა არ უნდა მიიტანო სხვასთან, შფოთი არ უნდა ასტეხო, არ უნდა იქურდო, არ უნდა იყო მეზობელთან ავი.

შვილებს სულ იმას არიგებდა: ისწავლეთ, თქვენი გულისთვის ვინვი და ვიდაგები, ტანზე ტანისამოსი ვერ ჩამიცვამს, შვილებს არაფერი დამიკლდეს, უსწავლელები არ დამრჩეს და მერე ქვეყანამ არ დამგმოსო”. (37,110).

პავლე მღვდელი თანდათან მოლონიერდა ეკონომიკურად. ამას ხალხის ყველფით კი არა, სხვა გზებით ახერხებდა. მაგალითად, მიგრიულთის ძირს, მჭავენწყალთან (ეხლანდელ ვაჟას წყალთან, არაგვს გაღმა, იმდროინდელ ფშავ-ხევსურეთის გზაზე – გზა მაშინ არაგვის მარჯვენა მხარეს მიუყვებოდა, მზის პირის მხარეს), დუქანი გაუხსნია და ვილაცა სომეხი ვართანა ჩაუყენებია დახლიდრად. კახეთში, ართანასა და ახმეტას, ვენახები უყიდია და მეზვრე ჰყოლია დაყენებული. მაგრამ აქედან

ზედმეტი ჯახირის მეტი არაფერი რჩებოდა. იმდენიც კი ვერ მოიქონია, რომ გამორჩევით საყვარელი შვილისათვის – ვაჟასათვის უმაღლესი დაემთავრებინა.

პავლე თავის ვაჟკაცობითა და ზნეობით, „სამამაცო“ საქმეებით მთელი ცხოვრება „მაგარ“ კაცად ითვლებოდა.

„მე მახსოვს, – გადმოგვცემს მინა რაზიკაშვილი, – ერთი შემთხვევა. ჩვენს მეზობელს საღმთო ჰქონდა. მასპინძელმა სტუმრებისთვის დიდი ჭედილა დაკლა, სუფრაზე მამასთან ვაჟაც იყო. ის ახალგაზრდებში იჯდა. ახალგაზრდებმა ერთმანეთში ჭედილის ძვალი (ქაჯია) ჩამოატარეს, მაგრამ ვერავინ გატეხა. ვაჟაც ბევრს ეწვალა, მაგრამ არაფერი გამოუვიდა. მამა ვაჟას თვალყურს ადევნებდა. როდესაც ვაჟამ ძვალი ვერ გადატეხა, მამამ გადასძახა: „მომეცი აქაო!“ მამა იმ დროს სამოც წელზე მეტისა იქნებოდა (აზვიადებს. ვაჟას მამა 59 წლისა გარდაიცვალა – გ. ხ.). ამოიღო ჯიბიდან წითელი ხელსახოცი, დაახვია ძვალს, გადასწია და გადატეხა. ნამტვრევები ვაჟას გადაუყარა და უთხრა: „ჯერ მოზვრები ხართ, ხართან ვერ გასწევთო!“ ვაჟას ძალიან გაუხარდა მამის გამარჯვება, წამოხტა და გადაკოცნა. მამამ აუხსნა ვაჟას და იმის ამხანაგებს, ძვალი როგორ უნდა დაეჭირათ, რადგანაც ღონესთან ერთად ცოტაოდენი ხერხიც სჭირდებაო”.

და, აი, ამ ძლიერმა, ჯან-ღონით სავსე კაცმა თავისი სათნო მეუღლის გარდაცვალების შემდეგ ერთი თვეც ვეღარ იცოცხლა. ცხელება შეეყარაო! ცხელება კი არა, საყვარელი მეუღლის უდროო სიკვდილმა მძიმედ იმოქმედა ოჯახზე უზომოდ შეყვარებულ პავლეზე და 1890 წლის 22 ოქტომბერს გარდაიცვალა 59 წლის ასაკში.

დედა ვაჟა-ფშაველასი, გულქან (ბაბაღე) ფხიკლეშვილი, უკანაფშაველი ქალი იყო, გაბიდლოურთა თემიდან. მასში მეტისმეტად ყოფილა გამჭვლავებული ფშაველი ქალისთვის დამახასიათებელი სიმშვიდე, სათნოება, პოეტური სული და ყველასი და ყველაფრის სიბრალოლი და სიყვარული. სულზე არანაკლებ ლამაზი ჰქონია გარეგნობა – ძალზე ლამაზი ყოფილა. წერა-კითხვა არ სცოდნია, მაგრამ სხვა მთიელი ქალებივით მასაც უზომოდ ჰყვარებია პოეზია, ლექსობა. სცოდნია უამრავი ხალხური ლექსი, კაფია, ლეგენდა-გადმოცემა, ზღაპარი, რასაც დიდი

გრძნობით უამბობდა შვილებს. თედო რაზიკაშვილი იგონებს: „უბრალო რამე ამბავს ისეთი ამბით, ისეთი ფერადებით შეზავებულს გადმოგცემდა, რომ იხილებოდა მსმენელი... იცოდა აუარებელი ლექსი და ზღაპარი, ცალკე კაცთა და ქალთა ცხოვრება, ლეგენდები და ამბები ჩვენს მეფეებზე, უფრო თამარზე და ერეკლეზე. როცა გვიამბობდა რაიმე სამწუხარო ამბავს, თან სტიროდა ხოლმე... იყო ბუნებით პოეტი, საშინელი მშვიდობის მოყვარე და უკიდურესობამდე გულკეთილი და უხვი, მოუღალავი მშრომელი და მოყვარული“.

ცნობილია, რომ ფშაველ-ხევსურნი განსაკუთრებით მოყვარულნი არიან პოეზიისა, არიან მოლექსე-მოკაფიავენი, გრძელი ლექსების „მათქომნი“ თუ „გამომთქმელნი“, მაგრამ ამ მხრივ განსაკუთრებით ზოგიერთი ჩამომავლობაა გამორჩეული, ცნობილი. იმ გამორჩეულთა რიგში ყოფილან გულქანის მამა-ბიძანი. მისი ბიძა, პარასკევა გაბიდოური, ერთ-ერთი განთქმული მოლექსე ყოფილა ფშავეში, ერთ-ერთი „გაუტეხელი“. ვაჟა მის შესახებ წერს: „მან შექმნა სატირული ლექსები და დღესაც ყველა ფშაველი იმის ჰანგზე „ლექსობს“. საუბედუროდ, წერა-კითხვა სრულიად არ სცოდნია, რომ ქალაქის საშუალებით შენახულიყო მისი ნაწარმოებები, თუმცა მისი ნაწარმოებები დღესაც ცოცხლობს, იმათ დღესაც მღერის ხალხი, ეს ლექსები ღრმა იუმორით არიან სავსენი“.

გულქანსაც მათგან მოსდევდა უფაქიზესი პოეტური სული. საოცრად ღვთისნიერი ყოფილა, გულკეთილი, შემბრალებელი. განსაკუთრებით ებრალებოდა ღარიბ-ღატაკნი, მშვიდნი. კარზე მომდგარს ლამის თან გადაჰყოლოდა, არაფერს დაიშურებდა, სასმელს თუ საჭმელს, მიუხედავად იმისა, რომ თავადაც ბევრი არაფერი ებადა. ვინც გინდა მგ ზავრს აველ-ჩაველო, პურუჭმელს არ გაუშვებდა.

ვაჟას კარის მეზობელი მარიამ ბაჩიაშვილი გვიამბობს ვაჟას ნალაპარაკებს თავის მშობლებზე: „მამაჩემი დედას ბუზურას ეძახდა. ერთი უყურეთ, უყურეთ ამ ბუზურას, კალთაში გამოხვეული რომ მიდის. ახუნის გორზე ჩამომავალი მგ ზავრი დაინახა, გზაში უნდა დაუხვდეს ჭიჭახეზე: დაჯე, შვილო, დაღლილი იქნები, პური გემშვევაო“.

ბუზურა ველური ფუტკარივით არის, ოღონდ ტანად ცოტა

უფრო მოზრდილია. ძალიან ტკბილი თაფლი იცის. ფუტკრებივით ისინიც სულ დაბზუიან და დაბზუიან.

სახელი ზედგამოჭრილი და, მართლაც, პოეტური შეურჩევია პავლეს თავის მეუღლისთვის.

„დედაჩემმა დალლა არ იცოდა რა იყო. – იგონებს სანდრო რაზიკაშვილი, – შინაურს საქმეს სულ ის აკეთებდა: პურის გამოცხობა, ძროხების მონველა, მათი დაბინავება, თივის დაყრა, რძის შედღვება, ქმარ-შვილისთვის ტანსაცმლის შეკერვა და მოქსოვა, სულ იმისი საქმე იყო. როდესაც ფქვილი გამოგველეოდა, საფქვავე ნისქვილშიაც კი მას მიჰქონდა. ბევრჯერ მძინარეს გათენებისას რომ გამომღვიძებია, მინახავს, დედაჩემი ბუხართან ზის და გააქვს საჩერელს წკრიალი – მატყლსა სჩერდა. ის ბევრჯერ ღამეს ისე გაათენებდა, რომ ლოგინში არც კი დანვებოდა, მეტადრე როცა მამაჩემის მოლოდინში იყო. მამაჩემი მაშინ მღვდლად იყო ხევსურეთში და იქიდან ნამოსული ზოგჯერ გათენებისას მოვიდოდა ხოლმე სახლში და გარედან შემოიძახებდა: „აბა, ვინა ხართ შინა, ოჯახიშვილებო, გამომხედეთ კარში“. დედაჩემი, აბა, ვის გააღვიძებდა, თვითონ გავიდოდა, ჩამაართმევდა ცხენს და თვითონვე დააბინავებდა, თანაც ეტყოდა ხოლმე: „კაცო, რას დახვალ ამ შუალამისას, შე ბეჩაო?! რო სადმე გადაიჩეხო მაგ კლდე-ღრეში, ხომ დაჰლუპე შენი ცოლ-შვილიო“.

გულქანი თავგადაკლულად მოყვარული ყოფილა თავის ქმარ-შვილისა. ვაჟა და მისი ძმები უკვე ვაჟკაცები იყვნენ, ცოლ-შვილიანები, მაგრამ დედა მაინც პატარა ბავშვებივით დასტრიალებდა თავს. შეხაროდა, ეამაყებოდა, ფრთები ესხმოდა მათი წარმატებებისაგან და მათი ყოველგვარი სიკეთე ცრემლს აღვრევინებდა.

სანდრო რაზიკაშვილი წერს: „ნიკომ (ბაჩანამ) გორიდან გიტარა მოიტანა, რაზედაც ის ძალიან კარგად უკრავდა და კარგად მღეროდა. როდესაც იმან ვახშამზე თავისი გიტარა ააჟღერა და ზედ სევდიანი ხმით ‘მახსოვს პირველად’ დაამღერა, დედაჩემმა თავი ვეღარ შეიკავა და მორთო ქვითინი, რამაც მეც გული ამიჩრუყა და ტირილი დავინწყე“...

გულქანის ხმამალალი სიტყვა არავის გაუგონიაო, იგონებენ. რალა თქმა უნდა, შვილების ცემაზე ხომ ზედმეტია ლაპარაკი.

მას თავისი სიკეთით, ალალობითა და სინრფელით ისეთნაირად შეეძლო ეთქვა შვილებისთვის, რომ ყოველგვარ დატუქსვასა და ცემაზე მეტად ჭრიდა.

მარიამ ბაჩიაშვილი ამასთან დაკავშირებით იგონებს: „ლუკას ხეზე ასვლისა ძალიან ეშინოდა. ვაშლის დაკრეფის დრო რომ მოატანდა, ხეზე ვერ აღიოდა, მუხლები მიკანკალებსო. მიზეზი რომ ვკითხე, ერთი ამბავი მიაბო: ბალობისას ძალიან მიყვარდა ხეზე ასვლა, სულ ერთთავად ხეებზე ვიჯექი. დედაჩემს ეშინოდა ხიდან არ ჩამოვვარდნილიყავი და დამაშინა. მითხრა, შენ თუ ხეზე ასვლას არ მოიშლი, აგერ ახუნის გორზე, სულ ზევით, მაღალი ნიფელი რომ დგას, ავალ, და იმ ნიფელზე შევხდები, სულ წვეროზე მოვექცევი, იქიდან გადმოვვარდები, დავეცემი და მოვკვდები, შენ კი უდედოდ დარჩები, დედა მოგიკვდება და რალა გეშველება ობოლსაო. დედის სიტყვებმა ისეთი გავლენა მოახდინა ჩემზე, რომ ის დღეა და ის დღე, მე ხეზე აღარ ავსულვარ. როცა ხესთან მივალ, მაშინვე დედაჩემის სიტყვები მამაგონდება და მუხლები ამიკანკალებსაო“.

ასეთ დედას, ასეთ მშობლებს უნდა დაეზარდათ კიდევაც ისეთი შვილები, როგორიც ვაჟა და მისი ძმები იყვნენ.

დაბადება

ვაჟა-ფშაველა (ლუკა რაზიკაშვილი) დაიბადა სოფ. ჩარგალში 1861 წლის 14 ივლისს. შავი თმა თვალეებზე ჰქონდა ჩამოფარებული. მნახველებს უთქვამთ, ეს თმიანობა იმის ნიშანია, დავლათიანი იქნება, სახელიანიო. ამ ნიშნით, თუ სხვა რამ გამოჩნეულობით, პავლეს თავის ექვს შვილში ეს მესამე შვილი განსაკუთრებით ჰყვარებია. ვაჟას დედამ გულქანმა იცოდა თურმე თქმა: ექვს-ექვსი შვილი ისე დავზარდე, რომ მამას ვაჟას მეტი ხელში არავინ აუყვანიაო. ჩანს, ვაჟაზე ვერ იკავებდა თავს პავლე მღვდელი, თორემ სხვა შვილების მიმართ კი გაუტარებია მთიელთა წესი: ვაჟაკი ფშავ-ხევსურეთში ბავშვს ხელში არ აიყვანდა, სირცხვილად ითვლებოდა.

ვაჟას დედა ჯერ კიდევ გასათხოვარი ყოფილა, როცა ერთი წინასწარმეტყველური სიზმარი უნახავს. ამის შესახებ ვაჟა თავის დაუმთავრებელ ავტობიოგრაფიაში „ჩემი წუთისოფელი“ წერს: – „დედაჩემის მიერ ნაამბობიდან ღრმად ჩამჭედია გულში მის მიერ ნანახი იაკობისებური ცხად-მოჩვენება, რომელსაც შემდეგ, როცა წამოვიზარდენით და მეცნიერებას ცოტაოდენად ვუსუნეთ, აღარც კი ვუჯერებდით, თუმცა დედა მაინც ჩვენს თავს ფიცულობდა დასარწმუნებლად: „ჯერ ისევ ქალი ვიყავ გასათხოვარი“, – ამბობდა დედაჩემი (ვეცდები იმის სიტყვებით გადმოგცეთ ნახული მოჩვენება) – მე და ჩემს ბიძაშვილს ქალს სხლოვანს (სოფელია ივრის ხეობაში) გარეთ დერეფანში გვეძინა. შუალამე იქნებოდა, დგანდგარი, ბირდგნიალი დადგა ისეთი, მეგონა, მთა-ბარი თუ იქცევავო. შეშინებული წამოვჯე ლოგინში, გავხედე და მთელი ცა განათებული იყო. ორი ოქროსფერი ჯაჭვი იყო წამოსული, ერთი ჭიაურის გორიდან, მეორე სხლოვანის გორითა, გადამბულეები, ზედ ცეცხლის ბალები აღიოდნენ და ჩამოდოდნენ და ისეთ მწკეპრ (წმინდა) ხმაზე გალობდნენ, ისე ტკბილად, ღმერთო, იმაზე კარგს რას გაიგონებს კაცის ყურიო.

ამ მოჩვენებასაც, რა თქმა უნდა, თავისი ძალა ჰქონდა და მაფიქრებინებდა, რომ ჩვენი დედ-მამის და მისი შვილების სვებედში განგება მონაწილეობას იღებდა“...

დედის ასეთ შთამაგონებელ „ცხადმოჩვენებას“ თუ სიზმარს არ შეიძლებოდა შვილებისთვის არ შთაენერგა რწმენა, რომ ისინი დიდი და სერიოზული საქმისთვის იყვნენ მოწოდებულინი, რალაცა განსაკუთრებული უნდა ჩაედინათ ხალხისა და ქვეყნის სასიკეთოდ. და ურწმუნებიათ კიდევ. რომ ეს ასე იყო, ამას ადასტურებს ვაჟას სიტყვები: „ამ „თმიანობამ“ თავისთავზე წარმოდგენა განმიდიდა, რალაცა არაჩვეულებრივ ადამიანად მომაჩვენა ჩემი თავი და დამისახა არაჩვეულებრივი მომავალი“.

პავლეს ნათლიად სასულიეროვე პირი, თავისი უფროსი შეურჩევია, განათლებული, კარგი კაცი, თუში. ქართველთა რწმენით ნათლულს ცალი გვერდი ნათლიისა აქვსო. არ შეიძლებოდა ამ ფაქტსაც არ ემოქმედნა ვაჟას თვითრწმუნებაზე.

საქართველოს მმარჩის სამმართველოს 1861 წლის მეტრიკულ ჩანაწერ ნიგნებში ვაჟას შესახებ წერია: „...მიმრქმელი თი-



ჩარგალი. ვაჟას სახლ-კარი

ანეთის ოკრულის ბლალოჩინი და კავალერი იოვი ცისკაროვი”. ხოლო ვაჟა-ფშაველას მეტრიკულ ამონაწერში, რომელიც მან წარადგინა თბილისის ალექსანდრეს სახელობის სამასწავლებლო ინსტიტუტთან არსებულ ორკლასიან სამოქალაქო სასწავლებელში, ვკითხულობთ: „მისი მშობლები: სოფელ ჩარგლის მცხოვრებნი, ჩარგლის წმინდა გიორგის ეკლესიის მედავითნე პავლე რაზიკოვი და მისი კანონიერი მეუღლე ბარბარე, ორივე მართლმადიდებელი სარწმუნოებისა. მიმრქმელი იყო თიანეთის მაზრის მღვდელმთავარი და კავალერი იობი ცისკარიშვილი, ხოლო საიდუმლო ნათლისღება აღასრულა ჩარგლის სამწყსოს მღვდელმა იასე გელაძემ მედავითნე ვასილ ნონკოლაურთან ერთად”.

ჩანს, ნათლობა პავლეს ჩარგალში ჩაუტარებია და „ბლალო-ჩინიც“ იქ დაუპატიჟებია ნათლიად. ის მართლაც საპატივცემულო, ძალზედ განათლებული საზოგადო მოღვაწე ყოფილა. მისი პიროვნებით მოხიბლულა ქართული კულტურის დიდი მკვლევარი აკად. მარი ბროსე, რომელსაც მისთვის მიუხდვია თუშური (წოვა-თუშური) ფოლკლორული თუ ენათმეცნიერული მასალის აღწერა. მან მალე ჩააბარა „წოვა-თუშური ენის აღწერითი გრამატიკა“. ამიტომ იობი ცისკარიშვილი იბერიულ-კავკასიური ენათმეცნიერების ისტორიაში მიჩნეულია მთის კავკასიურ ენათა მეცნიერული შესწავლის ერთ-ერთ პიონერად (53). ასე, რომ შემთხვევითი არ არის პეტერბურგში ყოფნის დროს და შემდეგაც ვაჟას გამორჩეული მეგობრობა ცისკარიშვილებთან.

ცალკე დედა და ცალკე მამა თითქოს ერთურთს ეჯიბრებოდნენ შვილებისადმი ხალხური შემოქმედებისა და წიგნების, სწავლა-განათლების სიყვარულის შთანერგვაში. ცდილობდნენ ეზიარებინათ ამაღლებული ზნეობისათვის, ლამაზი სულიერი სამყაროსადმი. გათენებიდან დაღამებამდე მუხლჩაუხრელად მშრომელნი, დაღლილ-დაქანცულნი, პიროფლიანნი მაინც არ ივინყებდნენ ამ უმთავრეს საქმეს, დროს პოულობდნენ შვილებისათვის ეამბნათ გადმოცემები, ზღაპრები, ასწავლიდნენ წინაპართა სადიდებლად ნათქვამ ლექსებს, ხალხური მარგალიტებით უვსებდნენ და უყვავებდნენ სულს. ძილის წინ ხის დიდ ტახტზე ჩამწკრივებულ, ბახალებივით თავწამოყაყვულ შვილებს გვერდზე შემონოლილი დედა უყვებოდა ძილისპირულებს.

მამა კი უფრო წიგნებიდან ამოკითხულ ამბებს უამბობდა. მოუთხრობდა ჩვენს სახელოვან წინაპრებზე. განსაკუთრებით სიყვარულით ჰყვებოდა თურმე დავით აღმაშენებელზე. მისი დიდი ცხოვრებიდან განსაკუთრებით წიგნებისადმი სიყვარულის ეპიზოდს გამოჰყოფდა თურმე: „იცი, დავით აღმაშენებელს წიგნების კითხვა როგორ უყვარდა? ნადირობის დროსაც კი, არ ვიტყვით ლაშქრობაში, როცა სადმე გეზზე იდგა და ნადირს უცდიდა, ცალ ხელში წიგნი ეჭირა და მეორეში მშვილდისარიო“.

პავლეს მონათხრობი დავით აღმაშენებელზე მთიელთა, ფშაველთა ნადირობის ქარგაზე იყო მოჭრილი, დილით ღამიანად გასულნი, საღამოს შინ რომ ბრუნდებიან. ხშირად მონადირეებს ისე უხდებათ სიარული მთელი დღის განმავლობაში, ერთხელაც ვერ ჩამოსხდებიან. ხანდახან, გეზში ჩამჯდარ კაცს, მარეკების მოსვლამდე კითხვის დროც კი რჩება, მაგრამ ნადირის მოსავალ გეზს არ მოსცილდება თვალი და ყური. აი, ასეთ ვითარებაში წიგნის კითხვა, მართლაც, საოცრებად წარმოიდგინება.

აღბათ, პავლემაც არ იცოდა, რომ დავით აღმაშენებელი სანადიროდ ერთი დღით კი არა, ერთი და ორი კვირით გადიოდა, თან ჯარი გაჰყავდა და ჯარს წვრთნიდა. ნადირობა ხომ იმ დროს ყველაზე კარგი წვრთნა იყო ჯარისა.

თუმცა მემამათიანე გადმოგვცემს: „და უსაკვირვლეს არს ესე: უწყით ყოველთა, თუ ვითარ სასწრაფო არს ყოველთა საქმე ნადირობისა, და თუ ვითარ დაიმონებს შედგომილსა თვისსა და წარტყუენილ ჰყოფს, და ნადირობასა შინა არა რასა სხვასა, გარნა ხილვასა და დევნასა ნადირისასა; და თუ ვითარ ხელთ იგდოს, მიმხედველ ჰყოფს. გარნა მისი გულსმოდგინება ამასაც სძლევედა, რამეთუ თვით ნადირობასა შინა წიგნი აქუნდიან ხელთა და, რაჟამს ჟამი იყვის, მისცნის ვისმე მსახურსა და ესრეთ დევნა უყვის. და ნუ უკუე ჰგონო, ვითარმედ ხელითა ცალიერითა მოიქცის, ანუ ცუდად დაშურის“. (43, 348).

გულქანისა და პავლეს მონათხრობები რომ დიდ შთაბეჭდილებას ახდენდა შვილებზე და მიჰყვებოდა მათ მთელი სიცოცხლის მანძილზე, ეს იქიდანაც ჩანს, რომ აღმაშენებლის მსგავსად ვაჟაც, შემდგომში, სასაგზლე ჩანთაში, თავის საყვარელ წიგნს, ლესინგის „ლაოკოონს“, დაატარებდა თან.

პავლე მღვდელი სამსახურისა და სხვა საქმეების გამო ხშირად მოწყვეტილი იყო ოჯახს, მაგრამ „როცა კი შინ იმყოფებოდა, – იგონებს ვაჟა, – მუდამ მიაბობდა მოთხრობებს ძველი საღმთო ისტორიიდან, წერა-კითხვას მასწავლიდა ძველებურს წესზე. ჩაუჯდებოდა ხორცს ხინკლისათვის საკეფლად ფიცარზე, იქვე ტახტზე მეც დაუჯდებოდი პირდაპირ და ვუგდებდი გაფაციცებით ყურს იმის ტკბილ საუბარს, რადგან ძველი აღთქმის ზოგ-ზოგი მოთხრობა მეტისმეტად მომწონდა, ჩემს ყურადღებას იზიდავდა: დავითისაგან გოლიათის დამარცხება, სამსონ ძლიერის მოქმედებანი, ძმათა მაკაბელთა თავდადება და სხვა“...

ვაჟა ათ წლამდე ჩარგალში იზრდებოდა და მთელი ბავშვობა, რა თქმა უნდა, ისე გაატარა, როგორც ატარებენ მთიელი ბავშვები. ოთხი-ხუთი წლიდან ფაქტიურად ოჯახურ საქმიანობაში იყო ჩაბმული. ზაფხულობით უმთავრესად ხბო-ბატკნებს მწყემსავდა, შურდულით ჩიტებზე ნადირობდა, მარწყვსა და ყოლს კრეფდა, მეზობლის ბავშვებთან ერთად ჩარგულაში ჭყუმპალაობდა და კალმანს იჭერდა, კალმანის ჭერა ემარჯვებოდა თურმე. სხვას რომ სულ ვერაფერი დაეჭირა, ის მაინც დაიჭერდა ცოტაოდენს.

ანკესით თევზის ჭერას, განსაკუთრებით კალმანისას, დიდი აზრიანობა და დაკვირვება სჭირდება: თხილის ჯოხი გრძელი, ქერქ გაცლილი უნდა იყოს, წვერში წვრილი, ძუა თეთრი ცხენისა, ანკესი თავისებურად შემოხრილი; იმასაც უნდა ცოდნა, როდის ჭიაყელაზე მოდის, როდის სანსალაზე. მორევთან მიპარვით მისვლაა საჭირო, ანკესის მოთრევასაც ცოდნა უნდა... იმთავითვე ბუნების წიაღში ჩახედვის ვაჟასეული ალლო კალმანის ჭერაშიც მჟღავნდება.

მამის მონათხრობიდან გაიგო, აღბათ, რომ ქართველი მოლაშქრენი ღრმა მდინარეების გადალახვისას ცარიელ ტიკებს ბერავდნენ, ხელებით ეყრდნობოდნენ, ფეხებს აფართხუნებდნენ და ისე მიცურავდნენ. ვაჟა შინიდან ტიკს იპარავდა და არაგვზე მორევში იმით სწავლობდა ცურვას და სხვებსაც ასწავლიდა.

ფარიკაობაც უყვარდა. ესეც, აღბათ იმ გმირი წინაპრების წამხედურობით, მათი გმირობა ენატრებოდა.

ვაჟას თანატოლი ხეხერა ზურაბაშვილი იგონებს: ერთხელ ვაჟამ „ვეფხისტყაოსანი“ წაგვიკითხა თავის მეზობელ ბავშვებს-სო. პოემამ დიდი შთაბეჭდილება მოახდინა ყველაზე. ალტაცე-ბულ-ალფრთოვანებულ ბავშვებს არანაკლებ ალფრთოვანე-ბულმა ვაჟამ მოუწოდა: მოდი, ჩვენც დავლაშქროთ ქაჯეთის ციხეო – სულა და კურდღელას ციხეს დავეცეთო. ხის ფარ-ხმლებით შეიარაღებულნი სამ ნაწილად გაყოფილან, სამი მხრი-დან მისდგომიან კივილ-ჭყვივლით, ხმლების ჩახაჩუხით შეც-ვივნულან ციხის ნანგრევში. მთავარი გმირი, ტარიელი, ვაჟა ყოფილა.

თელავი

მართალია, ვაჟა წერს, რვა წლისა მიმაბარეს თელავის სასუ-ლიერო სასწავლებელშიო, მაგრამ, ჩანს, კარგად აღარ ახსოვდა, რომ ათი წლისა ჩაიყვანა იქ მამამ. სასულიერო სასწავლებელში, ჩვეულებრივ, ათი წლიდან იღებდნენ. პავლე მღვდელს მიუღე-ბინებია ვაჟა სასწავლებელში, საცხოვრებლად კი ვინმე თალი-კო რამინსკაიასათვის ჩაუბარებია ოჯახში. თალიკო ქართველი აზნაურის ქალი ყოფილა, რუსზე გათხოვილი. ვაჟას შვილივით უვლიდა თურმე, ასმევდა, აჭმევდა, ურეცხავდა და ყოველივე ამაში პავლე თვეში ხუთ მანეთს უხდიდა.

საცხოვრებლად კი დაბინავდა კარგად, მაგრამ სასწავლე-ბელმა არ გაუმართლა ის დიდი ინტერესი და სიყვარული სწავ-ლისადმი, რითაც ვაჟა ჩარგლიდან წამოსვლისას იყო შეპყრო-ბილი. თელავის სასულიერო სასწავლებელი ის არ აღმოჩნდა, რასაც ელოდა. გონების ძალადობაზე დამყარებულმა სწავლის სისტემამ ლამის სულ შეაძულა სწავლა. თვით ვაჟა წერს: „სას-წავლებელში ყოფნამ ჩემს გულსა და გონებას ვერაფერი შემატა. ჩემს ფანტაზიას, გონების მოთხოვნილებას ვერ აკმაყოფილებ-და, ჩემს ცნობისმოყვარეობას ვერ აწვდიდა ნოყიერს საზრდოს. იძულებული ვიყავი მიმემართნა სხვადასხვა წიგნებისათვის... ექვსი წლის ჩემი თელავში ყოფნის დროს სწავლის ნაყოფად

ჩაითვლება რამდენიმე რუსულ-ბერძნული ფრაზა, ქართულს ვინ გვაღირსებდა”...

ვაჟას ჩარგალში სამი დიდი მასწავლებელი ჰყავდა: დედა, მამა და ბუნება. სამივე საყვარელი იყო მისთვის. დედაც ისევე ბუნებრივად უყვებოდა ძველებურ ამბებს თუ ხალხურ ლექსებს, როგორც ჩარგლულა მორაკრაკებდა და ისიც ისეთივე დიდ სი-ამოვნებას ანიჭებდა მას, როგორც მოაღერსე დედა. რამდენი რამე ასწავლეს მამამ და დედამ და ერთი ხმამალალი სიტყვაც კი არ დასცდენიათ, ერთხელ არაფერზე გასწყრომიან, ან კი რა საჭირო იყო სწავლას მონყურებული ვაჟასთვის მსგავსი მეთო-დი?

თელავის სასულიერო სასწავლებელში კი რამდენად უკულ-მართად, არაპედაგოგიურად უნდა ყოფილიყო სწავლის საქმე დაყენებული, რომ ვაჟასაც, სწავლამონყურებულ ბიჭს, გული ასცრუებოდა სწავლაზე. მეფის რუსეთის თვითმპყრობელური, კოლონიური სისტემის შესაბამისი საგანმანათლებლო პროგ-რამა სასულიერო სასწავლებელს ამქვეყნიურ ჯოჯოხეთად აქცევდა. აზუთხვინებდნენ ისეთ რალაცეებს, რაც ბავშვებში არავითარ ინტერესს არ იწვევდა, რაც მათ მხოლოდ გონებას დაუჩლუნგებდა და ინტერესს დაუკარგავდა მშობლიური ენი-სა და ისტორიისადმი, დაავინყებდა ქართველობას. ყოველ შემ-თხვევაში, სწავლების ძირითადი დრო და ენერგია იმ არასაჭი-რო, მხოლოდ და მხოლოდ მთავრობის პოლიტიკისთვის საჭირო საგნების უაზრო ზუთხვას მიჰქონდა და რა გამწარებით, რა პე-დანტიზმით უნერგავდნენ, უტენიდნენ ამ უაზრობას თავში ბავ-შვებს! ვისთვის როგორ, მაგრამ ნამდვილად სწავლას მონყურე-ბული ბავშვებისათვის ასეთი ძალდატანება უდიდესი სულიერი ტანჯვა იყო. ამას ემატებოდა როზგი და ცემა-ტყეპა.

თელავის სასწავლებელში ასეთი სულთამხუთაობის, ასეთი მძიმე ყოფის შემდეგ, მართლაც რომ დიდი ბედნიერება იქნე-ბოდა ვაჟასათვის თავის მშობლიურ ჩარგალში საშობაო თუ სა-ზაფხულო არდადეგების დროს დაბრუნება. სამოთხედ ეჩვენე-ბოდა ჩარგალიცა და მშობლიური კერაც. ჩანს, იმ ჯოჯოხეთმა უფრო გაუმძაფრა მთის სიყვარული და იქით ლტოლვა.

ვაჟას დაუწყია თავისი ავტობიოგრაფიის წერა, მაგრამ მა-ლევე შეუწყვეტია, რადგან, რაც იქ უნდა ჩაენერა, ბევრი რამ

უკვე აღწერილი ჰქონდა თავის ლექსებსა თუ მოთხრობებში, ანდა შემდეგში აპირებდა დაწერას. ბავშვობის შთაბეჭდილებები მას საგზალივით მიჰყვებოდა მთელი სიცოცხლის მანძილზე და ზოგს ლექსად აყალიბებდა, ზოგს – მოთხრობად. უთუოდ ბავშვობის იმ ტკბილ-მწარის მოგონებაა 1906 წელს დაწერილი ლექსი „მთიელი ბავშვი ქალაქში“.

**„ახ მთებო, ამწვანებულო, როდისღა გნახავთ თვალითა?
ჩემო პატარა სოფელო, პატარაკის ჭალითა,
სვით გაბმულ მურყნებო, კალმახიანის წყალითა?!
ახ, საჭამანდო შვინდისავ, ხის კოვზითა და ჯამითა,
ნადულო დედიჩემისა, გამაძლო შენი ჭამითა!
აუბნა დედას ზღაპარი, მე მომესმინა ლამითა?
არ იცით, ჩემო სწორებო, როგორა ვკვდები ჯავრითა?“**

.....

**მანამ მანდ ვიყავ, შინ ყოფნა არად გამაჩნდა ბევრადა:
არც მთა მიღირდა ძვირადა, არც თავის კერა-კერადა,
აქ-ლა გავიგე, სამშობლო ტკბილი ყოფილა ძნელადა,
სიზმარში მუდამ მანდა ვარ, დავეხეტები ველადა,
გამელვიძება, აქა ვარ, გავიბასრები ცრემლადა.**

.....

**ვინ იცის, რა მაგონდება! ქვაც მენატრება მშობელი,
თორემ ცოცხალი არსება, გულზედ მახია ყოველი“.**

იგივე ფიქრები და განცდები აქვს გადმოცემული ვაჟას“სა-შობაო მოთხრობაში“. საშობაოდ ჩარგალში აყვანილ ვაჟას აი, რა ფიქრები უტრიალებდა და რას განიცდიდა: „ეხლა ძლივს ამოვისუნთქე თავისუფლად. როდისღა ვიგრძნობ ამგვარ სიამოვნებას? ნეტა აღარ წამიყვანდნენ იმ ოხერ სასწავლებელში-მეთქი, ვფიქრობდი. ეს ფიქრი ხომ არ შემისრულდებოდა და არა, მაგრამ ის მიხაროდა, რომ ორი კვირა თავისუფალი მექნებოდა და სულთამხუთავი მასწავლებლები აღარ დამადგებოდნენ თავზე... ნიადაგ უნდა მესიამოვნა. ჯერ ერთი, გადავრჩი ბერძნულის მასწავლებელს, ამ დაობებულს, დახავსებულს ბურსაკს; ჯერ ქართული ანბანი არ ვიცოდით და ის კი მოგვიყვა ბერძნულს ენას. ნეტავი თვითონ მაინცა სცოდნიყო თავისი სა-

განი, ისიც მაშინა სწავლობდა. შავ-შავი, ხმელი კაცი იყო, დაგვადგებოდა თავზე და „გვაზუბრინებდა“, „ალფა, ბეტა, ლამა, დელტა“.

...ლმერთო, რა ამბავი იყო, როცა ის გაჯავრდებოდა: თვალები დაესისხლებოდა, მოავლებდა შეგირდს თმაში ხელს და გაისვრიდა, საითაც მოხვდებოდა: ერთი მუჭა ბალანი ხელში უნდა დარჩომოდა და მე რე შებერვით აქეთ-იქეთ გააბნევდა. უნდა მოგახსენოთ, რომ როზგი მაშინ ახალი გადავარდნილი იყო, მის სავალალოდ და სამწუხაროდ, მაგრამ ჩუმჩუმად მაინც ამოქმედებდა. შენახული ჰქონდა სახლში და საჭიროების დროს მოიკითხავდა. „თქვე მ – ლებო, იქნებ იმას ფიქრობთ, როზგი გადავარდაო, ვერ მოგართვესთ, აბა, ერთი წამოაქციეთ!“ – ეტყოდა ჩურჩულით გულდამშვიდებული უფროს შეგირდებს, რომელნიც სწრაფად გაჰბანრავდნენ ერთ-ერთს ამ არწივის მსხვერპლს და წამოაქციევდნენ: „აბა, ერთი რიგიანად მოახვედრეთ მაგას ორმოციოდე როზგი“. ბევრსა ჰყვიროდა სანყალი ბავშვი: – ვაი, დედავ, მოგიკვდიო, – მაგრამ ამაოდ. არწივი ეკალაძე დასძახოდა: – მოკვდი, მოკვდი, მოკვდი, ს-ინ! მაგრა დაჰკათ, მაგრა მაგ მ-ს!“ ვაი იმ შეგირდ-ჯალათის ბრალი, რომელიც გულჩვილობას გამოიჩინდა და ვერ დაჰკრავდა გამეტებით; ახლა იმას გააძაგვრინებდა იატაკზე.

მე ბუხარში ვიჯექი და იქიდან ვუცქეროდი ამ საშინელებას. დიად, ბუხარი იყო ჩემი სკამი მთელი ორი წელი, რადგან ადგილი აღარ იყო შეგირდისთვის და ერთთავად ნაცარში ამოგანგლული დავდიოდი. რა ღმერთი გამინყრებოდა, დამეშავებინა რამე ამ სურათების მნახველს. ეკალაძეს ბრაზი მოუფიქროდა ხოლმე, რომ საბუთს არაფერს ვაძლევდი გაროზგვისას, მომიშარებდა რასმე და დამკივლებდა: „მ-ის სულს აგითირებ, ფშაველო!“ გამისომდა ბჯღალს ქორხორზე, თითქოს ქორმა ქათამს გაჰკრა ბჯღალიო და გადაისროდა ბურტყლებს დაბლა“.

ეს ჯოჯოხეთი ტრიალებდა „ალფა, ბეტას“ ზეპირობის გამო. ვაჟას კი სწავლა უნდოდა, ნამდვილი ცოდნა. თავისით ცდილობდა რალაცას, ეძებდა წიგნებს, თხოულობდა, კითხულობდა. პროვინციულ ქალაქში მაშინ ბევრი არაფერი იშოვებოდა წასაკითხი, მაგრამ რასაც იშოვიდა, ფშაური ხინკლებივით

სულმოუთქმელად ყლაპავდა. ერთხელ ხელში ჩაუგდია რალაც ასტრონომიული წიგნი და ისიც კი დიდი გულმოდგინებით დაუმუშავებია.

საერთოდ, უსაქმოდ ვერ ჩერდებოდა თურმე თავიდანვე შრომას მიჩვეული ვაჟა. თუ წიგნი არ ეჭირა ხელში, დიასახლისს ეხმარებოდა: შეშას უჭრიდა, წყალს უზიდავდა... თუ არც არაფერი საქმე დიასახლისს ჰქონდა საიმისო, ან ამხანაგებთან არ თამაშობდა, აიღებდა მამა-პაპურ მშვილდ-ისარს და ფრინველზე სანადიროდ გადიოდა თელავის შემოგარენში.

ვაჟამ თავისი ნაკითხობით, უნარიანობით, ფიზიკური ძლიერებით მალე მოიპოვა მოთავეობა თავის ამხანაგებში. შეისწავლა კახური ჭიდაობა, კრივი და შეჯიბრებებში ტოლს არავის უდებდა. სასწავლებელში ყველას ერეოდა თურმე – თავის ტოლებს და დიდებსაც, მისი ნამქცევი არავინ ყოფილა; სასწავლებელსაც და ამხანაგებსაც ისა ჰყავდათ ფალავნად კვირაობითა და დღესასწაულებზე გამართული ჭიდაობის დროს. მაშინ ჭიდაობა იყო ყველაზე დიდი და საინტერესო სანახაობა და ჭიდაობაში თავგამოჩენილი კაციც შორს გაითქვამდა სახელს. ვაჟას ფიზიკური ძლიერება უწყობდა ხელს, თორემ ჭიდაობა კახელებივით ვერ იცოდა. კახეთში ბავშვობიდანვე ჭიდაობენ. ფშავში, და საერთოდ მთაში, კი ხალხის თვალწინ ნაქცევას ვერ იტანენ სიამაყის გამო. ვაჟას კი უმართლებდა, ვერავინ აქცევდა თორემ, მალე მიანებებდა თავს. რაკი უმართლებდა, ჩანს, ნათამამებული ვაჟა გაამაყებულა და ამის გამო დასჯილა კიდევ. თავისი შერცხვენა ვაჟას თვითონ უამბნია. მიხა რაზიკაშვილი იგონებს: „ამხანაგებთან ერთად ვაჟა წასულა დღეობაში ალავერდობას. იქ დიდი ჭიდაობის გამართვა იცოდნენ. მთელი კახეთის მოჭიდავეები იქ იყრიდნენ თავს. მოწაფეებიც ჩაებნენ ჭიდაობაში. რაკი მაღალი ტანისა იყო, ვაჟა დიდებს დასჭიდეს. წრიდან გამოუსვლელად ექვსი ნააქცია. „დავდიოდი, – სთქვა ვაჟამ, – რუსული მამალივით გათამამებული და კიდევ ვითხოვდი მოჭიდავეებსაო. ბოლოს გამომიყვანეს ერთი ხმელ-ხმელი ვილაც მეძროხე, მე ვთქვი, რომ ამას ერთი ხელის მოვლებით ხე და ქვას შემოვანყვეტავო და გაუფრთხილებლივ შევეტაკეო. როგორ მოხდა, არ ვიცი, მხოლოდ ის მახსოვს, რომ ჩემმა ფე-

ხებმა ჰაერში შეითამაშა და მიწაზე ზღართანი მოვადინეო. ასე გავფუჭდი ფალავანი კაციო!”...

იმ დროს საქართველოში ძალზედ გავრცელებული იყო მუშტი-კრივი. ეს თავისებური ფიზიკური წვრთნა, ვარჯიში თბილისური ჩვეულებაა, აქედან გადაინერგა საქართველოს ზოგიერთ ქალაქში, მათ შორის თელავშიც.

მუშტი-კრივი ვაჟკაცური სპორტი იყო. აქ მჟღავნდებოდა ადამიანის შეუპოვრობა, ამტანობა, სისხარტე. მოწინააღმდეგენი შიშველი მუშტით ურტყამდნენ ერთმანეთს. შეტაკება ხდებოდა ძირითადად უბნებს შორის. ამდენი ხალხის ერთურთისთვის დარევა ხელჩართულ ომს მოაგონებდა მნახველს.

თბილისური მუშტი-კრივი, მისი რაობა აღწერილი აქვს ცნობილ ქართველ პოეტს იოსებ გრიშაშვილს „ძველი თბილისის ლიტერატურულ ბოჰემიაში“. აქ იგი წერს: „კრივი პატარა ბიჭების შეჯიბრებით იწყებოდა. შემდეგ 18- 20 წლის ვაჟკაცები მოსდევდნენ, ხოლო, როცა ბრძოლა გამწვავდებოდა, ორივე ბანაკიდან გაისმოდა შეძახილი: „ქომაგი!“ „ქომაგი!“ და ეშხში შესული დარბაისელი და გამოცდილი ფალავნები უკვე ნამდვილ კრივს იწყებდნენ.

ათი-თხუთმეტი წუთის შემდეგ მოკრივეთა ბედი უკვე გადაწყვეტილი იყო. ნაცემი და დაბეგვილი მოკრივენი სტოვებდნენ ასპარეზს და ნელ-ნელა უკან იხევდნენ (ეგრეთ წოდებული „დამდგარი კრივი“ კი ხშირად ორ-სამ საათს გრძელდებოდა). მაგრამ ბრძოლა ამით არ თავდებოდა: დამარცხებულნი იშველებდნენ ქვებს, აგურებს, ხის ნაჭრებს და ყველაფერს, რაც ხელში მოხვდებოდათ. ამის გამო ხშირად იმსხვრეოდა მეზობელი სახლების კარ-ფანჯრები, აივნები, შუშაბანდები და სხვ. ბევრი მოკრივე ბრძოლიდან დაჭრილი გამოჰყავდათ...

...როცა ქალაქში კრივი გაიმართებოდა, მაყურებლები სახლის სახურავებზე ადიოდნენ, ავსებდნენ ბანებს და იქედან შესცქეროდნენ ომს და ამხნევებდნენ გამბედავ მებრძოლთ თანაგრძნობის აღმოჩენით. როცა ქალაქგარეთ იბრძოდნენ შურდულებით და ხის ხმლებით, მაყურებლებს წინდანიწვე ჰქონდათ დაკავებული გორები და მალლობი ადგილები.

კრივს განსაკუთრებით ახალგაზრდობა მისდევდა. ეს საკვირველიც არ არის. ქართველ ქალს ერთი ათად უფრო ტურ-

ფად ერვენებოდა ის ვაჟი, რომელიც კრივში გაიმარჯვებდა და სახელს გაითქვამდა. მოკრივენიც, რასაკვირველია, რამოდენადაც სახელის შოვნას სცდილობდნენ, იმდენადვე სწადდათ და ცდილობდნენ თავის გამოჩენას თავიანთ "ორთავ თვალის სინათლის" სასიამოვნოდ და სასიქადულოდ. გრიგოლ ორბელიანის თქმისა არ იყოს:

**„აბა, მუშტის კრივში მნახე, ვინა ვარ!
მაშინ შეგიყვარდე, სთქვა: „ძვირფასი ხარ!“**

კრივს ჰქონდა თავისი ჭეშმარიტად კარგი მხარე: „ქართველი კაცი პატარაობიდანვე იწვრთნებოდა სამხედრო ხერხებში, ავარჯიშებდა თავის საღ გონებას და გამჭვრეტელობას, რომელიც მას ბუნებით დაჰყოლია, ვარჯიშობდა სიმარდეში, სისწრაფეში – ერთი სიტყვით, კრივში ქართველი იძენდა ყველა იმ თვისებას, რომელნიც ძვირფასნი არიან სამხედრო საქმისთვის“. („ივერია“, 1885, 1)

ვაჟას ერთგვარად კრივმა მისცა ასპარეზი თავის ვაჟკაცობის გამომჟღავნებისა, იმის დამტკიცებისა, რომ არც ის იყო თავისი სახელოვანი მამა-პაპების მომყივლე. სულ საგმირო საქმეებისათვის ანთებული ჭიდაობასა და კრივში იკლავდა ჟინს, ხარჯავდა თავის მოჭარბებულ ენერგიას, ავარჯიშებდა მკლავსა და გონებას. ტოლების კრივში უძლეველი ყოფილა ვაჟა, ამიტომ მისი ჯგუფი ყოველთვის გამარჯვებული გამოდიოდა.

სასულიერო სასწავლებლისა რა მოგახსენოთ, მაგრამ კრივის სკოლა, მართლაც, კარგი გაიარა ვაჟამ თელავში. თუ როგორი იყო ეს სკოლა თელავში (შემდეგ თბილისსა და გორში), როგორი ძალის მოკრივე იყო ვაჟა, ამაზე კარგად მეტყველებს უფრო მოგვიანებით პეტერბურგში მისი ყოფნის ერთი ეპიზოდი.

„ერთხელ, პეტერბურგში ყოფნის დროს, ვაჟას და გიორგის (ვაჟას უფროს ძმას – გ. ხ.) ფული სრულიად გამოლევდათ და მშვირები დადიოდნენ თურმე ქუჩაში იმის იმედით, იქნება ვინმე ნაცნობი შეგვხვდეს და გვაჭამოს რამეო. შეხვედრიათ ნაცნობი გერმანელი სტუდენტი. ჩვეულებრივი მისალმების შემდეგ გერმანელს უთქვამს: „წამოდით, ბილიარდი ვითამაშოთ

და, ვინც წააგოს, სადილი იმან გადაიხადოსო“. ვაჟას გაუხარდა თურმე, რადგან ბილიარდს კარგად თამაშობდა და მოგების იმედი ჰქონდა. ეს ამბავი ასე აქვთ მოყოლილი ვაჟას ნათქვამად მ. შამანაურსა და ი. ბუქურაულს თავის მოგონებებში:

„გერმანელის ლუდხანაში ჩავედით. რა თქმა უნდა, ჩემი ძმა გიორგიც იქ არის, იმედი აქვს, რომ მოვიგებ. გიორგის სიხარულს საზღვარი არ აქვს, მამხნევებს, თან თვალს მიშვრება და მეუბნება: ეგრე, ძმაო, ეგრე, ვაჟავ, ერთი მუცლები მაინც ამოვივსოთო. თამაში ჩემს სასარგებლოდ დამთავრდა და ჩვენ უკვე სადილისთვის ვემზადებოდით, რომ ჩემი მოპირდაპირე მეუბნება: ცოტა ხანს იქით გავალ, მოვისაქმებ, მოვალ და ვისადილოთო. წავიდა, მაგრამ ის უკან აღარ დაბრუნებულა. თურმე, როგორც შემდეგში მიაბზო, არც იმას ჰქონდა ფული, ისიც ჩემს დღეში ყოფილა, იმას ჰგონებია, რომ მე ბევრი ფული მქონდა, უნდოდა სადილს მე გამომრჩენოდა.

ბილიარდის პატრონმა გვიყურა, გვიყურა და როცა ჩვენ სადილი აღარ მოვიკითხეთ, მოვიდა და ბილიარდის ფული მოგვთხოვა. ჩავვარდი უხერხულ მდგომარეობაში. გროში ჯიბეში არ მიდევს, აღარ ვიცი, რა ვქნა. ვუხსნი ამ კაცს, რომ პირობისა და ჩვეულების მიხედვით ფული უნდა წაგებულმა გადაიხადოს, ვუთითებ წამგებზე; ვეუბნები, დაიცა, მოვა ის და გადაიხდის, მაგრამ ის დაჟინებით ფულს დაუყოვნებლივ ჩემგან მოითხოვს, ხმას უმაღლებს, ბიჭებს ეძახის. ბიჭებიც მოდიან და უნდათ გირაოში ქუდი წამართვან. მე ქუდს არ ვანებებ, იმათ ძალით მოინდომეს, მოიტანეს ჩემზე იერიში, მაგრამ მეც მაგრად დავხვდი. ერთი მათგანი ხელით შემეხო და მაგარი მუშტი მომთავაზა, ამას სხვებიც აჰყვნენ. გიორგი, რომელიც უბრალოდ მაყურებელი იყო ამ სეირისა, უცებ ქორივით დააფრინდა ჩემს გამრტყმელს, უმაღვე ქვეშ ამოიდო და დაუნყო ცემა. რა თქმა უნდა, მეც მკლავი გავშალე და ვისაც შემოუნიავე, ფეხებზე არავინ დავაყენე, მეორედ შემოკვრა არავის სჭირდებოდა. შეიქმნა ერთი აურზაური. მუშტრები გულგახეთქილები გარეთ გარბოდნენ, რადგან რესტორნის პატრონი ხმამაღლა გაჰკიოდა: მიშველეთ, ყაჩაღები დაგვეცნენო! რესტორანი დაცარიელდა, სამაგიეროდ ყველა მოსამსახურე და ლაქია იქ მოგროვდა,

ყველანი მე და გიორგის მოგვესივნენ. გამშველებელი არავინ იყო, ყველა ჩვენ გვცემდა, ჩვენც ვუპასუხებდით და შეიქმნა ერთი გახურებული მუშტი-კრივი. თითო-თითოს შემოჰკრავს მუშტს გიორგი, დააპირქვავებს და მე დამიძახებს: „დაჰკარი-კავ, ლუკურიკავ, ძმაის ჭირიმე!... დაჰკა... დაჰკა... აქა გყავ შენი ძმა გიორგი!“

მეტი ჩარა აღარ იყო, ძალიან უნდა მომენადინა და გამებედნა, რადგან 20-25 კაცი გვესეოდა და, მართლაც, ბევრს ვადინე ცხვირ-პირიდან სისხლი, ბევრს შუბლზე კოპი დავასვი. მაგრამ რადგან ისინი ძალიან ბევრნი იყვნენ, ჩვენ დაღლილობა დაგვეტყო და საბოლოოდ გამარჯვება იმათი უნდა ყოფილიყო. ოთხივ კუთხიდან შემოეხვივნენ გიორგის და სცემდნენ. მე კიდევ ორ კედლის შუა კუნჭულს ზურგი მივყუდე, მუშტებს ვიქნევ და ჩემთან არავის ვუშვებ, მინდა გიორგის მივეშველო, მაგრამ ვერ ვახერხებ. უცებ გიორგი დაუსხლტა ხელიდან ამ ბრბოს, გავარდა გარეთ და მე დამიძახა: არ გატყდე, ძმაო, დაჰკა, ვაჟავ, დაჰკა, მე ეხლავე პოლიციას მოვიყვანო! მართლაც, თვალის დახამხამებაზე გიორგიმ პოლიციის ბოქაული მოიყვანა, თავის „გოროდოვებით“. ბოქაულს ყველანი ჩივილით მისცვივდნენ: გვიშველეთ, ბატონო, ყაჩაღები დაგვეცნენ, გვიშველეთო! ბოქაულის შეკითხვაზე რესტორნის პატრონმა უპასუხა, ორი ყაჩაღია, ერთი თქვენ რომ მოგიყვანათ, მეორე კი კუთხეში რომ დგასო – და ჩემზე მოუთითა. მე ისევ საომრად მომზადებულს, ჩემი პოზიცია მეჭირა.

– როგორ?! – განცვიფრებით წამოიძახა ბოქაულმა, – ეს ორი კაცი თქვენ ამოდენა ხალხს... არ მესმის...

– ვინა ხართ? – მოგვიბრუნდა ბოქაული ჩვენ.

– **Черт их знает, кто они такие, жид – не жид, болгар – не болгар, молдав не молдав, кавкай... Кавкай... их мать!** – წამოიძახა ერთმა მონინალმდეგეთაგანმა.

– შენი დედაც! – წამოვიძახე მე და გააფთრებულმა მივინიე მლანძღველისაკენ.

ბოქაულმა, რასაკვირველია, შემაყენა და დამაშოშმინა.

არ მესმის, – წარმოთქვა მხრების აწევით ბოქაულმა და გადმოგვხედა ჩვენ ორსა და მოპირდაპირეებს, – სირცხვილია, აბა

როგორ შევაყენო ოქმი, ამოდენა ხალხი უჩივის ორ კაცს, რომ გვცემესო. დამეკარგენით აქედან! – შეუყვირა ბრბოს ბოქაულმა და წამოდგა ზეზე, – მომშორდით, თქვენი სული აქ არ იყოს!

ზარდაცემული მოჩხუბრები იმწამსვე გაიფანტ-გამოიფანტნენ”.

(46,172)

გაიარა რამდენიმე ხანმა და გიორგი მოდის ნევის პროსპექტზე, შემოხვდა ვიღაც ახალგაზრდა, ევროპულად ჩაცმული, ცილინდრიან-ხელთათმანიანი, ტროსტით ხელში. მიუახლოვდა უცნობი თუ არა, მონინებით, ზრდილობიანად მიესალმა გიორგის, ცილინდრის მოხდით. გიორგიმ გაკვირვებით შეხედა უცნობს. „ვერ მიცანით? – ღიმილით ჰკითხა უცნობმა ფშაველს, – არა უშავს-რა, მოიგონებთ და, თუ შეიძლება, ერთი სადმე დავსხდეთ და ვილაპარაკოთ, ძალიან მინდა თქვენთან საუბარი“. უცნობმა შეიყვანა ის ერთ ევროპულად გამართულ სასადილოში, მოატანინა სასმელ-საჭმელი და შემოუსხდენ მაგიდას ის და გიორგი. აბა, რა თქმა უნდა, უნივერსიტეტის თავისუფალი მსმენლის, ნახევრად მშიერი ფშაველისათვის, იმნაირი სუფრა სიზმარი იყო. ლაპარაკობენ, შეექცევიან გიორგი და უცნობი.

– მაშ, ვერა მცნობთ, არ გაგონდებთ? აბა, მოიგონეთ, სად შევხვდით ერთმანეთს? – შეეკითხა გიორგის უცნობი.

– რა ვქნა, მაპატიეთ, ვფიქრობ, მაგრამ არა მაგონდება-რა, ვერ გიცნობთ.

– მაშ, ლუდხანაში ამა და ამ დროს ჩხუბი რომ ჩამოვარდა, იმ ორში ერთი თქვენ არ იყავით? – ჰკითხა უცნობმა.

– დიაღ, ვიყავი, – მიუგო გიორგიმ.

– მეც იქ ვიყავი, – მიუგო ღიმილით უცნობმა გიორგის, – მეც ვიღებდი მონანილეობას, მეც გეჩხუბეთ და... ერთი მითხარით ის, თქვენთან მეორე ვინ იყო?

– ჩემი ძმა იყო... რად იკითხავთ?

– რას ბრძანებთ, – თავის ქნევით უთხრა უცნობმა გიორგის, – მე ბოქსიორი ვარ, მთელი ევროპა მაქვს შემოვლილი. ჩემ დარტყმას ძნელად თუ ვინმე უძლებდა, მაგრამ თქვენი მუშტი უფრო მწვავე ყოფილა. ისეთი შემომკრა ფერდში შენმა ძმამ, რომ მოცველილი ბალახივით დავეცი იატაკზე. შინ რომ მივედი, ფერდი დალურჯებული მქონდა და სამი დღე და ღამე კომპრესი

მედო”... (მ.შამანაური, ივ.ბუჭურაული) (46,174).

ვაჟას თელავში ნასწავლი მუშტი-კრივი მარტო პეტერბურგში კი არა, ცხოვრების მანძილზე ბევრჯერ გამოადგა, ზოგჯერ მნიშვნელოვანი საქმეების გადასაწყვეტადაც კი.

კრივში დიდი ძალის შემმატებელია მიჯნურობა, სატრფოს-თვის გამჩვენება, როგორც გრიშაშვილი წერს. ვაჟაც არ იყო უამისოდ. მას თელავში უგრძნია პირველი სიყვარული. ოღონდ ამ სიყვარულის ამბავი ვაჟას მეტმა არავინ იცოდა. არ იცოდა თვით იმ გოგონამაც კი, ვისაც ეტრფოდა. ვაჟა ამ გამიჯნურების ამბავს ასე გადმოგვცემს: „რამდენადაც ძლიერი იყო ეს ჩემი სიყვარული, იმდენად გაუბედავი, დამალული, უსიტყვო, ისეთი, რომ ვგონებ, ვინც მიყვარდა, იმანაც არ იცოდა, მე კი, თუ მუდამ დღე არ მენახა თვალთ, მოგკვდებოდი, რის გამოც, როცა დროს ვიხელთებდი, უნდა გავქცეულიყავ იქ, სადაც ჩემი „სატრფო“ მეგულეობდა, რომ თვალთ დამენახა, დავმტკბარიყავი მისი ცქერით. ჩემი სიყვარულისა მევე მრცხვენოდა, ეს სიყვარული დანაშაულად მიმაჩნდა და როგორ განუცხადებდი სატრფოს!“...

თელავიდან წამოსვლის შემდეგ ამ ბავშვურმა გატაცებამ მალე გაუარა და თბილისში სხვამ დაიჭირა თელაველი სატრფოს ადგილი. აქაც ისევე გაუბედავი, გაუმჟღავნებელი სიყვარულით იწვოდა; თბილისური შემდგომში გორულმა შეცვალა.

ვაჟას ჯანსაღი სიცოცხლით სავსე არსება ითხოვდა სიყვარულს, მისი სულისათვის აუცილებელი, თანმყოფი რამ იყო ეს გრძნობა, მაგრამ მთიელური სიამაყე და თავშეკავებულობა ზღუდავდა, ვერ ამჟღავნებდა. მთაში ხომ ვაჟკაცს ისე არაფერი უტენს სახელს, როგორც სიყვარულზე ლაპარაკი და მექალთა-ნეობა. მთაში შესისხლხორცებული მამაპაპური ზნეობისათვის კი არასოდეს უღალატნია ვაჟას. ვიდრე საცოლშვილო არ შეიქმნა და ვინც უყვარდა, მისი ცოლად შერთვა არ განიზრახა, მანამდე სიყვარული ვერავის გაუმჟღავნა. თუმცა მაშინაც სხვათა შუამდგომლობა დასჭირდა.

მიუხედავად ასეთი სისპეტაკისა სიყვარულში, ასეთი თავშეკავებულობისა, ფრთხილი სამიჯნურო ამბებისა, ვაჟას მაინც ქალების მოყვარული კაცის სახელი ჰქონდა დავარდნილი. ეს,

ალბათ იმიტომ, რომ თვით ქალებს მოსწონდათ ვაჟა და ბევრი ცოლადაც სთავაზობდა თავის თავს.

ხალხში რომ ვაჟას ქალების მოყვარული კაცის სახელი ჰქონდა დავარდნილი, კარგად ჩანს მისი სიცოცხლის ბოლოდროინდელი ერთი ეპიზოდიდან.

...ვაჟას განუზრახავს თავისი უმცროსი შვილის, ვახტანგის, საგურამოს სამეურნეო სასწავლებელში შეყვანა, რაკილა მისთვის საამისო მიდრეკილება შეუმჩნევია. თვითონ ვაჟა ამ დროს ძალზედ დაავადებული ყოფილა და ამიტომ ეს საქმე მიუნდვია დავით ჯანაშვილისთვის, ვისაც აგრეთვე თავის შვილის ამ სასწავლებელში ჩაყვანა სდომებია. დავითს ეს ამბავი მოგვიანებით უამბნია ვახტანგისათვის: „საგურამოში რომ გამგზავნა ვაჟამ, ხათრი ვერ გაუტეხე, ჩავედი, გავიგე სწავლის პირობები და თქვენთვისაც ბინა ვიშოვნე. როცა იქიდან დავბრუნდი, ვაჟა ჩემ სახლში (დავით ჯანაშვილი მაღაროსკარში ცხოვრობდა – გ.ხ.) ავადმყოფი დამიხვდა. გაეცივებინა, საბანში იყო გახვეული, სახე სრულებით არ უჩანდა. მე ვუამბე საგურამოს ამბები. სკოლის შესახებ ვუთხარი, რომ ბავშვებს მშვენიერი ბინა ვუშოვნე. დიდებული ოჯახი, ცოლ-ქმარი, ეტყობა ხვთისნიერი ადამიანები არიან-მეთქი.

როდესაც ქალზე (დიასახლისზე) ჩამოვადე ლაპარაკი, საბნდან ცალი თვალი გამოყო და საცოდავად შემეკითხა: ჯეელი-აო? ცუდად კი იყო, ციებისაგან აძაგძაგებდა. მე გადავიხარხარე: – მელა კვდებოდა და თავი საქათმისაკენ მიჰქონდაო, – ვუთხარი.

– არა, ისე შეგეკითხეო, – იმართლა თავი ვაჟამ. (37, 11)

თბილისი

თელავის სასულიერო სასწავლებელი ექვსწლიანი იყო და ვაჟამაც ექვსი წელი დაჰყო აქ. სწავლის წყურვილმა მაინც გააძღვინა ბოლომდე ამ ჯოჯოხეთისათვის. 1877 წელს სწავლა გააგრძელა თბილისის ალექსანდრეს სახელობის სამასწავლებლო ინსტიტუტთან არსებულ ორკლასიან სამოქალაქო სასწავლებელში.

ვაჟა აქაც უცებ აღმოჩნდა ამხანაგების ყურადღების ცენტრში. თუ სადმე ჩხუბი ატყდებოდა, მაშინვე იქ გაჩნდებოდა და გამარჯვებაც იმათ რჩებოდა, ვის მხარესაც ვაჟა დაიჭერდა.

ვ. გოცირიძე გაზ. „სახალხო ფურცელში“ ვაჟას ამ პერიოდთან დაკავშირებით 1915 წელს წერდა: „ზეტცერის ქარხანაში ვმუშაობდი. ბინაც იქვე ახლო მქონდა. მეზობლად შვიდი-რვა რაჭველი, სამოქალაქო სკოლის მოსწავლე ცხოვრობდა. მშობლებისაგან დავალებული მქონდა მათზე თვალი დამეჭირა.

ერთ საღამოს ერთმა პატარა მოწაფემ, ვანო ბედელაძემ, გულგახეთქილმა მოიბრინა და მითხრა: „არიქა, გვიშველე... ჩვენს შეგირდებს სახელოსნოს შეგირდები დაესივნენ და სცემენო!“ მეც გავიქეცი სადგურისაკენ, რადგან ვიცოდი, სად იყო ის სახელოსნო, რომლის მოწაფეებიც სახელგანთქმული იყვნენ ამისთანა უწესრიგობაში. შუა გზაზე მეტი გავლილი მქონდა, რომ შემომხვდენ ჩვენი ცელქები ერთი სიცილ-ხარხართ. დამინახეს თუ არა, მომცვინდნენ და მახარეს, სახელოსნოს შეგირდებს კარგად ვცემეთო. დავტუქსე ძალიან და დავემუქრე, ამაღამვე თქვენს სისაძაგლეს მივწერ თქვენს მშობლებს-მეთქი. ისინი, ალბათ, არ მოელოდნენ ჩემს გაჯავრებას და თავჩაღუნულებმა გამოსწიეს ბინისაკენ. ცოტა ხნის შემდეგ ისევ თავიანთ ლაპარაკში გაერთნენ. იგონებდნენ ვინ რა გამირობა გამოიჩინა „ბრძოლაში“. შევნიშნე, რომ ჩემს მოწაფეებს კიდევ მომატებოდა ორი სხვა მოწაფე, რომელთაგან ერთი სულ უცხო იყო. ჩანდა, ბრძოლაში იმათაც მიეღოთ მონაწილეობა, მეტადრე ახსენებდნენ ლუკას სახელს, აქებდნენ მის „გმირობას“. გამოირკვა, ჩემი გმირები დაძლეულიყვნენ მრავალრიცხოვანი მოწინააღმდეგისაგან, ასე, რომ ზოგს კიდევ მოეკურცხლა სადგურისა-

კენ, მაგრამ წინ შემოხვედროდათ იმავე სკოლის მოწაფე, ფშავიდან ახლად ჩამოსული ლუკა რაზიკაშვილი, რომელიც თან მოსდევდათ ეხლა. გაიგო თუ არა ლუკამ, თურმე, მოწაფეების გაჭირვება, მიშველებოდა. როდესაც ერთმა ჩემმა მოწაფეთაგანმა, ნიკოლოზ ჩიკვაიძემ, წარმოთქვა აღტაცებით: „აი, შენი ჭირიმე, ლუკავ, კაცო, კაი დროს არ მოგვისწარი, ქორივით არ შემოგვერიე შიგაო!“ ლუკამ ხელით ანიშნა – დაიცაო, და წარმოთქვა:

**„შიგან ასრე გავერიე, გნოლის ჯოგსა ვითა ქორი,
კაცი კაცსა შემოვსტყორცი, ცხენ-კაცისა დავდგი გორი“.**

დაჰკრეს ტაში მოწაფეებმა და აისროლეს მალლა ლუკა – გაიკვირდა 15-16 წლის ყმანვილისაგან „ვეფხისტყაოსნის“ სიტყვები. მოწაფეებს მოეწონათ გმირული ლექსები. გაამეორებინეს, სთხოვეს: კიდევ გეცოდინება რამე მაგისტანა ლექსებით. ლუკაც არ დაზარდა, აუხსნა მოკლე შინაარსი „ვეფხისტყაოსნისა“ და შიგადაშიგ ლექსები თქვა...

...გამომშვიდობების დროს წარმომიდგინა ორი მოწაფე: ჩიკვაიძე –ავთანდილად და კვიტაშვილი თუ მესხი, არ მახსოვს კარგად, –ფრიდონად. „მეო, – მითხრა სიცილით, – ტარიელობა უნდა ვიკისროო, მეტი გზა არ მაქვსო“. (46,62)

დაუდგრომელი ბუნებისა ყოფილა ვაჟა, ცოცხალი, მიუხედავად სხვა მხრივ სიდიდისა და წინდახედულებისა. სულ რაღაც თავგადასავლების ძებნაში იყო, მაგრამ უაზროდ კი არა. ამ საგმირო საქმეებს ყოველთვის რაღაც კეთილი მიზანი ჰქონდა. მასთან, ერთ ოთახში მცხოვრები დ. ქადაგიძე იგონებს:

„ზამთარია, ძალზე ცივა, შეშა არ გვაბადია, არც ფული გვაქვს, რომ ვიყიდოთ. ვსაუბრობთ თუ როგორ ვიშოვოთ შეშა. ვაჟა უცებ წამოხტა და დაიძახა: „არიქა, ბიჭებო, ვაგ ზლის შეშა!“ ჩვენც მოგვეწონა ეს აზრი და ოთხივენი ღამე წავედით შეშის საქურდლად. როდესაც შეშას გადმოლაგება დავუწყეთ, უცებ მოგვესმა: „Кто, Там?! Стрелять буду!“

სიცოცხლე გაქვთ, დავიძარიო. ვინ წინა და ვინ უკან. ვაჟა სამივეს ჩამოგვრჩა. ბინამდის არ დაგვისვენია. ვაჟას დაცინვა დავუწყეთ, რომ უკან დარჩა. ვაჟა თავისით გულს იკეთებდა და

გვეუბნებოდა: „ძალიან შეგეშინდათ და იმიტომ ძალიან გამობობოდით“.

ხილიანობის დროს ხილის მოსაპარად დადიოდნენ ბიჭები მუშტაიდისა თუ სხვა ბალებში. რა ექნა მთიელ ბიჭს, ხილს დანატრებულს, ხილი ხომ უნდა ეჭამა, საყიდლად კი ფული არა ჰქონდა. დიდუბის მახლობლად, გერმანელთა კოლონიის ბალებში შეპარულებს უხდებოდათ პატარა შეხლა-შემოხლა, მაგრამ მუშტაიდის ბალებში ძალიანაც არ უშლიდნენ შესვლას. ვაჟას უყვარდა თეთრი თუთა. ახლაც ამ თუთას მიატანა. ბალს ხილის დროს ყარაული ედგა. უცბად ხმა მოგვესმა: „ეი, ჭროლა ფშაველი (აქაც იცნობდნენ ვაჟას!) თავი დაანებე მაგ თუთას!“ ვაჟა თეთრ თუთას „ჭროლა“ თუთას ეძახდა და ეს იყო მიზეზი, რომ მას მუშტაიდის ყარაულებმა უწოდეს „ჭროლა ფშაველი“... (დ.ქადაგიძე) (46,62)

ერთი მხრივ ეს ახალგაზრდული ფათერაკები, მეორეს მხრივ კი ვაჟა უკვე სერიოზულად ეკიდება საქმეს. თელავთან შედარებით თბილისში მეტი საშუალება იყო წიგნების შოვნისა და ვაჟაც არ უშვებდა ამ შესაძლებლობას ხელიდან. კითხულობდა ყველაფერს, რასაც ხელში მოიგდებდა. რაც შეეხება საკლასო გაკვეთილებს, მაინცდამაინც გულს ვერ უდებდა, არ აინტერესებდა. ვაჟა ბევრჯერ გაუფრთხილებიათ, თუ არ ისწავლი, ატესტატს არ მოგცემთო, არც თვით ვაჟას ჰქონდა ატესტატის მიღების იმედი, რადგან გამოცდების დროს „საეკლესიო სლაური“ ვერ ჩააბარა. მასწავლებელი პეტროვი არ უწერდა ნიშანს, ვაჟა არ მიდიოდა სათხოვნელად. ყველას მისცეს ატესტატი, ვაჟა კი მეორე დღისათვის დაიბარეს, გალანძღეს სიზარმაცისათვის და როგორც უღირსს, სამადლოდ მისცეს.

ბედის დაცინვაც აქედან იწყება: „საეკლესიო სლავურის“ უაზროდ მზუთხავები ითვლებიან წარჩინებულ მოსწავლეებად და ქება-დიდებათ იღებენ ატესტატებს, ისინი, ვისი გვარებიც თუ ვისმე ახსოვს დღეს, მხოლოდ და მხოლოდ ვაჟას წყალობით, ხოლო ვაჟას თავისი გზით დაძრულ ნიჭს ატესტატსაც კი ამაღლიან.

ასე ყოფილა თითქმის ყველა ნიჭიერი ადამიანი და ასე იყო ვაჟაც. მათი გუნება ვერ ეგუება მონურ წვრთნას, სწავლას იმისას, რასაც საუღლედ გამოწვრთნა ჰქვია. არც თბილისში ას-

წავლიან იმას, რისი სწავლაც გულთ ეწადა ვაჟას – ქართულ მწერლობას. ამ წადილს – ამ სიყვარულს მთაში ყოფნისას დაუდო სათავე პავლე მღვდელმა, შეაყვარა რუსთაველი, გურამიშვილი, ილია, აკაკი... და ამ კალაპოტით ცდილობდა მიჰყოლოდა დინებას. ვაჟას ამხანაგებს კი აოცებდა ვაჟას საქციელი; მათთვის, ბნელ რუსიფიკატორულ ქსელში გახლართულთა, რუსოფილთა, ნილილისტთა ოჯახებიდან გამოსული ბავშვებისათვის, მთავარი საზრუნავი იყო ცხოვრებისათვის გამოსადეგი „განათლების“ მიღება და ფულიანი სამსახურის შოვნა, მთავარი იყო ლუკმა-პური ემოვით. ამიტომ ვერ გაეგოთ, რატომ იქცეოდა ესე უცნაურად ვაჟა, რალა უნდოდა მამ! რატომ ეპყრობოდა ისე აგდებულად ატესტატის მიღებას, უიმისოდ ხომ ვერ გახდებოდა ჩინოვნიკი. მისმა ამხანაგებმა „კარგმა“ და „წესიერმა“ მოსწავლეებმა, ზეპირად იცოდნენ „საღვთო რჯული“, „საეკლესიო სლაური“, ლათინურიცა და ბერძნულიც, მაგრამ ვაჟასაგან გაიგონეს „ვეფხისტყაოსანი“ და აღტაცებაში მოვიდნენ. სქოლასტიკური საგნებით დამძიმებულ, დაბნელებულ მათ გონებაში თითქოს მზის სხივმა ჩაანათაო, ისეთნაირად გამოცოცხლდნენ. ვ.გოცირიძესაც გაუკვირდა, ვაჟამ რომ „ვეფხისტყაოსანი“ იცოდა და ვაჟასაც გაუხარდა „ვეფხისტყაოსნის“ წამკითხველი კაცი რომ ნახა.

„– მამ, შენ წაგიკითხავს „ვეფხისტყაოსანი?!“ – წამოიძახა ვაჟამ და ორივე ხელი მტაცა.

– წამკითხავს და ახლაც ვკითხულობ, მაგრამ კიდევაც ვერ გამიგია კარგად. შენ, ჩემო ბიძია, აკვანშივე დაგიწყია, ალბათ, რომ ზეპირად გისწავლია-მეთქი.

მითხრა: მე ბევრჯერ წამკითხავს და თუ გინდა, მაგისი გემო გაიგო, მეორედ, მესამედ წამკითხეო“.

უკვე დიდი გემოვნება ჰქონია ვაჟას. სცოდნია რასაცა ჰქონდა გემო, მაგრამ ქართული მწერლობა აკრძალული ხილი იყო სასწავლებელში. ამიტომ „ჭროლა თუთასავით“ ქურდულად ეტანებოდა. ნებას არ აძლევდნენ, მაგრამ ძალად ითვისებდა. ქართული ლიტერატურის გემო ხომ გააგებინა თავის ამხანაგებს ვაჟამ და ახლა ფშავურ ზეპირსიტყვიერებასაც აზიარა. ლექს-კაფიები კი ბევრი იცოდა „ჩარგლური სკოლის“ წყალობით. ხშირად უკითხავდა თურმე ამ ლექსებს. განსაკუთრებით ერთი

ფშაური ლექსი ჰქონდა აკვიატებულ-ამოჩემებული, – იგონებს დ. ქადაგაძე, – ამბობდა და თან ცეკვით ჰყვებოდა რიტმზეო:

**„ნანალ ნანალთან დანვება,
თუ პატარადაც დასცალდა,
თაფლ-ერბოსავით დატკბება“.**

სკოლის საგნებისადმი „მოუცლელობა“ მარტო გარეშეს კითხვით კი არა, ჩანს, იმითაც იყო გამოწვეული, რომ ვაჟა ამ დროისათვის საკმაოდ ბევრს წერდა. ამას გვიდასტურებს მისი მეგობარი ანდრეევი:

„ვაჟა-ფშაველა, – წერს ის, – ჯერ ბავშვი იყო, ფშაველი ბიჭი, თოთხმეტ-თხუთმეტი წლისა და მას ბლომად ჰქონდა თავის ლექსები. ვინ არ იცნობდა ანტონ ფურცელაძეს, ვის არ გაეგო მისი სახელი: „ყმანვილო, იყავ უცვლელად ერთგული შენის ქვეყნისა: იქა ხარ დაბადებული და იქვე ჩახვალ საფლავსა!“ ვისწავლეთ კითხვა და ანტონის სახელიც ვიცოდით, არ გვენახა, მაგრამ მივარდნილ ადგილსაც კი გავრცელებული იყო მისი სახელი. ვისთვის-ლა არ იყო მისი კარი ღია: მასთან შეეძლო მისვლა ყველას, იგი მასწავლებელი იყო ახალი თაობისა, მონინავე პირებისა. მე და ლუკა რაზიკაშვილიც მივედით ანტონთან. მიზეზი ჩვენი მისვლისა შემდეგი იყო: თავის გამოსაკვები გვიჭირდა. ლუკას ვუთხარი: ლექსები ხომ გაქვს დანერილი, კიდევ დანერე, წავულოთ ანტონს, გავაშინჯოთ და თუ მოეწონა, ვისმე დავაბეჭდინოთ სანახევროდ. ეს აზრი მოეწონა ჩემს ამხანაგს ლუკას, მაგრამ, ცოტა არ იყოს, სცხვენოდა თავი გამოეჩინა, როგორც ლექსების მწერალს. მაინც გავაბედეინე და წავედით ანტონთან. ლუკამ წამოიღო თავის რვეული, როგორც მახსოვს, თხუთმეტი ლექსი. ამ რვეულს ზევიდან ჰქონდა შემდეგი წარწერა: „ლექსები შეთლზული ლუკა რაზიკაშვილისა“.

შევედით ანტონთან, ღიმილით მიგვიღო, გამოგვკითხა ვინაობა, მიზეზი ჩვენი მისვლისა და ლუკამ მიაწოდა თავისი რვეული. ანტონმა იქვე, ჩვენთან, გადაათვალიერა რვეული, წაიკითხა რამდენიმე ლექსი, გვაჩუქა რამდენიმე ქართული წიგნი და გვითხრა, მისვლიყავით მეორე დღეს. ჩვენს სიხარულს

საზღვარი არა ჰქონდა, რომ ანტონი გველაპარაკა ჩვენ, სოფლიდან ჩამოსულ ბიჭებს.

მეორე დღეს დანიშნულ დროზე მივედით, ანტონმა თავზე ხელი დაადო და უთხრა ლუკას: „აბა, შემომხედე, შენ კაი ვაჟი ყოფილხარო!“ დიდი ხანი გველაპარაკა, ზოგ-ზოგი ლექსების შინაარსზე სთქვა, ძალიან კარგიაო, მომეწონაო და სხვა, დაუბრუნა ლუკას რვეული და ზევიდან წარწერაზე წაეშალა წითელი მელნით სიტყვა „შეთლზული“ და გაეშო მარტო: „ლექსები ლუკა რაზიკაშვილისა“. თანაც უთხრა: ეს წარწერაც კმარაო და როცა გახდები ისეთი პოეტი, აი, როგორც ილია ჭავჭავაძეა, მაშინ დააწერე ხოლმე შენს ლექსებს „შეთლზული ლუკა რაზიკაშვილისა“.

ეს ცოტა არ იყოს, არ ეამა ჩემს ლუკას და, როცა კარში გამოვედით, მეც რალაც ღმერთი გამიწყრა, დაცინვით ვუთხარი: აბა, მართლაც ეგრე რო გააბრტყელე წარწერა, რომელი გამოჩენილი პოეტი ბრძანდები-მეთქი. ამაზე ამხანაგურად წამიქიმუნჯა“. (გაზ. „სახ. ფურც.“ 1914 წ.) (46,65).

როგორც ჩანს, ვაჟა გულდანწყვეტილი წამოსულა ანტონ ფურცელაძისაგან. მიუხედავად იმისა, რომ შეაქო, თავზე ხელიც გადაუსვა და წიგნიც აჩუქა, მაინც ეტყობა, რალაც ისეთი შენიშვნა მის მოქცევაში, რაც არ ესიამოვნა. მისი მოპყრობა უფრო ვალის მოხდასავით იყო ახალგაზრდების მიმართ და არა გულიანი ჩაკვირვება, დაინტერესება, ისეთი, როგორიც ილიამ გამოიჩინა ვაჟას მიმართ, ანდა ისეთი, თვით ვაჟამ რომ გამოიჩინა გიორგი ლეონიძის მიმართ. მართალია, მაშინ შეიძლება, ბევრი არაფერი იკვეთებოდა ვაჟას ნიჭისა, მისნაირი შემწუნებელიც ბევრი ჰყავდა ანტონს, მაგრამ შემტყობი მაინც შეატყობდა. ჩვენს წინაპართ ტყუილად ხომ არ უთქვამთ: „სახარე ხბოს სასკორეში შეეტყობაო“. თვითონ ვაჟას არ შეიძლებოდა რაიმე პრეტენზია ჰქონოდა, არც იმისი მოლოდინი, რომ ვისმე ძალიან მოეწონებოდა, დაბეჭდავდნენ. მაშინ თვითონ მიიტანდა რედაქციებში – მაგრამ რაკი მიიყვანეს და მიატანინეს, გულისხმიერებას უფრო სხვაგვარს ელოდა, ვიდრე გამოიჩინეს. რა ისეთი სუსტი ლექსები იქნებოდა 16-17 წლის ვაჟასაგან დანერილი (მათგან ზოგიერთი შემონახულია და შესულია ვაჟას სრულ გამოცემაში), რომ თუნდაც ერთი ლექსი შეერჩია თხუთმეტიდან და რომელიმე რე-

დაქციაში ეშუამდგომლა, წაეხალისებინა. მე თქვენ გეტყვით და უარს ეტყოდნენ ანტონ ფურცელაძეს! ანდრეევისა არ იყოს, მაშინ ხომ მისი სახელი ჰქუხდა. არა, მან ამის მაგივრად მხოლოდ ყდაზე წარწერას მიაქცია ყურადღება: დიდკაცობა ადრე მოგინდომებიაო, ილია არა ხარო. ვაჟას გულუბრყვილო წარწერას, რომლისთვისაც ვაჟას არ მიუქცევია ყურადღება, ანტონმა ასეთი ყურადღება მიაქცია.

ცნობილია, რომ ანტონი ალ. ყაზბეგის ნაწარმოებებს პრინციპულად არ კითხულობდა, მწერლად არ თვლიდა.

ანტონ ფურცელაძის დამოკიდებულება ვაჟას შემოქმედებისადმი იმთავითვე სიმბოლური გახდა, თითქოს მან დაანათლა ეს უკუღმართობა, რომ შიგ რა იყო, იმას არავინ უკვირდებოდა, სიღრმეს არავინ ეძებდა, ერთეულების გარდა ვერავინ იგებდა, ზედაპირულს ხედავდნენ და გაიძახოდნენ: ყურადღების ღირსიც არ არისო, ხალხური მეღეჭსეაო, მთის პოეტიო, ფშაველი გლეხიაო, მის შემოქმედებას მხოლოდ ეთნოგრაფიული მნიშვნელობა თუ ექნებაო და სხვა ამისთანები.

გორი

გორის საოსტატო (სამასწავლებლო) სემინარიას, რომელიც 1876 წელს გაიხსნა, უნდა მოემზადებინა სახალხო სკოლების მასწავლებლები. ლუკამ იქ გადაწყვიტა სწავლის გაგრძელება. მართალია, თბილისის სამოქალაქო სასწავლებლის დამთავრების შემდეგ სწავლის გაგრძელება იქვე, სამასწავლებლო ინსტიტუტში, სდომებია, მაგრამ საამისოდ არც ეკონომიკური მდგომარეობა უწყობდა ხელს და არც გამოცდების ჩაბარების იმედი ჰქონდა. გორში კი შედარებით იოლი იყო ჩარიცხვაც და ეკონომიკურადაც უზრუნველყოფილი იქნებოდა, რადგან სემინარიას ინტერნატიც ჰქონდა – კვება და ჩაცმა მთავრობისა იყო, უფასო.

ლუკა რაზიკაშვილამდე მთიელებს აქ მხოლოდ ოსებს იცნობდნენ, ფშაველი და ხევსური ჯერ არავინ ენახათ. ამიტომ

სემინარიის ეზოში ფშაველი მამა-შვილის გამოჩენამ ყველას ყურადღება მიიქცია. შემოეხვივნენ და ინტერესით ათვალიერებდნენ ფშაურ ჩოხა-ახალუხში გამოწყობილ, ქრელ წინდა-პაჭიჭიან, ამაყი შესახედაობის მთიელებს.

ქსნის ხეობის ოსები მთიულეთის მომიჯნავენი არიან, ლომისის ქედის გადაღმა-გადმოღმა ცხოვრობენ და იქაურმა რომელიღაცა ოსის ბიჭმა ჩაცმულობის მიხედვით ისინი მთიულებს მიაშვავსა. მიაშვავსა და მთელი ხმით შესძახა: „შენი კვნესა-აამე!“ მთიულურს ხომ გრძელი ხმოვნები აქვს, ბოლოდან მეორე ხმოვანს გრძლად წარმოთქვამენ და ამ გაგრძელებას ხშირად დასცინიან ხოლმე მეზობელი კუთხის მცხოვრებნი. მართალია, ესენი მთიულები არ იყვნენ, მაგრამ მთავარი ის იყო, რომ ოსის ბიჭმა ამათი დაცინვა მოინდომა. ვაჟას ბრაზი მოანვა, მრისხანედ გადაუბრიალა თავისი თაფლისფერი თვალები და ხუმრობის ხასიათი წაუხდინა ოსის ბიჭს. აგრძნობინა, რომ დაცინვას არ მოუთმენდა. პავლეს ამ ოსის ბიჭისთვის ყურადღება არ მიუქცევია, მან ვაჟას შეხედა და ჯაგარაშლილი რომ დაინახა, ეამა, ჩაელიმა. ირგვლივ მყოფთ მაშინვე იგრძნეს, რომ ამათი გამასხარავება არ შეიძლებოდა.

იმ წელს გორის სემინარიაში ვაჟასთან ერთად სულ ოცდაორი ახალგაზრდას ჰქონდა საბუთები შეტანილი. მათ წინასწარი გამოცდა ქართულ წერაში ჩაუტარეს. ოცდაორიდან მხოლოდ შვიდი მიიჩნიეს გამოცდებზე დაშვების ღირსად და ამ შვიდეულში იყო ლუკა რაზიკოვიც. დიახ, რაზიკოვი! მოდაში იყო, განათლებულობად და დიდ ღირსებად ითვლებოდა თავისი გვარისათვის რუსული დაბოლოების მიკერება. ეს იმდროინდელი ეროვნული ღირსებისა და თვითშეგნების სიმდაბლის ერთერთი გამოხატულება იყო. ვაჟაც ძალიან ამაყობდა თურმე „რაზიკოვით“ და რომ ვისმე ეთქვა რადაო, ძალიან მენწყინებოდაო, – დაცინვით იხსენებდა შემდეგში ვაჟა თავისი მამისა და თავისი ახალგაზრდობისდროინდელ უნებლიე შეცდომასა თუ ცოდვას.

გამოცდები ექვს საგანში ბარდებოდა. ვაჟამ ექვსივე გამოცდა ასე თუ ისე ჩააბარა: საღვთო რჯულსა და ქართულ ენაში ოთხები მიიღო, არითმეტიკა-გეომეტრიაში, გეოგრაფიასა და ისტორიაში – სამები. კიდევ ოთხმა ახალგაზრდამ ჩააბარა იმ შვიდიდან და პირველ კლასში ხუთი მოსწავლე მიიღეს.

მართალია, სემინარიაში მოსწავლეები ყოველმხრივ უზრუნველყოფილნი იყვნენ, მაგრამ სხვადასხვა საზოგადოებრივ ორგანიზაციას გამორჩევით კარგი მოსწავლეებისათვის დაწესებული ჰქონდა თავისი სახელობის სტიპენდია, მაგალითად, „ქართველთა შორის წერა-კითხვის გამავრცელებელ საზოგადოებასაც“ ჰქონდა დაწესებული ასეთი სტიპენდია. ლუკა რაზიკოვს ჩარიცხვისთანავე დაუნიშნეს „კავკასიაში ქრისტიანობის აღმდგენელი საზოგადოების“ სტიპენდია და სემინარიის



გორის სამასწავლებლო სასწავლებელი

დამთავრებამდე შეუნარჩუნეს.

მიუხედავად ასეთი კარგი პირობებისა, ლუკა თავიდან ძნელად ეგუებოდა ინტერნატის კარჩაკეტილ რეჟიმს, თავისუფლების შეზღუდვას. თვით სასწავლებლის „ფორმაც“, „ტანსაცმელიც“ ეხამუშებოდა. ფორმას კიდევ არა უჭირდა, მალე მიეჩ-

ვია და მერე ფშავში ასული კიდევაც იწონებდა თავს მეზობელ თანატოლებთან, „მამალივით იფხორებოდა თავის კაკარდიან ქუდითა“, თავისუფლების სრულ დაკარგვასა და ოთხკედელშუა ტუსალივით ჯდომას ვერ მიეჩვია, თითქოს ჰაერი არა ჰყოფნიდა, თითქოს სული ეხუთებოდა, სულ გარეთ იწევდა. თუ არ გაუშვებდნენ, იპარებოდა. ამიტომ აქაური მასწავლებლები დათმობაზე მიდიოდნენ მის მიმართ, ესმოდათ მისი და ხშირად თავად უშვებდნენ, ან, თუ იპარებოდა, თვალს ხუჭავდნენ. მიხვდნენ, რომ ბუნებაში ლალად გაზრდილ მთიელ ახალგაზრდას უჭირდა ასეთი ცხოვრება, რომ მისთვის ხანდახან ბუნებაში განავარდება ჰაერივით იყო საჭირო. გუნება შეეკვროდა ვაჟას, დაღვრემილი სახით მიმოდოდა ხოლმე და, როგორც კი ბუნებაში გავიდოდა, უცებ გამოიცვლებოდა, გახალისდებოდა, ხუმრობდა, ლექსებს ამბობდა, ამხანაგებს ებლარძუნებოდა.

კვირა-უქმეებში უფრო სანადიროდ და სათევზაოდ უყვარდა სიარული. შიო მღვიმელი იგონებს: „ხშირად ლუკა და ნიკო ლეონიძე (მამა ჩვენი პოეტის გიორგი ლეონიძისა) ერთად მიდიოდნენ მტკვარზე სათევზაოდ დღე-ღამით. თან საკითხავი წიგნებიც მიჰქონდათ, მტკვარში რომ ჩანგლებს ჩაჰყრიდნენ ვადამდის, თავად წიგნებს ჩაუსხდებოდნენ. ძალიან კარგად მახსოვს, როგორ მოუთმენლად ელოდნენ ვაჟას და ნიკოს ამხანაგები: მოვლენ და ახალი თევზით დაგვაძლებნო. ასეც ხდებოდა. ეს ორი განუყრელი ამხანაგი, ნიკო და ვაჟა, არასდროს თევზს არ გაჰყიდდნენ, რამდენიც უნდა დაეჭირათ, სულ სემინარიაში მოჰქონდათ. დაუძახებდნენ ვასილა მზარეულს და ეტყოდნენ: მოხარშე და ერთი ძლომაზე აჭამე ბიჭებსო“.

სულ სხვანაირ გუნებაზე დგებოდა ვაჟა, როცა ზაფხულის არდადეგები ახლოვდებოდა. ახლოვდებოდა ჟამი ერთი წლის უნახავი მთების ხილვისა. აფორიაქდებოდა, აფაცურდებოდა, მოუსვენრობა დაეტყობოდა და როგორც კი შეწყდებოდა სწავლა, აღარ ელოდებოდა ფშავიდან ჩამოკითხვას, ცხენს – მეორე დღესვე ფეხით გაუტევედა ფშავისკენ. შემოდგომაზე კი კლდის ლოდვივით გამაგრებული ჯანით – „გაშავტყავებული“ ჩამოგორდებოდა მთებიდან და კვლავ მწყურვალვით დაენაფებოდა სწავლას.

გამაგრებულ ჯანთან ერთად ვაჟას სემინარიაში ჩამოჰქონ-

და ზაფხულის პერიოდში ჩანერილი ხალხური ზეპირსიტყვიერების ნიმუშები. გარდა იმისა, რომ ეს მისი საყვარელი საქმე იყო, გორის სემინარიის პროგრამაშიც შედიოდა და ოლქის სამოსწავლო მზრუნველის დავალებაც იყო სასწავლებლისადმი. მასალას ამონებდნენ მასწავლებლები და გზავნიდნენ თბილისში, სადაც ის ქვეყნდებოდა კრებულში: „Сборник материалов местностей и племен Кавказа“.

ინტერნატის კედლებიდან გასვლის ერთი მიზეზი იყო საზეიმო დღეებში ქალაქში გასეირნება და, განსაკუთრებით კი, ამ ზეიმების დროს გამართულ კრივში მონაწილეობის მიღება. გორი ორ უბნად იყო გაყოფილი – ზემო და ქვემო უბნებად. ზემო უბნელებს მაგარი ბიჭები ჰყოლიათ და ქვემო უბნელებს ყოველთვის ჯაბნიდნენ თურმე. ეს რომ გაიგეს ვაჟამ და მისმა მეგობრებმა, ქვემოუბნელებს გამოექომაგნენ და მას შემდეგ გამარჯვება ყოველთვის მათ მხარეზე რჩებოდა. „ჩავიდოდა თუ არა ვაჟა კრივში, –წერს შიო მღვიმელი, – ზემოთა უბნელებში ჩოჩქოლი ატყდებოდა: ჩამოვიდა ფშაველიო! ვაჟასთან ერთად კრივში ჩადიდნენ ნიკო ლეონიძე, ნესტორ კიკნაძე და ლავრენტი ოქროპირიძე. მათი ჩასვლა და ზემოუბნელების დაძვრა ერთი იყო“.

იმ ფაქტიდან, რომ ვაჟა თბილისში ძლეულ, ნაცემ ამხანაგებს მიეხმარა, გორშიც დაჩაგრულთა მხარე დაიჭირა, კარგად ჩანს ვაჟას ბუნება და ხასიათი, ის დიდი კაცთმოყვარეობა, ჰუმანურობა და ადამიანის ღირსების დაცვა, რაც ქვაკუთხედი მთელი მისი შემოქმედებისა და მოღვაწეობისა, მისი არსებობისა. ვაჟას სიმნიფეში შესვლასთან ერთად, მნიფდებოდა და ნაყოფს იღებდა სათნო დედის, გულქანის, მიერ ჩანერგილი სიკეთის ქმნის ღვთიური გრძნობა, ბეჩავთა სიბრალული, დაჩაგრულთა გამოქომაგება. თუ დედა გულქანი ამას ალერსიანი სიტყვითა და წმინდა ცრემლით აღწევდა, მისი შვილი ვაჟა – მჭახე მარჯვენითა და ვაჟკაცური თანადგომით, სამამაცო ზნითა და კეთილშობილებით.

ხალხის სიკეთისათვის თავდადებასა და გმირობას უდრიდა ლუკას მოთავეობა გორის შემოგარენზე თავდატეხილი უბედურების დროს. ამ ამბავს მისი კლასის ამხანაგი ალ. ნათაძე გადმოგვცემს:

„იმ ხანებში გამოცდებისათვის ვემზადებოდით, მაგრამ ვაი იმ მზადებას: აქაც ისეთი სიცხის ბული ტრიალებდა, რომ სული ეხუთებოდა ყველას და გარეთ გამოსვლას ვერავინ ბედავდა. ან მზე დაჰკრავდა, ან სიცხისაგან დაოსებულს საჩრდილობელს მოაძებნიდნენ. ქუჩაში იშვიათად თუ შეხვდებოდით ვისმე. აი, სწორედ ამ ჯოჯოხეთ დღეს, შუადღისას, საშინელი ზარების რეკვა მოგვესმა. ხალხი ეხლა კი ამოდრავდა, გაქცევა-გამოქცევა იკადრა იმის შესატყობად, თუ რა იყო მიზეზი ასეთი გახშირებული ზარების რეკვისა. ჩვენი დირექტორი სემიონოვი გამოვარდა ბალკონზე და გადმოგვძახა იქვე ახლო მდგომ მე და ვაჟა-ფშაველას: „ნადით ეხლავე და გაიგეთ, თუ რა უბედურება მოხდა და შემატყობინეთ ყველაფერი – იქნებ ჩვენი დახმარებაც საჭირო იყოს ვისთვისმეო“. ჩვენ მაშინვე გავიქეციით; უკან წინილებივით სხვა მონაფეებიც წამოგვეყვინენ. გორის გრძელი ქუჩა ჩავიარეთ და მივედით მტკვრის პირას. ისე თქვენს მტერს მოსწყდეს წელი, როგორც ჩვენ შევწუხდით და დავდარდიანდით იმ სანახაობით, რა სანახავიც ჩვენ წინ გადაგვეშალა: მთელი მტკვარი, ხიდი გორისა, დიდსამეფო ქუჩა მოდებული იყო კალიათი. ასეთი აუარებული რიცხვი ამ საშინელი მწერისა ზღაპარშიც არ გაიგონების და კალმით არ აინერების. თვალის დახამხამებაში მთელ გორს მოედო ეს საშინელი მტერი. სიარული შეუძლებელი ხდებოდა. ჩვენ მაინც მოვქუსლეთ სემინარიისაკენ და ყველაფერი ვაცნობეთ ჩვენს დირექტორს. მთელი სემინარიის მონაფეები ხის ტოტებით ხელში გადავედობეთ ამ ურიცხვ ჯარს, რომ სემინარიის ბალი დაგვეფარა ამათ შემოსევისაგან და, მართლაც, შევაჩერეთ მათი მოძრაობა სკოლის არემარეში. კალია მალე შეესია გორის ყანებსა და ბალებს, მისი ტალღა თითქმის სოფ. ბერშუეთს გასცილდა და ხელთუბნის მიმდვრებს მოედო. მთელი ხალხი ფეხზე იდგა. მათ შორის მე და ვაჟა-ფშაველაც იქ ვიყავით. ადმინისტრაციაც ამოდრავდა.

კალიასთან საბრძოლველად ჯერ ახლომახლო სოფლები და მერე შორიდანაც გამოიყვანეს. ამ არეულებაში ვაჟა-ფშაველა თვალისაგან ამცილდა, მისი გზა და კვალი ვეღარ გავიკვლიე და დაღონებული და დაძმარებული ამ მწარე სანახაობით სემინარიაში დავბრუნდი. ვაჟა-ფშაველა ღამე დაბრუნდა მთლად გაოფლილი და შეწუხებული. მან ყველაფერი გვიამბო: თუ როგორ

ჩამდგარა მუშებში და იმათთან ერთად უთხრია ორმოები. აუარებელი რიცხვი ჩაუყრიათ ამ ორმოებში და მერე მინით ამოუფსიათ.

ამ ლაპარაკს სემიონოვიც დაესწრო, ამგვარი საშუალება ბრძოლისა ჭკუაში დაუჯდა და გასცა განკარგულება – დილის ხუთ საათზე ყველა ჩვენთაგანი ბართა და ნიჩბით წავსულიყავით მინდვრებში და გლეხებთან ერთად ჩვენც მონაწილეობა მიგველო საერთო მტერთან ბრძოლაში, ჩვენ სიამოვნებით დავთანხმდით. ბელადებად ვაჟ-ფშაველა და რამდენიმე სხვა მონაფე ამოირჩია. ამათ უნდა გავეყავით რაზმებად და ყველა მათ განკარგულებას დავმორჩილებოდით. მე, სემიონოვი და არისტო ქუთათელაძე ვაჟას რაზმში მოვხვდით.

მეორე დილით ხის ტოტებით, ბარებითა და ნიჩბებით გაუდექით გზას. ჩვენთან ერთად თითქმის ყველა მასწავლებელი იყო. დიდი სანახაობა იყო. ყაზარმებს რომ ავუარეთ, ჯარის უფროსმა დაგვინახა, გამოგვეხმაურა და სალდათები გამოგვაყოლა საშველად. მოვედევით მინდვრებს, ჩვენი ნივილ-კივილი ზეცას სწვდებოდა. ვაჟა გვიყვიროდა და თან გვამხნევებდა. დავინყეთ ორმოების თხრა. ბევრი ორმო მოვამზადეთ, შორიდან მოვუარეთ კალიას, მივერეკებოდით ორმოებისაკენ და ვავსებდით და მერე მინას ვაყრიდით რომ, კალია ველარ ამოსულიყო.

სალამომდის ვიმუშავეთ და, სწორედ უნდა თქვას კაცმა, მარჯვედაც ვიმუშავეთ. ბევრი ორმო ამოვავსეთ და გზაც კი შევუკარით სხვა ყანებში არ შესულიყვნენ. ოთხი საათი იქნებოდა, სემიონოვიც გვიბრძანა სახლში წასვლა და სალამოზე ისევ გაგრძელება მუშაობისა. სიცხისაგან და მუშაობით დაღლილშენუხებულნი დავბრუნდით შინ. ვაჟა-ფშაველა და რამდენიმე მონაფე არ წამოვიდნენ ჩვენთან ერთად. ისინი სოფლებებში ჩაერივნენ და მუშაობა განაგრძეს.

ასე ყოველ დღე, სამი დღის განმავლობაში ვიბრძოლეთ ამ მოულოდნელ მტერთან. მტრის შემოსევის მეოთხე დღეს გარინდა საიდანლაც აუარებელი ფრინველი: ტარბი, ჭილყვაგი, შოშია და სხვები, მეტადრე ტარბი და ჯგუფებად ეცემოდნენ კალიას და სულ მუსრს ავლებდნენ... გორში პარაკლისიც კი გადავიხადეთ, ნიშნად მტრის შემოსევისაგან გათავისუფლებისა. სემინარიაშიც გადავახდევინეთ პარაკლისი ჩვენს საღმრთო

სჯულის მასწავლებელს ლაზარე ტურიაშვილს. ამ პარაკლისის შემდეგ სემიონოვიც სიტყვა გვითხრა, მადლობა გადაგვიხადა და ასე დაასრულა: „იქ, სადაც ორი ხელი უძღურია, სამი ხელი კლდეს გაარღვევს, ზღვის ტალღებს შეაჩერებს, მთას მთას მოახლის და გაჭირვებულ მდგომარეობას საკეთილდღეო მდგომარეობად გადააქცევს ხოლმე, გაჭირვება გმირებსაც ზრდის და შეუმჩნეველს შესამჩნევად ხდის. დღეს თქვენ ყველანი ხართ ძლიერ საქმეში შესამჩნევი, მაგრამ გამჭრიახობითა და თაღრიგიანობით ყველას ლუკა რაზიკაშვილმა გაჯობათ”.

ბევრისათვის დღეს გაუგებარი იქნება, თუ რა ძალა ედგა ვაჟას, თავს რომ იკლავდა. ბევრმა, მხოლოდ თავის ჯამში ჩამხედავმა, ვისთვისაც ხალხისა და ქვეყნის ჭირი ღობეს ჩხირია, არ იცის, რომ მაშინ რალაცა სხვაგვარი ენთუზიაზმი იყო, მით უმეტეს, მთაში. მთიელისაგან ჭირში ჩავარდნილი კაცის მოუხმარებლობა კაცის კვლას უდრიდა, წარმოუდგენელი იყო. კალიების შემოსევა კი იმ დროს, მართლაც, დიდ უბედურებად ითვლებოდა: გლეხებს პირნმინდად გაუნადგურდებოდათ მთელი წლის სარჩო და შიმშილით ამონყდებოდნენ. ვაჟამ და მისმა მეგობრებმა კარგად იცოდნენ ხვნა-თესვით მოწეული პურის ფასი, თვითონაც გლეხების შვილები იყვნენ. განსაკუთრებით ვაჟასთვის იყო გასაგები სხვათა გასაჭირი, სხვათა უბედურება და თავს იკლავდა მათთვის. არც იცოდა ვისთვის, მაგრამ სულერთია – ადამიანებისათვის, უბედურებაში ჩავარდნილი თანამოძმეთათვის.

დღეს კი არა, ზოგისათვის მაშინაც გაუგებარი დარჩენილა ვაჟას თავგანწირვა. როცა სემიონოვიც შეაქო და ამ ამბის გმირი უწოდა, ვაჟამ ახლადმოსულ ულვაშზე გადაისვა ხელი. მისმა ამხანაგებმა ტაში შემოჰკრეს, ვილაცამ კი ჩაიქირქილა და ვაჟას „კალიების უსტაბაში” უწოდა; ვაჟამ იქ კი შეიკავა თავი, მაგრამ მერე ანანა.

არა, ხუმრობაც უყვარდა ვაჟას, მაგრამ უმეტესობა მთიელეზბივით არც მას უყვარდა უთავბოლო ქილიკი და ლაზღანდარობა. ვერც უწესრიგობას ეგუებოდა. ამის გამო ბევრი უსიამოვნება შეხვედრია ცხოვრებაში. გორში სწავლის დროს კი ასეთი შემთხვევა ჰქონია: თვითონ, უკვე მესამე, დამამთავრებელი კლასის მოსწავლე, შესულა მოსამზადებელ კლასის მოსწავლეებთან და

უთხოვია, ცოტა წყნარად იყავითო. ბავშვები მეტისმეტად ხმა-
ურობდნენ და ხელს უშლიდნენ გვერდზე ოთახში მყოფ უფროს-
კლასელებს, რომლებსაც სერიოზული სამეცადინო ჰქონდათ.
ერთ-ერთ მათგანს, ჩანს, წლოვანებითაც დიდს, კოკოლის (თუ
კოკოლიას) არად ჩაუგდია ვაჟას თხოვნა, – შენ ვინა გკითხავსო!
– თავისი გაუგრძელებია. ეტყობა, ჯერ არ იცნობდა ვაჟას. ვაჟა-
მაც ვალარ მოითმინა მისი თავხედობა და გააცნო თავი – მიბე-
ჟა. ამის გამო კინალამ გამორიცხეს სემინარიიდან. პედსაბჭოს
სპეციალურად უმსჯელია მის შესახებ, რაც დასტურდება 1881
წლის 18 თებერვლის ოქმიდან. მაგრამ, რაკი ვაჟამ მოინანია თავისი
დანაშაული, რაკი მან „... победил свою ложную гордость и по-
дал руку примирения Кокולי“, და რაკი თვით კოკოლსაც უთხოვია
– ჩემი გულისთვის ნუ გარიცხავთ, მეც დამნაშავე ვიყავიო, და
რაკი ვაჟა საუკეთესო მოსწავლედ ითვლებოდა, აკმარეს „უმ-
კაცრესი“ საყვედური და „სამიანი“ – ყოფაქცევაში.

როგორც ვაჟას საატესტატო ფურცლიდან ჩანს, დასაწყის-
ში კარგად ვერ სწავლობდა. ერთადერთი ქართულში ჰქონდა
ყოველთვის ფრიადი. უჭირდა რუსული, უჭირდა მათემატიკუ-
რი საგნები, მაგრამ შემდეგ საგრძნობლად უმატა და გამოსაშ-
ვებ ატესტატში თითქმის სულ ხუთები უწერია – „Весьма удов-
летворительная“. ეს ხუთებზე სწავლა ყველა საგნისა იმას არ ნიშ-
ნავს, რომ ვაჟას ელაღატოს თავისი პრინციპებისათვის. არა,
ჯერ ერთი, აქ ასწავლიდნენ ქართულ ლიტერატურასაც, რამაც
დააკმაყოფილა მისი მოთხოვნილება და ერთგვარად გაუნელა
პროტესტის გრძნობა სხვა საგნების მიმართ; მეორეც, აქ არ
აზეპირებინებდნენ იმ უაზრო საგნებს, რასაც სხვაგან და რა-
საც ასწავლიდნენ ზოგადი განათლებისათვის, მართლაც საჭი-
რო იყო (ისტორია, გეოგრაფია, ბუნებისმეტყველება, არითმე-
ტიკა, გეომეტრია, რუსული ენა, პედაგოგიკა, ხატვა, საღმრთო
რჯული). ადრე ვაჟა ბუნებრივი და ბავშვური ცალმხრივობით
უდგებოდა საქმეს, მაგრამ შემდეგში თანდათან ჭკუაში ჩავარ-
და. თუმცა, ადრეც ქართულის გარდა რომ სხვა ინტერესებიც
ჰქონდა იქიდანაც ჩანს, რომ თელავში ყოფნისას ასტრონომიის
რალაც ნიგნიც კი დაუშუშავებია. ალბათ არც ნაკლები ფაქტო-
რი ის თბილი ურთიერთობა იყო, რაც აქ არსებობდა მასწავლებ-
ლებსა და მოსწავლეებს შორის. ამას ემატებოდა ის დიდი კლას-

გარეშე ნაკითხობა, ის თვითგანვითარება, რასაც ვაჟა ენაფე-
ბოდა გორში. ვაჟას სემინარიის ბიბლიოთეკის თითქმის ყველა
ნიგნი გადაკითხული ჰქონდა, როგორც ქართულ, ისე რუსულ
ენებზეო. თავისუფალ დროს ჩამოჯდებოდა თურმე სემინარიის
ეზოში დიდი კაკლის ძირში და კითხულობდა და კითხულობდა.
„თუ რაიმე ახალი ნიგნი გამოვიდოდა ქართულ ან რუსულ ენა-
ზე, ამას ვაჟას ხელში ვნახავდით. ყოველ ახალ მოძრაობას ლი-
ტერატურაში ვაჟასაგან შევიტყობდით“.

ვაჟა განსაკუთრებით ქართული ლიტერატურის შესწავლას
უთმობდა დიდ ყურადღებას. ამ მხრივ მას ხელს უწყობდა ის გა-
რემოებაც, რომ სემინარიაში ქართული ენა სავალდებულო საგ-
ნად იქნა შემოღებული და მოწაფეებს უკვე აღარავინ უკრძა-
ლავდა მშობლიურ ენაზე მეტყველებასა და წერა-კითხვას.

ვაჟას ძირითადი ენერგია და ყურადღება მაინც მიმართუ-
ლი იყო კლასგარეშე კითხვისადმი, კლასგარეშე ლიტერატური-
სადმი. მისი მეორე სემინარიელი ამხანაგი ალ. სალარიძე ვაჟას
ცოდნის წყურვილთან დაკავშირებით წერს: „ლუკამ ადრე დააღ-
ნია თავი „კაზიონურ“ ატმოსფეროს და მთელ თავის ძალ-ღონეს
ანდომებდა ცოდნის შეძენას. მან შეისწავლა ჰერაკლიტე, სოკ-
რატე, პლატონის „რესპუბლიკა“, ეპიკურე. გადაიკითხა ბეკო-
ნი, კანტი, ბორელი, დრეპერი, ლებოკი, სპენსერი, „Современный
социализм“ ლაველესი, „მცენარეთა მეტამორფოზა“ გოეტესი,
დაბოლოს, მიუბრუნდა ჰომეროსს, ვირგილიუსს, დანტეს, მილ-
ტონს, შექსპირს, ბაირონს და ფოხტს. მოლემოტისა და ბიუნ-
ნერის მატერიალიზმში იგი ეძებდა პასუხს ნივთისა და სულის
რაობაზე.“

„ლუკა ეკუთვნოდა იმ მძლავრ მოძრაობას, რომლის ლო-
ზუნგად ერთ დროს იყო: „ცხოვრება თანახმად ბუნებისა“. იგი
ვერ ეტეოდა პროგრამით განსაზღვრულ ჩარჩოებში, არ სწამ-
და პრაქტიციზმი, „პატარა საქმეები“, იგი სპობდა ქვეყნის ბო-
როტებას ერთის ხელის დაკვრით: „ყველაფერი ან არაფერი“. ამ
თვალსაზრისით ლუკა ანარქისტი, „შერქლნმკმ“ იყო, მისი
ფოიერბახული ჰუმანიზმი აღწევდა კოსმიურ საზღვრამდე. ლუ-
კა სტოიკი, ფიზიკულტურის მოტრფიალე პირველი ქართველი
ელინია, რომელიც შეედუღა ბუნებას. აი ფაქტი: ერთ მშვენიერ
დღეს ლუკამ შემოიარა ჩემთან ფოხტის ფიზიოლოგიური წერი-

ლებისა და ბუნების „ძალა და მატერიის“ წასაღებად. იმჟამად მე ვკითხულობდი ბარიატინსკის ლექსს „გოეთეს სიკვდილზე“:

**“С природой одной он жизнью дышал,
Ручья разумел лепетанье,
И говор древесных листов понимал,
И чувствовал трав прозябанье,
И была ему звездная книга ясна,
И с ним говорила морская волна“.**

მთელი მთა სიხარულისა ამოსკდა ლუკას გულიდან, ციბრუტივით ტრიალებდა ჩემს ოთახში და გაიძახოდა: „აი, ჩემი სარკე, მე ვიპოვე ჩემი თავი!“ (46, 96).

ვაჟა თავის პოვნაში გულისხმობდა, ალბათ ბუნების მგონობას. ჩანს, თავიდანვე რაღაც თავისებური ოცნებები ჰქონდა, რაღაცა ანუხებდა, მაგრამ ჯერ თვითონაც არ ესმოდა რა. მისთვისაც გაურკვეველი გრძნობები იყო, ბუნდოვანი და ჩამოუყალიბებელი. ბარიატინსკის ლექსმა, ეტყობა ბიძგი მისცა თავის გრძნობებში გარკვევისაკენ; არწმუნებინა თავისი აზრები, რომელთა ღირებულებაში, ჩანს, ჯერ კიდევ ორჭოფობდა.

ვაჟა გორის სემინარიაში სწავლისას, გარდა იმისა რომ ბევრს კითხულობდა, ბევრსაც წერდა. ხშირად დაფიქრებული დადიოდა, განმარტოვდებოდა და ისეთ დროს, როცა ბავშვები ერთ ალიაქოთში იყვნენ, ვაჟა მიჯდებოდა სადმე განმარტოებით, ამოიღებდა ჯიბიდან ბლოკნოტს და გაჩქარებული რაღაცას წერდა. თავის ნაწერებს, უფრო კი ლექსებს, ხშირად აკითხებდნენ ვინრო წრეში და ყველას ძალიან მოსწონდა. მის ნაცნობ-მეგობრებს კი არადა, ვაჟას ნაწერები უკვე კარგა ხანია რედაქციებსაც მოსწონდა. ჯერ კიდევ სემინარიაში შესვლამდე, 1879 წელს, გაზეთ „დროებაში“ გამოქვეყნდა მისი პირველი კორესპონდენციები „წერილი ხევსურეთიდან“, „ფშავის ხევიდან“, „წერილი ხევსურეთიდან, სოფ. ხახმატი“. ვაჟას სურდა ქართველი საზოგადოებისათვის გაეცნო ფშავი, ხევსურეთი, რომელთა შესახებაც იმდროინდელმა საზოგადოებამ თითქმის არაფერი არ იცოდა. ან კი რა უნდა სცოდნოდათ მაშინ, უგზობობით მოწყვეტილობის ჟამს, როცა ჩვენს დროში, ასფალტიანი გზების პი-

რობებშიც ისევე ძალიან ბევრს მოხევე და ხევსური ვერ გაურჩევია, მთიელსა და მთიულს ერთმანეთში ურევს.

ვაჟას სემინარიაში თავის წრე ჰყავდა, სულიერი მეგობრები, ვისთანაც ამ თავის შემოქმედებით ამბებზე საუბრობდა, ვინც ერთმანეთს უზიარებდა თავის ნაფიქრალ-ნააზრევს. ერთმანეთს სასარგებლო შენიშვნებსა და რჩევებს აძლევდნენ. ესენი იყვნენ შემდეგში ცნობილი მოღვაწენი: დავით კარიჭაშვილი, ლადო აღნიაშვილი, ალექსანდრე ნათაძე, თეოფილე ხუსკივაძე, ბაჩანა და სხვები. აი, ამათთან ერთად ლუკა იყო ერთ-ერთი მოთავე სემინარიაში ხელნაწერი ჟურნალის „რიჟრაჟის“ დაარსებისა. მათ ამ ჟურნალში განანილებული ჰქონდათ განყოფილებები. ლუკას პოეზია ებარა, მოთავე კი ლადო აღნიაშვილი იყო. მან საჭირო თანხის შეგროვებაც კი შეძლო სხვადასხვა მეცენატისაგან. თვით სემინარიის რექტორს, სემიონოვს, პროგრესულად განწყობილ რუს ინტელიგენტს, ხუთი მანეთი მიუცია და თან უთქვამს: „იმუშავეთ, იმუშავეთ, ჩემო გვრიტებო! თქვენი ქვეყანა გაგებულ მუშაობას მოელის და შრომას შეუჩვევლი, მოუმზადებელი მუშა ველარაფერს გაუკეთებს თქვენს სათაყვანებელ სამშობლოს. მე ცენზორს არ გინიშნავთ, როგორც ამ შემთხვევაში სხვა სკოლებში იციან ხოლმე, ჩემი თქვენდამი სიყვარული და თქვენი სიყვარულიც ჩემდამი თავდებია იმისი, რომ ბოროტად არ მოიხმართ ჩემს ნდობას“ (ალ. ნათაძე). (46, 99)


პირველ ნომერში, რომლის ათი ეგზემპლარი გადაუწერი-ნებიათ ბაჩანასათვის, როგორც კარგი კალიგრაფიის მქონესათვის, ლუკა რაზიკაშვილისა ერთი პოემა გაუშვიათ – „ყარსის ბოლოს“ და ერთიც ლექსი – „მელოდია“. ამ ჟურნალის ერთი ეგზემპლარი ილია ჭავჭავაძისათვის გაუგზავნიათ, ერთიც – „დროების“ რედაქციისთვის. დაუგზავნიათ სხვებისთვისაც. ჟურნალს მონივნავე ქართველი ინტელიგენციის დიდი მოწონება დაუმსახურებია. განსაკუთრებით აქტიური ყოფილა გორის ინტელიგენციისა და მათი მეთაურების, სოფრომ მგალობლიშვილისა და სხვათა, გამომხაურება. მათ მოუწადინებიათ ჟურნალის თანამშრომლების ახლოს გაცნობა და ისინი ვახშამზე მიუპატიჟებიათ. იმჟამად ანტონ ფურცელაძე გორში იმყოფებოდა სტუმრად კერესელიძესთან. ბევრი საქებარი სიტყვა უთქვამთ, განსაკუთრებით ვაჟა შეუქიათ. „სოფრომი და ანტონი

თავის ალტაცებულ თვალებს არ ამორებდნენ ვაჟა-ფშაველას, ამ ჩაკირკიტებულ ამაცსა და მრისხანე მთის არწივს. თვითონ მას წააკითხეს თავისი წაწარმოებები და ისეთი დიდი შთაბეჭდილება მოახდინა, რომ ჩვენს ალტაცებას საზღვარი არ ჰქონდა: ყველას სიხარულის ცრემლები მოგვადგა. ჩვენმა მწერლებმა სოფრომმა და ანტონმა მიიკრეს იგი გულზე, ეს ჩვენი ქვეყნის დიდება”. (ალ. ნათაძე) (46, 101).

ვაჟა გულმოდგინედ სწავლობდა აგრეთვე რუსულ ენას, რადგანაც უამისოდ შეუძლებელი იქნებოდა რუსული და ევროპული ლიტერატურის გაცნობა. იმ დროისთვის უკვე საკმაოდ კარგად სცოდნია რუსული ენა, იმდენად, რომ თარგმნიდა კიდევ. მანამდე, 1880 წელს, ჟურნალ „ივერიაში“ დაიბეჭდა მის მიერ თარგმნილი ერკმან-შატრიანის მოთხრობა „ფეოდალის აღზრდა“, ხოლო 1882 წელს უთარგმნია ოსტროვსკისა და სოლოვიოვის პიესა „ბედნიერი დღე“.

უნდა ვიფიქროთ, რომ სემიონოვს გულწრფელად ახარებდა თავისი მოღვაწეობის შედეგები, იმ სიახლეთა შედეგები, რაც მაშინ მისი თუ სხვათა წყალობით გორის სემინარიაში იწერებოდა. ის თავისი პედაგოგიური შეხედულებებით დიდი რუსი პედაგოგის უშინსკის მოწაფე იყო, დიდად განათლებული, პროგრესული მოღვაწე და კარგი სახელმძღვანელოების ავტორი.

სიცოცხლითა და ენერგიით სავსე ვაჟა მთელი არსებით ჩაება ყველა იმ საქმიანობაში, რაშიც ჩაბმული იყო იმდროინდელი ქართველი ინტელიგენცია და, კერძოდ, გორის ინტელიგენცია. კაცმა რომ თქვას, თითქმის აღარაფერი ხდებოდა ისეთი, ვაჟა რომ არ ყოფილიყო მასთან დაკავშირებული. სემინარიის მეორე კლასში იყო, როცა გორის ხალხოსანთა წრეს დაუახლოვდა და მისი ერთერთი აქტიური მონაწილე გახდა. ამ მხრივ ვაჟაზე დიდი გავლენა მოახდინა ციმბირში გადასახლებიდან ახლად დაბრუნებულმა მიხეილ ყიფიანმა. სემიონოვმა მიხეილის წარსული კარგად იცოდა, მაგრამ მაინც გაბედა და მიიწვია თავის სასწავლებელში ქართული ენისა და ლიტერატურის მასწავლებლად. აქ ყიფიანმა გაშალა დიდი მუშაობა და ხალხოსნურ მოძრაობაში ჩააბა გორის მოწინავე ახალგაზრდობა, მათ შორის ვაჟა-ფშაველაც. ისინი აგროვებდნენ ინფორმაციას ხალხის ცხოვრების შესახებ და მოხსენებების სახით კითხულობდნენ. ამასთანავე,



ვაჟას ატესტატი

ამუშავებდნენ რეფერატებს საქართველოს ისტორიიდან. ორი რეფერატი ვაჟას წაუკითხავს – დავით აღმაშენებელსა და თამარ მეფეზე. პავლე მღვდელმა ტყუილად არ შეაყვარა ისინი! „მაშინდელი ვაჟა ნამდვილი მთის არწივი იყო, ყოჩაღი, გამბედავი, შეუპოვარი, მეგობრისათვის თავდადებული, გამჭრიახი, წყლიანი მოლაპარაკე“. (ს. მგალობლიშვილი).

ვაჟა გულიანად კი ჩაება ხალხოსნურ მოძრაობაში, მაგრამ მალე რატომღაც აიცრუა გული. მალევე მიხვდა, რაღაც არ იყო მათი საქმიანობა დიდი იმედების მომცემი. თანაც უკვე შემოქმედებით წვას განიცდიდა და აღარ ეცალა პოლიტიკისა და კრებებისათვის, საიდანაც ბევრს არაფერს სიკეთეს ელოდა. იგივე ალ. სალარიძე ვაჟას ხალხოსნურ მოძრაობაში მონაწილეობის შესახებ წერს: „ლუკა რაზიკაშვილს (ვაჟა-ფშაველას) ნაკლებად იცნობდნენ სემინარიელები, იგი წინდახედულად და გაფრთხი-

ლებით მუშაობდა ჩვენთან. ამიტომ ამხანაგები მასზე ამბობდნენ: „აი, ადამიანი, რომელიც დადის მარტორქად“. როდესაც ბურსაკები საყვედურს ეუბნებოდნენ ლუკას – რატომ არ დადინხარ კრებებზეო, მისი პასუხი იყო: „მე ვტრიალებ ჩემი ღერძის ირგვლივ“.

1882 წელს უფლისციხის კლდეში გამოკვეთილ დარბაზში ხალხოსანთა საიდუმლო შეკრებაზეც წარმოთქვა სიტყვა ვაჟა-ფშაველამ, სადაც ლაპარაკობდა ფშავ-ხევსურეთში მიწის განაწილების საკითხზე. ეს სიტყვა ბარის მდგომარეობის მიხედვით იყო გაფორმებული, სხვათა სიტყვების მიმსგავსებულად, სოლიდარობისთვის, თორემ მთაში მიწების საკითხი არა მდგარა არასოდეს. თავად-აზნაურობა იქ არა ყოფილა და მიწები თვითონ მთიელების საკუთრება იყო. სოფლელები ურთიერთ შეთანხმებით, წილისყრით ინაწილებდნენ სახნავ-სათესებსაც და სათიბებსაც (ტყე და საძოვრები საერთო იყო). ასე იყო საკოლმეურნეო რეფორმებამდე, ჩვენი საუკუნის 40-50-იან წლებამდე.

მთას ის სატიკივარი არა ჰქონდა, რასაც იქ ლაპარაკობდნენ. ვაჟას ბარის სოციალური საკითხების მიხედვით უნდა აენყო თავის გამოსვლები, რაც არც კარგად იცოდა და არც მთავარ საკითხად მიაჩნდა. იქ არავინ ლაპარაკობდა უფრო მთავარზე, – ეროვნული დამოუკიდებლობისათვის ბრძოლაზე. ასეთი მიდგომა საკითხებისადმი გამოააშკარავა შემდგომში ვაჟას შემოქმედებამ – სოციალური საკითხები მას ნაკლებად აინტერესებდა, ის უფრო მაღალ პრობლემებს ეჭიდებოდა.

ვერ მოერგო ვაჟა ხალხოსნობას. ამას ამჩნევდნენ და მისი უკმაყოფილონი იყვნენ. ვაჟამ კი იცოდა თავის მისია, თავისი უმთავრესი საქმე და არ უნდოდა ერთი მხრივ სასარგებლო, მაგრამ მაინც წვრილმანი საქმისათვის შეენირა ენერგია და შესაძლოა თავიც.

„პირველხანობით ლუკა აღტაცებული იყო მიშო ყიფიანის ქადაგებით. მან ბევრი რევოლუციური ლექსი ზეპირად დაისწავლა და სიამოვნებით მღეროდა. მაგრამ ასეთმა გატაცებამ დიდხანს არ გასტანა. ლუკა ხალხისათვის აღარ დადიოდა კრებებზე, ხანდახან სულ აღარ ესწრებოდა... ინტერესი პოლიტიკისადმი თითქმის დაჰკარგა და მისი ადგილი ლიტერატურამ დაიკავა. ამ

დროს ლუკა გატაცებით კითხულობდა რუსული და ევროპული ლიტერატურიდან სხვადასხვა ნაწარმოებებს.

რამდენადაც მე შევამჩნიე, ლუკა რაზიკაშვილი მეტად მგრძობიარე პიროვნება იყო. სულიერი განცდა ხშირად ეცვლებოდა. ხან იყო მეტად მხიარული და საუბრის მოყვარე, ხან სულ ოცნებობდა და ასეთ დროს ლაპარაკსაც ერიდებოდა, ხან ბრძოლას ნატრულობდა და ყველიერში კრივში მონაწილეობასაც იღებდა“.

ვაჟა-ფშაველამ ს.მგალობლიშვილის ბინაზე წაიკითხა მოხსენება იოსებ დავითაშვილის შემოქმედების შესახებ. მან ძირითადად ამ ლექსების დადებითი მხარე აღნიშნა: „მე წინააღმდეგი ვარ იმ შაბლონური დაფასებისა, რომელიც ამ ბოლო დროს ზოგმა მოკრიტიკემ ჩვეულებად გაიხადა: გადაფურცლავენ წიგნაკს, ამოიკითხავენ ავტორის გვარს და თუ ის ნაკლებ ცნობილია, გაბედულად წამოიძახებენ: ეს უნიჭოა... ეს ლექსი არ ვარგა, ამას საშუალო ნიჭი აქვსო, იმას რითმა არ უვარგა და სხვა ამგვარი. ასეთი სუბიექტური საზომით მგოსნის დაფასება არა თუ მიუღებელია, არამედ მავნეა და უნაყოფო“.

რუსულის მასწავლებელმა ნოვოსპასკიმ ლუკას დაავალა დაენერა თემა: „ლექსი „მერანი“, როგორც ბარათაშვილის მსოფლმხედველობის გამომხატველი“. თემა შესანიშნავი გამოუვიდა და დიდი ინტერესიც გამოიწვია. მსმენელნი ტაშის გრილით შეხვდნენ. ბარათაშვილი შედარებული იყო ბაირონთან,

რუსოსთან, გოეთესთან და დღევანდელი თვალსაზრისით ძალზედ სწორი და საინტერესო დასკვნები იყო გაკეთებული.

1882 წლის ივნისში ლუკა რაზიკაშვილმა წარჩინებით დაამთავრა გორის საოსტატო სემინარია. პედსაბჭოს დადგენილებით საჩუქრად გადასცეს იან ამოს კომენსკის „დიდაქტიკა“ და „ახალი აღთქმა“. სემინარიის კურსდამთავრების ატესტატში ყველა საგანში „ხუთი“ უწერია. ერთადერთი „ოთხი“ ხატვა-ხაზვაში მიუღია.

სემინარიის დამთავრებასთან დაკავშირებით ალ. გარსევანიშვილმა დაგვიტოვა ვრცელი მოგონება: „სემინარიის დირექტორს სემიონოვს ჩვეულებად ჰქონდა ოფიციალური აქტის გარდა სადილის გამართვა კურსდამთავრებულთა პატივსაცე-

მად. იმ წელს, როგორც ვიცი, ეს არ მომხდარა. მიშო ყიფიანის დატუსაღებამ და საერთოდ გამეფებულმა რეაქციამ სულიერად ყველანი დასცა, ააშფოთა. ამავე დროს ხმა გავერცელდა, რომ სემიონოვი, როგორც უკიდურესი ლიბერალი, მოხსნილი იქნება სამსახურიდანო. ეს იყო მიზეზი, რომ სემიონოვს ტრადიციული სადილი იმ ზაფხულს არ გაუმართავს.

სამაგიეროდ, ვაჟა-ფშაველას და ზოგიერთი მისი ამხანაგის პატივისცემად სადილი გამართა ჩემმა ნათესავმა, რომელიც სოფელ ხიდისთავში ცხოვრობდა. ეს იყო ვასო მელვინეთუხუცესი, გორის ხალხოსანთა ჯგუფის აქტიური წევრი. იგი იღებდა მხურვალე მონაწილეობას გორის სცენისმოყვარეთა წრეში და ასრულებდა მთავარ როლებს. გარეგნობით იყო ლამაზი ყმაწვილი კაცი, ახლად წვერ-ულვაშ დამშვენებული.

ვაჟა-ფშაველას, მოსწავლეების გარდა, დიდად აფასებდა ბევრი ჩვენი ინტელიგენტიც. ერთი მათგანი იყო მელვინეთუხუცესი. იგი ისე იყო გატაცებული ხალხოსნური მოძღვრებით, რომ მამულის ნახევარი გლეხებს უფასოდ გადასცა, თავისთვის კი დაიტოვა ვენახები, რომლებიც მისი სახლის ახლოს მდებარეობდა.

იმ სადილზე, ვაჟას ამხანაგების გარდა, დაესწრნენ ტბილისიდან მოსული კურსდამთავრებული გიმნაზიელები – ივანე რატიშვილი და მიხეილ გედევანიშვილი, შემდეგში ცნობილი ექიმი, რომელმაც თავის ხარჯზე ილია ჭავჭავაძის თხზულებები გამოსცა.

სადილობამდე სტუმრები დიდი კაკლის ქვეშ იხსდნენ. აქ გამართა საინტერესო საუბარი ლიტერატურულ თემაზე. პოლიტიკის შესახებ ხმა არავის ამოუღია. ივანე რატიშვილმა ვაჟას, სხვათა შორის, უთხრა: თქვენს რეფერატს ბარათაშვილის შესახებ აქებენ, კარგი იქნება თუ მის შინაარსს გაგვაცნობო. ვაჟა სიამოვნებით დათანხმდა და მხატვრული ენით გადმოგვცა მოკლედ რეფერატის შინაარსი. ამის შემდეგ ივ. რატიშვილმა ბევრი ილაპარაკა სოციოლოგიის ერთერთ მიმართულებაზე, რომელიც დიდ მნიშვნელობას აძლევს ისტორიაში პიროვნებას.

მშვენიერი ქართული ენით გადმოცემულმა სიტყვამ კარგი შთაბეჭდილება დატოვა მსმენელებზე. ვაჟამ ჩაინერა ყველა ის მასალა, რომელიც რატიშვილმა დაასახელა.

სწორედ ამ დროს ეტლით მობრძანდა დირექტორი სემიონოვი. ჩვენ ყველანი ფეხზე წამოვხტით და ვენახის კარებთან მივეგებეთ. ახალგაზრდების დანახვაზე დირექტორს სახე გაუბრწყინდა და მხიარული ხმით შემოგვცა:

**„Друзья, дадим друг другу руки,
И смело двинемся вперед...
Пусть под знаменем науки
Союз наш крепнет и растет“.**

– ამ ლექსის გამო, – თქვა სემიონოვმა, – ავტორი შორეულ ქვეყანაში გადაასახლეს, მე კი მირჩევენ გორიდან წასვლას მხოლოდ იმიტომ, რომ ახალთაობას ჰუმანურად ვეპყრობი და საზოგადოებას ვემსახურები... ამასაც ავიტანთ...

სადილი მოწყობილი იყო ვენახის ბოლოს, ერთი დიდი ხეივანის ქვეშ.

იმ დღის გმირებად იყვნენ ერთის მხრივ, თვით ჩვენი პურმარილიანი მასპინძელი ვასო და მეორე მხრით – სემიონოვი.

შუა სადილის დროს მასპინძელმა მოატანინა ჭიანური და დიდი გრძნობით ბაიათები დაუკრა. გაისმა ტკბილი მელოდიის ხმა, რომელმაც ალტაცებაში მოიყვანა ყველანი. შემდეგ სამაგალითოდ დაუკრა ლეკურიც. გაჩაღდა ცეკვა. გამხიარულდნენ სტუმრები და ვაჟას სადღეგრძელო ხელმეორედ გადაჰკრეს...

რაც შეეხება სემიონოვს, მან თავისი მჭერმეტყველური სიტყვებით პირდაპირ მოხიბლა სადილზე დამსწრენი:

„ძვირფასო მოსწავლენო და ამჟამად კი ჩემო მეგობრებო! – მიმართა მან კურსდამთავრებულ სემინარიელებს. – ცოდნით შეიარაღებულთ დღეიდან, თქვენ ხელი უნდა მოჰკიდოთ საზოგადოებრივ მოღვაწეობას. კეთილი და პატიოსანი! გახსოვდეთ მხოლოდ, რომ მიზნის მისაღწევად მართო ცოდნა არა კმარა; საჭიროა ამასთან ერთად მტკიცე ხასიათის შემუშავება. რა არის ხასიათი? ესაა ჰარმონიული, ასე ვთქვათ, შეკავშირება სამი ფსიქიური ფაქტორისა: გონების, გრძნობის და ნებისყოფისა. მტკიცე ხასიათს მოკლებულ მოქალაქეს დასტანჯავს წუთისოფელი – მე ამას ვამბობ ხაზგასმით... ამიტომ გულწრფელად გირჩევთ, ამ გარემოებას სერიოზული ყურადღება მიაქციოთ.

განივითაროთ თვითმოქმედების უნარი, მიეჩვიოთ დისციპლინას, სხვებიც ამას მიაჩვიოთ. ეცადეთ ნაკისრი ვალდებულება ზუსტად აასრულოთ და მაშინ... მხოლოდ მაშინ იგრძნობთ სიხარულს, რომელიც გამოიწვევს თქვენში მოქმედების ხალისსაც... თუ განახორციელებთ ამ დარიგებას, თქვენ იქნებით ნამდვილი სახალხო მასწავლებელი და არა სოფლის მასწავლებელი, როგორც ეს რამდენიმე წლის წინათ ბრძანა რეაქციულმა პედაგოგმა მოსალევსკიმ, კავკასიის ოლქის მზრუნველის თანაშემწემ. კერძოდ, შენ, ჩემო ლუკა! – მიმართა ორატორმა ვაჟას, – გეტყვი იმას, რაც შენთვის ხშირად მითქვამს! ბუნებით პოეტო, შენი ტალანტი არ დამარხო. განავითარე გონება, დააკვირდი და შეისწავლე ცხოვრება, იკითხე სხვადასხვა მიმართულების წიგნები და მაშინ შესძლებ, რომ ყოველმხრივ ჩვენი სინამდვილე დაასურათო. არ დაივიწყო, ჩემო ძვირფასო, ის სკოლა, რომელმაც შენ აღგზარდა, არ დაივიწყო აგრეთვე შენი კეთილი მასწავლებლები და მათ შორის მეც”...

აქ შეწყვიტა სემიონოვმა სიტყვა, თვალცრემლიანი მიუახლოვდა ვაჟას და სამჯერ გადაკოცნა... დანარჩენებს ხელი ჩამოართვა. ორმა მოწაფემ დირექტორს ხელზე აკოცა. ვაჟა-ფშაველამ აღელვებული ხმით ასე უპასუხა თავის საყვარელ დირექტორს:

„ძვირფასო მასწავლებლო, ნიჭიერო პედაგოგო და იშვიათო ადამიანო! გაძღვეთ პატიოსან სიტყვას, რომ თქვენს ღვანლს სიკვდილამდე არ დავივიწყებთ. თქვენი სახელი, როგორც სიმბოლო მოწაფეთა გონებრივი წინსვლისა, ჩვენ შორის წმინდა იქნება მარადის. ასეთსავე მაღალ გრძნობას განვიცდიტ ჩვენ იმ სკოლის წინაშე, რომელმაც აღგზარდა და თქვენი ხელმძღვანელობით კეთილი მომავლისაკენ გზა გვიჩვენა”. (46, 155-157).

აი, ასეთი დიდებული სკოლა გაიარა ვაჟამ გორში. სემინარია და გორის მოწინავე ახალგაზრდობა, მოწინავე ინტელიგენცია ის სასიამოვნო გარემო იყო, სადაც ვაჟამ თელავისა და თბილისის სულის შემხუთავი ატმოსფეროს შემდეგ შვევით ამოისუნთქა, სადაც მოიპოვა ის საკვები, რაც მის სულს სჭირდებოდა. ბედნიერ დამთხვევასავით იყო ისიც, რომ ვაჟას გორში სწავლისას იქ მოღვაწეობდნენ სემიონოვი და მიშო ყიფიანი. თანაც მანამდე ცენზორთა და რუსიფიკატორთა ფხიზელი თვალი უმ-

თავრესად თბილისს დასტრიალებდა. მათთვის ზარდამცემი საშროება კი სწორედ გორში იბრძმებოდა.

აი, ასეთი განწყობით, იმედებით, ქვეყნისა და ხალხისთვის სამსახურის დიდი წყურვილით, დიდი ცეცხლით აღგზნებული ემზადებოდა ვაჟა პრაქტიკული თუ შემოქმედებითი მოღვაწეობისათვის.

ტოლათსოფელი

გორის საოსტატო (სამასწავლებლო) სემინარიის დამთავრების- თანავე, 1882 წლის 1 ივლისიდან ვაჟა სკოლის მასწავლებლად გაანაწილეს სოფელ ტოლათსოფელში, ერწოში, თიანეთის მაზრაში (დღევანდელი თიანეთის რაიონი). ეს სკოლა ამტნისხევის სკოლად იწოდებოდა.

ამტნისხევი ეწოდებოდა დღევანდელ სოფელ ღულელებს. ვარაუდობენ, რომ სახელწოდება „ამტნისხევი“ მომდინარეობს ერთი ასურელი მამათაგანის – ანტონ მარტყოფელისაგან, რომელიც VI საუკუნეში მოსულა საქართველოში ქ. ედისიდან სხვა განსწავლულ ქართველებთან ერთად და განმარტობით, მარტოდ ცხოვრობდა დღევანდელი მარტყოფის სიახლოვეს. მას სამისიონეროდ უმოგზაურია საქართველოში და მრავალი წარმართი მოუქრისტიანებია. თიანეთის მხარეშიც მისულა და ერწოში თავისი სახელობის ეკლესია დაუარსებია. იქვე ჩამომდინარ ხევსაც და მერე სოფელსაც ანტონის ხევი უწოდა ხალხმა. ანტონის ხევი კი დროთა ვითარებაში ფონეტიკურად იცვალა: რაკი მთიელებმა თანდათან კვლავ წარმართობისკენ იბრუნეს პირი და ის ეკლესიაც დაინგრა, ანტონი და მისი სახელიც მიავიწყდათ და ანტონის ხევი ჯერ „ანტნისხევად“ იქცა, მერე – „ამტნისხევად!“ (ჯ. ლომაშვილი).

1858 წელს კავკასიაში ქრისტიანობის აღმდგენელმა საზოგადოებამ ტოლათსოფელში ანტონისავე სახელზე აღადგინა ეკლესია. 1872 წელს კი ამავე საზოგადოებამ ეკლესიასთან გახსნა დაწყებითი სკოლა და უწოდეს – ამტნისხევის სკოლა. სკოლას შერჩა ეს სახელი, სოფლის სახელი კი „ღულელებმა“ შეცვალა, რადგან იქ ხევსურეთიდან, სოფელ ღულიდან, ჩამოსახლებუ-

ლან ხევსურები. აქვე გვერდზე გადაბმული იყო ტოლათსოფელი, ტოლაშვილების უბანი, სკოლა იქ იყო და ამიტომ ტოლათსოფლის სკოლადაც მოიხსენიებოდა.

გორის მონინავე საზოგადოებისაგან თავზეხელგადასმული და დიდი საქმეებისათვის გზადალოცვილი ვაჟა დიდი ენთუზიაზმით, დიდი სიყვარულით შეუდგა საქმეს. უკვე საკმაოდ სახელმწიფოებრივ ვაჟაკს თავისიანები ნაცნობ-ნათესავეები სიხარულითა და იმედით შეხვდნენ – ფშაველ-ხევსურთ ხომ იშვიათად ჰყავდათ მაშინ ნასწავლი კაცი. ისინიც ისე თვლიდნენ და თვით ვაჟაც, რომ მათი ფარ-ხმალი უნდა ყოფილიყო, მათი ქომაგი. ვაჟას ამაში ეჭვიც არ ეპარებოდა, არც შიში ჰქონდა რამისა. მაგრამ მან ჯერ კიდევ არ იცოდა, არ სჯეროდა, რა უძლეველია ცხოვრების უკუღმართობა, რა დონკიხოტობაა მასთან შეხეთქებული ჭიდილი. არ იცოდა, რომ ქვეყნის სიკეთისათვის მეტრძოლ ერთეულებს მაშინვე წინ აღუდგება ბოროტთა და მძარცველთა საოცრად ორგანიზებული, საოცრად დაუნდობელი ძალა.

ქვეყნისა და ხალხის სიკეთისათვის ანთებული მივიდა ვაჟა ტოლათსოფელში. მივიდა იმ იმედით, რომ ბავშვებს აღზრდიდა პატრიოტებად, მომავალ გმირებად, თავის თანამებრძოლებად, განათლებულ, მოაზროვნე ადამიანებად.

თავდავინწყებით შეუდგა ვაჟა ბავშვებთან მეცადინეობას, სკოლის საკითხების მოგვარებას. სკოლის შენობა სამოთახიანი იყო. ერთში გაკვეთილები ტარდებოდა, მეორეში – შორი სოფლებიდან მოყვანილი ბავშვები ცხოვრობდნენ, მესამეში – მასწავლებელი. ვაჟა გაკვეთილების შემდეგაც ისევ ბავშვებს დასტრიალებდა თავს. ხშირად ღამითაც უკითხავდა კლასგარეშე საკითხავ წიგნებს, მაგრამ წიგნები აკლდა. ამიტომ ვაჟამ 1882 წლის შემოდგომაზევე თხოვნით მიმართა „ქართველთა შორის წერა-კითხვის გამავრცელებელ საზოგადოებას“:

„პატივი მაქვს ვაცნობო ზემოხსენებული საზოგადოების მმართველობას, რომ ჩემდამი რწმუნებული სკოლა, რომელშიც იმყოფება ოცდაათამდე ყმაწვილი და ათამდე ქალი, ექვემდებარება კავკასიაში ქრისტიანობის აღმდგენელ საზოგადოებას. რადგანაც იგი საზოგადოება გულგრილად უცქერის დედაენაზე სწავლის მსვლელობას, ამიტომ არ აკმაყოფილებს ამ მოთხოვ-

ნილებას და არც გზავნის სახელმძღვანელო წიგნებს სამშობლო ენაზე. ამისთვისა ვსთხოვ საზოგადოების მმართველობას უმორჩილესად, დააკმაყოფილოს ეს ჩემი თხოვნა და გამომიგზავნოს ხუთი ეკზემპლარი „ბუნების-კარი“ და ხუთმეტი „დედაენა“.

ვაჟას თხოვნა წერა-კითხვის საზოგადოების გამგეობამ განიხილა ი. ჭავჭავაძის თავმჯდომარეობით და დააკმაყოფილეს: წიგნები გამოუგზავნეს. ქრისტიანობის აღმდგენელი საზოგადოებისათვის, რა თქმა უნდა, სასიამოვნო არ იქნებოდა, ვაჟასაგან სხვა ორგანიზაციასთან მათი მოურიდელები ლანძღვა, მაგრამ ვაჟა საამისოდ იყო სწორედ შემართული – არავის არაფერში მორიდებოდა, არ დაენდო, ვინც საქვეყნო საქმეს უგულოდ ეკიდებოდა, ღალატობდა.

თავისუფალ დროს ან საბადურის ტყეებში დადიოდა სანადიროდ, ან ერწოს ვაკეზე ჩახლართულ მდინარე აძეძე იხვებს ხოცავდა, ან თავის ტოლებს საჯილდაო ქვის აწვეა-გადაგდებაში ეჯიბრებოდა, ანდა გლეხებთან ჩამოჯდებოდა საფიხვნოდ. თუ ვისმე საჩივარი ან სხვა რამ ქალაქის დაწერა დასჭირდებოდა, უწერდა, თავადაც ექომაგებოდა, მღვდელსა და მამასახლისს არავის დააჩაგვრინებდა. ჯერჯერობით ყველგან თავისი გაჰქონდა და ამან კიდევ უფრო მეტი თავდაჯერებულობა შეჰმატა. შეიძლება ითქვას, ჯერ მისულიც არ იყო ერწოში, რომ იმავე 1882 წლის ოქტომბრის დასაწყისში „ლ. კათაკმეველის“ ფსევდონიმით გაზეთ „დროებაში“ გამოაქუხა მწვავე კრიტიკული სტატია „ჭრელი ამბები“ (წერილი ერწო-თიანეთიდან). ამ წერილში ერთი ხელის მოსმით, უშიშრად, მთელი პირდაპირობით სულ ერთმანეთს მიაყოლა „ბრწყინვალე თავადი ხიმშიაშვილი“, რომელსაც დუშეთში, ორმოცი ვერსის მანძილზე სუნი დაუყრია ერწოში სარჩოს შოვნისა და საეკლესიო ადგილ-მამულები თაღლითურად მიუსაკუთრებია, „ხალხი უსინდისოდ დაუბეგრია და „ცეცხლში ჩაუყრია“. ხიმშიაშვილის უკანონობა მთავრობას თავისი მხარდაჭერით განუმტკიცებია: „იმ წამს დაბადებულან ყაზახები, მოუთოკავთ წინააღმდეგები და გაუსტუმრებიათ გასასწორებელ-მოსაჭკვიანებელ სახლში“.

ვაჟა აქ აკაკი წერეთლის ლექსს იშველიებს:

**შ„უსამართლობა წინ მიდის კანონიერის გზებითა:
სრული უფლება ეძლევა სხვადასხვა კონგრესებითა“.**

„მას აქეთია საჩივარი მოქმედებს, მაგრამ ნამოქმედარი გლეხების სასარგებლოდ არ ჩანს. ხალხის თხოვნა და ღალატება მინაში იმარხება. მგონია, თორმეტი თხოვნა ეწყოს ზოგი კანტორაში, სხვა – სამეფო ქონებათა უპრავლენიაში, ვინ იცის – ნახევარი იმათგანი ჩირჩილმა შეჭამა და ნახევარი „ვინმემ“ „ვინმეს“ გულისათვის გადაყლაპა?!“

ბატონიც, ამით ფრთებშესხმული, ხმარობს სისხლისა და ტვინის გამომსრუტავ საქციელს. დღიურზე იღებს (მოსავლის-მოუსავლიანობის დროს, სულ ერთია) სამ მერკას, რომელიც შეადგენს თითქმის ორ კოდს; ახლა კომლექსურად განერილია: თითო ლიტრა ერბო, ქათამი, კვერცხი, წეკო – ერთი სიტყვით, ყველაფერი, რასაც კი კბილი მოეკიდება... მიკვირს, რომ დედა-კაცის მანდილსაც არ დაადო იჯარა!

...ერთ საცოდაობას კიდევ ეს ბეგარა წარმოადგენს: მოვა ერთი ინჟინერი „დაპლანავს“ თავის თვალის ხაზზე, ხალხი გას-თხრის ამ გზას; მოვა მეორე, ის კიდევ სხვაგან უჩვენებს, მესამე – სხვაგან!”

...ამ მაცდურს (თიანელ ზ. ახალკაცოვს – გ. ხ.) გადაუბირებია ჩვენი სუსტად სიმართლისმოყვარე ჩინოვნიკობა, დაუყენებია თავის კვალზე და შინაურის „პურ-მარილის“ ძალით, როგორც უნდა, ისე მიჰყავს საქმე. ეს ბ. ა-ვი აუკიდებს შარებს, „ძალის“ წარმომადგენელნი კიდევ უსვამენ სალაშინს იმისგან გაკეჭნილ საქმეებს.

აქაური მომრიგებელი მოსამართლე ბ. სიზოვი დაითანხმოს, საკვირველი არ არის, რადგან ყველა კაცი ჩვენს ფუტურო ბოძებზე აშენებულ ცხოვრებაში ემორჩილება „დობილ-ძმობილურ“ კანონებს“.

„...თავის სურვილი წმინდად აღსრულებაშიც მოიყვანა პოლიციის მოხელეებით და ოკრუჟნი სუდის ჩვენების გადაწყვეტილებით“.

„მართლა, სულ თავი-და-თავი კი მავინყდება. ამას წინათ „დროებაში“ იყო შენიშვნა თიანეთის მღვდლების ყოფა-ქცევაზედ, მაგრამ კორესპოდენტს ბევრი დავინყვებია იმათ შესახებ. ეს სულიერნი მამანი სამკვდრო-სანათლაოში აღებულ ფულებს

როდი სჯერდებიან, ადვოკატობაც დაიწყეს! ჩხუბობენ, მერე თავის მრევლს აბარებინებენ, ტყუილად ხალხს აფიცებენ და თავის წმინდა დანაშაულებას თვითონვე ლაფში სტურტნიან“.

აი ასე! ვაჟამ ბრწყინვალე თავად ხიმშიაშვილს მიაყოლა ყველა თაღლითი, ინჟინერი თუ სასამართლოს მოხელე, პოლიციელი თუ მღვდელი. გაზეთმა „დროებამაც“ დიდი გაბედულება გამოიჩინა, როცა ეს თითქმის პოლიტიკური ჟღერადობის წერილი გამოაქვეყნა. წერილი მძლავრი ბომბის აფეთქებას ჰგავდა თიანეთის მაზრაში. მღვდელი თუ ჩინოვნიკი, გლეხი თუ თავადი, კაცი თუ ქალი, დიდი თუ პატარა – ყველა ერთმანეთს შეასკდა. ვინ ლოცავდა ვაჟას და ვინ – ლანძღავდა. იგრძნეს, რომ მოვიდა ისეთი ვილაც, ვინც ძილსა და მოსვენებას დაუკარგავდა ხალხის წურბელებს, ვინც დაურღვევდა მშვიდსა და ბედნიერ ცხოვრებას ხალხის მყვლეფავებს და მტანჯველებს, ვინც ამოღებული ხმალივით დაუდგებოდა დაბეჩავებულთ, სიმართლეს. იგრძნეს და როგორც ყოველთვის, აქაც ბოროტი ძალა უცებ დაირაზმა ვაჟას თავიდან მოსაშორებლად, დაუყოვნებლივ, დაუხანებლად. მაგრამ როგორ? იმას ვერ იტყოდნენ, ტყუილი დაწერაო ან მასწავლებლად არ ვარგაო. საჭირო იყო შანტაჟის მოწყობა, ანკესზე წამოგება. ეს შანტაჟი იკისრა თიანელ გალანძღული მღვდლების მეგობარმა, ამტნისხევის ეკლესიის მღვდელმა აღნიაშვილმა, ვისაც ვაჟას სკოლა ექვემდებარებოდა უშუალოდ.

ჩანაფიქრი ვაჟას მოუთმენელ ხასიათზე იყო აწყობილი, ანკესზე თავისით უნდა წამოგებულიყო: რაკი უსამართლობას ვერ იტანდა, უსამართლობა უნდა ჩაედინათ მის მიმართ. ასე მოაწყო საქმე აღნიაშვილმა.

მღვდლის სახლი და სკოლა ერთიან შემოღობილში იდგა, შუაზე უბრალო ლობე ჰყოფდა. მანამდე რომ ფიქრადაც არ მოსვლია, ესლა აღნიაშვილმა ლობის გადმოწევა მოინადინა და სკოლის ეზოს მისაკუთრება, სადაც ბავშვები თამაშობდნენ ხოლმე და ვაჟაც ფიზკულტურის გაკვეთილებს ატარებდა. ვაჟამ ამისი ნება არ მისცა. მღვდლის მიერ მოყვანილ მუშებს დაუძრო ჩაყრილი მარგილები და გადაუყარა. მღვდელმა აღნიაშვილმა შეუტია. ვაჟამ, როგორც ასეთ დროს სჩვეოდა, სტაცა ხელი, ჯერ ძირს მოისროლა, მერე კი პანლურებით გააცილა სკოლის ეზოდან. მღვდელსაც სწორედ ეს უნდოდა. შევარდა შინ და კარგად

გაშანშალებული საჩივარი აფრინა ქრისტიანობის აღმდგენელ საზოგადოებაში. საჩივარში გარდა თავისი, „წმინდა მამის“, შეურაცხყოფისა, ბევრი უსინდისო ცილისწამებაც ჩანერა ვაჟას მასწავლებლობასთან დაკავშირებით. საქმის გამოსაძიებლად თვით საზოგადოების ინსპექტორი დარსკი ავიდა ერნოს. ვაჟა ცუდად შეხვდა მას, სკოლაშიც კი არ აპირებდა თურმე შეშვებას, მამის თხოვნისთვის რომ არ გაეწია ხათრი, რომელიც შემთხვევით აღმოჩნდა იქ, შვილის სანახავად ჩამოსული. მიუხედავად ამისა, დარსკის მაინც ფაქტი არ უარუყვია და ვაჟას მასწავლებლობისთვის კარგი შეფასება მიუცია, ბავშვების ცოდნის დონითაც კმაყოფილი დარჩენილა. მასწავლებლობა კი მოუნონეს ვაჟას, მაგრამ იძულებული გახადეს „საკუთარი თხოვნის“ საფუძველზე, „ჯანმრთელობის მოშლის საფუძველზე“, განთავისუფლებულიყო სამსახურიდან. ეს მოხდა 1883 წლის გაზაფხულზე.

პირველი შეჭიდება ცხოვრების უკუღმართობასთან, ქვეყნის ბოროტ ძალებთან, მარცხით დამთავრდა. რომ ეგონა, სიმართლის მთქმელს ვერავინ რას გამომრჩებაო, ინტელიგენცია გვერდში ამომიდგებაო, ტყუილი აღმოჩნდა. სიტყვა, კრინტიც კი არავის დაუძრავს მის დასაცავად, არავინ გამოჰქომაგებია. ვაჟა მარტო აღმოჩნდა და ძალზე იოლადაც გაინაპირა მგლების ხროვამ.

ანთებულსა და აბრიალებულ ვაჟას პირველად მაშინ გადაესხა ცივი წყალი საზოგადოებისაგან. ამან ვერ ჩააქრო, რა თქმა უნდა, მისი ცეცხლი, მაგრამ რამდენადმე კი ჩაანელა. ცაში მონავარდე არნივი მიწაზე ჩამოსვა.

პეტერბურგი და კვლავ ჩარგალი

„გულზე მჭირს სამი იარაო“, – იტყვის შემდეგში ვაჟა. ეს პირველი იყო. მაგრამ ვაჟა ისეთი სუსტი პიროვნება არ იყო, რომ ასეთ ჭრილობასა და მარცხს დაეფრთხო, დაეღარებინა, თავის მრწამსსა და მიზნებზე ხელი აელო. ის თავის ცხოვრების მიზანს წინ ხედავდა.

ვაჟა სწავლის გაგრძელებაზე, პეტერბურგში წასვლაზე ოც-

ნებობდა თურმე, მაგრამ ამისთვის საჭირო სახსრები არსაიდან ეგულებოდა და ამიტომ არას ამბობდა. აბა, რა ისეთი შემოსავალი უნდა ჰქონოდა ნახევრად წარმართულ მთაში პატიოსან მღვდელს პავლე რაზიკაშვილს, რომ მრავალრიცხოვანი ოჯახი ერჩინა, ხუთივე ვაჟისთვის ჯერ აქაური სასწავლებლები დაემთავრებინა და ახლა პეტერბურგსაც გაეგზავნა. აქაურს აუვიდა როგორღაც, მაგრამ პეტერბურგის წელი აღარა ჰქონდა. გულით კი ეწადა. უფროსი ვაჟი გიორგი კი გაგზავნა იქ, მაგრამ ვაი, იმ გაგზავნას – რის ვაი-ვაგლახით აწვდიდა საარსებო ფულს. გიორგი ხშირად წერდა იქიდან – ფული მომანოდე, შიმშილით ნუ მომკლავ, ცოტაც როგორმე შემინყვე ხელი, დავამთავრო, რომ ჩამოვალ, მომრიგებელ მოსამართლედ დამნიშნავენ მანდ და მერე მე ვიცხოვრებ. პავლეც ვალებს იღებდა და უგზავნიდა.

ვაჟა-ფშაველა ამიტომაც და იმიტომაც, რომ უკვე ჩაება თავის საყვარელ საქმიანობაში, პედაგოგის კეთილშობილური პროფესიით ეწადა მომსახურებოდა თავის ქვეყანას, აღარ ფიქრობდა პეტერბურგზე, მაგრამ რაკი ასე მოულოდნელად თავისუფალი აღმოჩნდა, კვლავ გაეღვიძა სურვილი სწავლის გაგრძელებისა. იქნებ როგორმე, იქნებ რითიმე. იქნებ ძროხები მოიჭარბონ, რამე გაყიდონ და ცოტაოდენი ფულით გაემგზავროს და მერე ღმერთი რალაცას მისცემს, რალაცა გამოჩნდება. ლუკმა პური ჰქონდეს, მშიერი არ მოკვდეს ოლონდ, დანარჩენს ყველაფერს აიტანს. აიტანს რუსულ ყინვასაც, ჯანი მაგარი აქვს, მიჩვეულიც არის, ჩვენს მთაში განა ნაკლები ყინვა იცის!

ზაფხული ჩარგალში გაატარა და სექტემბრის დასაწყისში თავის მეზობელ ფშავლებთან ერთად საქონელი გამორეკა თბილისში გასაყიდად. ქალაქის სიახლოვეს, გლდანსა და დილოში მაშინ ბაკები და ღამისსათევები ყოფილა. ერთი ასეთი ბაკი და დუქანი სოფელ გლდანთან ჰქონია კულა გლდანელს, სახელგანთქმულ მოჭიდავეს. თიანეთის მხრიდან ჩამოსული მთიელნი უმთავრესად მასთან აჩერებდნენ თურმე საქონელს ქალაქში ჩარეკვამდე. ჩარგლელებიც და სხვა ფშაველნიც მაშინ უმთავრესად თიანეთზე, თავის მაზრაზე, გამოვლით ჩამოდიოდნენ თბილისში. ვაჟამაც და მისმა მეზობლებმაც, ჩანს, ამ გზით ჩამორეკეს საქონელი და ღამე კულას ბაკში შეყარეს, თავად კი დუქანში შევიდნენ პურის საჭმელად. ცნობილმა მოჭიდავემ

პატივით მიიღო მთიელნი, პატივით მიიღო ვაჟა-ფშაველა. იმ ღამეს კულას ვაჟას საუბრიდან გაუგია, რომ სწავლის გაგრძელება სწადია, ამის საშუალება კი არ აქვს და აი, ახლა მოუდის საქონელი, რათა ცოტაოდენი ფული მოიმარაგოს. «გულს გული იცნობსო», ვაჟაკცმა კაცმა გაიგო ვაჟაკაცის გულისტკივილი, მუხის ტოტივით მარჯვენა მკერდზე მიიბრაგუნა და დაიქადნა: კულა მოგიკვდეს თუ პეტერბურგს არ გაგგზავნოსო! თან შეჰპირდა, მოკლე ხანში, ამა და ამ დროს, თიანეთში ამოვალ საჭიდაოდ, შენც იქ იყავი და მთელს შემოსავალს შენ მოგცემო. მართლაც, ასულა კულა თიანეთში, მის ჭიდაობას დიდძალი ხალხი დასწრებია და მთელი შემოსავალი იქვე გადაუცია ვაჟასთვის.

ეს ფული, ცოტაოდენი თავისი, უფრო ბევრი დაპირებები – გამოგიგზავნითო, საზოგადოებებს ხარჯს გავაღებინებთო, შენ ნუ გეშინია, წადი და ყველაფერი კარგად იქნებაო – და 1883 წელს შემოდგომაზე ვაჟა პეტერბურგის თოვლ-ყინულიან გზას დასდგომია.

ვაჟას უფროსი ძმა გიორგი იურიდიულ ფაკულტეტზე სწავლობდა. ვაჟამაც გადანყვიტა ამავე ფაკულტეტზე შესვლა, მაგრამ გორის სემინარიის კურსდამთავრებულს უნივერსიტეტში არ იღებდნენ, იღებდნენ მხოლოდ გიმნაზიადამთავრებულებს. მეტი რაღა გზა ჰქონდა, ადგა და თავისუფალ მსმენელად შევიდა.

იმავე შემოდგომის მიწურულს ვაჟამ ზაქარია ჭიჭინაძეს გამოუგზავნა წერილი, სადაც მეგობრული მოკითხვისა და პეტერბურგული შთაბეჭდილებების შემდეგ სწერს: «...თუ ძმა ხარ, წერილი მომწერე და მანდაური ამბები შემატყობინე უკრიტიკოდ, გაუკილაგად, ისე, რომ ნათქვამს კლანჭი არ გამოედებოდეს. კარგი იქნებოდა, რომ გროშებსაც გამომიგზავნიდი. აქ ერთი მანეთი თუმანი ღირს, ჩემისთანა გაფხეკილი კაცისთვის კი ორამდეც მიაღწევს. ლექციებისა უნდა შევიტანო, ოცდახუთი მანეთი და ერთი თვის საზრდოლა დამრჩება. კოჭლად წავა საქმე, თუ ცხოვრების წყაროები არ გამოვძებნე».

ვაჟა დიდი გულისყურით ისმენდა ლექციებს, წიგნებსაც ბევრს კითხულობდა, მონანილეობდა ქართველ სტუდენტთა შეკრებებში. ისინი ლუკმასაც უზიარებდნენ ვაჟას, მაგრამ, თავადაც გაჭირვებულებს, როდემდე შეეძლოთ ვაჟას რჩენა. ამას

თვით ვაჟას ამაყი სულიც ვერ აიტანდა. მან ქართველ სტუდენტთა ერთ-ერთ დამხმარე სალაროდანაც აიღო ორმოცდაათი მანეთი სესხად, ისიც შემოეხარჯა და დარჩა სრულიად ულუკმაპუროდ. საქართველოში კი ვაჟა თითქოს აღარც ახსოვდათ. კაპიკიც კი არავინ გაუგზავნა. მობეზრდა ვაჟას ძალღუმადური ყოფნა, საშინლად გულდანყვიტებდა და იმედგაცრუებულმა მიატოვა პეტერბურგი და 1884 წელს ისევ საქართველოში ჩამოვიდა.

ეს ორი წელი (1883-84) ძალზე უნაყოფო იყო ვაჟასათვის. გუნებანამხდარს, იმედდაკარგულს, ჩანს აღარც კი უნდოდა რაიმეზე ფიქრი. სულ რაღაც სამი-ოთხი ლექსი ძლივს ამოთქვა და ისიც იმჟამინდელი მისი სულიერი განწყობილების გამომხატველი. 1884 წლის გაზაფხულზე, პეტერბურგში, არის დაწერილი, მაგალითად, ლექსი «ნუთუ მკვდარია ჩემი იმედი?» ასე დასვა კითხვა, როცა ცხადად დაინახა, რომ სწავლისათვის თავი უნდა მიენებებინა. იმდენად გულთ ეწადა სწავლის გაგრძელება, ეგონა, თუ ამ სურვილს ვერ შეისრულებდა, დაიღუპებოდა.

„რით მოვირჩინო გულის ნაჭრევი, რამლა ამიგზნოს მე გულში აღი?“

მთებიდან გამოყოლილი ღაღარი, რომელიც გორის სემინარიაში ცეცხლად აბრიალდა, ერწოს უსიამოვნო მასწავლებლობამ და პეტერბურგის ხელმოცარულმა სტუდენტობამ ისე ჩაუქრო, რომ აღარ სჯეროდა, თუ კიდევ შეძლებდა მის ხელახლა აღგზნებას. თანაც ეს ის პერიოდია, როცა ვაჟა ჯერ კიდევ თავის თავისა და თავის გზის ძიებაში იყო. ჯერ ვერც საკუთარი ხმა ეპოვა. ცდილობდა, ათი ან თოთხმეტმარცვლიანი საზომით ეწერა, ფეხი აეწყო XIX საუკუნის იმდროინდელი მწერლობისათვის, ილიასა და აკაკის შემოქმედებისათვის. შინაგანად კი ხალხური, რვამარცვლიანი ლექსის მოთხოვნილებას გრძნობდა, მაგრამ ჯერ ვერ ენდობოდა საკუთარ ინტუიციას.

პეტერბურგიდან დაბრუნებულმა, აღარც სტუდენტმა, აღარც მასწავლებელმა, აღარც პოეტმა, ბოლმითა და ეჭვებით გულგასენილმა ისევ თავის საყვარელ მთებში, საყვარელ ჩარგალში შეიმყუდროვა. იქ თუ მოეფონება ცოტა გულს, მაგრამ ვერც იქ

იქნება მშვიდად, რადგან თავისიანთა მზერაში დაცინვასა და ეჭვს დაუწყებს ძებნას – ვერ ივარგეო, გამოგადგესო. სხვაგან ყოფნას კი ისევ მთაში სიკვდილი უჯობს. წლის მიწურულში დაწერა ლექსი „ამირანი“, რომელიც მრავალმხრივ სიმბოლურია. იმ დიდ ეროვნულ, ღრმა ჩანაფიქრთან ერთად მასში ჩაქსოვილია პირადი განცდებიც. ზამთარს ჩარგალში გამომწყვდეული, ხელ-ფეხშეკრული თავად აღმოჩნდა კავკასიის მთებზე მიჯაჭვული ამირანის როლში; აღარც არავის ახსოვს, აღარც არავინ კითხულობს მის ამბავს:

**„დაჰვინწყებია ეს მონა ძირს კაცსა, მალლა ზეცასა,
არ იხსენებენ მისგანა დევ-ემშაკების ჟღერასა“.**

არც იმათ რამეში ჩაუთვალეს ის თავგანწირვა, ვისთვისაც და რისთვისაც მთელი მაზრის უფროსობა გადაიკიდა. დევ-ემშაკებსა და მჭედლებში, ვინც ამირანის დასაბმელი ჯაჭვი გამოჭედეს, რალა თქმა უნდა, ისინი იგულისხმებოდნენ, ვისაც ვაჟა შეებრძოლა და ვისთან ბრძოლაში ხელ-ფეხი შეუკრეს და მთაში გამოკეტეს:

**„რომელთაც გრდემლზე დაჰკვერეს მის დასაბმელად ჯაჭვიო,
არ შეიბრალეს მართალი, გაგზავნეს ტყვედა მთაში“.**

აქ ლაპარაკია სიმართლისათვის მებრძოლ მართალ ადამიანზე, რომელიც ტყვედ გაგზავნეს მთაში. ვაჟა იმუქრება: ისიც იქნება, ამირანი ხელში ხმლით ბარს დატყდება თავს და ცოდვების მონანიე მჭედლებს მწარე ცრემლებს აფრქვევინებსო.

„ამირანში“ აღწერილ ამბავს თითქმის არაფერი აქვს საერთო მითიურ ამირანთან. აქ ვაჟას ყველაფერი თავის ყოფაზე აქვს გადმოტანილი, ხმლითაც თავად ფიქრობდა მთიდან ბარზე დაცემას, იმ უწმინდურთაგან საქართველოს განმენდას, მოღალატე, ერის გამყიდველი, რუსულად გადაგვარებული ინტელიგენტიანთა ჩკუის სწავლებას. ამას კარგად მიხვდა მეფის ცენზურა, როცა მისი დაბეჭდვა აუკრძალა ჟურნალ „თეატრს“ 1885 წელს.

საყურადღებოა, რომ ვაჟამ თავისი შემოქმედების დასაწყის-

შივე მიმართა მითოლოგიას. მითოსური სამყარო მის შემოქმედებაში ძველის აღდგენაა ახლებური ფორმით, შიგ ჩადებულია ახლებური აზროვნება. მითებიც, სხვა ხალხური გადმოცემების მსგავსად, რომლებიც მის შემოქმედებას დაედო საფუძვლად, თავის შემოქმედებით ქურაში აქვს გადადუღებული, როგორც ამას თვითონ ამბობდა.

ვაჟას მიერ მითოლოგიის ახლებურად ამეტყველება მის სიცოცხლეშივე შენიშნეს. „თანამედროვე ქართველ პოეტებს შორის ვაჟა-ფშაველა – მოვლენაა ყველაზე მეტად იდუმალი და თვითმყოფადი. ნებისმიერი სკოლისა თუ მიმართულების მიღმა დგას იგი. მიუსადაგია მისთვის მსოფლხედვა „თანამედროვეობისა“. ძნელად სარწმუნოა, რომ ჩვენი თანამედროვეა ეს მკვდრეთით აღმდგარი ძე მითოლოგიური წარსულისა.“ (39,286) ცხოვრებაშიც ერთგვარად მითოლოგიურ ამბებთან სიახლოვეს ცდილობდა ვაჟა. რაც კი ძალის მქონეა, ყველას ყურშას ეძახდა – ასე ერქვა ამირანის ძალს, რომელიც ჯაჭვს ლოკვით აწვრილებდა. ყურშა ერქვა იმ მონადირის ძალსაც, კლდეზე რომ გადაიჩნება და ბანდულის თასმით თავდაყირა დაეკიდა უფსკრულის თავზე.

**„შაჰყეფე, ყურშავ, ოხერო, შე შავის პატრონისაო,
კლდეზე გიკიდავ პატრონი, ფურბერნის საბანდითაო“.**

„ამირანი“ საყურადღებოა კიდევ იმითაც, რომ ამ ლექსით იწყება ვაჟასეული პოეზია, ხალხურ შემოქმედებაზე აღმოცენებული, ფშაური დიალექტით შეზავებული, მძლავრი, თავისებური ელვარების მქონე პოეზია.

ამ ფორმით ლექსების წერის ბიძგი მისცა, როგორც თვით ვაჟა წერს, რაფიელ ერისთავის ლექსის „სამშობლო ხევსურისას“ გამოქვეყნებამ. ამ ლექსის ნაკითხვამ თავისებურად შეუჩქროლა გული ვაჟას. დაუდასტურა თავისი გულის ნაგრძნობი, რომ ფშაური დიალექტი პოეზიისთვის იყო შექმნილი, ერთი მხრივ, თავისი საოცარი სილბოთი და მუსიკალობით, მეორე მხრივ „მსგავსი კლდისა სალისა“.

ამის შესახებ აი, რას წერს ვაჟა თავის ერთ-ერთ აღსარების წერილში „პრო დომო სუა“: „ჩემზე, უნდა მოგახსენოთ, ყველა-

ფერს, რაც კარგი და ხელოვნური რამ დაწერილა, ზემოქმედება, ძალა ჰქონია, აღტაცებაში მოუყვანივარ, მომწონებია. რა თქმა უნდა, თ. რაფიელის ლექსებმა, როგორც საერო კილოთი ნაწერმა და ისიც ჩვენებურ მთის კილოთი, სხვანაირად ააჩქროლა ჩემი გული, სხვაგვარად შესძრა იგი, ამასთანავე ნუ დავივიწყებთ იმასაც, რომ, თუმცა მაშინ შეგირდი გახლდით, მაგრამ ხალხური, ფშაური, ხევსურული ლექსები ბევრი ვიცოდი; ეს კილო მიყვარდა, ჩემს გულში განსაკუთრებული კუთხე ეჭირა; თუმცა მაშინაც ლექსებს ვწერდი, ანუ უკეთ რომ ვსთქვათ, ვბლაჯნიდი. მაგრამ ამ საერო ენაზე წერას ვერ ვბედავდი, რადგან მწერლობაში ლექსების წერის კილოდ არ იყო მიღებული, არამედ სხვა კილო მეფობდა. ჯერ დღესაც ჭირს ამ ფშაურს კილოზე ნაწერის ლექსების საზოგადოებისაგან ყურის დაგდება და მაშინ ხომ უფრო საძნელო იქნებოდა”.

დიდმა პოეტმა ამ დროიდანვე დაუდო სათავე ფსევდონიმ „ვაჟა-ფშაველას“ ხმარებას. მანამდე მისი ფსევდონიმები იყო: „ლ. რაზ-ვი“, „ლ. რ-ზ“, „ლ. რ-ზ-კ-ლი“, „ლ. კათაკმეველი“, „მგელა ხინკალჭამიაშვილი“, „ლ. რ“.

1885 წლიდან გამოჩნდა მისი ახალი და უმთავრესი მწერლური ფსევდონიმი „ვაჟა-ფშაველა“. ამ ფსევდონიმთან დაკავშირებით თავის მოგონებებში ვაჟა-ფშაველას უახლოესი თუში მეგობარი ივანე ბუქურაული წერს: „დიმიტრი ცისკარიშვილმა, რომელიც შემდეგ თელავის სამოქალაქო სასწავლებლის გამგედ იყო, მიაშობო: „ჩვენ, ცისკარიშვილები და რაზიკაშვილები, პეტრეს ქალაქში თითქმის სულ ერთად ვიყავით. ხშირად მოდიოდა ჩვენთან ვაჟა. მოუსვენარი იყო ვაჟა? „კარგისა არსავ ვაჟა-ფშაველა“, ვეტყოდი ხოლმე ვაჟას ხევსურული კილოთი. „ვაჟას“ მე დავუმატე „ფშაველა“, გამოვიდა „ვაჟა-ფშაველა“, ამის შემდეგ სხვებმაც დაუძახეს ლუკას „ვაჟა-ფშაველა“ და ეს სახელი დარჩა ფსევდონიმად”.

შემდეგ თვით ვაჟას ვკითხე და იმანაც დასტური დამცა, რომ „ვაჟა-ფშაველა მიტრომ დამარქვა და მეც ფსევდონიმად ვიხმარეო”. (24,48).

შემდეგში რაიმე მწვავე მასალის გამოქვეყნებისას ცენზურისა და მღვენელთა კვალის ასაბწევად ვაჟა ნაირნაირ ფსევდონიმებს მიმართავდა. ამ სიჭრელემ მარტო ვაჟას მღვენელთ

კი არა, ჩვენს დროში ვაჟა-ფშაველას სრული კრებულების გამომცემლებსაც აურია გზაკვალი. ბევრმა მეცნიერმა (თ. სახოკია, ალ. აბაშელი, ს. ყუბანიშვილი, ს. ლეკიშვილი, ლ. ჭრელაშვილი, ალ. ჭინჭარაული, ელ. აბრამიშვილი, თ. მაჭავარიანი) ბევრი დრო და ენერგია მოახმარა მისი ფსევდონიმების გახსნას. გარდა ამ ზემოთ ჩამოთვლილი ფსევდონიმებისა, გამოვლინდა კიდევ შემდეგი ფსევდონიმები: „ვაჟა-კაცი“, „ვ. ფ-ლა“, „შენი მარად პატივისმცემელი მამუკა“, „გოგოჭური“, „მამუკა“, „შენი ერთგული მამუკა“, „ნარ-ეკალა“, „იქაური“, „ვ-ა-ფ-ლა“, „ჟავა“, „პარასკევა“, „“, „შენი კეთილისმოსურნე ექვთიმე“, „ველაფშა“, „ჟულაკა გოგოჭური“, „ფშაველი“, „ვ. ფ.“, „უცნობი“, „მეთვალყურე“, „არამკითხე პოეტი“, „დროებით თიანელი“, „ფშაველი მწყემსი“, „დალონებული“, „ეკალ-ძმარა“, „მოკეთე“. ამ ფსევდონიმთაგან ბევრის ამოცნობა გვიან მოხდა. მათ ამოცნობას კი ის მოჰყვა, რომ ვაჟას თხზულებებს დაემატა კიდევ ერთი ტომი ისეთი და იმდენი ნაწარმოებებისა, რომლებიც ერთ მწერალს ეყოფოდა. არის კიდევ სავარაუდო ფსევდონიმები („ბაყათარ ოსი“, „გარეშე მაყურებელი“, „მგზავრი“, „ნაწობნარი“, „მთიული წყალობა“), რომელთა ნამდვილად ვაჟასეულობა საბოლოოდ არ არის დამტკიცებული, მაგრამ ჯერჯერობით რაც გარკვეულია, კიდევ ერთ ტომად შეემატება ვაჟას ტომეულებს ისე, რომ ფსევდონიმების ამოცნობით ვაჟას თხზულებები ათტომეულის შემდეგ თორმეტ ტომამდე გაიზარდა. გამოსავლინებელიც კიდევ რჩება. ამით კიდევ უფრო იზრდება იმის გამოგაცება, რა ნაყოფიერი შემოქმედი ყოფილა ვაჟა.

იურისტობაზე მეოცნებე

გულმოკლული ვაჟა 1885 წლის შემოდგომამდე ებრძოდა ჩარგალში მომავლის უიმედობაზე მწარე საფიქრალს. დრო არის მკურნალი სევდისა და მწუხარებისაო და ვაჟასაც ნელ-ნელა გადაუარა, კვლავ მიუბრუნდა საწერს. 1885 წლის გაზაფხულიდან ჟურნალ-გაზეთებში თანდათან ჩნდება მისი ლექსები, კორესპონდენციები.

სხვა, ალბათ, შეუშინდებოდა ძლიერთა ამა სოფლისათა და

თავისი მაზრის უფროსობაზე ველარაფერს დანერდა, მით უმეტეს, რომ თავადაც სჭირდებოდა ხანდახან მათთან ურთიერთობა, იქ უხდებოდა ტრიალი, თბილისისაკენ გზად მიმოსვლა. სამსახურის საქმეებზეც შესაძლოა, მათთან დასჭირვებოდა მისვლა, როგორც უმუშევარს. მაგრამ არ გატყდა ვაჟა. თავისას მაინც არ იშლიდა. „დროებაში“ გამოაქვეყნა ფელეტონი „თიანეთი“. ფსევდონიმად მიაწერა „მგელა ხინკალჭამიაშვილი“ („ხინკალჭამიაშვილი“ იქიდან, რომ ვაჟას ძალიან ჰყვარებია ხინკალი. იტყოდა თურმე: „გენაცვლე, ჩახოფებულები (ჩამარილებულები) ხორცის ხინკალო და პანტის არაყო“), მაგრამ ფელეტონი უკვე იმ სიმძაფრისა არ იყო, როგორისაც „ჭრელი ამბები“.

წერილი ერთგვარად კომპრომისული იყო. ვიღაც ვიღაცათა ლანძღვასთან ერთად, ვიღაც ვიღაცათა ქებაც გამოურია.

ფელეტონი ერთგვარი თავის მართლებით იწყება: იმიტომ ვწერ ამას, რომ სხვა კუთხეებივით ფშავ-ხევსურეთს კორესპონდენტი არ ჰყავსო. ვინც კი ოდნავ განათლებულია თიანეთის მაზრაში, ყველა რუსულად ცდილობს ლაპარაკს, რადგან ეს მიაჩნიათ განათლებულობის ნიშნად. ვაჟა სამდურავს გამოთქვამს ფელეტონში იმის გამო, რომ ახლად გახსნილი სამკითხველო ბანქოს სათამაშოდ და მერე ნაგებულ-მოგებულ პურ-მარილების საასპარეზოდ არის ქცეული.

ჰკიცხავს ვიღაც ადვოკატის ხრიკებს, მაგრამ მაღლიერებას გამოთქვამს მოსამართლის მიმართ: „კიდევ კარგი, რომ მომრიგებელი მოსამართლე პატიოსანი მოხელეა. კარგად იცის აქაური ხალხის ავლა-დიდება, გულმტკიცვნიულად ეკიდება სანყალს და დაჩაგრულს“...

„ძველი მამასახლისი, რომელიც არაერთხელ და ორჯერ გაუკიცხავთ „დროებაში“, გამოცვალებს და ახალი დააყენებს. ეს უკანასკნელი დიდს იმედს გვპირდება და, როგორც ჩანს, იქნება კიდევ შეგვისრულოს. პირველადვე გამოიჩინა თაოსნობა, სოფლის ნამდვილი პატრონობა. მშვენივრად მოაწყო სასოფლო სამართლოს სადგური, ფხიზლად ეკიდება სოფლის ცხოვრების წესიერებას, თუმცა ერთის საყვედურის ღირსი კი არის – სოფლის სიფაქიზეს ჯერ არ დასდევს, ვითომ ეს საჭირო არ იყოს“...

„მაზრის ექიმი უფრო ფხიზლად არის, თუმცა, სამწუხაროდ, მხოლოდ ამ ბოლო დროს – სწორედ რომ ბოლო დროს! – გამო-

იჩინა ეს თვისება: აქაურ ყასბებს აუკრძალა შუა სოფელში საქონლის დაკვლა – ხოლერა გაჩნდებოდა და მიუთითა სოფლის ბოლოს, ორის ვერსის მანძილზე“...

„სხვაც ბევრი რამ მქონდა სათქმელი, მაგრამ დარჩეს, კვლავ იყოს. დიდები, განათლებულები, არა, კადრულობენ „დროების“ კორესპონდენტობას, მე მაინც მოგწერთ ხოლმე. მაინც სანყალი კაცი ვარ და ჩემს თავს იყოს აქაურების რისხვა, როგორც იქნება, გაუძლებ“.

„ჭრელ ამბებთან“ შედარებით ტონი აშკარად შერბილებულია. თუ იქ ერთი კარგი სიტყვაც კი არავის მიმართ დასცდენია, აქ პირველ რიგში საქებარს ამბობს მომრიგებელ მოსამართლისა, მამასახლისისა და ექიმისას. აღნიშნავს ნაკლსაც, მაგრამ ბევრზე თავს იკავებს, შემდეგისთვის იყოსო. ეს, რა თქმა უნდა, ისე არ უნდა გავიგოთ, რომ ვაჟას შეეშინდა, ხელი აიღო თავის პრინციპებზე. არა, უბრალოდ იმ „ჭრელი ამბების“ ირგვლივ დატრიალებულმა ამბებმა დაარწმუნა, რომ უაზრობა იყო ასე წინდაუხედავად, ასე დონკიხოტურად შებრძოლება ბოროტებასთან. დაინახა, რომ, მამა პავლედან მოყოლებული ასეთი საქციელი არავინ მოუწონა, მხარი არავინ დაუჭირა. ვინც ერთგული მეგობარი ეგონა, იმანაც კი აღმაცერად დაუწყო ცქერა. საქმოსანმა ხალხმა, მაზრის ხელმძღვანელობამ ინტრიგანი შეარქვეს. ვაჟას კი ეგონა, იმ წერილის შემდეგ ხალხი მაინც გმირად აღიარებდა, მაგრამ რომ არ მოელოდა, ისეთი სამწუხარო რამ დაინახა: ყველა იმდენად იყო გართული თავის ჯამში ცქერით, იმდენად არ აინტერესებდათ ხალხისა და ქვეყნის საქმე, რომ მტყუან-მართლის გარჩევაც კი არ უნდოდათ, გარჩევა თეთრისა და შავისა. დაინახა ვაჟამ, რომ თავისი გმირი წინაპრების დრო წასულია, მათ მსგავსად საქვეყნო საქმეზე გულის შეტკივილი, მათებური ვაჟკაცობით მტერთან რკინება ეხლა დანაშაულად ითვლება, სიმართლის თქმა – მკრეხელობად, ვაჟკაცობა – უხეშობად, სიბრიყვედ. გაიძვერები და ქვეყნის დამაქცევლნი მოქცეულან ხელმძღვანელ პოსტებზე და კანონი მათ იცავს, თვალს ხუჭავს მათ უმსგავსობაზე, ხელს უწყობს ხალხის დამონებაში, ხალხის ყვლეფაში, რათა იმათ იცხოვრონ, როგორც უნდათ, იყვნენ მომხვეჭელნი, ამორალურნი, ოღონდ კი დაიცვან სახელმწიფოს ინტერესები. სახელმწიფოს არაფერს უშლის

მექრთამე მოსამართლე, მყვლეფელი მოხელე, პირიქით, ისინი ამით უფრო მეტად მორჩილებაში იყოლიებენ ხალხს, დაუკარგავენ მათ წამოყვლეყვლაგების სურვილს. მთავრობას უფრო მეტად აფრთხობს ვაჟასთანა სიმართლის მთქმელნი, რომელნიც იმ გაიძვერათა სახით ფაქტიურად ებრძვიან „ფუტურო ბოძებზე აშენებულ ცხოვრებას“.

არ ეგონა ვაჟას, თუ მთლად ასეთი სუსტი იყო სიმართლისათვის მებრძოლთა ოპოზიცია, თუ ამდენი ჩასაფრებული მტერი ჰყავდა და თვით სახელმწიფო აპარატი იყო ყოველივე ბოროტების სათავე. ამიტომ ერთ-ერთ იმ დროინდელ თავის წერილში „ხმა მთიდამ“ თავისი მწარე გამოცდილების მაგალითით აფრთხილებდა ახალგაზრდებს: „თუ ახალგაზრდა კაცი ხარ და გული ჯერ კიდევ „პატიოსნად“ გიცემს, დიდი დარაჯი უნდა იყო შენის თავისა, რომ ამ შხამიან ობობას ქსელში არ გაეხად და სამუდამოდ არ დაიღუპო სულით და ხორციით. საბრალოა, მკითხველო, და ხშირად შესაცოდავიც ახალგაზრდა, რომელიც მივარდნილს „დაყუდებულსავით“ ცხოვრობს და რომელსაც ყოველ წამს სხვადასხვა ქინქლა-კოლეები ჰკბენენ და სისხლსა სწოვენ... ღმერთო, რა მალე და მწარედ სტყუვდება ახალგაზრდა. დიალ, მკითხველო,

Жизнь — не то, что говорили

Мои книги и мечты...

მაგრამ... ლამის მეც წვრილმან რამეებზე არ მოვყვე ცხარე გოდებას“...

იმავე 1885 წელს აქვეყნებს „შვლის ნუკრის ნაამბობს“, ლექსებს, მაგრამ თიანეთის „სატკივარი“ მაინც ვერ მოუწვლეს და ისევ მას უბრუნდება. „თიანეთის“ გამოქვეყნებიდან ორი თვეც არ არის გასული და „დროებაშივე“ „ლ.რ.“ ფსევდონიმით აქვეყნებს ფელეტონსვე „სოფელი თიანეთი“. ესეც „თიანეთის“ მსაგავსად „ჭკუა ნასწავლი ახალგაზრდის“ თვალთახედვით არის დაწერილი. ნაკლთან ერთად დადებითიც არის მოხსენიებული. ფელეტონში მიწასთან არის გასწორებული ვინმე მაზრის ექიმი, მედიცინის დოქტორი ბ. კ. ბ-შვილი. საუბარია ჯერ მის, ექიმისთვის, შეუფერებელ საქციელზე, მერე მის ნაცოდვილარ დისერტაციასზე. „კაცს საზოგადოების თვალში ორი ღირსება ჰხდის პატივსაცემლად: გონებრივი განვითარება და პატიოსნება; ბ.

ბ-ს პირველი ძალიან ღალატობს და მეორისა რა მოგახსენოთ. მისი დისერტაცია, მედიცინის დოქტორობის მისაღებად დაწერილი, მეოთხე კლასელის თხზულებას მოგაგონებთ, საკლასოდ დაწერილს...“

...მისი აზრით, სტავროპოლის მუშა ხალხის უბედურება, უწმინდურებისაგან წარმოსდგება. ლიტერატურა, – ამბობს იგი დიდის ყვედრებით, – ხალხის უბედურების მიზეზად გარშემოტყმულს პირობებსა სთვლის, მაგრამ ეს შეცდომით მოსდის. დაბალი ხალხის პირველი და უკანასკნელი უბედურების მიზეზი უწმინდურობა ანუ ბინძურობა არის. ეს ბავშვურის ტიტინით დაწერილი მეცნიერული, ვითომ გამოკვლევა, შეუნელებია ადგილ-ადგილ ციფრებად და გამოუკვერია დისერტაცია, მაგრამ ნეტა ისევ მედიცინურ გამოკვლევაში ყოფილიყო გაბმული ბ. ბ-ი და ნ. ბარათაშვილის პოეზიის საკურთხევლის ცეცხლზედ არ დაენყო ხელების თობა. რა დააშავა ნ. ბარათაშვილმა ისეთი, რომ იმისი ცეცხლმოდებული სიტყვები: „ცუდად ხომ მაინც არ ჩაივლის, ეს განწირული სულისკვეთება“ და სხვა გამხდარა ბ-ის დისერტაციის დასკვნის დასამშვენებლად. როგორ შეძრწუნდებოდნენ სამარეში ნ. ბარათაშვილის ძვლები, თუკი როგორმე იგრძნობდნენ, რომ უღირსად მედიცინის დოქტორობის მძებნელი ქართველი, რომელიც ქართულად ჭირით აგებს ენას, იმეორებს მის, საქართველოს ბედისაგან გამონვეულ სიტყვებს. მაგრამ არ ანუხებს ის, რომ ქართული არ იცის და საქართველოზე არაფერს ზრუნავს; ის დოქტორულის მედიდურობით დაიმედებულია დისერტაციაზე, რომელიც იმას შეუძენია მედგარის (!) შრომით, რათა გაუადვილოს მოძმეთა ცხოვრების გზა: „Не безследно-же пройдут эти порывы истомленной души, и стезя, с таким трудом протоптанная, все-ж останется, чтобы облегчить путь собратьям моим“.

როგორი ერთგული და გულშემატკივარიც არის ჩვენი ექიმი თავის მოძმეებისა, იგი თავის ყოფაქცევით ამტკიცებს. ჰკითხეთ აქაურ ღარიბ ხალხს“...

„თუმცა თიანურ მოხლეებს შორის ამისთანა ყალბი ხალხი ბევრია, მაგრამ კარგებიც მოიპოვებიან. თიანეთი წინანდელზე ბევრად გაუკეთესებულა მაზრის უფროსის ბ. ლევან ჯანდიერის წყალობით“...



კადრი კინოფილმიდან „ვედრება“

მართლაც, აღმამფოთებელი ცინიზმი და თავხედობა იყო თიანეთის სწავლული ექიმის დისერტაცია. ის ექიმიც ერთი იმათაგანი იყო, ვისაც ექიმობა ხალხის საძარცვავ საშუალებად მიაჩნდა, დისერტაციაც იმიტომ გაახლავდა, რომ მეტი შემოსავალი ჰქონოდა, ფართო ობობას ქსელს აბამდა ხალხში და ყოველივე ამით უნდოდა ბარათაშვილს გვერდში ამოსდგომა. ამას, რა თქმა უნდა, ვერ მოუთმენდა ვაჟა და ვერც მოუთმინა. ექიმის სიბინძურეს სხვა სიბინძურენიც მიაყოლა და კვლავ ფარი იფარა: ბოლოს ქება დააყოლა მაზრის უფროსისა. ეხლა უკვე მხოლოდ შიშველი ხმლით არ გადის ბრძოლაში ვაჟა, ფარიც გამოაქვს, ჩაჩქანიც. იცის, იქედანაც გადმოუქნევენ და რა სასურველია კიდევ მძიმე „ჭრილობების“ მიღება, რომელთა მკურნალობას წლები სჭირდება.

მართალია, ვაჟამ საგრძნობლად შეცვალა ტაქტიკა, ნაკლოვანებებთან ერთად დადებითსაც აღნიშნავდა ხოლმე თავის ფელეტონებში, მაგრამ, დაჩაგრული ხალხის გარდა, ვის დასაცავადაც ეს წერილები იწერებოდა, მადლიერი მაინც არა-

ვინ რჩებოდა. ვაჟას „ყოველ წამს სხვადასხვა ქინქლა-კოლოები ჰკბენდნენ“. ვაჟა არ იყო „თიანეთით“ კმაყოფილი იმ მხრივ, რომ შერბილებულად დანერა, ბოდიშებით, უსიამოვნება კი მაინც დიდი შეხვდა. „სწორედ მოგახსენოთ, მე სრულიადაც ვერ მოვიფიქრებდი, თუ აქ, ამ ჩვენს გაუნათლებელს მხარეში, ბეჭდვით სიტყვას ისეთი დიდი გავლენა ექნებოდა, როგორც იქონია პირველმა კორესპონდენციამ. რა უმანკო და უკბილო კორესპონდენცია იყო და რამოდენი ყაყანი და მითქმა-მოთქმა კი გამოიწვია! მთელი ერთი თვე სულ ამ კორესპონდენციაზე ლაპარაკობდნენ, სულ იმაზე სჯიდნენ – ჰკიცხავდნენ, აქებდნენ... გაბრაზება იქამდინ მივიდა, რომ ერთმა მოხელემ თამამად გამოაცხადა – ეგ ვილაცა მგელა ხინკალჭამიაშვილია, გაჩერდეს, თორემ თვით „დროების“ რედაქციაში გავბერტყამო. გესმით? რედაქციაში გავბერტყამო?! საწყალობელი! მაგრამ როცა კაცს საფანელი შემოელევა და საბუთი აღარა მოეპოვება-რა, მაშინ მუშტზე დაიწყებს ცქერას“.

ვაჟა წერილის დასაწყისში ეხება განაწყენებულ თიანელთა გამოხდომებს მის წინააღმდეგ, თორემ წერილის ძირითად ნაწილში განხილულია მაზრაში სისხლის საქმეების გარჩევისა და დამნაშავეთათვის სასჯელის გამოტანის საკითხი.

„ოლქის სასამართლოს „სეზონმა“ ბედნიერად გაიარა. სასიხლო საქმეების გადაწყვეტამ კარგი შთაბეჭდილება იქონია მთიელებზედ. უნდა ვსთქვათ, რომ არცერთი საქმე არ იზიდავს ისე ძლიერ მთიელის ყურადღებას, როგორც სისხლის სამართლის საქმე. აქაური ხალხის შეხედულება სისხლის საქმეებზედ ძირეულად განსხვავდება კანონის შეხედულებიდან და, თუ კანონი სასტიკად უცქერის რომელსამე დანაშაულებას, ხალხი კიდევ იმავე დანაშაულებაზედ სხვანაირად სჯის, მსუბუქს სასჯელს თხოულობს. ან რას იზამს, როცა ზოგიერთი ბოროტმოქმედება, მაგ: ქალის მოტაცება, მოლაღატე ცოლის ცხვირის მოჭრა, შურისძიების გამო მოკვლა, ხალხის ჩვეულებას შეადგენს და ჩვეულება, ხომ მოგეხსენებათ, „სჯულზე უმტკიცესი არის“. ჩვენდა სასიამოვნოდ, სასამართლო არ იფიქრებს ხალხის ჩვეულებას და, რაც კი შეიძლება, შეღავათს აძლევს დამნაშავეებს, მსუბუქ სასჯელს აკისრებს მათ. წრეულსაც ასე გახლდათ. თუმცა ბევრი „საციმბირო“ და „საკატორლო“ საქმეები გაირჩა,

მაგრამ ერთის მეტს არ გადაუნყვიტეს ციმბირში გაგზავნა და ისიც იმიტომ, რომ შემსუბუქება ვერასგზით ვერ მოხერხდებოდა. საბრალო მთიელს ბრალდებოდა ქალის მოტაცება და მისი ძალად გაუპატიურება. თუმცა ამნაირი შემთხვევა აქეთ იშვიათი არ არის, ბევრს თავმოსანონებელ საქმედაც მიაჩნია, მაგრამ ძალად გაუპატიურებას კანონი სასტიკად უცქერის. ეს საქმე პირველად განიხილეს და წარმოიდგინეთ, რა რიგად შეშინდა მთა, როცა გაიგეს, რომ ამ საქმის გულისთვის დამნაშავეს ციმბირი გადაუნყვიტეს... თქვენ ვერ შეგიძლიათ წარმოიდგინოთ რანაირი თავზარდამცემი გავლენა აქვს ხალხზე, როცა კანონი და ჩვეულება ერთმანეთს ვერ ურიგდებიან!.. მაგრამ, როგორც ვსთქვით, წრევანდელმა სასისხლო სამართლის განყოფილებამ ხალხის გული მოიგო”.

ვაჟა ცოტა ხანს, სულ რამდენიმე თვე ისმენდა პეტერბურგში იურიდიული ფაკულტეტის ლექციებს, მაგრამ ამ ცოტა ხანშიც მოასწრო იურისპრუდენციაში ღრმად ჩახედვა. მან თან ჩამოიტანა წიგნები, ლექციების ჩანაწერები და მერეც განაგრძობდა მათ შესწავლას. ზემოთ მოყვანილი ამონაწერიდანაც კარგად ჩანს, როგორ კარგად ერკვეოდა ვაჟა მართლმსაჯულების საკითხებში, როგორ ცდილობდა მთის ადათ-წესებისთვის მიესადაგებინათ სახელმწიფო კანონები, თანხმობა ყოფილი

ყო ქართველი ხალხის მართლმსაჯულებასა და რუსის „ზაკონებს“ შორის. სწორედ ეს შეუსაბამობა და უცხოთა ძალად თავს მოხვევა იყო, რამაც ერთ დროს, საქართველოს რუსეთთან შეერთების პირველ წლებში, გამოიწვია დიდი გულისწყრომა ქართველ ხალხში. იმან გამოიწვია მთიულეთის, კახეთის, გურიის, სამეგრელოს და სხვა აჯანყებები. რუსეთის მთავრობის კანონით მკაცრად ისჯებოდა ის, რაც ქართველთა შეხედულებით არ უნდა დასჯილიყო, არ ისჯებოდა ის, რაც მკაცრად უნდა დასჯილიყო. ასეთმა შეუსაბამობამ განსაკუთრებით გულისწყრომა გამოიწვია მთიულეთში. ღრეობის დროს მსუბუქი ნაკეჭნავება, ვაჟკაცური ფარ-ხმლის შეჟღერიალება, ახალგაზრდათა ჩამოქროლება წრეში და მკლავის ცდა – თუ მთიელთაგან ვაჟკაცი-სათვის შესაფერის საქმედ, სამამაცო ზნედ ითვლებოდა – ახალი კანონის ძალით ისჯებოდა, ხოლო მრუშობა სულაც არ ის-

ჯებოდა, რისთვისაც მთიელებს უმკაცრესი სასჯელი ჰქონდათ – ხიდის ყურზე ჩაქოლვა.

მთის ადათ-წესებისა და ახალი კანონების „ჭიდილისადმია“ მიძღვნილი ვაჟას ერთი მცირე ზომის დრამატული ნაწარმოები „სცენები (ფშაველების ცხოვრებიდამ)“. პიესას საფუძვლად უდევს სწორედ მთიელთა ადათ-წესებისა და „რუსის“ კანონების შეუსაბამობა: ფშაველი მოღალატე ცოლს ცხვირს მოაჭრის, დასჯის მამაპაპურად, მის საყვარელს კი ხანჯლით მოჰკლავს. პრისტავთან თავის ფეხით მისულ ფშაველს საციმბიროდ გაამზადებენ. აქ მხატვრული ფორმით არის მოცემული ის, რაც თიანეთის მართლმსაჯულებაზე დანერგილ ფელეტონშია განხილული.

ჩანს, ძველი ადათ-წესების მიმდევარი ვაჟა, როცა პეტერბურგში იურიდიულ ფაკულტეტს ირჩევდა, ახალი კანონებისაგან მთიელების დაცვაზე ფიქრობდა. სწავლის გაგრძელება ვერ შეძლო, მაგრამ იმედს მაინც არ ჰკარგავდა. მანამდე კი ცდილობდა წერილების სახით მიეწოდებინა თავისი აზრი საზოგადოებისათვის, დაენახებინა, თუ რა იყო მოსაგვარებელი, გასარკვევი, მაგრამ ამის დამნახავი და გამგები არავინ ჩანდა. არავის აინტერესებდა ვაჟას აზრი. ბიუროკრატიული აპარატი ერთხელ და ერთხელ მიღებული კანონებით ხელმძღვანელობდა. ამ მხრივ ბედნიერი გამონაკლისი ყოფილა თიანეთის მაზრის მომრიგებელი მოსამართლე, ვინც დამნაშავეთათვის სასჯელის დადების დროს მთის კანონებსაც ითვალისწინებდა. ეს სასიამოვნო ფაქტი აღუნიშნავი არ დაუტოვებია ვაჟას.

იურისტობაზე და კანონიერების დაცვაზე ფიქრი ვაჟას სიცოცხლის ბოლომდე გაჰყვა. მაშინაც კი, როცა ის უკვე აღიარებული მწერალი იყო და თავის ცხოვრების წესიც გარკვეული ქონდა, მაგრამ რაიმე მცირე ხელფასიან სამსახურს ეძებდა, საარსებო წყაროს, უფიქრია იურისტად მუშაობა. თიანეთში განთავისუფლებულა მომრიგებელი მოსამართლის ადგილი და ვაჟას უთხოვია, თუ შეიძლება, მე დამნიშნეთ ამ ადგილზეო. უარი არ უთქვამთ, კარგიო ოღონდ საგნის ცოდნაში შემოწმება იქნება საჭიროო. ორი თვე იმეცადინა ვაჟამ, აღიდგინა პეტერბურგში მოსმენილიც და სასამართლოს რამოდენიმე მოხელისაგან შემდგარი კომისიის წინაშე წარსდგა გამოცდაზე. ეს გამოცდა კი

არა, ბედისაგან, უკუღმართი ცხოვრებისაგან მოწყობილი მწარე სპექტაკლი იყო: გენიოსს, უდიდეს ჰუმანისტს, საკაცობრიო პრობლემებზე დაფიქრებულ ვაჟას გამოცდას უწყობენ უფიცი, ყვეყნი ჩინოვნიკები. და უწყობენ როგორ? ცინიკურად, ჩუმი ქირქილით, რადგან წინასწარვე გადაწყვეტილია, რომ ამ თანამდებობაზე ვაჟა არ მიიღონ, მაგრამ... ერთობიან. ვაჟა გოლიათის გულუბრყვილობით გადის და მოსწავლესავით პასუხობს დასმულ კითხვებზე. ფშაურ ჩოხა-ახალუხში გამონწყობილ გოლიათს გამოცდას უწყობენ ფრაკიანი კაცუნები, ისინი ერთობიან, ვაჟას თავს კი ტრგედიკა ტრიალებს, საარსებო ლუკმა სჭირდება, ფიზიკური შრომა აღარ შეუძლია, ლამის ატირდეს კაცი, გამაძღარნი და კმაყოფილნი კი კბილებს იჩიჩქნიან და სულელურ შეკითხვებს უსვამენ. ორი თვის მეცადინეობის შედეგად ისეთი ცოდნა გამოამჟღავნა ვაჟამ, ისეთ საკითხებზე ესაუბრა მართლმსაჯულების მსახურთ, რაც მათ არც კი გაეგონათ. კომისია აღფრთოვანებული და გაოცებული დარჩა თურმე ვაჟას ცოდნითა და იურიდიულ საკითხებზე მსჯელობის უნარით, მაგრამ იმ ადგილზე, როგორც წინასწარ იყო გადაწყვეტილი, ვინმე თავადი ვახტანგ ბარათაშვილი მიიღეს. ვაჟა კი გულს იმითლა იოხებდა: იმათ უნდა გამოვეცადე, მაგრამ სინამდვილეში გამოცდა მე ჩავეუტარეო.

თიანელი ქალი ნუცა შამანაური ამ ამბავთან დაკავშირებით იგონებს: „თბილისიდან დაბრუნებულმა ჩვენთან შემოიარა. დაღონებული იყო.

– რა მოხდა, ვაჟა, გამოცდები ვერ ჩააბარე? – შეეკითხა ჩემი მეუღლე.

– გამოცდები კი კარგად ჩავაბარე, მაგრამ ადგილი მაინც სხვას მისცეს.

– ვინ გამოგზავნეს?

– ვინა და კაცი უფიცი. არც ქართველია და არც რუსი. თქვენ იცნობთ მას – ვახტანგ ბარათაშვილს უბოძეს ეს პოსტი. მე მას შევხვდი, – განაგრძობდა ვაჟა, – საუბარი გაფუბი. საკვირველიც არის და სამწუხაროც: რა სიკეთე უნდა მოუტანოს მან გლახებს, როცა მათს ცხოვრებას არ იცნობს? როცა მას ვესაუბრებოდი, ილია ჭავჭავაძის დასურათებული გამოცემა მეჭირა და იმას ვფურცლავდი. ჩემი ყურადღება მიიქცია ლუარსაბ თათქარიძის

პორტრეტმა, ფურცვლა შევაჩერე. ვახტანგიც დააკვირდა სურათს და მკითხა:

– კტო ონ ტაკოი?

მე ვუპასუხე, ლუარსაბ თათქარიძეა-მეთქი და საუბარი გავუბი ლუარსაბზე. ის ჯერ მისმენდა, შემდეგ მკითხა:

– ა ონ ჟივოი?

სიცილი ძლივს შევიკავე, თუმცა სასაცილო კი არა, სატირა-ლია. ასეთი კაცი რა სიკეთეს მოუტანს გლახებს”. (40,33).

ოთარშენი. ცოლის შერთვა

მასწავლებლობა არ გამოვიდა, მაგრამ ცხოვრება ჯერ წინ იყო და უნდა ეფიქრა სამსახურზე, სამუშაოზე. მარტო მწერლობით ვის უცხოვრია საქართველოში, რომ მას ეცხოვრა, მით უმეტეს, რომ ის ჯერ ვერც იდგა მყარ ნიადაგზე. სხვას კი არა და ჯერ თვითონაც არ სჯეროდა თავისთავისა. თორმეტი წლის სწავლაც, მიღებული პროფესიაც ენანებოდა წყალში ჩასაყრელად.

ამ გაჭირვების ჟამს ვაჟას ისევ თავის ნათელ, ტკბილ მოგონებებთან დაკავშირებული გორი ეიმედებოდა. ისევ იქით მოსინჯა ბედი და არც ტყუილად!

ოფიციალურად ადგილი არც იქ იყო, არაოფიციალურად კი სოფელ ოთარშენში (გორთან ახლოს) ცნობილი თავადის ოთარ ამილახვრის ოჯახში მიიწვიეს შინა მასწავლებლად. სულ არაფრობას მაინც ჯობდა ჯერჯერობით და დათანხმდა კიდევც.

ამილახვრის შვილს გიორგის, ვისთვისაც ვაჟას უნდა ესწავლებინა, სწავლის მეტი ყველაფერი აინტერესებდა. ეგოისტურად იყო აღზრდილი, ჯიუტი, თავნება. რომ ვერაფერი შეასმინა, ერთხელ მოთმინება დაკარგულმა ვაჟამ ლანანი ადინა ყბაში. ნალოლიავებ გიორგის ძალიან ემწარა ფშაური სილა, გავარდა და კედელზე ჩამოკიდებულ თოფს ეცა. ატყდა ერთი წივილი-კივილი სასახლეში. იჭერდნენ გიორგის, ამშვიდებდნენ, ეხვეწებოდნენ. გიორგი კი უფრო გულდაგულ იზიდებოდა ვაჟასაკენ და თან გაიძახოდა: „ჰაი, დროებას რა ვუთხრა, რომ ვილაც ფშაველი ამილახვარს სცემსო!”

ვაჟას სილამ კარგი შედეგი გამოიღო. გიორგი ცოტას მოჭკვიანდა, დადინჯდა და მერე და მერე ძალიან დაუმეგობრდა ვაჟას, რადგან ნადირობა და ჭიდაობა იმასაც ძალიან იტაცებდა. ხშირად ებლარძუნებოდა ხოლმე ვაჟას და სანადიროდაც დაჰყვებოდა. ვაჟამ „საფანტის“ თოფი შეიძინა და თავისუფალ დროს ფრინველზე სანადიროდ გადიოდა.

„ვაჟასთან გორიდან ხშირად გავდიოდით, – წერს ს. მგალობლიშვილი, – ერთხელ იანვარში ვენწიეთ თ. ამილახვარს. დაუძახეს ბიჭებს ოჩხის მოსაჩხრეკად და საორაგულოს დასასინჯად. ლიახვს თოში მოაქვს, ნაპირები გამჭირვალე ყინულით არის დაფარული. ვაჟა ბიჭებთან ერთად ჩადგა წყალში, ბევრი ვემუდარეთ, გაცივდებო, მაგრამ არ მომიკვდეთ, უნინ ის ჩავიდა წყალში, მარდად მოჩხრიკეს ოჩხი და ცოცხალ-ცოცხალ თევზს ისროდნენ ნაპირას. თითქმის ნახევარ საათს იდგა ვაჟა გაყინულ წყალში. ასეთი კერპი და შეუპოვარი იყო ცხოვრებაში, არავითარ საფრთხეს, განსაცდელს არ მოერიდებოდა“.

ერთი ზამთარი (1885-86) გაატარა ვაჟამ ოთარშენში. ფუქსავატი გიორგის წვრთნას მეტად, ალბათ, ვერც გაუძლებდა. ბედად ბედნიერმა შემთხვევამ იხსნა.

ვაჟას შეუყვარდა ოთარ ამილახვრის მოახლე და მისი უკანონო შვილი კეკე ნებიერიძე (დედის გვარზე იწერებოდა). მაგრამ როგორც თელავში, თბილისსა და გორში შეყვარებულ გოგონებს, მასაც ვერ უბედავდა თქმას. თავის სიყვარულისა და კეკეს ცოლად თხოვნის სურვილი სხვა მოახლე ქალებს გაანდო და შუამდგომლობა სთხოვა. მათ სიხარულით უშუამდგომლეს. არც კეკეს უთქვამს უარი, რადგან არც თავად იყო გულგრილი მოხდენილი ვაჟკაცის, ნიჭიერი მწერლისა და, რაც მთავარია, თავისი უდროოდ დაღუპული მეუღლის პროფესიისავე კაცის მიმართ.

კეკე კი დათანხმდა მაგრამ „კნეინა“ დადგა უარზე – არ ეთმობოდა კარგი მოახლის, მუქთი მუშა-ხელის გაშვება სასახლიდან. ვაჟას კატეგორიულმა განცხადებამ, რომ სულ ერთია მოიტაცებდა, წაიყვანდა, დაათმობინა „კნეინასაც“.

ვაჟამ გადაწყვიტა მთაში, ჩარგალში, წაეყვანა კეკე და ჯერ-ჯერობით იქ ეცხოვრათ. საოცრად ლამაზი, კეთილი, მშვიდი და მაღალი სულის ქალი, რომელიც თავის ცხოვრების მეგობრად,



ასევე მაღალი სულის ადამიანებს ირჩევდა (კეკეს პირველი ქმარიც მასწავლებელი იყო), მზად იყო ვაჟასთან ერთად თუნდაც ჯოჯოხეთში ჩასულიყო. მოახლეობაში გაზრდილ, ობოლ, ბედი-საგან დაჩაგრულ ქალს არ გაუკვირდებოდა ვაჟას ღარიბული, მაგრამ მთის რომანტიკით სავსე ცხოვრება და იქნებ ხიბლავდა კიდევც.

1886 წლის გაზაფხულზე, აპრილის ბოლო იყო თუ მაისი, ვაჟამ ჩარგალში აცნობა, ცოლი მომყავს და ამა და ამ დროს მცხეთაში ცხენები დაგვახვედრეთო. გორიდან ძმები, თედო და ბაჩანა, გამოჰყვინენ. მცხეთაში პავლესაგან გამოგზავნილი ათამდე ფშაველი მაყარი დახვდა, სანეფო-საპატარძლო, ლამაზად ნაქსოვი ჯეჯიმებით დაკაზმული ცხენებიც ჩამოეყვანათ. საგზაოც გამოეყოლათ – პანტის არყიანი ტიკები. ჩამოსხდნენ, პური შეჭამეს, ადღეგრძელეს „ნეფე-დედოფალნი“, „ახალყოილნი“, დალოცეს ფშავ-ხევსურეთის სალოცავები პავლე რაზიკაშვილის ოჯახს მონეული ბედნიერებისათვის, დალოცეს მოგზაურ ანგელოზი და მერე ნალის ძგრიალითა და დამბაჩების ქუხილით შეუყვინენ არაგვის ხეობას. ფშავის ხეობაზე როცა შეუხვიეს ჟინვალთან, ცხენები შეასვენეს, ტიკს პირი მოხსნეს და თავადაც ამომშრალი ყელი ჩაისველეს. აქ კიდევ უფრო მოგულადნენ, კივილ-ჭყვივით გააყრუეს არაგვის ქალები, ცხენებს წალმა-უკულმა დააჭენებდნენ, ერთურთს ეჯიბრებოდნენ, ლალობდნენ. განსაკუთრებით ბაჩანა ძვრებოდა ტყავიდან. გვარინანად ნასვამი იყო და თავის ცხენს, რომელსაც „ძმობილს“ ეძახდა, წალმა-უკულმა დააჭენებდა ყიჟინით. გააჭენებდა, წინ გაიჭრებოდა, მობრუნდებოდა და ისევ ნეფე-დედოფალთან მოიჭრებოდა; თან გაიძახოდა: ბაჩუა ვარ, ბაჩუაო! ვაჟა აფრთხილებდა: კაცო, გონთ იყავ, ცხენს ნუ არბენ, გადმოგადგებს, ნასვამი ხარო! – ვისა? მე გადმომადგებსო?! – არ იშლიდა ბაჩანა. გააჭენა ცხენი და ლობეზე გადაახტუნა, სათიბში გაინავარდა. იქიდან რომ გამოაჭენა და გადმოახტუნა, ბაჩანა ველარ შემაგრდა უნაგირზე და ძირს მოადინა ზღართანი, მაგრამ სწრაფადვე წამოხტა და გაცინებულმა შესძახა: ბაჩუა ვარ, ბაჩუა!

– ბაჩუა კი არა, შე სანყალო, აჩუა ხარ, აჩუა! – გაუნყრა ვაჟა.

მიაღწიეს მაღაროსკარს, დღევანდელი ფშავის ცენტრს,

დღეს ყველაზე დიდ დასახლებულ პუნქტს არაგვის ხეობაზე. მაშინ კი აქ, სოფელ მაღაროს მისასვლელ ქალაზე (მაღაროს კარს), მხოლოდ დუქნები იყო, მგზავრთა ღამის სათევები. აქ აუცილებლად შეჩერდებოდა მგზავრი. ზევიდან მომავალი, კართანის კლდეებს გადარჩენილი, კოპალის სამადლობელს დაღვედა, კართანისაკენ მიმავალი კი შველას შესთხოვდა კოპალას, ხელის მომართვას, მშვიდობით მგზავრობას.

ხინვა თურმანაულის დუქნის კარზე მიაძვრიალეს ცხენები ვაჟას მაყრებმა. შიგნიდან შეჭიავებული ფშავლების ლექს-კაფიობის ხმა გამოდიოდა. დაიქვეითეს ვაჟამ და მისმა მაყრებმა, აქაც უნდოდათ გაეხმაურებინათ ვაჟას ბედნიერების ამბავი, თითო ჭიქით დაელოცათ. შიგნითაც გაიგეს ფშავლებმა, ვაჟას პატარძალი მოჰყოლებიაო. უცხო ტომ-ჯილაგის ქალის მოყვანა თემის ადათის, მამა-პაპათა წესის დარღვევა იყო. ფშაველს ფშაველი უნდა ეთხოვა, ხევსურს – ხევსური, თუკი უნდოდა ნამდვილი, თავის გემოვნების ოჯახი შეექმნა. ამით გაღიზიანებულმა, კაფიობის ჟინმონოლილმა გიჟათ ქურსიკამ, გვარად გოგოლაურმა, არ დაიშალა და მთელი ხმით შემღერა: „ურჩიელს მაჰყავს ცოლიო“... და გადაამლაშა. ვაჟა შევარდა დუქანში, სწვდა ავყია მოკაფიავეს, გარეთ გამოათრია და თავის მაგარი მუშტით გონზე მოიყვანა და გონიც დააკარგვინა. ქურსიკას თანამეინახენი წამოეშველნენ. იმათ თედო, ბაჩანა იოსებ ჟამიაშვილი და სხვა მაყრები დაერივნენ. მთიელებმა მუშტით ჩხუბი არ იცოდნენ, ამიტომ ქურსიკამ ხანჯალი იშიშვლა და ვაჟას დაუქნია. ვაჟამ აიცდინა და რაკი თვითონ ხანჯალი არ ება წელზე, იოსებს ამოსტაცა ქარქაშიდან, ქურსიკას მეორედ მოქნეულს შეუფარა და ახლა თვითონ გადაუქნია. ქურსიკამ შეფარება ველარ მოასწრო, აცდენა სცადა, თავი გვერდზე გადასწია, მაგრამ მთლად ვერ აიცდინა, ყბა და ყური ჩამოსხიპა ბასრმა ფოლადმა.

სხვანაირად დაიწყო მთის რომანტიკა, ისე არა, როგორც კეკე ელოდა. ეს ყვავილივით ნაზი, პატარა ტანის ქალი გაშეშებული, ერთმანეთზე სამკვდრო-სასიცოცხლოდ დატაკებულ, დასისხლიანებულ მამაკაცებს სახეზე ხელებაფარებული შესცქეროდა შიშისაგან გულგახეთქილი და ცივი კივილით იკლებდა იქაურობას.

აღბათ, ამანაც დაანამუსა ფშავლები, დროზე შეწყვიტეს

ჩხუბი. თუმცა ბევრი სახუმარო და სასაცილო მიეცა მაყრებს, უფრო მხიარულ გუნებაზე დადგნენ.

დიდი სამზადისი იყო ჩარგალში. პავლე მღვდელი და მისი ოჯახი ყველას უყვარდა, ყველა პატივს სცემდა და ყველა გვერდში ამოუდგა. გულით უხაროდათ თავისი სოფლის, ფშავის სიამაყის – ვაჟას გაბედნიერება. აინტერესებდათ, როგორ რძალს მოუყვანდა ვაჟა გულქანს. ბარელი ქალის ვარგისიანობა ეეჭვებოდათ. როგორმა სიხარულმა მოიცვა ყველა, როცა დაინახეს გულქანის ასლი და კვალი. ამიტომ პირველი დღიდანვე ვაჟაზე არანაკლებ შეიყვარეს ის ოჯახის წევრებმა და მეზობლებმაც. იმის შიში, რომ ბარელი ქალი ფშავის ცხოვრებას ვერ შეეწყობოდა, პირველ დღიდანვე გაქარწყლდა. კეკე ისე ჩაერთო ჩარგლურ ყოფაში, თითქოს აქ ყოფილიყოს გაზრდილი. ეს შეაძლებინა დიდმა კეთილშობილებამ და ვაჟასადმი დიდმა სიყვარულმა.

დიდთონეთი

დაოჯახების შემდეგ კიდევ უფრო მწვავედ დადგა სამუშაოს შოვნის საკითხი. ვაჟა თავის ძირითად პროფესიად პედაგოგობას თვლიდა და გულითაც უყვარდა ეს საქმე. მზად იყო მასწავლებლად ემუშავა ყველგან, სადაც უნდა ყოფილიყო, რადგან ფშავ-ხევსურეთში მაშინ ერთი სკოლაც კი არსად იყო. ვაჟა ჩამოვიდა თბილისში, მიიკითხ-მოიკითხა და გაიგო, რომ სოფელ დიდთონეთში თავისუფლდებოდა მასწავლებლის ადგილი. ბ. ჭელიძე, ისიც გორის საოსტატო სემინარიადამთავრებული და წერა-კითხვის გამავრცელებელი საზოგადოების სტიპენდიანტი, ავადმყოფობის გამო ითხოვდა განთავისუფლებას. ვაჟას გარდა, ამ ადგილს სხვებიც თხოულობდნენ, მათ შორის სასულიერო სემინარიის მე-4 კლასის მონაფე ვინმე ბარნაბოვი. საზოგადოებამ განიხილა მათი განცხადებები ილია ჭავჭავაძის მეთაურობით და დაადგინა: „ეცნობოს რაზიკაშვილს, რომ ის დანიშნულია თონეთის სკოლის მასწავლებლად, ჯამაგირი მიეცეს იმ დღიდან, როდესაც ის გამოცხადდება სკოლაში“.

ვაჟამ ფშავში მიიღო გამგეობის შეტყობინება და მაშინვე თავის მეუღლესთან ერთად გამოემგზავრა სოფელ დიდთონეთისაკენ. ბ. ჭელიძესაგან გადაიბარა სკოლა და „ქ. შ. წ. კ-ის გამავრცელებელ საზოგადოებას“ გაუგზავნა შემდეგი შინაარსის მოხსენება:

„ქართველთა შორის წერა-კითხვის გამავრცელებელ საზოგადოებას დიდთონეთის სკოლის მასწავლებლის
ლ. რაზიკაშვილის
მოხსენება

მაქვს პატივი ვაცნობო მმართველობას, რომ დანიშნულს ადგილას გამოვცხადდი 16 ამ თვისას, 17-ს შეუდექი სწავლას. სწავლა ისევ ძველ შენობაში მიმდინარეობს. ჯერჯერობით ოცამდე მოსწავლეა, მათ შორის ორი სულ ახლები არიან. როგორც საზოგადოება და მამასახლისი იმედს მაძლევენ, მოსწავლეთა რიცხვმა ერთი-ორად უნდა იმატოს. სკოლისათვის საჭიროა „ბუნების კარი“ არანაკლებ 5 ეკზემპლარისა, „დედა-ენა“ 10 ეკზემ., დაფები, გრიფელები, კარანდაშები, სანერლები, კალმები, რვეულები. ახალი სკოლის შენობა ჯერ არ დაუსრულებიათ. ამასთანავე ვსთხოვ უმორჩილესად ერთი ეკზ. პროგრამაც გამომიგზავნოს მმართველობამ, რომლითაც მოვალე ვარ ვიხელმძღვანელო.

დიდთონეთის სკოლის მასწავლებელი
ლ. რაზიკაშვილი”

ამ განცხადებიდან ჩანს, ვაჟა რა გულდაგულ მოეკიდა საქმეს და ისიც, როგორი რთული ვითარება დახვდა სკოლაში. ძველ მასწავლებელს, არამცთუ სახელმძღვანელოები და სანერ-კალმები, პროგრამაც კი არა ჰქონია. ამის გამო კი, ჩანს, ბავშვების ნახევარიც არ დადიოდა სკოლაში.

სოფელი დიდთონეთი მანგლისის მხარეს არის, თბილისიდან ორმოცდაათ კილომეტრზე. ამ დიდ სოფელში ძირითადად ქართველები ცხოვრობდნენ, საკმაოდ იყვნენ სომხებიც და ოსებიც. მოსახლეობა კულტურის მხრივ ძალზე ჩამორჩენილი იყო. წერა-კითხვის მცოდნე მთელ სოფელში არავინ მოიძებნებოდა.

ი. მანსვეტაშვილმა შემდგომში ვაჟას საკითხთან დაკავშირებით სკოლის შემოწმებისას დიდთონეთის მოსახლეობის შესახებ ასეთი რამ ჩაწერა თავის ანგარიშში: „რამდენადაც შევატყველაპარაკში, გლეხები არ არიან წინააღმდეგი სწავლისა, თუმცა სწავლის სარგებლობა ძალიან ბუნდოვნად კი ესმით. და თუ სკოლაში ცოტა მოსწავლეები არიან, ამის მიზეზი იქ, საკუთრად თონეთში, ჩემი აზრით, ის უნდა იყოს, რომ თონელები, საზოგადოდ, ალებ-მიცემობის მიმდევარი, ჩარჩი ხალხია და, მანგლისისა და ქალაქის მიხედვით, სადაც ხშირად მიმოსვლა აქვთ, უფრო იმას რჩეობენ, რომ თავისი შვილები ან ვაჭარს მისცენ შევირდად, ან რაიმე ხელობაში“.

ვაჟამ თავიდანვე მკაცრად მოსთხოვა შეუგნებელ მშობლებს, რომ მათ შვილებს სისტემატურად ევლოთ სკოლაში. ხშირად, თუ თხოვნა და ტკბილი სიტყვა არ გაჭრიდა, უბრაზდებოდა კიდევ, ჯარიმით ემუქრებოდა.

ამას გარდა, შემდეგ და შემდეგ სხვა სირთულეებიც გაჩნდა. ახალი შენობა, რომელშიც იმავე შემოდგომაზე გადავიდა სკოლა, წამოდგმული იყო შემალღებულ, საქარე ადგილზე. სკოლის კედლები ცუდად იყო შელესილი, ფარღალა და ამიტომ, თან რაკი არცა თბებოდა, საყინულეს ჰგავდა. შეშა არა ჰქონდათ, არ მოუტანეს. დიდთონელები არ ასრულებდნენ ვალდებულებას, რომელიც „ნ.-კ. გ. საზოგადოებასა“ და დიდთონელებს შორის იყო დადებული 1880 წელს სკოლის გახსნასთან დაკავშირებით. სოფლელებს სკოლისათვის სამი საყენი შეშა უნდა მოეტანათ და მასწავლებლისათვის წლიურად გადაეხადათ 300 მან. (ე.ი. თვეში 25 მან.). ვაჟამ ამის შესახებაც აცნობა საზოგადოებას, მაგრამ არც არაფერი შედეგი ამას მოჰყოლია, ისევე, როგორც პირველ თხოვნას წიგნებისა და საწერის თაობაზე. ზამთარი გავიდა, როგორც იქნა, საზაფხულო არდადეგებამაც მოაღწია და ინსტრუქცია კიდევ არ ჰქონდა მიღებული. „საზოგადოებამ“ ისევე უყურადღებოდ დატოვა თხოვნა ჯამაგირის გაზრდის შესახებ.

ვაჟა ყოველივე ამას არად აგდებდა, რადგან თავის საყვარელ საქმეს ემსახურებოდა. მას სჯეროდა, რომ დიდი ეროვნული საქმე ებარა. ჯერ კიდევ გორის საოსტატო სემინარიის დამთავრებისას, გამოსაშვებ გამოცდაზე ვაჟას აურჩევია თემა: „რაში

მდგომარეობს სამასწავლებლო სემინარიის ძალა“, სადაც იგი წერდა: „სოფლის მასწავლებელთა დიდი ამოცანა სწორედ იმაში მდგომარეობს, რომ განათლება შეიტანონ ბნელ მაზრაში, უკეთესი ცხოვრებისათვის მოამზადონ ბავშვები, განავითარონ მათი გონება, რათა მათ შეეძლოთ თავისუფლად და გონივრულად იტრიალონ თავიანთ სფეროში, მიიყვანონ ისინი სასარგებლო-სა და სამაგნეოს გაგებამდე და იმ საჭიროებებისაც, რომლებიც ესოდენ უხვადაა მათ ცხოვრებაში. ახალგაზრდა თაობაში საჭიროა აღიზარდოს საზოგადოებრივი გრძნობა, საზოგადოებრივი ზნეობრიობა. ტყუილად როდი შესძახა მოლოტკემ პრუსია-საფრანგეთის ომის დროს: სოფლის მასწავლებელი იმარჯვებსო! მაშასადამე, საოსტატო სემინარიის ძალა იმაში მდგომარეობს, რომ მისი საგანი და პრინციპი ხალხია და მისდამი საგანგებო სამსახური. მას შეუძლია იამაყოს იმით, რომ მასწავლებლებს უშვებს, შეიძლება დიდი ცოდნით არა, მაგრამ გამსჭვალულთ ცოცხალი იდეებით, ნამდვილი რწმენით, საქმის ხალხს და არა მხოლოდ სიტყვის“.

ვაჟას ეს მხოლოდ ლამაზი სიტყვებისათვის არ დაუწერია: ის მზად იყო და შეეცადა კიდევ ყოველივე საქმით დაემტკიცებინა, სიტყვა საქმედ ექცია. მას პედაგოგობა დიდ საზოგადოებრივ სამოღვაწეო არენად მიაჩნდა. სჯეროდა, რომ მასწავლებელს დიდი ეროვნული საქმის კეთება შეეძლო.

ვაჟა მასწავლებლის სარბიელად თვლიდა არა მარტო სოფლის სკოლას, არამედ მთელ სოფელს. ამიტომ იყო, რომ ხალხოსნური ენთუზიაზმით შეიჭრა როგორც ტოლათსოფელში, ისევე დიდთონეთშიც და ერთიანად ააფორიაქა ხალხი, მშვიდ დინებას მიყოლილი მტერ-მოყვარენი.

სკოლაშიც და მოსახლეობაშიც ერთიანად, ერთი ძალით გაბედულად გააჩაღა კულტურულ-საგანმანათლებლო მუშაობა.

ვაჟა სკოლაში მხოლოდ სასწავლო პროგრამით არა კმაყოფილდებოდა. ყველაფერს აკეთებდა იმისათვის, რომ ბავშვებისათვის სკოლა შეეყვარებინა, ბევრი რამ ესწავლებინა. ამ მიზნით ის კლასგარეშე და პროგრამის გარეშე მეცადინეობებსაც ატარებდა; გაჰყავდა ბუნების წიაღში და იქ უკითხავდა ხალხურსა და საკუთარ ლექსებს. ამ დროს ვაჟას უკვე გამოქვეყნებული

ჰქონდა ისეთი შედეგები, როგორც არის „დევეების ქორნილი“, „არაგვს“, „ქეიფი“, „გიგლია“ და სხვა. საკმაოდ სახელმძღვანელო პოეტი იყო და მისი ავტორიტეტიც დიდ როლს თამაშობდა ბავშვების რწმენის გამტკიცებაში. ყოველივე ამან კი ის შედეგი გამოიღო, რომ მეორე წელს, მართლაც, ერთიორად გაიზარდა მონაფეების რიცხვი. ამასთან ერთად ვაჟა, როგორც ირკვევა, დიდ და საინტერესო მუშაობას ეწეოდა ხალხში, მშობლებში. შემორჩენილია ვაჟასეული ერთი ხელნაწერი, მოხსენება, რომელიც ერთხანობას პავლე რაზიკაშვილის დაწერილი ეგონათ, რაკი მის ბიოგრაფიულ ჩანაწერებთან იყო ჩადებული, არც თავი ჰქონდა, არც ბოლო და არც ხელმოწერა. სიმონ სხირტლაძემ გაარკვია, რომ ეს პავლესი კი არა, ვაჟას დაწერილია დიდთონეთში მასწავლებლობის წლებში და პოეტს იგი დაუწერია სპეციალური დანიშნულებით – მშობლებისათვის.

ვაჟამ იცოდა, რომ მშობლების მიმართ გამოჩენილი სიმკაცრე, მუქარა ბოლომდე ვერ უშველიდა საქმეს. საჭირო იყო იმ ბნელი, ჩამორჩენილი საზოგადოებისათვის, როგორც დიდთონეთში იყო, აეხსნა, გაეგებინებინა სწავლის მნიშვნელობა. ამიტომ მოხსენება დაწერილია ძალზე მარტივად, დაბალი დონის მსმენელისათვის გასაგები ენით, ძალზე მარტივი, მაგრამ საინტერესო მაგალითების მოშველიებით. ამ მაგალითებით ნაჩვენებია, რომ ცოდნა სჯობია უცოდინრობას, რომ ნასწავლი კაცი უფრო იოლად უმკლავდება ცხოვრებას, უფრო გამარჯვებულა, ვიდრე უსწავლელი. ამასთან თავის მსმენელს უხსნის იმასაც, რომ მასწავლებელი, როგორი მონადინებულიც გინდა იყოს, ვერაფერს გახდება ბავშვის აღზრდაში, თუ მშობლებიც გვერდში არ ამოუდგებიან და მის მძიმე ხვედრს არ გაიზიარებენ. თუ ოჯახი სხვას უწერავს შვილს, სკოლა კი – სხვას, აქედან არაფერი გამოვა.

ვაჟა მასწავლებელზე არანაკლებ როლს მშობლებს აკისრებს და უფრო მეტსაც კი. ჩანს, მშობლების როლი იმიტომ უფრო გაამძაფრა, უნდოდა მეტი შთაბეჭდილება მოეხდინა ჩარჩ, უნიგნურ ხალხზე. უნდოდა ჩაეგონებინა, რომ მათი შვილების სიკარგე თუ სიცუდე მათ ქცევაზე, მათ პირად მაგალითებზე იყო დამოკიდებული.

„ავილოთ კიდევ მაგალითი. – წერს ვაჟა, – მამა ღვთის მოყვა-

რე კაცია. მუდამ დილით და საღამოთი სულ ცრემლით ევედრება ღვთისმშობლის ხატს. მაგრამ ერთი ცუდი ზნე სჭირს, – ვაჭრობაში სიმრუდე – დამპალ საქონელს ასაღებს. ერთს შეაპარა დამპალი საქონელი. მყიდველმა სახლში წაიღო ნივთი, ნახა კარგად, საქონელი დამპალია, არ გამოდგა?! დაუბრუნა საქონელი ვაჭარს: არ გრცხვენთან, ღმერთი არა გნამსო, უთხრა, ამას რომ მაძლევდი, შენს ღმერთს რას ეუბნებოდიო. ვაჭარი ეუბნება: „ის თვალი დადგეს, რა თვალმაც შენ მოგატყუა, ვა! თვალები სადა გქონდა, ვაჭრობა მაშ, რის ვაჭრობაა!“ ბავშვებს ეს ყველაფერი ესმით. ხედავს მამაში ორს ერთმანეთის მონინაალმდევე მხარეს: სიტყვა ერთი აქვს იმის მამას, საქმე სხვა. ეს რას ნიშნავს? მამაჩემი სახარებაში კითხულობს „გიყვარდეს მოყვასი შენი, ვითარცა თავი თვისიო“ და თვითონ კი ქვეყანა უტყუილებია, მაინც ბედნიერად ცხოვრობს! შვილიც, რასაკვირველია, მამისაგან იღებს მაგალითს და დაუწყებს ქვეყანას ტყუებას, გამოვა ქვეყნის ამომგდები.

აბა, ყველამ გავისინჯოთ ჩვენი ცუდი ჩვეულებანი და კარგად დაუკვირდეთ, თუ მასში აღზრდა არ იყოს დამნაშავე. ბევრი არ დაიჯერებს და იტყვის, რასაც წერა-მწერალი დაუწერს კაცს, მისი ბოლო ისე გათავდებაო.

ბევრი მაგალითი მინახავს, მამაც კარგი ჰყოლიყოს შვილსა, კარგი მაგალითებიც ენახოს და ნამდვილი გველი, ქვეყნის ამომგდები გამოსულიყოს. ხშირად ეგეც მოხდება ხოლმე, მაგრამ ბედისწერა აქ არაფერ შუაშია. რა ვუყოთ, ზოგი კაცი ავადმყოფობის გამო გულფიცხი, გულ-ანჯახია, მჭამელი, ბოროტი, დაუდეგარი. ამისთანა ბევრი მაგალითი ხდება, მაგრამ ეს ყველაფერი ჩემს ნათქმის მაინც არ ეწინააღმდეგებიან.

ბოროტი არ იბადება არასდროს კაცი. მის გაბოროტებაში გამზრდელი, მშობლები, თვითონ ჩვენა ვართ დამნაშავენი.

ბოროტება, სიგულფიცხე, ბრაზი ბავშვის გულში ცოტ-ცოტა იზრდება, ამაში ჩვენი უყურადღებობა და ცუდი მაგალითია.

ცოლ-შვილში ხშირად თავდაუჭერლად ვიქცევით, რასაც უნდა ვამბობთ, რასაც უნდა ვშვრებით, არ უყურებთ არც გონებას, არც სვინდისს. ბავშვის მახვილი გონება ამას იბეჭდავს გონებაში და გულში, მოსწონს, კარგი ჰგონია. არც ერთი სიტ-

ყვა და საქმე, რომლისაც ჩვენ თვითონ გვრცხვენთან შემდეგ, ბავშვებს არ გამოეპარება.

ამიტომ, რაც უნდა კეთილი გვინდოდეს შვილებისათვის, თუ კეთილს არ გავაგონებთ, კარგს მაგალითს არ ვაჩვენებთ, შვილების სიკეთით დატკობას ვარ მოვესწრებით. ერთს კაცს უნდოდა მუხიდან ნავის გაკეთება, მაგრამ ბოლოს კბილის საჩიჩქნი ჩხირის მეტი ვერაფერი გააკეთა. ეს დაიხსომეთ მკვიდრად, ნუ დაივიწყებთ. ხომ გახსოვთ ვაჭარს რომ უნდოდა შვილის გადიდკაცება და ციმბირში კი ამოაყოფინა თავი. მარტო სურვილი და სიკეთის სიყვარული შვილებისადმი არა კმარა; ცოდნა, შეგნებაა საჭირო...

დედ-მამამ უნდა შვილებს შესწირონ თავისი სიცოცხლე. უმეტესი ჩვენი ფიქრი, ყურადღება შვილებზე უნდა იყოს მიქცეული. თუ შვილები გვეყვარება, რასაკვირველია იმათაც შეუყვარდებით; რაკი დაინახავენ, რომ გვიყვარს შვილები, გვენდობიან კიდევ, რჩევას გაგვიგონებენ, მაგალითს ჩვენგან აიღებენ და ეცდებიან ჩვენ დაგვემსგავსონ.

ყმანვილს თუ დედ-მამის რჩევა, სიტყვა არ სწამს, საქმე მორჩომილია არც მაგალითს ექნება ძალა.

თუ გვინდა ჩვენს სიტყვას შვილებმა ფასი დასდონ, ხუმრობითაც ტყუილი არ უნდა ვუთხრათ და სხვებსაც უნდა ვთხოვოთ, ტყუილს არ მიაჩვიონ ჩვენი შვილები. ცხოვრებაში ბევრს განსაცდელს მოელის კაცი, ბევრჯერ დასჭირდება იმას ტყუილის თქმა. ამიტომ მშობლებმა უბრალო ხუმრობაშიც ტყუილს უნდა თავი დაანებონ.

შვილები რაკი გვეყვარება, სასტიკად, მხეცურად არ მოვეპყრობით. შური და ცემით ბოროტი კაცი ვის გაუკეთილებია?

ცემით დაშინება შეიძლება კაცისა, გაპატიოსნება კი – არასოდეს, სული, მხოლოდ სული მოქმედებს სულზე, მხოლოდ გული იცნობს გულს.

სიყვარულითა და ჩაგონებით შეიძლება ასწავლოს შვილს მშობელმა სიყვარული, გულკეთილობა და გონიერება”. (16, 89).

ვაჟას კი დაუნერია ეს მოძღვრება, მაგრამ არ არის ცნობილი, წაიკითხა თუ არა ის ერთად შეკრებილი სოფლის წინაშე. ის კი სავარაუდოა, რომ ხალხთან ურთიერთობისას შინ თუ გარეთ, ბევრჯერ და ბევრთან ექნებოდა ამ საკითხებზე საუბარი.

დაინახა ხალხმა, რომ ვაჟა მათი და მათი შვილების კეთილისმსურველი იყო და გულით მიენდვნენ, შეიყვარეს. შეიყვარეს კიდევ იმიტომაც, რომ მათ იფარავდა, ესარჩლებოდა მამასახლისისა და სხვათა თვითნებობისაგან. რამდენადაც იმათ შეიყვარეს, იმდენადვე შეიძულეს ამის გამო მთავრობის მოხელეებმა, მღვდელმა, მამასახლისმა. თანდათან იძაბებოდა ვითარება. აქაც იგრძნეს, რომ ვაჟა არ აპარპაშებდა ძველებურად, „ანყობილ” ცხოვრებას აურევდა. ამიტომ აქაც ატყდა ჩურჩული მის მოშორებაზე. თანდათან აითვალნუნეს და ცდილობდნენ რაიმე შარის მოდებას, გამოწვევას, რომ თავიდან მოეშორებინათ. ინვევდნენ და ვაჟამაც დაუფიქრებლად მიიღო გამოწვევა.

...მამასახლისის შვილისათვის თავის თანაკლასელს წამოერთყა და ამიტომ მეორე დღეს სკოლაში აღარ მოვიდა. სამაგიეროდ თვითონ მამასახლისის მოვიდა სწავლის დაწყების წინ და თავის შვილის მცემელს დაუნყო ცემა. ცემა ხომ მისი ხელობა იყო; ბავშვები კი არა, გლეხებიც სულ ცემა-ტყეპაში ჰყავდა. ვაჟამ რომ ეს დაინახა, გამოუვარდა, ერთი-ორი უთავაზა და აივნიდან გადმოაგდო, თან მიაძახა: შვილი სკოლაში გამოგზავნე, თორემ უარეს დღეს დაგაყენებო! მეორე თუ მესამე დღეს წინ შემოყრილ მამასახლისს ავად შეუღრენია ვაჟასათვის. ამის პასუხად ვაჟას თავისი თანამედროვე ცნობილი ფშაველი მოლექისის, ფოთოლათ მერცხალას, ნათქვამი კაფია მიუხლია:

**„რას მიბღვერ, მამასახლისო, გული რად გიძე დიღია?
მიტომ თუ მედიდგულები, ყელზე რომ ჯაჭვი გკიღია...
სახლი რკინებით სავსე მაქ, ძაღლებიც ჯაჭვით მიბია.
ერთს თუნდა სულში ჩაგაკლავ, რომელიც უფრო დიღია.
შენ რო მე კაცად არ მაგდებ, მეც ხათრი ფეხზე მკიღია!”**

მეორედაც მიუბეგვავს ვაჟას მამასახლისი. ამჯერად უკვე მონაფის მშობლების ცემისათვის. მამასახლისს ჯერ ქრთამი აუღია მათგან, საქმეს გაგიკეთებთო და როცა არ გაუკეთებია, მერე უცემია მათთვის, – როგორ თუ სამდურავს მიბედავთო. ვაჟამ ვერ მოითმინა ასეთი აბურად აგდება კაცისა და ცემა ეგრე არ უნდაო...

ამ შემთხვევებში თვითონ მამასახლისიც დამნაშავე იყო და

საჩივარი ვერ გაჭრიდა. კაცის ცემა და ჩხუბი კი დანაშაულად არ ითვლებოდა, თუ ის სამართლიანი იყო, თუ ის ადამიანის ღირსების დაცვას ემსახურებოდა. საჭირო იყო უფრო მძიმე რაიმე ბრალდება წაეყენებინათ, რალაცაში დაედანაშაულებინათ ვაჟა, რომ საჩივარი ეფექტური ყოფილიყო, რომ მოემორებინათ. ეს საბაბიც თვითონ ვაჟამ მისცა თავისდა საუბედუროდ და იმათ საბედნიეროდ. ისევ მღვდელი და ეკლესია ჩაერთო საქმეში. სარწმუნოებასთან, იდეოლოგიასთან მკრეხელური დამოკიდებულების ბრალდება უფრო ჭრიდა, რაც იმ დროს სამშობლოსა და მეფის ღალატს უდრიდა. სახელმწიფო იდეოლოგია ქრისტეს რწმენა იყო. ეს იყო ხალხის მორჩილებაში ყოლის იდეოლოგია. „მოთმინებითა შენითაო“, უქადაგებდნენ და ვინც არ ითმენდა, ის ქრისტეს უარყოფელი გამოდიოდა. იმთავითვე ქრისტიანობაც და ყველა სხვა რელიგიაც, იდეოლოგიაც, ხალხის დამონების, ხალხის მორჩილებაში ყოლის იარაღი იყო სახელმწიფოს ხელში. მართალია, ქრისტიანობა ამასთან ერთად გადამრჩენელი იყო ქრთველი ერისა, მან დიდი როლი ითამაშა საქართველოს დამოუკიდებლობის, თვითმყოფადობის საქმეში, მაგრამ XIX საუკუნეში მან სულ სხვა სახე მიიღო: მეფის რუსეთის ხელში ის იქცა კოლონიური ქვეყნის სრულ მორჩილებაში, მონობაში მოთმინებით ყოფნის იდეოლოგიად. ვინც ჩაგვრის წინააღმდეგ ხმას აღიმალლებდა, მას ანტიქრისტიეობას, ურწმუნობას, ღალატს სწამებდნენ.

ვაჟა ამასი კარგად ერკვეოდა და ამიტომაც ამბობებული იყო არა იმდენად ქრისტიანობის, რამდენადაც მისი არსის წინააღმდეგ. ის ეწინააღმდეგებოდა მღვდელსა და ეკლესიას იმიტომ, რომ მათში ხედავდა მეფის რუსეთის დამპყრობლურ-მჩაგვრელური პოლიტიკის გამტარებლებს, დამცველებს, ჯაშუშებს-სასულიერო პირნი ვალდებულნი იყვნენ ყოველი აღსარება ჟანდარმერიისათვის ეცნობებინა. ეს დააკანონა პეტრე I-მა და ასე მოდიოდა. მშიშრები და ლაჩრები სწორედ სარწმუნოებასთან მიმართებაში იჩენდნენ პირმოთნეობას, თვალთმაქცობას. ვაჟა კი, პირიქით, სწორედ აქ ამჟღავნებდა პროტესტს. ამიტომ ის თავიდანვე ცუდ დამოკიდებულებაში აღმოჩნდა სოფელ დიდ-თონეთის ეკლესიის მთავართან, მამასახლისის ცოლისძმას-

თან, დ. შავშიშვილთან. მას უსაყვედურებია ვაჟასთვის: წირვა-ლოცვაზე რატომ არ დადინარ ან მარხვას რატომ არ იჭერო? „მარხვა ის არის, რომ კაცი არ მოატყუო, არ დააბეზლო და ბოროტება არ ჩაიდინო“, – უთქვამს ვაჟას.

ვაჟა სკოლაში არც საეკლესიო გალობას ასწავლიდა ბავშვებს. ი. მანსვეტაშვილმა სკოლის შემონმებისას ერთ-ერთ ნაკლად ეს ჩაუთვალა ვაჟას. აი, რას წერდა იგი: „ერთი ნაკლი კიდევ სკოლისა, რომელსაც თვით მასწავლებელი გრძნობს, ის არის, რომ საეკლესიო გალობას არ სწავლობენ ყმანვილები. მასწავლებელი თვითონაც ძალიან სწუხს, მაგრამ, რა ვქნაო, შემომჩივლა, მე თვითონ არ ვიცო. მაგრამ იმედია, რომ დღეის იქით ეს ნაკლი აცილებული იქნება. იქაურს მთავარს კარგად სცოდნია საეკლესიო გალობა, მე ვთხოვე, რომ ეს მოვალეობა იმას ეკისრნა. მთავარმა დიდის სიამოვნებით თანხმობა გამოაცხადა და იმედიც მომცა, რომ ზაფხულისათვის თითქმის მთელი წირვის გალობა ეცოდინებათო, საერო სიმღერები კი თვით მასწავლებელს უსწავლებია და რიგიანადაც მღერიან“.

გორის საოსტატო სემინარიის დამთავრების ატესტატში ვაჟას „სიმღერა-მუსიკაში“ „5“ უწერია. ქართულ ხალხურ სიმღერებსაც მღეროდა და ბავშვებსაც რიგიანად ასწავლიდა. რომ მოენადინებინა, შეძლებდა საეკლესიო სიმღერების შესწავლასაც, მაგრამ პრინციპულად არ სწავლობდა და არც ბავშვებს ასწავლიდა.

მაშინდელ ვითარებაში ქრისტიანობის ნამდვილ არსს მართო ვაჟა კი არა, ბევრი სალად მოაზროვნე ხვდებოდა და ამიტომ ნელნელა ეკარგებოდათ რწმენა. განსაკუთრებით მთაში იყო პირნაქცევი ხალხი — ისევ ძველისაკენ, ნიშებისა და ხატ-სალოცავებისაკენ იბრუნეს პირი; ამიტომ XIX საუკუნის ნახევრიდან შეიქმნა „ქრისტიანობის აღმდგენელი საზოგადოება“, რომელმაც მთაში თუ ბარში, თითქმის ყველა სოფელში, ააშენა საყდარი. ვაჟა განსაკუთრებით ამ საყდრების მიმართ ამჟღავნებდა უნდობლობას.

მწერალი დავით კასრაძე იგონებს: „ერთხელ ვაჟასთან ერთად პირველი გიმნაზიის ახლოს ვიდექით. ჩვენთან ჩემი თანამოსწავლე ამხანაგებიც იდგნენ. აქვე ახლოს იყო სამხედრო ტაძარი. ვაჟამ შეხედა ამ ტაძარს და სთქვა: ნეტავ ამას კი არ დავი-

ნახავდე და თუნდა ამ მეორე თვალსაც მოვითხრიდიო. „რატომ-
თქო?“ – შევეკითხე. ჩვენ ძალიან გაგვაკვირვა ვაჟას სიტყვებმა.
„ეს ძეგლი, – თქვა ვაჟამ, – შამილის ბრძოლების დამარცხების
ნიშანია; ნიშანია კავკასიის დაპყრობისა და მეფის ხმლით დი-
დებისაო“.

ეს არაოფიციალურად. ოფიციალურად კი ეს აზრები არა-
ნაკლებ პირდაპირობითა აქვს ნათქვამი თავის პუბლიცისტურ
წერილებში. ერთ წერილში „ხევსბრობა მთაში და მისი დღევან-
დელი სვე-ბედი“, ვაჟა წერდა: „სასულიერო მთავრობამ ბევრ
ადგილას, საცა ხატობა, დღეობა იმართება, საყდრები ააშენა
ფშავში და ხევსურეთში, მაგრამ ხალხი მაინც გაურბის საყდარს
და სანთლის დანთება ურჩევნია სადმე იქვე, იმ წმინდა ადგილის
მიდამოში, დახავსებულ ლოდზე, ვიდრე გაბრწყინებულ ეკლე-
სიაში... ეჭვი არ არის, რომ ეს მდაბიოდ, მდაბიო ადგილას ვედ-
რება ღვთისა, შეიცავს პროტესტს ეკლესიური ღვთისმსახურე-
ბისა და მღვდლების წინააღმდეგ“.

ვაჟა, როცა ამას წერდა, რა თქმა უნდა, იმავე აზრისა იყო,
ისიც მხარს უჭერდა იმ მდაბიო მთიელთა აზრს და ისიც იმავე
თვალთ უყურებდა მეფის რუსეთის პოლიტიკის დასაყრდენ
ეკლესია-საყდრებს და მათ მსახურთ. მღვდლების შესახებ თა-
ვისი აზრი უფრო კონკრეტულად ჩამოაყალიბა მეორე პუბლი-
ცისტურ წერილში „მღვდლების ვინაობა“.

„იქნება სთქვათ: მღვდლობა, ანაფორები რას გვიშლისო,
მაგრამ ხომ ყოველი „პრისტავი“ ამბობს და გეფიცება, როცა
ეტყვი გაიხადე მუნდირი და გამოდი სამსახურიდან და ხალხს
შეუერთდიო, დიად, ფიცითა სქდება: ნამდვილი ქვეყნის ერთგუ-
ლი ვარ, მუნდირში ხალხს უფრო ბევრში რაშიმე გამოვადგებიო.
საქმით კი გამოდის, რომ ამჯურა ხალხს ვნების მეტი ქვეყნისათ-
ვის არაფერი მოაქვს, რადგან ვის პურსაცა სჭამენ, იმის ხმაღს
იქნევენ. ძალლი საცა სალაფავსა სჭამს, იქა ჰყეფს...“

ეს ერთი ჯურა მღვდლების ვინაობა ვიცით, ხოლო არიან
სხვა მღვდლები, რომელნიც არ ვიცი რომელ პარტიას ეკუთ-
ვნიან. მე ვამბობ ხევსურეთის მღვდლებზე. ამ რამდენიმე წლის
წინათ ქრისტე. აღმდ. საზოგადოებამ ააშენა, საცა არა მგონია,
ხევსურეთში საყდრები და დანიშნა მღვდლები. საკმაო ჯამაგი-
რიც გაუჩინა, თითო მათგანი იღებს წელიწადში 600 მანეთს და

ერთხელ თუ დაენახვება წლის განმავლობაში თავის მრევლს,
დანარჩენი დრო თავიანთ სახლებში სხედან (ნუ დავივიწყებთ
რომ ეს მღვდლები სულ ბარელები არიან გარდა ს. ახიელისა) და
იღებენ პენსიებს. აი, ესეც ნიმუში ბიუროკრატიის კეთილგონი-
ერებისა. სად არიან ეს მამანი? რას ფიქრობენ? ნუთუ არაფერს
მოვალეობას არ ჰგრძნობენ წინაშე ერისა“...

ამ ამონაწერიდან ჩანს, რომ მთიელები მღვდლების წინააღ-
მდეგნი იმდენად არ იყვნენ საერთოდ: მათ ასე თუ ისე იცოდნენ
ისტორიულად დიდი დამსახურება სამღვდელოებისა ქართველი
ერის წინაშე. არა, ისინი ვერ ურიგდებოდნენ ახალი დროის თალ-
ლით მღვდლებს, მატყუარებს, უწმინდურებს, გაიძვერებს, მედ-
როვეებს; იმათ, ვინც სამღვდელოებაში მხოლოდ და მხოლოდ
კარგი ცხოვრებისათვის შედიოდა და არა რწმენისათვის ან ხალ-
ხის, ქვეყნის სამსახურისათვის. თანაც მეფის ხელისუფლება რა
უხვია თავის იდეოლოგიის გამტარებლების მიმართ: 600 მანეთს
აძლევენ წლიურად, როცა ვაჟა-ფშაველას და მის მსგავს სკო-
ლაზე გადაყოლილ მასწავლებელს ზუსტად მის ნახევარს აძლე-
ვენ – 300 მანეთს, თანაც იმასაც გლეხებს ახდევინებდნენ.

გარდა ამისა, ხალხსაც ყვლეფავდნენ და მთის სალოცავე-
ბიდან განძეულსაც იპარავდნენ. ამის გამოც დაუნდობლად ებ-
რძოდა ვაჟა სამღვდელოების ზოგ უსინდისო წარმომადგენელს.
ბესარიონ ტუქსიშვილი შესწრებია, ვაჟა მაღაროსკარში ოქრომ-
ჭედელ დავით ჯანაშვილს ელაპარაკებოდა თურმე გაბრაზებუ-
ლი: ეგ ჯვარი გააკეთე და იმ ქურდს არ წააღებინო ქალაქში, იქვე
უნდა მიიტანოს, საიდანაც წამოიღო. ეგ ბერი კი არა, მძარცვე-
ლი ყოფილა, ფშავლების ქონებას იტაცებსო. აქ იპარავს, ჩააქვ
ქალაქსა და იქ ეპისკოპოსებს ასაჩუქრებს – ალბათ ღვდლობასა
ჰპირდებიან. მე ამას მამასახლისსაც დავავალებო.

ვაჟა რო წავიდა, მივედი და დავითსა ვკითხე, რაზე იყო ვაჟა
გაჯავრებულიო? იმაზეო, მითხრა, რო თამარელის ეკლესიის
ბერმა ხელაშვილმა ვერცხლის ჯვარი მომიტანა, ტარი აქვს გა-
ტეხილიო. რა ვიცი სად მიჰქონდა. ეს გაუგია ვაჟას და არც დას-
თმობს... რა ხათაბალა გამიხდაო.

აი, ეს განწყობილება ვაჟას სულის ამბოხად ექცეოდა ხოლ-
მე, როცა საქმის გამო უხდებოდა მღვდლებსა და სხვა მოხელე-
ებთან ურთიერთობა. უჭირდა თავის შეკავება, რომ ან სიტყვით,

ან კალმით, ან მუშტით არ გამოეხატა თავისი დამოკიდებულება მათდამი. ამ ამბოხის გამოსატყულება იყო ისიც, რაც ვაჟამ დიდ-თონეთის ოპოზიციის მიმართ ჩაიდინა და რითაც მათ კარგი სამსახური გაუწია.

დიდთონეთის ეკლესიის გალავანში, ქრისტიანობის აღ-მდგენელი საზოგადოების მიერ აშენებული საყდრის კედელსა და გალავანზე ნიშანი მიაკრა და თოფის სროლაში ვარჯიშობდა. განა ან თოფის სასროლი ადგილი სხვა არ იყო, ან არ იცოდა რას აკეთებდა, მაგრამ ამით ის მეფის რუსეთის კოლონიურ პოლი-ტიკას, დამონების იარაღს თოფავდა, გულს იფხანდა. ბრძოლა ეწადა, იარაღით ბრძოლა. იმ ხანებში გამოაქვეყნა „პაპიჩემის ანდერძი“.

**„წუ დაისვენებ, ებრძოლე მტერს, მინამ გიდგა სულიო.
შვილო, მეც ეგრე ვიყავი, ეგ არი ჩვენი რჯულიო“.**

თოფის ხმაზე შეიძრა სოფელი: „ვინ არისო, ვინაო?“ და მა-მასახლისი, ეკლესიის მთავარი და სხვა მოხელენი ფაცხა-ფუცხით წამოადგნენ თავს ვაჟას. წინასწარ ზეიმობდნენ მისთვის ჭკუის სწავლებას, რადგან „დანაშაულზე წაასწრეს“. ეგონათ, ვაჟას შეაშინებდნენ; რაკი დანაშაულზე წავასწარით ქედს მო-ვახრევიანებთო. ყვრილითა და მუქარით მოსთხოვეს შეენწყვი-ტა თოფის სროლა და მოსცილებოდა იქაურობას. ვაჟა დაერია მამასახლისსა და ნაცვლებს, ჯაჭვები ჩამოგლიჯა ყელიდან და ცემა-ტყეპით დაირეკა სოფლისაკენ.

ეხლა კი მიეცათ ნამდვილი საბაბი „ველური მთიელის“ თავი-დან მოსაშორებლად. იმავე დღეს შეადგინეს საჩივარი და ბოქა-ულ ლუკოვსკის მიართვეს. ბოქაულმა თავის მხრივ იშუამდგომ-ლა თბილისის მაზრის უფროსის წინაშე „მავნე და მთავრობის მოწინააღმდეგე“ მასწავლებლის სოფლიდან გაძევების თაო-ბაზე. ლუკოვსკი მხოლოდ ამით არ კმაყოფილდებოდა, ითხოვ-და ვაჟას პასუხისგებაში მიცემას. მართლაც, მაზრის უფროსმა თბილისში გამოიძახა ვაჟა, მისი დაპატიმრება ჰქონდა განზრა-ხული. ამ საქმეში ჩაერია სკოლის მზრუნველი კონსტანტინე ყავრიშვილი და თავისი თავდებობით ვაჟას პატიმრობა ააცდი-ნა. „წერა-კითხვის გამავრცელებელ საზოგადოებას“ კი აცნო-

ბეს, თითქოს დიდთონელებს ეთხოვოთ გუბერნატორისათვის – სკოლა დაგვიხურეთო. „ქ. შ. წ. –კ. გ. საზოგადოების“ გამგე-ობამ თავის ერთ-ერთ წევრს, საქმეთა მწარმოებელს ი. მანსვე-ტაშვილს, დაავალა სოფელ დიდთონეთში ასვლა და საქმის გა-მოკვლევა. ის იქ 1887 წლის 8 ოქტომბერს ჩავიდა და სამი დღის მანძილზე იძიებდა საქმის ვითარებას. გაირკვა, რომ სკოლის დახურვის მოთხოვნა ვაჟას მოწინააღმდეგეთაგან მოგონილი ტყუილი იყო. ამაში მანსვეტაშვილი დაარწმუნა არა მხოლოდ ხალხის გამოკითხვამ, არამედ იმ ფაქტმაც, რომ სწორედ მაშინ პროკურორმა, ჟანდარმერიის კაპიტანმა და მაზრის პოლიცი-ამ გამოიძია ბრალდება, თითქოს გლეხებს ხელმწიფის სურათი დაეხიოთ, რაც ტყუილი აღმოჩნდა. ამ ამბავს დაწვრილებით აღ-წერს ი. მანსვეტაშვილი და დასძენს: „ეს ამბავი მე იმიტომ მო-ვიყვანე, რომ, ჯერ ერთი, მეჩვენებინა ზნეობითი სახე თონელებ-ის უმეტესი და გავლენიანი ნაწილისა, მეორე კიდეც იმიტომ, რომ ჩემის აზრით, ამ საქმეს კავშირი აქვს სკოლის საქმესთან. მე ვგონებ, რომ სათავე იმ ხმებისა, რომელიც იქ გვითხრეს, ვი-თომ თონელებს განზრახვა აქვთ გუბერნატორს ქალაქი მის-ცენ სკოლის დახურვის თაობაზეო, აქ უნდა იყოს. ეს ხმები უნ-და დაეყაროთ და ეს განზრახვა უნდა დაბადებოდათ იმათვე, რომელთაც თავისი ღარიბი მოძმენი არ დაიშურეს და ისეთი მძიმე დანაშაულება დასწამეს, როგორც ხელმწიფის პორტრე-ტის დახვევა. და რადგანაც ამასთანავე მასწავლებელზე გუმანი ჰქონდათ შეტანილი, რომ ვითომ ის უმართავდა ხელს და გზას უჩვენებდა იმ გლეხებს, რომელნიც მინის გაყოფას იყვნენ მო-წინააღმდეგელები, ამიტომ ამისთვისაც ხელი მიუყვიათ, რომ ეგე-ბა აქედან მოვიშოროთო. მაგრამ, რადგანაც პირველი ბოროტი საქმე ვერ აუსრულდათ, ეხლა ამისათვის თავი დაუნებებიათ და ყველა ერთხმად მეფიცებოდა, რომ ჩვენ თავის დღეში მაგისტა-ნა არაფერი გაგვივლია გულშიო, სკოლისაც და მასწავლებლი-საც მადლიერნი და კმაყოფილნი ვართო“.

რაკი საქმე ისე არ წარიმართა, როგორც ვაჟას მოწინააღ-მდეგეებს სურდათ, დროებით შეძვრნენ, შეიმალნენ, თავიც მო-იკატუნეს იმის შიშით, ცილისწამებისთვის პასუხი არ მოგვთხო-ვონო. მაგრამ ვაჟას იქ დარჩენის აზრს ვერ შეერიგებოდნენ. ამი-ტომ, რაკი ძველი შერჩათ, მალევე განაახლეს ჩივილი და ახალი



ვაჟა ფშაველა ივერიაში ილიასთან
ი.მამისაშვილის ნახატის ილუსტრაცია

ცილისწამებები. მაზრის უფროსმა უკვე აღარ დაუჯერა მათ საჩივარს და ყურადღებაც აღარ მიაქცია. ამიტომ მათ „ნ. კ. გ. საზოგადოებას“ მიმართეს ცილისწამებლური წერილით, თითქოს ვაჟა ბავშვებს სცემდა, ლანძღავდა და მისი შიშით სკოლას აღარავინ ეკარებოდა.

ეს იყო ნოემბერში, ი. მანსვეტაშვილის დიდთონეთში ყოფნის ერთი თვის შემდეგ. მიუხედავად იმისა, რომ მან ეს ყველაფერი თავისი თვალთ ნახა და თავისი ყურით მოისმინა, ეს ცილისწამება მაინც რატომღაც დაიჯერა. „წერა-კითხვის გამავრცელებელი საზოგადოებიდან“ იმავე მანსვეტაშვილის ხელმოწერილი წერილი მიიღო ვაჟა-ფშაველამ: არასასიამოვნო ამბები მოდის თქვენზე, რომ ხალხს მკაცრად ეპყრობით, ლანძღავთ, აგინებთ, სცემთ; სკოლაშიც სულ ხუთიოდე შეგირდილა დადის. თვითონაც კარგად გესმით თუ მასწავლებელსა და სოფელს შორის

განხეთქილებაა, მაშინ მასწავლებელს იმ სკოლაში აღარ დაედგომება. ეცადეთ, როგორმე ყველა ეს ცილისწამება უარყოთ.

ყველა-ყველა, მაგრამ მანსვეტაშვილისაგან მიწერილმა წერილმა გააოცა ვაჟა. მეტი რა გზა იყო, ადგა და ვრცელი ახსნა-განმარტება გაუგზავნა „ნ.-კ. გ. საზოგადოებას“. გამგეობამ ეს ბარათი განიხილა ილია ჭყონიას თავმჯდომარეობით და ვაჟა გაამართლა. ამან ცოტა დაამშვიდა ვაჟა, თორემ ძალზე განერვიულებული ყოფილა ამ უსულგულო ბრალდებით.

ვაჟა კი გაამართლეს, მაგრამ ბოროტი ძალა მაინც არა ცხრებოდა. რაკი თავისას ვერ მიაღწიეს, ახლა გამგეობის თავმჯდომარეს ილია ჭავჭავაძეს, მიმართეს პირადად, უფრო ჩამოყალიბებული ცილისწამებებით სავსე თხოვნით. ამის საფუძველზე, 1888 წლის ივნისის დასაწყისში, „გამგეობამ“ ვითარების გასარკვევად და საგაზაფხულო გამოცდებზე დასასწრებად ახლა მეორე თავისი წევრი ალ. მირიანაშვილი გაგზავნა დიდთონეთში. ვაჟას ამ დროისათვის ბავშვები უკვე დათხოვნილი ჰყავდა, რადგან ყვავილის ეპიდემია გავრცელდა. თვითონ კი ჩარგალში იყო წასული. ამით კარგად ისარგებლეს ვაჟას მოწინააღმდეგეებმა, მამასახლისმა გაუნია მასპინძლობა მირიანაშვილს და ყველაფერი ისე ჩაანერინეს, როგორც მათ უნდოდათ. რამდენიმე სუსტი, ჩამორჩენილი ბავშვი მოუყვანეს, გაასაუბრეს და შთაბეჭდილება ცუდი შეუქმნეს. ყოველივე ამის შედეგად მირიანაშვილმა უარყოფითი დახასიათება წარუდგინა გამგეობას. სხვადასხვა ბრალდებათა შორის ჩამოთვლილი იყო ასეთებიც: „საღმრთო რჯული მეტად სუსტად იციან ბავშვებმა“... „ლექსების კითხვაში ჩქარობენ, მიუხედავად დასვენების ნიშნებისა და აზრისა“ და სხვა მისთანები.

ამ მოხსენების მოსმენის შემდეგ, იმავე წლის 11 ივნისს, ხმების უმეტესობით გადაწყდა ვაჟას დათხოვნა სკოლიდან. არ დაეთანხმნენ ა. ჭყონია, ნ. ცხვედაძე, ვოლსკი და ფავლენიშვილი. ვაჟამ, როცა თავისი მოხსნის ამბავი შეიტყო, კიდევ გამოუგზავნა „ნ.-კ. გ. საზოგადოებას“ ახსნა-განმარტებითი ბარათი, სადაც ბრალს სდებდა მირიანაშვილს არაობიექტურობასა და არაკეთილსინდისიერებაში, მაგრამ აღარაფერი გამოვიდა. როგორც ყოველთვის, ამ შემთხვევაშიც ბოროტი ძალების დაჯგუფება უფრო აქტიური და ძლიერი გამოდგა კეთილ ძალთა წინა-

აღმდეგ. ვაჟა სხვას არაფერს ითხოვდა, სიმართლის გარკვევის მეტს, მაგრამ სიმართლე ამჯერადაც ფეხქვეშ გაითელა.

ვაჟას არ უნდოდა დიდთონეთიდან წასვლა, ჯერ ერთი, იმიტომ, რომ უყვარდა თავისი პროფესია და კარგადაც ჩაერთო საქმეში; მეორეც, ოჯახის შესანახად ხელფასი სჭირდებოდა, არსებობის საშუალება და მესამეც, არ უნდოდა ნაძირალების, ვიგინდარების გული გაეხარებინა, მათი დასაცინი გამხდარიყო, ერცხვინებოდა ხალხისა და ქვეყნის თვალში. მართლაც და, რა საშინელება იქნებოდა ამაყი, ქედუხრელი ვაჟასათვის ასე გამოზუნძულება.

დიდთონეთის გლეხობამ, იმათ, ვისაც ვაჟა ფარად ედგა, ექომაგებოდა, ეხმარებოდა, როცა მისი მასწავლებლობიდან განთავისუფლების ამბავი გაიგეს, ძალიან შეწუხდნენ. დაუყოვნებლივ შეადგინეს თხოვნა, რომელსაც ასოთხმოცმა კაცმა მოაწერა ხელი და ილია ჭავჭავაძეს მიართვეს. თხოვნაში ეწერა: „რადგანაც ჩვენ, მთელ თონეთის საზოგადოებას, გვსურს ლუკა რაზიკაშვილი ისევ მასწავლებლად, არაფერი დანაშაული არ აქვს სოფელთან სიკეთის მეტი და არც სკოლის შეგირდებთან, ჩვენ ამაზე უკეთესი მასწავლებელი არ გვინდა და წერა-კითხვის გამგეობასაც ვსთხოვთ ჩვენი თხოვნა მიიღოს. თუ ერთი-ორი კაცი უჩივის ჩვენს მასწავლებელს, საზოგადოებასთან იმათ საქმე არა აქვთ“.

ამ თხოვნას ასოთხმოც კაცთან ერთად ხელს აწერდა დიდთონეთის მთავარდიაკვანი, ხოლო მათ ხელმოწერებს ბეჭდის დასმითა და ხელმოწერებით ადასტურებდნენ დიდთონეთის ახალი მამასახლისი ნიკო ბერუაშვილი და ამავე სიფლის მოსამართლეები პავლე გოგიჩაშვილი და სოლომონ მჭედლიძე.

ეს თხოვნა გამგეობამ განიხილა, მაგრამ უყურადღებოდ დატოვა.

კიდევ ერთი მარცხი განიცადა ვაჟამ. იმედი ჰქონდა, „ქ. შ. ნ.-კ. გამავრცელებელი საზოგადოება“ დაიცავდა, მაგრამ ამოდ. ახალი მამასახლისი, ეკლესიის წარმომადგენელი, გლეხები ითხოვდნენ ვაჟას, ის კი რატომღაც იმ ძველთა და მოხსნილთა ცილისწამებას მიაყოლეს. მართალია, ვაჟა ზოგ შემთხვევაში შეიძლება თავშეუკავებელი იყო, მაგრამ როგორ შეიკავებდა თავს ვაჟაკაცი კაცი, როცა მოსწავლეს უცემდნენ სკოლაში, თვალწინ.

ის ხომ იმ დროს ვაჟას საპატრონო იყო და ვაჟა ვალდებული იყო დაეცვა. რანაირად შეიძლებოდა მკლავი არ გაეშალა იქ, სადაც ყოველ ნაბიჯზე მკლავი იშლებოდა. ნათქვამია: „მგლებში ჩავარდნილმა მგლებივით უნდა იყმუვლოსო“. ვაჟას იქ რომ ინტელიგენტური შეგონებები დაეწყო, სასაცილოდ აიგდებდნენ. მუშტის ენა იყო საჭირო იმათთან ვინც მუშტით ლაპარაკობდა, სხვანაირად ვერაფერს გააგებინებდა. ეს დიდთონელებმა გაიგეს, წერა-კითხვის საზოგადოებაშიც გაიგო ბევრმა. გაიგო თვით იმ ძველმა მამასახლისმაც, ვისაც ვაჟამ სცემა, რადგან მან ამ ცემის გამო არ უჩივლა. ვაჟა მუშტი-კრივისათვის არავის გაულანძლავს მაშინ, როცა „ივერიის“ რედაქციიდან პანდურით ისროლა კაზაკთა თავხედი ატამანი აშინოვი, რომლის მუქარი-საგანაც ვერხვის ფოთოლივით კანკალებდნენ სწორედ ისინი, ვინც ვაჟას მოხსნა „მიუსაჯა“. მაშინ მთელ ქალაქს მოსდეს ვაჟას გმირობის ამბავი, აქებდნენ, ლოცავდნენ. საინტერესო იქნებოდა ერთი, რას გააწყობდნენ ზრდილობიანი ახსნა-განმარტებებით ხანჯალმოღერებულ ავანტიურისტთან.

ერთადერთი კაცი, ვისაც არასოდეს არვისი ეშინოდა და ვისაც ვაჟას დაცვა შეეძლო, ილია ჭავჭავაძე იყო. სხვათა საპირისპიროდ ის დიდადაც აფასებდა მას, მაგრამ ამ შემთხვევაში არც მან დაიცვა, რადგან ჩანს ნაწყენი იყო ვაჟაზე. ილიასადმი წარდგენილ ცილისწამებულურ საჩივარში დიდთონელები წერდნენ, რომ ვაჟამ ეკლესიას თოფის სროლა აუტეხა, ურწმუნოაო. სინამდვილეში კი, როგორც უკვე აღვნიშნეთ, ვაჟა ნაძალადეგ საყდრებს და რელიგია-პოლიტიკას უცქერდა აღმაცერად და ქართული არც ეკლესია და არც რწმენა არასოდეს უარუყვია.

ილია ჭავჭავაძე ქრისტიანობას, მის რწმენას ქართველობის შენარჩუნებისათვის ერთ-ერთ უმთავრეს ძალად თვლიდა. ამიტომ იყო, რომ მთელ თავის შემოქმედებაში ქრისტიანობის ერთგულებას ქადაგებდა, ე.ი. ქართველობისათვის ერთგულებას, ხოლო ქრისტიანობისათვის ღალატს, ქართველობისათვის ღალატთან აიგივებდა; ამ ღალატის გულში გავლენასაც კი დალუბვად თვლიდა. ასეა ეს ჩაფიქრებული „განდეგილში“ (2, 34). თვითონაც მორწმუნე იყო ილია და სისტემატურად დაიარებოდა ეკლესიაში.

ანდა, შეიძლება მართლაც, ილიას არ სიამოვნებდა დიდ შე-

მოქმედებისათვის მოწოდებული პიროვნების წვრილმან კინკლაობაში დროისა და ენერჯის დაკარგვა. უნდოდა, რომ ვაჟას მთელი ენერჯია შემოქმედებისათვის მოენდომებინა. ილიას ადრევეც უნდოდა, პეტერბურგიდან ხელმოცარულად დაბრუნებული პოეტი თავისსავე მასაზრდოებელ ატმოსფეროში გაებრუნებინა. მაშინ ძმებს ყიფშიძეებს უთქვამთ ილიასათვის: ვაჟას ფული ვუშოვოთ და ბერლინის უნივერსიტეტში გავგზავნოთო. ილიას შუბლი შეუჭმუნხნია: „ბატონებო, ვაჟა პეტერბურგიდან იქნებ ბედმაც დააბრუნა, ახლა გერმანიაში უპირებთ გავგზავნას? ძლიერ კარგი, მაგრამ იცით კი რა გამოვა? თავი გაანებეთ, გერმანიაში იქნებ არაფერი გამოუვიდეს, უკეთეს შემთხვევაში ფილოსოფიას დაენაფება, მაშინ ფანდურს მალლა ჭერში შესდებს. ვაითუ, ვერც ფილოსოფოსად ივარგოს, ფანდურიც სამუდამოდ დაემსხვრას. მაგას ჰონორარი დაუნიშნეთ, ისევე მთაში წავიდეს და წეროს – თავისებური ფანდურის ჟღერით დაგვატკბოსო” (ი. იმედაშვილი) (46, 309).

ილია თავიდანვე კარგი შეხედულებისა იყო ვაჟას შემოქმედებაზე. 1886 წელს გამოქვეყნებული ორმოცამდე სხვადასხვა სახის ნაწარმოებიდან რამდენიმეს გარდა ყველა „ივერიამ“, ილიამ, გამოაქვეყნა და აქედან ოცამდე ლექსი და ორი პოემა – „მოხუცის ნათქვამი“ და „გიგლია“. ეს იმ დროს, როცა ილია ლექსებს ძალზე იშვიათად ბეჭდავდა თავის „ივერიაში“, ძალზე მკაცრი და მომთხოვნი იყო.

„ივერიის“ თანამშრომელი გრ. ყიფშიძე კრებულში „ილია ჭავჭავაძის სიკვდილი და დასაფლავება“ წერს: „კრიტიკის ქარცეცხლში ატარებდა თავის თავსაცა და სხვასაცა. ამ მხრივ არავის ჰზოგავდა, არც თავის თავს, თავის ნაწერებს, მეტადრე პოეზიას, დიდად არ აფასებდა და ამ მხრივ მეტად თავდაბლობდა. ისე მოსწონდა ვაჟა-ფშაველას ნაწერები, მეტადრე პოეტური პროზა და პოეზია, საერო კილოზედ აგებული, რომ მის ალტაცებას საზღვარი არა ჰქონდა. ჭეშმარიტი, ნამდვილი პოეტი ეგ არისო. მაგის ლექსებსა და პოემებს რომ ვკითხულობ, აგრეთვე ბაჩანასას, მრცხვენთან, ჩემის მელექსეობისა და ახლა ხომ კალამს როგორღა ავიღებ ხელში ლექსის დასაწერადო“. (21, 102).

რედაქციის თანამშრომლებსაც გადაჭარბებულად მიაჩნდათ

ილიას ალტაცება ვაჟა-ფშაველათი. უმეტესობა მკითხველი საზოგადოებისათვის კი, რა თქმა უნდა, გაუგებარი იყო ვაჟას შემოქმედება. არ მოსწონდათ მისი ხალხური სტილი, უფრო სწორედ ამის გამო პოეტად არ თვლიდნენ და ხალხური მელექსის დონეზე აყენებდნენ. განსაკუთრებით არ მოსწონდათ ყურსმი-ურვეველი ფშაური კილო და „მაღალგემოვნებიანი“ მკითხველი „ივერიის“ რედაქციას ანონიმურ წერილებსაც კი სწერდა, რომ „შეენწყვიტათ ვაჟას ლექსების ბეჭდვა და მით გაზეთის ავტორიტეტი აენიათ“.

მიუხედავად ასეთი საერთო დაუნახაობისა, ილიას შორს და ღრმად ხედვამ მაინც შეამჩნია თავიდანვე ვინ იყო ვაჟა. „ნ.-კ. გამავრცელებელი საზოგადოების“ საქმეთა მმართველი და გაზეთ „ივერიის“ თანამშრომელი ი. მანსვეტაშვილი გვიამბობს: „ვაჟამ თავისი „მოხუცის ნათქვამი“ მოგვიტანა „ივერიაში“ დასაბეჭდად. რედაქციაში შევიკრიბენით თანამშრომლები, ხელნაწერი წავიკითხეთ. მკითხველის მოვალეობა კისრად ედვა გიგა ყიფშიძეს, რომელსაც რედაქციის მედავითნეს ვეძახდით. გიგამ თავისებურად გრძნობით გადააბულბულა.

– გიგა, აბა, ერთი კიდევ გადაიკითხე! – ეუბნება ილია.

გიგამ გადაიკითხა, ილია დიდხანს ჩაფიქრებული იჯდა. ეტყობოდა, დიდი შთაბეჭდილება იქონია ნაკითხულმა. მერე, თითქოს ძილიდან გამოერკვაო, ილიამ ალტაცებით წამოიძახა შემდეგი სიტყვები, რომელიც წინასწარმეტყველური აღმოჩნდა:

– არა, ჩვენ, ძველებმა, ახლა კალამი უნდა ძირს დავსდვათ! გზა ვაჟას უნდა დავუთმოთ!” (46, 308).

ეს სიტყვები მანსვეტაშვილსაც და ივერიის სხვა თანამშრომლებსაც გადაჭარბებულად მიუჩნევიათ. ასევე მიუჩნევია თვით ვაჟა-ფშაველასაც, როცა ილიას ნათქვამი გადაუციათ, მაგრამ ძალიან კი გახარებია და წახალისებულა. გალალეული იყო იმ ხანებში ვაჟა – საქმე წაღმა მიუდიოდა. თავისი საყვარელი საქმე – მასწავლებლობა, საყვარელი მეუღლე და მწერლობაშიც ილიასაგან ასეთი შეფასება, ერთ წელიწადში ორმოცამდე ნაწარმოების გამოქვეყნება! მართლაც, მწვერვალზე იყო. და უცებ საქმის ასეთნაირად შემობრუნება!

დარჩა ვაჟა უადგილოდ, ულუკმაპუროდ. – რა ვქნა, როგორ ვიცხოვრო, არსებობა ხომ მინდაო? – კითხულობდა გულმოკ-

ლული. ისევ „ნ.-კ. გ. საზოგადოებამ” სცადა ვაჟასათვის ხელის განოდება „ვაჟას რედაქციაში მონვევა მუდმივ მუშაობისათვის გადაწყვეტილი იყო. მხოლოდ ილია ცოტად ეჭვობდა და გვეუბნებოდა:

– კარგა ვშვრებით, გამოგვადგება? ან კიდე, რომ გამოგვადგეს, ცოდო არ იქნება, მისი ნიჭი გაზეთის მუშაობაში ჩავკლათ?!

მართალს ამბობდა ილია. აქაც წინასწარმა გრძნობამ არ უმტყუნა მას და მალე თვით ვაჟამ მოგვცა პასუხი ზემოთ მოყვანილ საეჭვო საკითხებზე.

ვაჟამ რედაქციაში იმუშავა მხოლოდ სამი დღე. ვაძლევდით გადასაკითხად და გასასწორებლად კორესპონდენტებს, ვათარგმნინებდით პატარა წერილ ამბებს რუსული გაზეთებიდან. ორ დღეს მუშაობდა, თუმცა იმის მუშაობას დიდი ხალისი არ ეტყობოდა. მოვიდა რედაქციაში მესამე დღეს, ცოტა ჩაფიქრებული იყო... იმავე დღეს ვაჟამ გამოგვიცხადა, რომ რედაქციას თავს ანებებს: მე აქ მუშაობას ვერ შევძლებო. რედაქციას თათბირი ჰქონდა და ასე გადავწყვიტეთ: მიგვცა ვაჟასათვის თვეში ხუთი თუმანი და ვაჟას სამაგიეროდ, ევალეობდა თვეში რაიმე ნაწარმოები უსათუოდ მოეწოდებინა. ვაჟა აიბარგა და გასწია თავის ჩარგალში. დაუბრუნდა არნივი თავის საყვარელ მთებს”. (31, 107).

ი. მანსვეტაშვილი რომ წერს, რედაქციაში ვაჟა უხალისოდ მუშაობდაო, გულისხმობს და სხვანიც ამას გულისხმობენ, თითქოს ვაჟას მთები ენატრებოდა და თბილისში ყოფნა არ შეეძლო. არ არის მართალი! ვაჟას უჭირდა ყოფნა იმათ შორის, ვინც არ დაიცვა, ვინც სოფლის ვიგინდარების, ხალხისა და ქვეყნის წინაშე მართალი გაამტყუნეს, არ დაიცვეს. რედაქციაში შენიშვნაც მისცეს — მაგიდა დაულაგებელი გაქვს, მტვრიანიო! ნაწყენი იყო და კმაყოფილი, გახარებული კაცის ნილაბს ვერ აიფარებდა, ვერ ითვალთმაქცებდა, მიუხედავად იმისა, რომ იმ დროის უპირველეს რედაქციაში ყოფნა დიდ პერსპექტივას უშლიდა წინ ნაწარმოებების გამოქვეყნებისა, სრული ჰონორარის მიღებისა და უზრუნველი ცხოვრებისას. ვაჟას თავად არ შეეძლო და არც ითვალთმაქცებდა, მაგრამ სხვისი პირფერობაც გულს ურევდა. ამას კი მობოდიშების მიზნით უთუოდ ადგილი ექნებოდა ილიას



ვაჟა-ფშაველა და ალექსანდრე ყაზბეგი

რჩეულის წინაშე იმათგან, ვინც მისი მოხსნის საკითხს ხმა მისცა. ვაჟას უნდა ეთმინა თავხედობა იმათიც, ვინც ილიასა და ილიას თანამებრძოლთ მოძველებულ მწერლებად თვლიდა და წარამარა შეურაცხმყოფელ გამოხდომებსაც არ ერიდებოდა. მიხვდა ვაჟა, რომ ამ მონამულ ატმოსფეროში მას სუნთქვა არ შეეძლო. იცოდა, რა მძიმე ცხოვრებაც ელოდა მთაში, მაგრამ ბარის ჯოჯოხეთს ისევ მთის ჯოჯოხეთი ერჩივნა. ი. მანსვეტაშვილის

სიტყვებს: „დაუბრუნდა არწივი თავის საყვარელ მთებსო“, რატომღაც საზეიმო განწყობილებით იმოწმებენ მკვლევარნი, ისე გვიხატავენ, თითქოს ვაჟა ბარში ძალად ვილაცხას ჩამოეყვანოს, ცხრა კაცი ჯაჭვით დაებას და ეხლა აშვებულს, სიხარულით მიეშურებინოს საყვარელი მთებისათვის, თითქოს არ სცოდნოდა, რა დუხჭირი, რა მძიმე, რა გამოყრუებული ცხოვრება ელოდა იქ. მთა მაშინ არის მიმზიდველი, როცა ცხოვრებაც ლალია, თორემ დუხჭირი ცხოვრებისათვის მთა ორმაგად მძიმე ასატანია.

ჯერ ჩვენ დროში, როცა საყოველთაო საშუალო განათლებაა, საშუალო დამთავრებულნიც კი თაკილობენ გლეხურ შრომას, გლეხურ ცხოვრებას, ვაჟას კი, იმ დროს, როცა პედაგოგი სანთლით საძებარი იყო, როცა ფშავ-ხევსურეთს ორი-სამი კაცი თუ ჰყავდა განათლებული, უარი უნდა ეთქვა ყველაფერზე და კვლავ მამა-პაპურ გლეხურ ცხოვრებაში ჩაბმულიყო. ეს იოლი და რომანტიკული იმისთვის არის, ვინც არ იცნობს მთის მძიმე ცხოვრებას.

ძნელია, ალბათ, იმის წარმოდგენა, თუ რა მძიმე იქნებოდა ამ ამაყი კაცისათვის მოხსნილის, სამსახურიდან გამოგდებულის, თავმოყვარეობა- შელახულის დაბრუნება მის ხელისშემყურე ოჯახში, მშობლებთან, მეზობლებთან, ნაცნობ-ნათესავებთან. ვაჟას სწორედ ამ განწყობილებით უნდა დაენერა:

**„მთას ვიყავ, მწვერვალზე ვიდევ, თვალწინ მეფინა ქვეყანა,
გულზე მესვენა მზე-მთვარე, ვლაპარაკობდი ღმერთთანა.
საკეთილდღეო ქვეყნისა მედვა სულად და გულადა:
სიცოცხლე, მისთვის სიკვდილი მქონდა მეორე რჯულადა.
ეხლა თავ-თავქვე მოვდივარ, ხევში მიმელის ბნელია,
თან მომდევს ფიქრი მწუხარე, გულის, გონების მწველია.
მალლიდან დაბლა, ჩამოსვლა, ვაჰმე, რა მეტად ძნელია!
წამლობას ველარ გამიწევს ეხლა ცრემლები ცხელია.
რად მოვალ, თავქვე რად მოვალ, ჩემს თავს რად ვიხდი ტიალად?
იმ მთას თავს რისთვის ვანებებ, თუნდ ვიქცე ტანჯვის ფიალად?
(„მთას ვიყავ“)**

და ესეც:

**„მე რა ვქნა? ვზარდე ბარტყები-ბალღამს მასმევენ მწარესა
და მიბნელებენ ძალადა ორსავ-მზესა და მთვარესა;
გარეთ მაგდებენ ყინვაში და მიკეტავენ კარებსა;
პურის მაგივრად ქვას მძღვნიან, ჯაჭვით მიბოჭვენ მკლავებსა,
ხორცს სხვას აძლევენ, გამოხრულს, მე მომიყრიან ძვალებსა“.**
(*„ნეტავი შენა, მერცხალო“*)

აი, ასე განიცადა მასწავლებლობის მიტოვებინება, დათმობინება იმ ბუდისა, სადაც ბარტყები ზარდა, გამოაგდეს ყინვაში და გამოხრული ძვლები მიუყარეს. განიცადა დატოვებინება იმ მთისა, სადაც გულით შეჰხაროდა მზესა და მთვარეს, ღმერთის სიახლოვეს იყო. უკვირს კიდევ ვაჟას, რატომ ჩამოვდივარ დაბლა, როგორმე გამეძლო, თუნდაც სულ ტანჯვაში ვყოფილიყავიო, მაგრამ ძნელი იყო გაძლება, არ ელოდა, რომ ის „მთა დააზრობდა ფეხებს“.

ვაჟას დიდთონეთიდან განთავისუფლებას იმითი ამართლებდნენ, ვითომ მის სიცოცხლეს იქ საფრთხე ემუქრებოდაო, მოკვლით ემუქრებოდნენო, მართალია, მისი მოწინააღმდეგე მამასახლისი გადაყენებული იყო სამსახურიდან, მაგრამ არ მოასვენებდაო, ეცდებოდა სამაგიეროს გადახდასო. ტყუილია! ასე თუ მოვყვებით, ყველა პროგრესული მოღვაწე, ქვეყნისა და ხალხის სიკეთისათვის მებრძოლი, განსაკუთრებით მაშინ, ტერორის ქვეშ იყო. ყველას მოკვლით ემუქრებოდნენ, მაგრამ არავინ არსად გადახვენილა. მოკვლით ემუქრებოდნენ თვით ილიასაც პეტერბურგიდან დაბრუნებისა და თავისი ნაწარმოებების გამოქვეყნების პირველი დღეებიდანვე, მაგრამ არ დამფრთხალა, თბილისიდან არ გაპარულა და ყვარლის სიმაგრეში არ ჩაკეტილა. ნახევარი თვის ხელფასიც იქნებ იმიტომ აღარ მისცეს ვაჟას, რომ მის სიცოცხლეს უფრთხილდებოდნენ?

ასე უსიამოვნოდ დამთავრდა ვაჟას პედაგოგიური მოღვაწეობა. საყვარელი საქმისაგან ჩამოცილებამ მას ძლიერ ატკინა გული და ეს გულისტკივილი სიცოცხლის ბოლომდე გაჰყვა. ამაზე მეტყველებს გარდაცვალებამდე რამდენიმე თვით ადრე მასწავლებელ ლადო ბზვანელისადმი მიძღვნილი ლექსის სტრიქონები:

**„მასწავლებლის ბედზედა მრავალჯერ დამიკვნესია,
ღმერთმა გიკურთხოს მარჯვენა, თესლი კეთილი სთესია!“**

რა ვუყოთ, მასწავლებელი დღეს არა ფასობს ჩვენშია.
თუმცა ხსნა ჩვენის ერისა მხოლოდ და მხოლოდ თქვენშია.
სული გასუქდეს, ბევრით სჯობს, ვიდრე გასუქდეს ლეშია”.
(„ლალო ბზვანელს“)

ვაჟა თავის ნაწარმოებებში ხშირად აქსოვდა პედაგოგიურ აზრებს, ბავშვების აღზრდის საქმეს დასტორიალებდა თავს. ეს ჩანს მის ბევრ ლექსსა თუ მოთხრობაში. საბავშვო მოთხრობები, რომელშიც აღწერილია მთიელთა მაღალზნობრივი ცხოვრება, მომავალი თაობის აღზრდისათვის ფასდაუდებელი განძია, ისინი პატარებსაც და დიდებსაც უნერგავენ მშობლიური მხარის სიყვარულს, სიკეთის ქმნის სიხარულს, ჰუმანიზმს, ოპტიმიზმს, აცნობენ და აყვარებენ ბუნებას, ცხოველთა და ფრინველთა სამყაროს, მათ ზნეს, აყვარებენ მცენარეულობას – ყვავილებს, ბალახს...

ვაჟა საბავშვო მწერლობის დიდი დამფასებელი იყო, რადგან სწორედ ისინი ზრუნავდნენ მომავალი თაობის აღზრდაზე, მათ სულიერ საკვებზე. ამიტომაც თქვა შიო მღვიმელზე: „ეს პატარა კაცი, დიდი კაცი“. ვაჟამ დიდი შეფასება მისცა საბავშვო მწერლობას, ხაზი გაუსვა იმ სიძნელეებს, რომელიც ამ დარგში მომუშავე მწერლის წინაშე დგას. ის წერდა: „ნურვის ჰგონია, ადვილი იყოს საბავშვო ლექსებისა და მოთხრობების წერა, ყველაზე ძნელი სწორედ ესაა“...

ვაჟა თავის პუბლიცისტურ წერილებში ხშირად აყენებდა პედაგოგიურ-აღმზრდელობით საკითხებს. ზოგი სპეციალურად ამ თემისადმი იყო მიძღვნილი, ზოგში კი სხვა საკითხებთან ერთად ამასაც ეხებოდა. მაგალითად, სტატიაში, „ერთი კვირა ხევსურეთში“, ხევსურთა საჭირბოროტო სხვა საკითხებთან ერთად არ ივიწყებს სწავლა-განათლების მნიშვნელობასაც ამ „ყველაზე მეტად ჩამორჩენილი კუთხისათვის“. 1883 წლის 11 დეკემბერს კი „ქართველთა შორის წერა-კითხვის გამავრცელებელ საზოგადოების“ გამგეობას წარუდგინა პროექტი მთაში მოძრავი სკოლების შემოღების თაობაზე. ვაჟა ამ პროექტში წერდა: „პატივცემულ გამგეობას კარგად მოეხსენება, რომ ჩვენში მეტად მცირეა სასოფლო სკოლების რიცხვი, ამ სკოლებსაც სული აქვთ შეხუთული, რა გარემოებისაგან, ამას განმარტება აღარ

ესაჭიროება. ზოგ ადგილას ისე გაჭირდა საქმე, ანუ, უკეთ რომ ვსთქვათ, საქმე გაუჭირეს, სკოლების დაკეტვას ამჯობინებენ იმათ ქონას... სკოლები ცოტა მოდის ჩვენი სოფლების რიცხვზე, ასს სოფელზე ერთი სკოლა და, მაშასადამე, რიცხვი ამ სკოლაში ნასწავლთა, შედარებით საზოგადოდ მცხოვრებთა რიცხვთან უსათუოდ ნაკლები უნდა იყოს.

მაშასადამე, ჩვენი სასოფლო სკოლა ვერ სწვდება თავის დანიშნულებას: რაც შეიძლება მომეტებულს ასწავლოს წერა-კითხვა სოფლები სადაც ახლომანლო მდებარეობენ, იქ კიდევ არაფერი უშავს, რა ქნან მთის მცხოვრებთა, რომელნიც დაქსაქსულად ცხოვრობენ? როგორ გზავნონ თავიანთი შვილები ოცისა და ოცდაათი ვერსის მანძილზე?

ერთი სახსარი ამ გაჭირვებისაგან თავის ხსნისა არის შეცვლა ახლანდელი წესისა, მთა ადგილებში მაინც, თუ ბარად არა. მიზნის მიღწევა შეიძლება მხოლოდ მაშინ, როცა გამგეობა იქონიებს მოძრავ სკოლებს. ამ სახით საქმის შეცვლამ არ უნდა შეაშინოს, რადგან სხვა ქვეყნების მაგალითმა უნდა გაგვამხნეოს, მით უმეტეს, რომ ჩვენი ცხოვრება უფრო სხვა მდგომარეობაში, სხვა პირობებშია მომწყვდეული და ამის მეტი სახსარი სკოლებს თავის ხსნისა სხვა აღარ დაგვრჩენია.

გამგეობა თუ კეთილ ინებებს და შეინწყნარებს ამ აზრს, შეიძლება სხვა სკოლები ჯერჯერობით დასტოვონ ისე, როგორც არიან და სცადოს ამისთანა მოძრავი სკოლა ჯერჯერობით ფშავში...

ფშავში რომ გაიმართოს ერთი მოძრავი სკოლა, თუ ხეირიანი მასწავლებელი ექნა, გაუნწევს ექვსი სკოლის სამსახურს.

მასწავლებელი ამოირჩევს რვა დიდ სოფელს, რომლებსაც გარეშემო წვრილი სოფლები ახვევია. თითო სოფელში მასწავლებელს სამოცზე ნაკლები ქალი და ვაჟი არ ეყოლება და ამათ გაუნაწილებს ერთი წლის დროს ან შრომას. წლის თავზე თუ ივარგა მასწავლებელმა, ეყოლება იმას „ანბანის“ მცოდნე ოთხასზე მეტი მოწაფე. სხვა რომელი სკოლა შესძლებს ამას ერთი მასწავლებლის მეოხებით?

ვიმედოვნებ, გამგეობა ამ ამბავს უყურადღებოდ არ დასტოვებს” (16, 171).

ამაო იყო ვაჟას იმედი. მის ამ ჭკვიანურ ჩანაფიქრს არავინ

გამოხმაურებია, არავითარი დაინტერესება არ მოჰყოლია. ხომ შეიძლებოდა ვაჟასათვის ჩარგალში გაეხსნათ სკოლა და საშუალება მიეცათ ეს თავისი ჩანაფიქრიც ექსპერიმენტის სახით განეხორციელებინა. ხალხისათვის უსარგებლო მღვდლები, მეფის რუსეთის პოლიტიკის დასაყრდენი, არხოტამდე ყველგან ჩააყენეს, ეკლესიები აუშენეს, 600 მანეთი დაუნიშნეს, მთელ ფშავ-ხევსურეთში კი ერთი სკოლის გახსნაზე არავინ ფიქრობდა. რა დიდი შეღავათი იქნებოდა ეს თვით ვაჟასათვისაც. მაგრამ ეს სხვა საკითხია, მთავარი კი ის არის, რომ უკვე დიდი ხნის წინ სკოლას ჩამოცილებული ვაჟა, უკვე ფშაურ ყოფასა და მწერლობაში მტკიცედ ჩაბმული, მაინც არ წყვეტს პედაგოგიურ მოღვაწეობაზე ფიქრს და ფშავში გამოკეტილი თვალ-ყურს ადევნებს, რა სიახლეებია ამ მხრივ ჩვენში თუ საზღვარგარეთ. და ის ფშავიდან უფრო მეტსა ხედავს, ვიდრე ისინი, ვისაც ამ საქმეთა ხელმძღვანელობა აქვთ მინდობილი.

დაბოლოს მაინც ჩარგალი

უბრუნდებოდა საყვარელ მთებს ბრძოლაში დამარცხებული არწივი, რომელმაც მთებიდან დაიხულუნა, რათა იქ, ბარში მეტისმეტად მომრავლებული ყვავ-ყორნები მიეფრთხ-მოეფრთხო, ბევრს გაჰკრა ბრჭყალი, მაგრამ მათმა სიმრავლემ თავისი ქნა. მოქანცულნი ველის არწივნი, ვისმა ხმამაღალმა ყაშყაშმაც თავის დროზე ბარს საზარელი ძილი დაუფრთხო, გამოაღვიძა, ახლა იმდენად ძალაგამოლულნი იყვნენ, რომ თავის ჯიშისას მხარი ველარ უჭირეს და მხოლოდ მწარე ღიმილიანი მზერა გააყოლეს მთებისაკენ გაბრუნებულს.

მიდიოდა ვაჟა ბარიდან ისე, როგორც თემისაგან მოკვეთილი ალუდა ქეთელაური. დიახ, არის რაღაც საერთო ვაჟას სამსახურიდან დათხოვნასა და „ალუდა ქეთელაურს“ შორის – ეს პოემა ხომ სწორედ იმავე 1888 წლის ბოლოს 13-14 დეკემბერს გამოქვეყნდა. მიეშურებოდა მთაში, სადაც სულს მოათქმევიანებდა არაგვის ხილვა, მშობლიური კერა, ცოლი, შვილი, ზაფხულობით

კი და-ძმებიც იქ იყრიდნენ ხოლმე თავს და დროს ლალად ატარებდნენ. კარგი ძმობაც ჰქონდათ და კარგებიც იყვნენ. ხუთივე ნასწავლი იყო, ამათგან სამი ცნობილი მწერალი: თედომ საბავშვო პროზითა და ხალხური სიტყვების შეკრება-გამოცემით გაითქვა სახელი, ხოლო ბაჩანას, როგორც პოეტს, ბევრნი ვაჟაზე მაღლაც კი აყენებდნენ (ჩანს, ამას სოციალ-დემოკრატები შვრებოდნენ, ვის მხარესაც რატომღაც იდგა ბაჩანა). ამიტომაც ბაჩანა ყველაფერში ეჯიბრებოდა და ექიშებოდა ვაჟას: ნადირობაში, თიბვაში, სიმძიმის აწვევაში და, რაღა თქმა უნდა, მწერლობაშიც.

„პირდაპირ სადღესასწაულო ხასიათი ეძლეოდა მათს შეკრებას, – წერს ნ. ნათაძე, – მხიარული ბაასი, სიცილი, ხუმრობა სუფრაზე და სუფრის გარეშე, დაუსრულებელი იყო. ხშირად თედო და სანდრო, მათთან მიხაც, მისცემდნენ ხოლმე ერთმანეთს პირიპირს და აუტეხდნენ ვაჟას ხუმრობით დაცინვას, რომ გაეჯავრებინათ იგი, მაგრამ ვაჟა ლომივით იგერიებდა ყველას და არ ყოფილა ისეთი წამი, რომ მის სახეს წყენა შესტყობოდა, თუმცა ბევრჯერ ხუმრობას ძლიერ ამლაშებდნენ“.


„უფრო ბაჩანა და თედო მიიტანდნენ იერიშს ვაჟაზე, – გვიამბობს ივ. ბუქურაული, – ვაჟა კი იჯდა დინჯად თავის დარბაისლურ შეხედულებით. ბაიბურად არ მიაჩნდა მას მათი დაცინვა, სიცილ-კისკისი, თითო-თითოს ახედ-დახედავდა და ჩაიღიმებდა... ძმებში ღვარძლიანი და დამცინავი უფრო იყო ბაჩანა და ამასთან იყო ფხუკიანიც. რა ხუმრობასაც სხვა ძმანი აიტანდნენ, ის ვერ იტანდა, გულის მოსვლა ჩქარა იცოდა“.

ბაჩანა სულ რაღაცას უჩიკინებდა ვაჟას. ერთხელ მიზეზი რომ ველარაფერი უპოვა, ჩხვლეტა დაუნყო ჩხირით. – კარგი მომასვენეო! – გაუნყრა ვაჟა. „შენ რატომ არ ასვენებ მეტყვევებს, ღვდლებს, მამასახლისსა და სხვადასხვებსაო!“ უთხრა ბაჩანამ.

ცეკვა-თამაშს რომ დაიწყებდნენ, ტაშს უკრავდნენ და თან გაიძახოდნენ: „ტაში, მელან, ტაში, მელან!“ ამას ვილაცა ფშავში მოარულ ვაჭარს, ვართანას დასცინოდნენ — მას თურმე მოსწონდა ფშავლის ქალი მელანია. სადღაც დღეობასა თუ ქორწინილში ეს ვაჭარი დამთვრალა, გახურებული ცეკვა-თამაშის დროს ტაშს უკრავდა, რაც ძალი და ღონე ჰქონდა, ცეკვავდა და

თან ყვიროდა: ტაში, მელან! ტაში, მელან! ტაში, მელანო!

ძმათა ლალი შეკრებები სოფელში 1890 წლამდე გრძელდებოდა, სანამ მათი მშობლები ცოცხლები იყვნენ. 1890 წლის შემოდგომაზე კი ჩარგლური ხალისიანი შეკრებები შეწყდა. 16 სექტემბერს 56 წლის ასაკში „ჭვლებისაგან“ გარდაიცვალა დედა, გულქანი, ხოლო 22 ოქტომბერს მამა პავლე — ცხელებისაგან. ეს მოულოდნელი უბედურება, მართალაც მეხის დაცემასა ჰგავდა, რადგან ჯერ კიდევ ჯან-ლონით სავსე ცოლ-ქმარი უძღვებოდნენ მთელ საქმიანობას და ოჯახის სადავეებიც ეჭირათ.



ვაჟას ოთახი

მათი სიკვდილის შემდეგ კი მოიშალა და დაიშალა მღვდლიანთ დიდი ოჯახი.

1891 წლის აგვისტოში, როგორც კი წლისთავი გადაუხადეს მშობლებს, ძმებმა დარჩენილი ქონება გაიყვეს და ყველანი თავთავისი გზით წავიდნამოვიდნენ. უფროსი ძმა გიორგი თია-

ნეთში ვექილობდა და იქვე დაემკვიდრა საცხოვრებლადაც, ბაჩანამ იმ დროისათვის მოახერხა ხევსურეთში სკოლის გახსნა და იქ მასწავლებლობდა, თედო ხელთუბანში (გორის რ-ნი) ასწავლიდა და იქვე დასახლდა; უმცროსი ძმა სანდრო თელავში სწავლობდა, შემდეგ კი თბილისში დაიწყო მუშაობა. ჩარგალში მხოლოდ ვაჟა-ლა დარჩა. უძრავი ქონება, სამეურნეო იარაღები არაფერი გაუყვიათ, ვაჟას დაუტოვეს ყველაფერი. მოძრავი ქონება კი, როგორც „პირობის ქალაღდიდან“ ჩანს, შემდეგნაირად გაუყვიათ (წინა პუნქტები არ არის საინტერესო):



„6. დანარჩენი ნაძრავი ქონება, ცხვარი, ცხენები, და ძროხები გავიყავით თანასწორად და გვერგო:

გიორგის: ერთი ფური (გახტა), ერთი მოზვერი (ბოქა), ორი წლევანდელი ხბო (წარბა და მერცხალა), და სამი ცხვარი;

ლუკას: ერთი მოზვერი (ბოლრა), ერთი ფური (თამამა) და კიდევ ერთი ხარი (ვართანა);

ნიკოს: ერთი ხარი (ფესანგა) და ექვსი ცხვარი;

თევდორეს: ერთი ფური (პირნათელა), ერთი დეკეული (წკრიალა), კიდევ ერთი დეკეული (ლევანკა) და ერთი წლევანდელი ხბო (ხახმატა);

მართას: ერთი ფური (ბიბინა), ერთი მოზვერი (თვალშავა) და ექვსი ცხვარი;

სანდროს: ერთი ფაშატი ცხენი და ერთი მოზვერი (ქარუ-მა)“.

სანდროს აღზრდა, როგორც მცირეწლოვანისა, ოთხივე ძმამ იკისრა. აღარც მშობლები, ძმები წავიდნენ-წამოვიდნენ, ერთადერთი და მართაც ყვარელში გათხოვდა და გამოყრუვდა „ღვდლიანთ სახლი“ – დარჩა მარტო ვაჟა თავისი მეუღლითა და წვრილშვილით ცხოვრების პირისპირ. აღარავინ შეემწე და ხელის შემხველებელი. ბარში გაზრდილი ნაზი ქალი კეკე მთის მძიმე პირობებში მაინც ვერ შეძლებდა იმდენს, რამდენიც მთიელის ოჯახის გაძლოლას სჭირდებოდა. არც მაინცადამაინც ვაჟა იყო მიჩვეული გლეხურ საქმეს. სანამ მშობლები ცოცხლები ჰყავდა, ყველაფერს ისინი აკეთებდნენ, ვაჟა ისე თუ წაახმარდა ხოლმე ხელს. მას არა საქმავდნენ, ხელს უწყობდნენ შემოქმედებით საქმიანობაში. ეხლა კი მეტი გზა არ იყო, ყველაფერი – წვრილმანიდან მსხვილმანამდე – თვითონ უნდა ეკისრა, რაც არ იცოდა, უნდა ესწავლა და ოჯახს გასძლოლოდა, სხვანაირად შიმშილით სიკვდილი ელოდათ.

მიგრიულთის ძირს, პავლე მღვდელს რომ დუქანი ჰქონდა, ეს დუქანიც ვაჟას დარჩა, მაგრამ ლუკამ ვაჭრობა არ იკადრა და დუქანი გააუქმა. ან კი როგორ ისარგებლებდა დუქნით, როცა მისი შეხედულება დუქანზე ქვეყანამ იცოდა. აი, რას წერდა ერთ-ერთ თავის ადრინდელ „თიანურ ფელეტონში“:

„ჩვენ მხარეს, სხვათა შორის, ერთი ჭირი სჭირს და ამ ჭირით მარტო ჩვენ არა ვართ დაავადებულნი, არამედ ჩვენი ქვეყნის სხვადასხვა კუთხეებიც. ეს ჭირი სამიკიტნოების გამრავლება გახლავთ. საცა ოთხი- ხუთი კომლი სადმე სჩხირია, იქვე საყელში უსათუოდ დუქანია დასკუპებული. აზრი და მიზანი მედუქნისა ყველასათვის აშკარაა: უნდა სწოვოს დუქანმა სისხლი და ტვინი ოჯახებისა...“

ხალხიც გრძნობს ამას, ხოლო ერშიაც მოიპოვებიან ისეთნი, დუქანს მონყალე თვალით რომ უცქერიან. ესეც ზოგიერთი ჩვეულების ბრალია: რომ მოკვდეს ვინმე, სად წავიდე? ასე უცბათ საით ვიშოვნო სასმელი და საჭირო სანოვაგეო?

მკვდრების ხსოვნა და პატივისცემა კარგი საქმეა, ხოლო ეს პატივისცემა იმ ზომამდე არ უნდა მივიყვანოთ, ცოცხლები იმათ მსხვერპლად შევეწიროთ – ეს უფრო დიდი უგუნურება იქნება ჩვენი.

მკვდრების გულისათვის მიკიტნების ყოლა და დუქნების

ქონა ცოცხლების ცოცხლად დამარხვას მომაგონებს, თვით სიცოცხლისა და ერის არსებობის მტრობას, რასაც არც ერთი ჭკუათმყოფელი ადამიანი არ იკისრებს, არც იკადრებს“... (15, 220).

ვაჟა ამ დროისათვის ჯერ კიდევ ახალგაზრდა კაცი იყო (30 წლისა), მაგრამ ჯანმრთელობა უკვე შერყეული ჰქონდა. ეს უყო „ციმბირის წყლულმა“, თვალის იმისგანა ჰქონდა დაზიანებული...“

1890 წლის ზაფხულში ვაჟას ბიძამ, მწარამ, სოფელ ბონახში ავადმყოფი ხარი დაკლა. რაკი ზაფხული იყო და იმდენ ხორცს ვერაფერს მოუხერხებდა, იაფად მიჰყიდა ვაჟას. ვაჟამაც ოჯახის სარჩოდ თითქმის ნახევარი ხარი აჰკიდა ცხენს და შინ წამოიღო. გამოჭრა ხორცი, რბილი კასრებში ჩაამარილა, ძვლები ბუხრის თავზე დაჰკიდა გასახმობად. კმაყოფილი იყო, რადგან ხორცი ზამთარშიც გაიყვანდა მის პატარა ოჯახს. თურმე ხარი ჭირიანი ყოფილა და ეს არც ბიძა მწარიას სცოდნია. მწვადები იქაც გემოზე უჭამიათ, ვაჟას შინ ხინკალიც გაუკეთებია. სხვას არაფერი და ვაჟას კი, ჩანს, თვალზე მოისვა ხორციანი ხელი, „ბედნიერი“ გამოაჩნდა. „მეორე თუ მესამე დღეს ვაჟას სიცხე მისცა და თვალის ქუთუთოზე ქავილი დაუნყო, ზედ მუნუკიც გამოუვიდა. მაშინვე შეატყო დედაჩემმა, რომ ის მუნუკი „ბედნიერი“ იყო. ის იმოდენა ხორცი სულ მიწაში ჩავფალით, რომ ძალღებსაც კი არ ეჭამათ.

ვაჟა იმის შემდეგ ჩანვა ლოგინში და მთელი ერთი თვე, თუ თვე ნახევარი ლოგინიდან არ ამდგარა. ვაჟას ცხენიც, რომელსაც ის ხორცი ეკიდა, ვერ ასცდა ამ ჭირს. იმასაც გამოაჩნდა „ბედნიერი“ და ვაი-ვაგლახით ძლივს მოვარჩინეთ“ (ალ. რაზიკაშვილი).

ვაჟას დედა მკურნალობდა შინაურული წამლებით. სხვამხრივ განკურნა, მარტო თვალის ქუთუთოს ვერაფერი უწამლა. მაშინ ვაჟა თბილისში ჩამოვიდა და ოპერაცია გაუკეთეს: მკლავიდან ხორცი ააჭრეს და თვალზე მიაკერეს. მაინც ვერ განიკურნა მთლიანად, თვალის ქუთუთო ჩამოფხავებული დარჩა და ცრემლმდინარი. ასეთი თვალის გამო ფშავლებმა მისთვის შერქმეულ „რაზიკაანთ დევს“ „ცალთვალა“ დაუმატეს და ახლა „რაზიკაანთ ცალთვალა დევს“ ეძახდნენ.

და, აი, ასეთი ჯანგატიხილი, ჯერ კიდევ ავადმყოფი ვაჟა დედისა და მამის სიკვდილის შემდეგ იძულებული გახდა, ლოგინიდან წამომდგარიყო და ყველაფრისთვის მიეხედა: თივაც მოსატანი იყო და შეშაც, ძნაც მოსაგულელებელი და გასალენი: ზამთარი დგებოდა და ყველაფერი ველზე რჩებოდა.

რა ფიზიკური და სულიერი ტკივილების დაძლევის, რა უკანასკნელი ძალების დაძაბვის ფასად უხდებოდა ვაჟას დედისა და მამის დატოვებული საქმის დაბოლოება, მომთავრება. ავად იყო თუ კარგად, სულერთია, უნდა საქმე ეკეთებინა, უნდა ჭაპანი ენია, სანამ სული ედგა და შეეხებოდა ისეთსავე მძიმე ფიზიკურ შრომას, როგორსაც უხსოვარი დროიდან ენეოდნენ მისი მამა-პაპანი: ხნავდა, თესავდა, მკიდა, ლენავდა, თიბავდა, თივას ეზიდებოდა, შეშას, ამას ემატებოდა საქონელი და სხვა ათასი ოჯახური წვრილმანი, ნავთი და მარილი. ერთ-ერთ ფოტოზე აღბეჭდილია, ვაჟა როგორა თლის ცულისტარს. და როდისღა იცლიდა წერისათვის, როგორღა ახერხებდა?

ვაჟა-ფშაველას შვილი ვახტანგ რაზიკაშვილი იგონებს: „მამაჩემი მაინცდამაინც კარგი მეურნე არ გახლდათ, თუმცა ყველაფერი ემარჯვებოდა. იმისი ხელით გაუკეთებელი არაფერი რჩებოდა. თვითონ აკეთებდა უღლებს, ტაბიკებს, ცულისტარს, ნიჩბებს, ნამგლებს, წალდისა და ხერხის ტარებს, საქონლის ბაკებს, წნავდა ლასტებს, მართავდა საბძლებს, აწყობდა ლატანს, სთლიდა საბძლის კავებს, აკეთებდა მარხილებს და სხვა.

ყველაფერს თავისებურად აკეთებდა, სხვების ნახელავს არ ჰბაძავდა, რალაც ახალი შეჰქონდა საქმეში. ხშირად ეს ახალი უფარგისი იყო, მაგრამ მაინც თავისებურად გაკეთებული მოსწონდა.

მამა კარგად აგებდა ყორეს. ორი ყორული აქვს თავისი ხელით გაკეთებული. დღემდის არის დარჩენილი ჩვენს სახლთან, ნასკოლარის ბოლოზე, ვაჟას ხელით აგებული ქვის ყორე. კიდევ დიდ ხანს იდგმება ის ყორე. ქვები ლამაზად არის ერთმანეთზე გადაბმული, მოხერხებულად და ოსტატურად გადაკერებული.

საცხენე გომურის კედელიც მამამ თვითონ ააშენა.

თავის ნაკეთები საქმე ძალიან მოსწონდა. შორიასლოს დაჯდებოდა, უყურებდა ხოლმე სიამოვნებით თავის აგებულ ყორეს და ამვლელ-ჩამომვლელი მგზავრისა თუ მეზობლის დანახვაზე

იქაძნებოდა – აბა, შეხედეთ, ასე უნდა ყორეს აგება! აბა, როგორი ბიჭი ვარო! მართლაც, მამაჩემის აგებულ ყორეს ვერავინ დაინუნებდა. სულ ერთავად ყორეებს აგებდა და ხელი უკვე შერვეული ჰქონდა ამ ხელობისათვის.

შრომასა და საქმეში იყო მუდამ გართული. სულ ფუსფუსებდა. უსაქმოდ ვერასდროს ნახავდით. აკი თვითონაც ამბობდა ერთ ლექსში:

**„არც როს უსაქმოდ არა ვარ,
მუდამ ვკონინებ, ვჩუჩუნებ“.**

ჩვენს ეზოში რაც ხეხილი დგას, სულ მამაჩემის დარგულია. კალეელი ვაშლის ჯიში ფშავში პირველად მამაჩემმა გაავრცელა და ვაშლის იმ ჯიშს ფშავლები დღესაც „ლუკაის ვაშლს“ ეძახიან!“ (37, 13).

ჩარგალთან ახლოს, მიგრიაულთის ძირს მცხოვრებმა ეფრემ ბუთხაშვილმა ვეებერთელა მსხლის ხე მიჩვენა და მითხრა: ეს ვაჟა-ფშაველას მოცემული ნერგიაო. „მაშინ ცამეტ-თოთხმეტი წლისა ვიქნებოდი, ჩარგლის კარს ვიყავით ბაღლები. ვაჟამ შემოიარა ცხენით. ნერგები ჰქონდა ცხენის გავაზე დაკრული. მკითხა: შენ ვისი ხარო? ვუთხარი მამუკაისიო – მამაჩემთანა ძმაკაცობდა, ხშირად მოდიოდის სტუმრად. ერთი ნერგი გამოსწავდა და მითხრა: წაიღე, დარგე და ჩემს სახსოვრად გაახარეო. გახარებულმა წამოვიღე და დღე და ღამ იმას შევტრიალებდი. მაშინ ხილი არ იყო ფშავში – არ გაიხარებსო. პირველად ვაჟა-ფშაველამ მოიტანა და, როცა დაინახა ხალხმა, რომ იხარა, მერე ყველამ ხეხილის გაშენება დაიწყო. მხოლოდ, ვაჟას მერე კი მე გავაშენე, ძალიან დამაინტერესა. ეს ვაჟასეული მსხალი ეხლაც ყოველწლიურად ისხამს და ახლა რამდენს ისხამს!“

ვაჟასაც ისევე, როგორც უმეტესობას მთიელებისას, 5-6 ძირი ფუტკარიც ჰყოლია, რომელთა მხოლოდ თვითონ უვლიდა, სხვას, არც შინაურს და არც გარეულს, მათთან მიკარების უფლება არა ჰქონდა. გულქანის გადმოცემით, მიუჯდებოდა თურმე „მამაი“ რომელიმე ხოკერს საფრენთან, საათობით ადევნებდა თვალს მათ ფუსფუსს და ებუტბუტებოდა: „მე და თქვენ ერთნაირად თავდაუზოგავ შრომაში ამოგვდის სული, ერთ-

ნაირად წმინდა. ღმრთის მოსაწონ საქმეს ვემსახურებითო!“.

„ფუტკრის გატეხვა“, თაფლ-სანთლის გამოდნობა, ნარჩენების დამუშავება — სულ ვაჟას საქმე იყო, მარტო გულქანს თუ წაახმარებინებდა ხელს.

„გატეხილი“ ხოკრიდან ახალი ფიჭის ხილარს ამოიღებდა ჯამში, სანთელს აანთებდა, იობისად დალოცავდა: „იობის პელთა-ნებასამც იქნება, ღმერთმა ალალ უყვას — ფუტკარ იმისაგან არიო“, მერე დაგვიდგამდა იმ თაფლიან ჯამს საჭმელადა“ — იგონებდა გულქანი.

თითქოს არც ესწავლოს თბილისისა და გორის სასწავლებლებში, არც პეტერბურგში, ვაჟა გარეგნულად ყოველნაირად ფშაველ გლეხს დაემსგავსა. მ. შამანაური წერს: „ხშირად ყოფილა შემთხვევა, მივსულვარ ვაჟასთან, მიკითხნია და უთქვამთ: იქით არის, ხნავსო. მივსულვარ ადგილობრივ ვაჟასთან და თვალწინ წარმომდგომია შემდეგი სურათი: ვაჟას აჩაჩა გუთანში (ხის გუთანში) შეუბამს ყვეარი ხარი, თვითონ ფეხშიშველა ეწევა გუთნის დედობას, ცოლი კი მეხრის მოვალეობას ასრულებს, ხარებს წინ უძღვის.

— რა ვქნა, ძმაო, თუ ეს მინა არ ავჩიჩქნე და პური არ მოვიყვანე, ყველანი მშვივრები დავიხოცებით, რადგან ჩემი პოეტობა-მწერლობა ნავთის, მარილის ფულს ძლივს მაძლევსო“.

ვაჟას ძმები

გიორგი

ძმები რაზიკაშვილები, შორიშორს ცხოვრების მიუხედავად, კავშირს არ წყვეტდნენ ერთმანეთთან, მიწერ-მოწერადაცა ჰქონდათ, მისვლა-მოსვლაც და ლექსობა-კაფიაობაც; ზოგ შემთხვევაში კი დიდ ასპარეზზე გამოტანილი ლიტერატურული პაექრობაც.

უფროსი ძმა, გიორგი, როგორც აღვნიშნეთ, თიანეთში იყო ვექილად და ბინითაც იქვე დაემკვიდრა. თიანეთში, სამაზრო ცენტრში ჩასული ვაჟა, რა თქმა უნდა, უმთავრესად მასთან მიდიოდა, როგორც თავის ოჯახში. „გიორგი, მამაჩემის დახასიათებით, ყველაზე ნიჭიერი ყოფილა. ბუნებითაც უჭრიდა ენა. უმაღლესი იურიდიული განათლება ჰქონდა მიღებული. გარეგნობით თითქმის ყველას სჯობდა — მაღალი, მხარბეჭიანი, ლამაზი და ღონიერი, განთქმული ხუმარა და მოქეიფე იყო. არ დარჩენია არც ერთი სოფლის მოხელე, რომ არ გაეღიქვოს და მასხრად არ აეგდოს. ცხოვრობდა თიანეთში და სამართლიანობისა და ხალხის ინტერესების დაცვის გამო დიდი სიყვარულითა და პატივისცემით სარგებლობდა, მაგრამ დიდხანს არ უცოცხლია. ხშირად იგონებდნენ ძმები ვაჟასთან მის გახუმრებას და ბევრსაც იცინოდნენ ხოლმე“ (36, 41).

ვაჟა და გიორგი შეხუმრებულები ყოფილან, თუმცა გიორგის ხუმრობას ცოტა, არ იყოს დიდკაცური, ბოროტი ხუმრობის სუნი უდის. გაზულუქებული გამძლარი კაცი სასაცილოდ იგდებს ღარიბ ძმას, ვაჟას. ალ. რაზიკაშვილი გვიამბობს: „ვაჟას ჰქონდა ერთი ძველი გახუნებული ნაბადი. ამ ნაბდით ხშირად ესტუმრებოდა თავის ძმას გიორგის თიანეთში. გიორგის არაერთხელ უთქვამს ვაჟასათვის, მოიშორე ეს გახუნებული ნაბადიო, მაგრამ ვაჟა მაინც არ იშორებდა. რაკი თხოვნით ვერაფერს გახდა გიორგი, გადასწყვიტა ხერხისთვის მიემართნა: ერთხელ, როდესაც ვაჟა საქმეებს მორჩენილიყო და შინ წასასვლელად მომზადებულიყო, შეეკაზმა თავისი იორლა ცხენი, აეკიდა ხურ-

ჯინი, გავაზე კიდევ თავის ძველი ნაბადი დაეკრა, თვითონ კი ბაზარში წასულიყო. ამ დროს გიორგის ეპოვნა დრო: მოეხსნა იმის ცხენისთვის ის ნაბადი, გაეშალა, თავის ცხენისათვის ამ ნაბდიდან ორი თექალთო გამოეჭრა, შემდეგ ნაბადი ისევ დაეხვია და დაეკრა ვაჟას ცხენისათვის ისე, რომ ვაჟას ეს ამბავი არ სცოდნოდა. გამოეთხოვა გიორგის, მოახტა თავის „ნიკორს“ და მოუსვა შინისაკენ. ივრის მინდორი რომ გაიარა, მიადგა სოფ-



ლივინის მთას. სოფლივინის მთას რომ გადაივლის კაცი, იქიდან ჩვენს სოფელს გადაჰხედავს. ვაჟა შეუდგა ამ მთას თუ არა, ერთბაშად თურმე კოკისპირულმა წვიმამ კი დაასხა. მოხსნა ვაჟამ ცხენს ის თავისი ნაბადი და მოიხვია, მაგრამ შენც არ მომიკვდე, რომ იმან ის წვიმა ვერ დაიჭირა და უშენს ვაჟას შიგ ზურგში. ვაჟა ხან იქით მიუბრუნებს კალთებს ნაბადს და ხან – აქეთ, მაგრამ წვიმა თავისას არ იშლის. ბოლოს რომ მიუსვ-მოუსვა ხელი და კარგად გაშინჯა, ჰხედავს და რას ხედავს? იმის ნაბადში ისეთი ფანჯრებია გამოჭრილი, რომ შიგ თურმე ბულა-კამეჩი გაძვრება. მაშინვე მიხვდა ვაჟა ვისი „ძალლობაც“ იყო ეს ოინი, მაგრამ რას გააწყობდა”.

ხუმრობა! ხუმრობა მაშინ იქნებოდა, ამ დაჭრილი ნაბადის შემდეგ იქვე ახალი ნაბადი რომ აღმოეჩინა ვაჟას, თორემ რა ხუმრობაა მისი სანწყალი, ერთადერთი ნაბდიდან ჩინოვნიკმა თავისი ცხენისთვის თო-

ქალთოები გამოიჭრა, ისედაც დაავადებული ძმა კი მთაზე დასასველებლად და თითქმის სასიკვდილოდ გაიმეტა. ისიც უნდა ვირწმუნოთ, რომ ასეთი გამძღარი მოხელე იმასაც არ ჰკითხავდა ვაჟას, ჰქონდა თუ არა ახალი ნაბდის ფული. ან აქცევდა თუ არა ვაჟა ყურადღებას ნაბდის სიძველეს? ტანსაცმელს ჩინოვნიკებისთვის ჰქონდა მნიშვნელობა, თორემ ქართველებს უთქვამთ: „ღვდელი ჭილობში იცნობაო“.

გიორგის მეორე „ხუმრობა“: მას, როგორც მსმელ და სტუმრისმოყვარე კაცს, უქურდებოდა ხოლმე ცარიელი ბოთლები. ვაჟა აიღებდა, ჩაალაგებდა ხურჯინში და წაიღებდა ჩარგალში. ეს რამდენჯერმე მოხდა. გიორგიმ ამას მიაქცია ყურადღება. „დაიცა, ლუკავ, ერთი ოინი თუ არ გიყავი, რა კაცი უნდა ვიყო“, გაიფიქრა გიორგიმ გულში. გაიარა დრომ, მოვიდა ვაჟა, გიორგიც დაუხვდა ჩვეულებისამებრ. მიდის ვაჟა შინ. ოთახის კუთხეში ეყარა ცარიელი ბოთლები. ჩაინყო ეს ბოთლები ვაჟამ ხურჯინში, გამოემშვიდობა გიორგის და გასწია შინისაკენ. მივიდა შინ. ვაჟას ცოლმა ამოალაგა ხურჯინიდან ცარიელი ბოთლები და შეუდგა რეცხვას. ჩაასხა წყალი ერთ ბოთლში, ხედავს ძირიდან წყალი წურწურით ჩამოდის; ნახა ბოთლი ძირში გახვრეტილია: „კაცო, – დაუძახა ცოლმა ვაჟას, – რათ გინდოდა ეს გახვრეტილი ბოთლები თიანეთიდან აქ რომ მოიტანეო?“ ვაჟა მაშინვე მიხვდა რაშიც იყო საქმე. არაფერი არა თქვა, მხოლოდ ოდნავ უღვაშში ჩაიცინა”.

ან ეს რა ხუმრობაა? სოფელში, და ისიც მთაში, ცარიელი ბოთლი ყოველთვის საჭიროა, რადგან ბევრი იხარჯება: სტუმარს ისე ვერ გაისტუმრებ, თუ საგზაოდ არაყი არ ჩაუხსნი, ზოგი თავად უნდა ჩაიდგა სამგზავროდ და უკან აღარ მოგყვება. სხვადაც რამდენი რამისთვის არის საჭირო. ერთი დღის სავალზე, მთაზე გადაიტანა და აღმოჩნდა, რომ ვეჭილს უხუმრია, ძირები დაუხვრეტია. სხვაც რომ არა იყოს რა, ბოთლები გააფუჭა. სტუმრის მოყვარე მოქეიფე კაცი ხშირად იხდიდა ალბათ ძვირადღირებულ წვეულებებს, ერთხელ კი არ გახსენებია კაპიკებად ღირებული ნავთი გაეგზავნა ვაჟასთვის, ან წამლების ფული მიეცა. ასე ყოფილა მაშინაც და ასეა დღესაც: სახელმწიფო მართლმსაჯულებაში ჩამდგარი მოხელენი თავის თავისა და თავის უფროსების მეტს ველარავის ამჩნევენ, არც სატკივარი

ვისიმე გაეგებათ, თუნდაც ისინი თავისი ალალი ძმები იყვნენ. „დედაჩემის, თინათინ რაზიკაშვილის ნაამბობიდან ვიცი. „ძმებში გიორგი ყველაზე კარგად ცხოვრობდა და ძალიან უზრუნველყო იყო. რასაც გაიხდიდა, მიჰყრიდა, ვიდრე გაარეცხვინებდა, ახალს იყიდდა და ჩაიცვამდა. ჭურჭელზედაც, თუ სახლში სჭამდა, სულ ახალ-ახალი ჭურჭელი მოჰქონდათ. ვაჟას ეს შეუმჩნევია და უთქვამს: იმას იმდენი უყრია, სად რა წაიღოს, არ იცის, მე კი აქ გამოსაცვლელიც არა მაქვსო. სხვის წაღებას, მე წავიღო“. (36, 41).

თედო რაზიკაშვილის ქალიშვილის, ეთერის ამ მოგონებებიდანაც კარგად ჩანს, რომ გიორგი ვერ ამჩნევდა ვაჟას გაჭირვებას. ერთხელ ნახმარ ტანსაცმელსა და ჭურჭელს მეორედ აღარა ხმარობდა, სხვებს აძლევდა, ვაჟასთვის კი ცარელი ბოთლებიც არ ემეტებოდა, იდგა და ბოთლებს ძირებს უხვრეტდა. იქნებ ეს ერთგვარი ჩუმი ქიშპიც იყო ვაჟას მიმართ – უნდოდა რაც შეიძლება მეტად გამოეჩინა თავისი „სიდიდე“ მწერალ ძმასთან შედარებით. ამასთან ერთად არც ის არის გამორიცხული, რომ გიორგი ამ მეტისმეტად მაძღრისი თანამდებობის დაკარგვის შიშით, ყველანაირად ცდილობდა დაემტკიცებინა ირგვლივ მყოფი მეფის მოხელეთათვის „ბუნტოვშიკი“ ძმის უთანაგრძნობა. ცდილობდა დაერწმუნებინა მეფის მთავრობა თავის ერთგულებაში იმითი, რომ არ იცოდა (სხვა მოხელეებთან ერთად) ვინ იყო ილია ჭავჭავაძე და არ სცნობდა ვაჟა-ფშაველას, როგორც მწერალს, როგორც პიროვნებას.

ასეთ უფროსებს და ასეთ ძმებს ხშირად იქაცა აქვთ პრეტენზია უკეთესობისა, რაშიც უპირატესობა ღარიბისა თუ დაჩაგრულის მხარეზეა – ეკაფიავებოდა კიდევ ვაჟას, მაგრამ ქართულად ვერ ახერხებდა, უფრო რუსულად ემარჯვებოდა და უფრო უაზროდ. ნადირობაში და სროლაშიც სულ იმის სამზადისში იყო, რომ ვაჟაზე კარგად ინადირებდა, უბრალოდ მოუცლელობისაგან არ ჩანდა როგორც მონადირე. სანადიროდ არასოდეს არ იყო ნამყოფი, მაგრამ არა კმაყოფილდებოდა შვლებით და წვრილი ნადირით, უთუოდ ირემი უნდა მოეკლა და ისიც – ხარი, არანაკლებ 10-12 რქის ნაყრიანი. განმენდილ-გაკრიალებული თოფი, გამზადებული ვაზნებით კედელზე ეკიდა და წასვლის მეტი აღარა უნდოდა რა... მაგრამ ამ წასვლაში იყო საქმე. ხანდა-

ხან გიორგის ვაზნების სათვალავიც აერეოდა ხოლმე, რა თქმა უნდა ვაჟას დააბრალებდა და აუტეხდა ერთ დავიდარებას. ვაჟა კი დაცინვით ეუბნებოდა:

– ბიჭო, შენ ნამდვილი ტარტარენი ხარ. ერთი, თუ ღმერთი გნამს, დაიხედე შენს მუცელზე, ყაზარასავით რომ გაბერილხარ, რომელ ნადირზე ოცნებობ? შენ და ირემი? ღმერთმა ნუ შემარგოს შენი მოკლული ირმის ხორცი! ნუთუ მართლა მონადირეობაში სდებ თავს? ერთი დამიხედეთ ამ მონადირეს! ტყუილად თოფს და პატრონებს ნუ აცდენ, ვეფხვმა იცის, როგორ მოიხმაროს... მოიტა რაღა აქ!.. ხომ გაგიგონია ნათქვამი: „იარალნ მამცენ, ფშაველო, რად გი არ იცი ხმარებაო“. აი, ეს შენზე და შენისთანა მონადირეებზეა ნათქვამი, გესმის? ჰო, მოიტა, შენ კარგი ბიჭი ხარ, კიდევ იშოვნო, ერთი ათიოდე ვაზნა მაინც ჩამოდი... მაშ რად მიხარიან მე შენი თავი. ერთად წავიდეთ ერთად სანადიროდ. ბულაანში წავიყვან, ახმეტის თავში, იქ ადვილი სასიარულოა. ირემსაც ხომ არ უყვარს ღადე-ღუდე ადგილები... ად-

ვილად ივლი... ყვირილობას წავიდეთ, ყვირილობას. უთუოდ მოვკლავთ ხარს. გიყვარდეს ირმის სუკები, ზედ ახმეტური მაჭარი. ჩვენს ვენახსაც, ამბობენ, წლეულს კარგა ასხიაო”...

იმდენს ელაპარაკებოდა, რომ ბოლოს ისიც თავს ბულაანში წარმოიდგენდა, ვაჟას ხომ უვაზნებოდ ვერ გაუშვებდა და რამდენიმე ცალს სასწრაფოდან ამოაცოცებდა. ვაჟაც სიამოვნებით გამოართმევდა და ჯიბეში გააქანებდა”. (მ. რაზიკაშვილი) (46, 231).

ამაყი იყო ვაჟა, ჩანს, არაფერს არა სთხოვდა. რატომ უნდა ეთხოვა? ვე-



რა ხედავდა გიორგი, რომ მის ძმას ძალზე უჭირდა, ცოლ-შვილის გამოსაკვებად დაავადებული კაცი წელებზე ფეხს იდგამდა, ცოლ-შვილი მშიერ-ტიტველი ჰყავდა, გიორგი კი უაზროდ ხარჯავდა, ჩანს, ქრთამად აღებულ ფულებს.

ვაჟა, მონადირე და თოფ-იარაღის უზომოდ მოყვარული მთიელი, მარტო ვაზნების თხოვნისაგან ვერ იკავებს თავს, ათას რალაცას ჰპირდება ნადირობაში თავის გამოჩენის მსურველ ვეჭილს. პოლიციასა და მოხელეებს იარაღისა და ვაზნის შოვნა არ გაუჭირდებოდათ, რამდენსაც გინდა იშოვიდა, შეეძლო ვაჟასთვისაც ეშოვნა, მაგრამ არა, უნდოდა ეიძულებინა, რომ ეთხოვა. ხანდახან ერვენებოდა, რომ აკლია ვაზნები და ვაჟას უყვირის, ერხუბება – შენ მომპარავდიო.

მოკლედ, გიორგი გაღმა იყო, ვაჟა – გამოღმა.

ბაჩანა

ბაჩანა ვაჟას მეორე ძმის, ნიკო რაზიკაშვილის ფსევდონიმია. ამ სახელით არის ცნობილი ქართულ მწერლობაში. ტანდაბალი, მომცრო ტანისა ყოფილა და ამიტომ შეურქმევიათ ბაჩა, ბაჩანა. ბავშვობაში ძალიან სწყინდა თურმე ეს მეტსახელი, თიკუნი, მაგრამ შემდეგში შეეგუა, კიდევ მოსწონდა და ლიტერატურულ ფსევდონიმადაც შეირჩია. ის ხუთი წლით უმცროსი იყო ვაჟაზე.

ტანად კი პატარა ყოფილა, დაბალი, მაგრამ ჩასხმული ჯირკვა, მხარბეჭიანი, ძალიან მკვირცხლი, ფიზიკურადაც ძლიერი და ამასთან ძალზე ფიცხი. მის შესახებ ხშირად ხუმრობდნენ: ვაი იმას, ვინც მაგას გააბრაზებს, სანამ სიტყვას მოათავებს, ბაჩა ვეფხვივით დაახტებაო. თავისი ფიცხი ხასიათის გამო ბევრ ხიფათს, ბევრ უსიამოვნებას გადაჰყრია ცხოვრებაში. ერთხელ მიპარვით ფერდში დაჭრეს კიდევც, რამაც საბოლოოდ შეურყია ჯანმრთელობა.

სახით ისიც თავის ძმებივით ლამაზი სახისა ყოფილა, უკან გადავარცხნილი გრუზა ქოჩორი კიდევ უფრო ლამაზ იერს მატებდა. ამიტომ ბევრ კარგ ქალსაც მოსწონდა, მაგრამ მაინც თავის ბავშვობის შეყვარებული, თავისი თანასოფლელი მარიამ გურასპაული შეირთო, ფშავლის ლამაზი ქალა. თავისი თემსოფლის ქალის მოყვანა მთის ადათით აკრძალული იყო, მკაცრად ისჯებოდა. ბაჩანასაც თემიდან მოკვეთით ემუქრებოდნენ, ამიტომ ის გარიდებული იყო ჩარგალს და მასწავლებლობდა გურჯაანის რაიონის სოფელ ვეჯინში, სიღნაღში, ხევსურეთში (ბარისახოში), ფშავში (აფხუმოსა და მაღაროსკარში).

ბაჩანას 18 წლისას დაუწყია ვეჯინში მასწავლებლობა. გორის საოსტატო სემინარიის დამთავრების შემდეგ არჩევანი ჰქონია: ან მღვდლობა, ან მასწავლებლობა. მას მასწავლებლობა აურჩევია.

უსამართლობას ვერც ბაჩანა ეგუებოდა, დაჩაგრულთ ექომაგებოდა და ამის გამო მტრად გადაჰკიდებთან გურჯაანელი თავადები. ერთი აბაშიძე ვილაცა ყოფილა, ნამეტნავად ის გადაჰკიდებია, გამომწვევად ექცეოდა თურმე. ერთხელ მას ბაჩა-

ნას აქლემის ბენვის კაშნე მოუხვევია ყელზე და წაუღია. ბაჩანას არ შეურჩენია, წაურთმევია.

წვეულებაზე სადღაცა ყოფილან. უკნიდან წამოჰპარვია ეს აბაშიძე და სასიკვდილოდ დაუქნევია თავში ხანჯალი. ბაჩანას თავის გვერდზე განევა მოუსწრია, მაგრამ ხანჯალს ლავინის ძვლები ჩაუჭრია. ისეთი მძიმე ჭრილობა ჰქონია, ექიმს არ დაუდგია ხელი. ვიღაც ექიმბაშს მოურჩენია შინაურული წამლებით.

სკოლიდან დაუნახია ბაჩანას ეს აბაშიძე როგორ ართმევდა გლესს გულურა შეშას. ფანჯრიდან გადმოფრენილა, წამოუქცევია და მაგრა უცემია. ამის გამო ხევსურეთში ისე გაუგზავნიათ, როგორც გადასახლებაში. 7 წელი იმასწავლებლა ბარისახოში. ხევსურებს ძალიან ჰყვარებიათ, ხათრი ჰქონიათ მისი. ბევრჯერ მოსისხლენიც შეურთებია. „ბიძურა და ჭრელა ლიქოკლები სასმლით ჩამოვიდნენ მასთან აფხუშოში, ბარისახოდან წამოსვლის შემდეგ, ცრემლმორეულებმა ბევრი ჰკოცნეს. მამამაც კარგად აქეიფა ისინი და ისე გაისტუმრა ორი დღის შემდეგ“, – მიაბზო ბაჩანას შვილმა გიგლა რაზიკაშვილმა.

ის აბაშიძე ბოროტი კაცი ყოფილა. რევოლუციის დროს ცუდკაცობა არ შეურჩენიათ ქიზიყელებს და მისი თავი მარგილზე ჩამოუცვიათ.

მხიარული, დაუდეგარი კაცი იყო, შეუპოვარი. პოეზიაშიც გაუმართლა. ხშირად მას უფრო მალლა აყენებდნენ, ვიდრე ვაჟას. თავადაც არ ეპარებოდა ეჭვი ამაში და ვაჟას ყოველთვის ექიმჰებოდა. ალბათ ცდილობდა იმის დამტკიცებას — ტანად ბაჩა ვარ, მაგრამ ლუკას მაინცა ვჯობივარო. სხვა ძმები ერიდებოდნენ ვაჟას, ბაჩანა კი მოურიდებელი ყოფილა. დაეტაკებოდა თურმე და ხან ერთი იყო ძირს და ხან მეორე. ღონით ვაჟას ხანდახან კიდევაც ჯობნიდა თურმე.

მთაში კარგი ვაჟკაცობის, მკლავმაგრობის ერთ-ერთი გამოსაცდელი საშუალებაა თიბვა. სათიბში, განსაკუთრებით „მუშათ“ (ნადის) დროს ეჯიბრებიან ხოლმე ერთთურთს, „ვისაც თავი აქვს ცდისა“. მკლავმაგარი ბაჩანა ხშირად იწვევდა თურმე ვაჟას.

ერთხელ მამა-შვილები მთაში ყოფილან სათიბზე. მათთან ყოფილა მათი დისწული მიხაც. ჰოდა, მიხა იგონებს: „პირველად

ვაჟა დაწინაურდა და ბაჩანას გადმოსძახა: „ბაჩო, მკლავი სჭრის, მკლავიო!..“ „ვნახოთო“ – მიაძახა ბაჩანამ. მკლავი ორივეს უჭრიდა, მაგრამ აქ ცელზე და მის ლესვაზე იყო დამოკიდებული, ბაჩანას უფრო ემარჯვებოდა მუშაობა და ლესვა ცელისაც კარგად იცოდა... რამდენიმე ხნის შემდეგ ბაჩანა დაწინაურდა და ვაჟას გადმოსძახა: „ვაჟავ, ეხლა ვისი მკლავი სჭრისო?!“ ვაჟამ დააგდო ცელი და დაჯდა: – „ამ ბლაგვით მუშაობა შეუძლებელიაო“. მამამ, რომელსაც ვაჟა განსაკუთრებით უყვარდა, ცელს გადააბრალა და ვაჟა დამარცხებულად არ გამოიყვანა. მოვიდა ბაჩანაც, ისაუბმეს, გაუღესა ცელი ვაჟას და განაგრძეს მუშაობა“. (46, 234).

ბაჩანა, რაკი თავისებურად დამცინავი და ღვარძლიანი ყოფილა, ვაჟასთან შეხვედრისას არ უშვებდა შემთხვევას და სულ რაღაცას ეკამათებოდა, სულ რაღაცას უმტკიცებდა. ვაჟა არა ჰყვებოდა, მაგრამ ხშირად ისიც არ უთმობდა და ქილიკზე ქილიკითვე პასუხობდა. ივ. ბუქურაული იგონებს: „ერთ საღამოს ვაჟა, ბაჩანა, ჯაჯანაშვილი (სახელი არ მახსოვს) და მე წავედით მუშტაიდის სასეირნო ბაღში. მოსეირნე ხალხი ბევრი ირეოდა. ჩვენ დავიჭირეთ მაგიდა, მოვატანიეთ სასმელ-საჭმელი და შევექცით...“

სხვათაშორის, ლაპარაკი ჩამოვარდა არაგვზე. მე ვკითხე, თუ არაგვი მთაში როგორ მოდის, ვინროდ თუ გაშლით, ხიდებია თუ ფონები. აქ ბაჩანამ სთქვა, რომ ბარისახოსთან არაგვზე გადავხტომილვარო. ვაჟამ პირზე ღიმილით შემომხედა, ჩაიცინა და სთქვა: „ჰო, დიალ, არაგვზე გადახტა ეს ბიჭი!“ ბაჩანა შეფხუკიანდა, დაიკრა გულში მუშტი და დაიწყო ფიცით მტკიცება, რომ მართლა გადამხტარა, მოწმეებსაც კი ასახელებდა. ვაჟა ილიმებოდა და იმეორებდა: „დიალ, არაგვზე გადახტა ეს ბიჭიო!“

ცოტახნის შემდეგ ბაჩანა ადგა და მიიმალა სიბნელეში. არ გაიარა დიდმა ხანმა, უცბად მოგვესმა ფართხალი და მასთან ძახილი: ვაჰ! ვუჰ! მე და ჯაჯანაშვილი წამოვვარდით და გავიქცით იქითკენ, საიდანაც ხმა მოისმა. და რა დავინახეთ? დგას ბაჩანა მთლად წყალში განუწული და ჩოხისა და ახალუხის კალთებს სწურავს. თურმე იქვე ახლო ნაპირებიდან ბალახგადაფარებული რუ ყოფილიყო, ბაჩანას ვერ შეეძინია რუ სიბნელეში და შიგ შუაში ჩავარდნილიყო. მოვიდა ბაჩანა მაგიდასთან მთლად

დასველებული. „ბიჭო, – გაიცინა ეხლა კი გულიანად ვაჟამ, – აკი არაგვზე ხტებოდი, აქ კი პატარა რუზეც ვერ გადამხტარ-ხარ?“

მოკლედ, მთაში თუ ბარში, სადაც შეხვდებოდნენ ერთმანეთს, ბაჩანა უთუოდ რალაცაში ნაექიშპებოდა ვაჟას, რალაცაში შეეჯიბრებოდა. ვაჟა ხშირად თუ გუნებაზე იქნებოდა, ძალზე გულუბრყვილოდ, კეთილი გულით აჰყვებოდა ხოლმე, უცებ დიდ ბავშვად იქცეოდა.

იგივე ივ. ბუქურაული იგონებს: „ერთხელ სოფლიდან ჩამოსულ ვაჟას და ბაჩანას დაეჭირათ სასტუმროში ოთახი სალდათის ბაზართან. ვაჟასთან და ბაჩანასთან იყო მათი ძმა სანდროც. ბაჩანა და სანდრო მაშინ გავიცანნი პირველად. ვიხუმრეთ, ვილაზ-ლანდარეთ, ბოლოს დავინწყეთ სკუპით ხტუნაობა – ვინ უფრო შორს გადახტებოდა. ვხტოდით სამნი: ვაჟა, ბაჩანა და მე: სანდრო არ იღებდა მონაწილეობას. ვაჟამ გაიძრო ჩოხა, ჩუსტები. წაიღებდა ვაჟა ხელებს უკან, შედგებოდა თითის ფრჩხილებზე, გადაგვაველებდა თავმომწონედ მოელვარე თვალებს და ისკუპებდა. „როგორია ბიჭი?!“ – წამოიძახებდა ვაჟა. „მაგთვენი არაფერი“, – იტყოდა ბაჩანა თავისებური კისკისით. ვხტოდით რიგ-რიგად. ერთმანეთს მაგდენად ვერა ვჯალდავდით. „დაიცათ, ვაჟნო, ერთიც კიდევ უნდა გადავხტე!“ – წამოიძახა ვაჟამ. ისკუპა რაც ძალი და ღონე ჰქონდა, მაგრამ ცოტა ტანი ფეხებს ვეღარ მოაყოლა და ზღართან მიიღო იატაკზე. ამ დაცემის დროს ვაჟას ლაჯებში გაუსქდა უბრალო ბამბის შალვარი. ასტეხეს ძმებმა სიცილი. ვაჟამ ამოიღო ნემსი, ძაფი და არხეინად შეუდგა შალვრის დაკერებას“ (46, 234).

ძმები ხშირად ერთურთს ალექსებდნენ, იუმორისტული ლექსების მიწერ-მონერით კითხულობდნენ ერთურთის ამბავს. ეს იყო უმთავრესად ვაჟასა და თედოს შორის. ხანდახან ერთვე-ბოდნენ ამ გალექსებაში სანდრო და მათი დისწული მისა.

ვაჟასა და ბაჩანას შორის კი ხშირად სერიოზული, ცხარე კამათი იმართებოდა ლიტერატურულ საკითხებზე. ერთურთს რჩევას აძლევდნენ, მითითებებს ამა თუ იმ ნაწარმოებებზე, კამათობდნენ. ბაჩანამ უსაყვედურა ვაჟას, მაგალითად, კვირიას წნელით რატომ შემოარტყი ხმალიო, „მუში“ (ლაფანი) მაინც გეთქვაო. ვაჟამ ბაჩანას მისცა შენიშვნა „თაღლაურას“ გმირის

ლალატით დალუპვაზე – გმირის ეგრე დალუპვა ცოდოაო.

1960 წელს აფხუშოში ერთადერთი მოხუცებულია ცხოვრობდა – „ჟამიათ ბებერი“, იმან მიაბო ბევრი რამ ვაჟასა და ბაჩანაზე და, სხვათა შორის, აი, ეს ამბავიც: „ბაჩანას სკოლა ჩვენს სახლში ჰქონდა, მეც მასწავლიდა...ერთხელ ვაჟამ შემოი-არა, ნათიბი ჩვენ მთაში ჰქონდა, თივას აქედან ეზიდებოდა. შემოვიდა ვაჟა შინ, რალაცა დაილაპარაკეს და ეცა ბაჩანა. ატეხეს ერთი ლენა-მტვრევა: მერე გავიგეთ ბაჩანასაგან, თურმე „ხმელნიფელზე“ უკითხია აზრი ვაჟასთვის – ესეთი რალაც აზრი მომივიდა და ივარგებო? ვაჟას კი თვითონ დაუნერია და გამოუქვეყნებია კიდევ. ამაზე ყოფილიყო გაბრაზებული ბაჩანა“.

ასეთი მტრული შეჯახების შემდეგ ძმები მალე ივიწყებდნენ წყენას, უცებ გადაუვლიდათ და ისევ ძმანი იყვნენ.

ვაჟას და ბაჩანას შინაურულმა ლიტერატურულმა კამათმა ერთხანობას პრესის ფურცლებზეც გადაინაცვლა და საზოგადოების ყურადღებაც მიიპყრო. კამათი დაიწყო ისევ და ისევ ბაჩანამ, როცა ვაჟას ერთ-ერთი უბრწყინვალესი, ძალზე თანამედროვედ აღერადი (მაშინაც და დღესაც) ლექსი გამოაქვეყნა „დროებაში“ 1909 წალს. აი, ეს ლექსი:

კაი ყმა (ხევსურულ ჰანგზე)

კარგ ყმად ვინა ვსთქვათ, ვაჟებო, ნათქვამის არა გვრცხვენოდეს,
მსმენლის გულს აბორგოვებდეს, არავის არა სწყენოდეს?

ვინა, ვინ არის კაი ყმა, ვის ტანზე ხმალი ჰშვენოდეს?

მიდით, იქ მიდით, სადაცა ხალხი ხალხზედა ლელავდეს,
მტერი ჩვენ გვცემდეს, ჩვენ-მტერსა, ხმლები, ხანჯრები

ელავდეს.

სისხლის ტბა მუხლებს სწვებოდეს, ცოცხლები მკვდრებსა

სთელავდეს;

ფარების დადგეს ჯღრდები, თვალეი თვალეის სწველავდეს;

მოციქულობდენ ტყვიანი, შუბები შუბებს სწვერავდეს,
ჭიაფრად მუზარადებსა სისხლის წვიმაი ჰფერავდეს;
დაგელობდეს სიკვდილი, სუდარაებსა ჰკერავდეს.
ვინც მიეგებოს მტერს წინა, წინ-წინ ვინც რისხვას ეტყოდეს.
სახე-სისხლგადამდინარი ტკივილს არ გამოიტყოდეს,
თავზარსა სცემდეს სიკვდილსა, ზედ ქორებულად ფრინავდეს,
სიცხეში სიოდ დაჰბეროს, დაათბოს, როცა ჰყინავდეს.
პირველად ომის დამწყები, ბრძოლის ველს ბოლოს სწირავდეს,
სხვანი იყოფდენ ნადავლსა, ის ისევ მტრის წინ გრგვინავდეს,
მიძღვნილსა საუფროსოსა ამხანაგებსვე სწირავდეს.
დარაჯად ედგას ლაშქარსა, როს ის ღრმა ძილით ხვრინავდეს.
სწორს ფიქრს აძლევდეს თემ-სოფელს, ცდუნება არა სძირავდეს.
მტრის ჯავრის ედგას ლოგინი, მტრის ჯავრი საბნად ჰფარავდეს.
იქ იდგეს ხმალამონვდილი, საც ძალა აღმართს ჰკვალავდეს.
გაბეჩავებულს სიმართლეს უსამართლობა სძალავდეს.
სხვისი იუბნოს სახელი, თავის გარჯასა ჰმალავდეს.
მზედ იდგეს ხევსურეთისა, უხვად შუქს ჩამაჰმალავდეს.
სჯობ, მოკვდეს მშიერ-ტიტველი, კვდებოდეს, არა გმინავდეს;
თავის სამარხად, სუდრად მარტო სახელსა სწირავდეს.
ვადღეგრძელებდეთ ცოცხალსა, მკვდრისა ვსვათ შესანდობარი.
წყლული სცნას დედის კოცნადა, თავის ლოგინად – სამარი.
საკაცე – თავის ლურჯადა, ქვა-ლოდი – ნაბდად საფარი,
ქალისა, რძლისა ქვითინი ეგონოს სიცილ-ხარხარი,
დენა ცრემლისა – ხორხომა, ღრუბელთა გადმონაყარი.
სულეთს შავიდეს ხმლიანი ლალი ლალისა ცხენითა,
წინ მიუძლოდეს არწივი ხმით მოყაშყაშე, ფრენითა.
ქება უყვივლონ გმირებმა, გადასრულებმა ჩვენითა.
ერეკლემ ხელი მაჰხვიოს, დაისვას თავის გვერდითა,
გამაეგებოს თამარი მცინარი, თავის ფეხითა.
გახარებულნი უფალი კარგ ყმას ჯვარს სწერდეს ზენითა.
ანგელოზები ხარობდენ, ალ-ქაჯნი იყვენენ წყენითა.
აი, ვინაა კაი ყმა, მოსაგონარი ქებითა!
არა თქვენ, სადიაცენო, რო ძროხებივით სძლებითა;
ღამე მაძღრები დასწვებით, დილით მშივრები სდგებითა;
თავის ჯამს ჩასცქერთ, საქვეყნოდ არც როს არ გამასდგებითა.
თავისად სცოცხლობთ, მცონარედ, ლეში ალალოთ ჰკვებითა;
გაიგებთ კარგის გარჯასა, გწყინთ და შურითა ხდებითა;
უქმად ჩამაჰლევთ სიცოცხლეს, უქმად საფლავში სწვებითა,
დაჰკარგავთ სააქაოსა, ვერც საიქიოს სწვდებითა,
არ იცით, დასწნდით რისადა, ან რისათვისა ჰკვდებითა!”

ბაჩანა რატომღაც არ დაეთანხმა ვაჟას კარგი ყმობისაკენ
მოწოდებას, ვერ გაიგო, რას ითხოვდა ვაჟა თუ ამ კარგი ლექ-
სის გაბაიბრურება უნდოდა, საკმაოდ მდარე ლექსით გაეპაექრა
ჟურნალ „განთიადში“.

ვაჟა-ფშაველას (მისი ლექსის გამო: „ვინ არის კაი ყმა“)

შენ იმას თვითონ ბრწყინვალე, ამკობ ქებათა-ქებითა
და კვლავ სამეტოდ „კაი ყმას“ ჰრთავ სხივ-შარავანდედითა.
მაგრამ იმ ხოტბა-შესხმასა, რახან „კაი-ყმა“ ყოფილა, –
უნდა დავძინოთ, რომ მასთან დიდი დარდაკიც ყოფილა.
თორემ ჩვენ დროში კარგ ყმობას, ვინ იზამს ტუტუცის მეტი?
და ვინ შეაქებს ამისთვის, ძველი თათქარიძის მეტი?”

ვაჟას გული ატკინა მის ჩანაფიქრზე, მის მოწოდებაზე —
კაი ყმობა ვქნათ, მამულისთვის მტერს ვეკვეთოთო — ასეთმა
გამოხმაურებამ და მერე ისიც ვისამ? ძმისამ, პოეტ ბაჩანასა-
გან, ვისი იმედიც, ალბათ, ყველაზე მეტად ჰქონდა; ვისი ლექსი
„მუხა“, თავისი ღრმა პატრიოტულობის გამო, საზოგადოებამაც
აიტაცა, ილია ჭავჭავაძესაც ძალიან მოსწონდა და მოსწონდა
ვაჟასაც. ხშირად სადმე საზოგადოებაში ლექსის თქმას როცა
სთხოვდნენ ვაჟას, ჯერ ბაჩანას „მუხას“ იტყოდა თურმე და მე-
რე თავის „არწივს“. ვაჟას არ შეეძლო უპასუხოდ დატოვება ამ
გატრიზავებისა და „სახალხო გაზეთში“ უპასუხა ლექსითვე:

პასუხი ბაჩანას (მისი ლექსის გამო)

„მაშინ კარგია კაი ყმა,
რო დილა-ბინდზე დგებოდეს,
იცვამდეს გრილსა რკინასა,
„ომს ვიზამ“ – იმუქრებოდეს.

ლურჯაი ხრავდეს ლაგამსა
ნალმა-უკულმა დგებოდეს.
იხარჯებოდეს კაი ყმა,
ფარი ოხრადა რჩებოდეს”.

(ხალხური)

რა ფრიად დავღონებულვარ, ცრემლი მადგება თვალებში,
მუხლთ მეკვეთება, ვმუნჯდები, სიდამბლე მომდის მკლავებში:
ყორნის ყრანტალად ქცეულა ბულბულის სტვენა ჭალებში,
გულსა და გონებას მირევს ავად ბუნების თარეში,
კარგისა შეცვლა ავზედა ამ ჩვენ სამშობლო მხარეში!
მიკვივის: „გაიგონეო: მზეს უმზეობა სჯობია;
კაი ყმა, ვინც უნდა იყოს, ბრიყვი და დასაგმობია!
რა უნდა ვუთხრა მე იმას, ვინც ასეთ ფიქრსა ჩვეულა?!
როგორ მწყინს, კაი ფანდური შუაზე გადამტვრეულა.
რა ცუდი საქმე მომხდარა, იგიმცა მიწა წყეულა!
უმსგავსობაა: კეთილი ბოროტისაგან ძლეულა.
გული მიკვდება, თვალთაგან მდულარე გადმონთხეულა!..
მუხავ, უთხარი შენს მგოსანს, ასნიე მკლავი გმირისა!
რად მოგდგომია საჭრელად ცულით, გამტეხი პირისა.
შენს კაი ყმობას დასცინის საჯაროდ მთქმელი ძვირისა,
გუშინ რომ გუნდრუკს გიკმევდა, დღეს შენს მოკვლასა

ჰკვივისა.

თუ არ გრძნობს უსამართლობას, სატრფიალო ხარ იმისა?!
შენ უპასუხე, მუხავ, შენ, მე მეტს ვერ ვეტყვი ვერასა,
მტრობაში ჩამომართმევენ და დამიგმობენ წერასა.
ძალით ან ხვეწნით, ცხადია, ვის მოვანონებ მღერასა?!
მხოლოდ კაი ყმებს ვუსურვებ უხვად სამშობლო კერასა!”

ბაჩანა, ჩანს, მეტისმეტად გააბრაზა ვაჟას პასუხმა. მარ-
თლაც, მწარე იქნებოდა საქვეყნოდ სამშობლოს მოლაღატედ
გამოცხადება, თანაც ძმისაგან. ეს იმ დროს, როცა კაცს სამ-
შობლოსათვის თავგანწირულ რაინდად მიაჩნდა თავი და იყო
კიდევ. ვაჟას საპასუხოდ ჟურნალ „ერში“ გამოაქვეყნა ლექსი
„მთამა სთქვა“, სადაც ნაგულისხმევია სამშობლოს დამმონებ-
ლი, მძარცველი, საიდან სად მოთრეული მტერი, მაგრამ გარ-
კვეულნილად ვაჟას მისამართითაც არის ნასროლი ისრები:

„ვდგევარ და თვალი მიხუჭავ, თოვლ-ფიფქო, თავზე მედები.
ვეტრფი ჩემს ერს და სამშობლოს, ოცნებით თავზე ვეველები.
თვალი კი ვერ გამიხილავ, მტერო, წინ ამეხეჩები.
ნეტევი ან მე დამთხია და ან ეგ მოჰკლა წყეული.
ჩვენს სახლ-კარზედა ბატონობს საით სად გადმოთრეული;
შურისძიებამ შემიპყრო, ვარ თავგულგამორეული.
დახე, როგორა გვერთგულობს, როგორ გვისრულებს

აღთქმასა,

ჯერ დავაპიშვლა, დავგძარცვა, ახლა გვიპირებს დაჭმასა.
თუ კიდევ რას გამოგვრჩება? კი დავაჯერებს ამასა?
დღესამდე სიყვარულისა მისთვისაც მქონდა კუნჭული,
ენლა კი გამომერეცხა, ცოფით ამევსო სულგული,
ბნელეთის ზღვაში დამენთქა საკაცთმოყვარო კუნძული.
წმინდა და სპეტაკ გულშია, ზღვევის ჩამისხნდა გველები,
მგელი, სისხლ-ხორცით უძლები და ვეფხვი შეუბრალები.
მწეწენ და მლადრვენ, არ ვიცვი, როდის მოვთხოვო ვალები?
მიწყდება ბუნვი მოთმენის წამ-ერთი ჭირად მიხდება.
ყოფადი ნადრევი სჯობს, ქმნადი – რაც მალე იქმნება.
თუ ისევ მოკლედ, თორემა მერე გვიანლა იქნება”.

ვაჟამ იოლად ამოიცნო ბაჩანას ნართაულები, მაგრამ მაინც
ისევ სამშობლოზე ჩივილზე გადაიტანა, თუმცა კონკრეტულ,
თავის მისამართით გამოშვებულ ისრებსაც უფარა. საპასუხოდ
დაწერილი ლექსი „მთამ სრულიად სხვა თქვა“ (პასუხად ბაჩა-
ნას) იმავე წელს გამოაქვეყნა „დროებაში“.

„მთამ ეგ არა სთქვა, ბაჩანავ, როგორაც შენა გგონია.
მისი ნათქვამი, ნაგრძნობი, მე სულ სხვა გამიგონია.
გაცვრცვილმა, ნაცემ-ნაგვემმა, აღშფოთებულმა ფრიადა,
ისევ თავს უთხრა: „დამშვიდდი, გულო, რამ ავაზვიადა?!
მომთმენი, აუჩქარები, ამწონ-დამწონი საქმისა
კი არ გამხადო მსხვერპლად შენ შემთხვევითი წამისა?
სურვილი მალეობისა მოსანონია თავისა?
ერთი წელი და ათასი ბარდაბარია ჟამისა.
მაშ ჩვენი ტანჯვაც ჩავთვალთ სიბნელედ ერთის ლამისა.
გვიან აყვავდეს, იგი სჯობს, ხილ-ხული ჩემსა არესა,
მინამდე ადრე და დაზრეს, დღეს იგემებდეს მწარესა.
არ მომწონს ფაცი-ფუცობა, სულსწრაფთ, უმეცართ ხელობა,
თუ სამერმისოს კარგს ვხედავ, დღევანდლის დღისა მწველობა

**სურდოდ მაჩნია, – ჭლექისა იმას არა აქვს ნიშანი,
ოლონდ გვეჭდიოს გულში ღრმად, ყველას მომავლის მიზანი,
მოვრწყოთ ნაღვანით ოფლითა ჩვენი სამშობლოს მიწანი!..
აჰლეღვებულხარ ძალიან, თავის ძმა ველარ გიცანი!
რომ მომავალი ჩვენია, ამას რად უნდა მისანი?!”**

ასეთი მებრძოლი, შეუპოვარი სულის პატრონი იყო ბაჩანა, ლალი, იმედიანი. მაგრამ შემდეგში უკულმა დაიწყო ტრიალი ცხოვრების ჩარხმა და ბაჩანაც თანდათან ჩაქრა. პეტერბურგში განათლების მიღების დიდი სურვილი ჰქონდა, მაგრამ დიდი ცდისა და წვალების მიუხედავად, ვერაფერი სახსრები გამოძებნა. ეს ხელმოცარვა დიდ დაღად ჰქონდა გულში ჩარჩენილი. იყო მთებში მიყრუებულ სოფლებში გამოკეტილი. მისი მდგომარეობა ჩანს მისივე წერილიდან, რომელიც მას თედოსათვის მიუწერია: „ვარ მარტოკა, ვესაუბრები მხოლოდ ჩემს თავს, მოპასუხე და ხვაშიადის მოზიარე არავინაა, გარდა არაგვისა, მთებისა და ბეჩავის ჩემის ცოლისა... ვზივარ ბევრჯერ ჩემთვის, საცოდავ ფიქრებში გართული, ვუკრავ ფანდურს, ვესაუბრები ბევრს რასმე ჩემის გულის ამონაკვესისას და საწყალი ჩემი ცოლი კი ზის და ჩამოსდის ცრემლები!.. ესაც ნუგეშია ტანჯულის მგოსნისა, არა, ძმაო?.. კიდევ კარგი, რომ ეს მაინც მიგებს და მაფასებს, რაც კი მოეთხოვება იმის განვითარებას. ნეტა, საზოგადოება რომ არა ვსთქვა, წიგნები მაინც მქონდეს ბევრი-ბევრი, რაც საჭიროა, მაშინ კიდევ აღარას ვიტყოდი, იმეებით მაინც ვიცხოვრებდი... დიახ... ჩემი მონაფეები, ჩემი საყვარელი შვილები... ისინი რომ არ მართობდნენ კიდევ ან გაგვიჟდებოდი, ან სხვა რამე უფრო უკეთესი დამემართებოდა... დავჯდები, შემოვისხავ გარს ჩემს ბარტყებს, ვკითხულობ და ხშირად მეც ვტირი ჩემს მონაფეებთან”.

ასეთ გამოყრუებულ ცხოვრებას ზედ ერთვოდა ცოლ-შვილის ავადმყოფობა. ამას მოჰყვა თავს დატეხილი დიდი უბედურება – ერთბაშად ორ-ორი შვილის სიკვდილი.

ამ ტრაგედიამ უფრო დააძაბუნა ბაჩანა, ცოლ-შვილზე თავგადაკლული მამა. იმედების გაცრუება, სილატეკე, მარტოობა, სიკვდილიანობა – ასეთი იყო ბაჩანას ცხოვრება, განსაკუთრებით, მეორე ნახევარში.

ბაჩანა აფხუშოდან 1918 წელს წამოვიდა დუშეთში, მენშევიკების დროს, იქ მასწავლებლობდა. 1920 წელს კვლავ სიღნაღში დაბრუნდა. უკვე ძალიან ავადობდა. გარდაიცვალა 1928 წლის დეკემბერში. ბაჩანას დამკრძალავი კომისის თავმჯდომარე ყოფილა პლატონ კეშელავა, ისინი ნათელ-მირონებიც ყოფილან. მწერალთა კავშირიდან მოუწყვიათ გასვენება. მეუღლეს დატირების ნებას არ აძლევდნენ თურმე, პლატონს დაურთია ნება და ხმით უტირია მარიამ გურასპაულს:

**„დაიცა, ცეცხლო, ნუ მედები,
ვერ დაგინვივარ და ვერც დამწვავ!
დაიცა, გულო, ნურც შენ მებრძვი,
ვერ მოგიკლივარ და ვერც მამკლავ!
სიკვდილო, ნურც შენ მოგწონ თავი,
სირცხვილზე მეტი არც შენა ხარ!
თქვენი ჭირიმი, ჩარგალელნო დებო და ძმებო, ბიძებო!
განა რო შამიფერა ღმერთმა,
არ მაპატია, მაზღვევინა
გადამდეგობა თემ სოფლისა,
გადამდეგობა თემთ პირისა,
რას უშავებდა ე ბალები,
აქ არ ვიყავა დამნაშავე?!
რად არ დამთხარნა ორნი თვალნი,
რად არ დამიხმნა ორნი ხელნი
დედა მოგიკვდეთ, მანონაო,
ავალებინე ენა-ყბადა,
ნავალებინე ქარსა-დ წყალსა!“**

მის ტირილს დამსწრე საზოგადოება დიდად გაუოცებია. და-ასაფლავეს დიდუბის პანთეონში.

თედო

თედო რვა წლით უმცროსი იყო ვაჟაზე. ამიტომაც ვაჟა მასზე თავიდანვე ბევრს ზრუნავდა. ერთად უხდებოდათ შრომა პატარაობიდანვე სიღარიბეში წამოზრდილებს. შრომა არ ეზარე-

ბოდა, მაგრამ ძილი უყვარდა დათვის ბელივით ჩამკვრივებულს და... დედის რძე.

„კარგად მახსოვს, როცა ძუძუს ვწოვდი ისევ, მეხუთე წელში ვიყავი. ხბორებში მგზავნიდნენ, მაგრამ სანამ დედა ძუძუს არ მომანოვებდა, არ წავიდოდი ხოლმე“, – წერს თ. რაზიკაშვილი თავის ავტობიოგრაფიაში.

არც ვაჟა-ფშაველას და არც ბაჩანას თავისი ბავშვობა არსად აღუწერიათ. თედოს აღუწერია და, რა თქმა უნდა, ის მარტო თედოსი კი არა, სხვა მისი ძმების ბავშვობის ნამდვილი სურათია, იმ განსხვავებით, რომ ვაჟას დროს ჩარგალში სკოლა არ იყო, მერე გახსნეს და მალევე დახურეს. თედოს მიერ აღწერილი თავისი ბავშვობა ტიპურია არა მარტო მისი ძმებისათვის, არამედ საერთოდ მთიელი ბავშვებისათვის. აი, რას გვიაზრობს: „ექვსი წლის ჩარგლის სკოლაში დავდიოდი, მაგრამ ვაკეთებდი რამეს თუ არა, ეს იქიდან ჩანს, რომ ერთხელ, როცა სტრელეცკი მოვიდა სკოლების დასათვალიერებლად, სწავლის გათავების შემდეგ გამომელვია, პარტაზე დამძინებოდა...“

ქართული წერა-კითხვა ჩემმა ძმამ ნიკომ მასწავლა. პირველად ძალიან მიჭირდა, მერე კი კარგად ვსწავლობდი. მესამე განყოფილებაშიც გადამიყვანეს და დაიკეთა კიდეც ჩარგლის სკოლა... მანამ ხვან-თესვას შევიძლებდი, საქონელში დავდიოდი, მერე კი ყველა გლეხურ საქმეს ვაკეთებდი. თავისუფალ დროს კი ტყესა და წყალში ვატარებდი. ისე გავიზარდე, ქალამანი არ მღირსებია... ეჰ, რაღა გავაგრძელო, იმ ხანებში საშინლად ღარიბად ვცხოვრობდით. ტანზე ბევრი არაფერი მცმია, შარვალი სულ არა, ზაფხულში კი შიშველი ფეხით დავდიოდი ცხვარსა და ძროხაში... მახსოვს ისე დამეყვებოდა ფეხის თითები, რომ ხანჯლით დაჭრილსა ჰგვანდა, მერე რა ძნელი იყო ამისთანა ფეხებით რიყეზე მაყვლიან ნაკაფებში და ახალ ნამკლებში სიარული! რო მომაგონდება, ახლაც ჟრუანტელი მივლის ტანში. ზამთარში ისე დამისქდებოდა ხოლმე ხელები, თითქოს დანით დაუჭრიათო...

ორი წელიწადი დავრჩი უსწავლელი, თითქმის გადამავინწყდა რაც ვისწავლე, ქართულს კი, აბა, რას დავივინწყებდი. ერთ ზამთარს „საქართველოს ისტორია“ გადავწერე. ეს წიგნი თევდორე მღვდელს ეკუთვნოდა, მამაჩემს ეთხოვა და, რადგან ძველი

გამოცემა იყო და არსად არ იშოვებოდა, მამაჩემმა შემიკვეთა, გადამიწერეო. სხვა საქმისაგან გამანთავისუფლა და ჩავუჯექი ამ წიგნს. ზამთრის სიცივეში ჩავდიოდი სკოლის ოთახში და იქა ვწერდი. მაშინ სკოლა უკვე დაკეტილი იყო (სკოლის დახურვის მიზეზი ის იყო, რომ მასწავლებელი ანისიმოვი რუსი იყო, ქართული არ იცოდა, ბავშვებს ვერაფერს აგებინებდა, ამიტომ მოწაფეებმა ნელ-ნელა და ბოლოს სულ მიანებეს სკოლაში სიარულს თავი. 1880 წელს გაუქმდა ჩარგლის სკოლა - გ. ს.)

ორი წლის გაცდენის შემდეგ ჩემმა ძმამ ლუკამ წამიყვანა ტოლათსოფელში, სადაც ის დანიშნეს მასწავლებლად... ლუკასთან სულ ერთი წელი დავყავ, რადგან სკოლა მაისში ისევ დაკეტეს”. (36, 14).

ამის შემდეგ ნიკოს (ბაჩანას) წაუყვანია გორში, სადაც მაშინ თვითონ სწავლობდა, სემინარიაში მისაბარებლად. იქ დაქირავებულ ბინაში ნახევრად მშიერ-ტიტვლები დიდი გაჭირვებით ცხოვრობდნენ. თედო მძიმედ ავადაც გამხდარა ციებით. 1889 წელს წარჩინებით დაუმთავრებია სემინარია, მაგრამ სკოლაში ადგილი არსად ყოფილა. „კიდევაც რო გვეკონდეს, მაინც არ მოგცემდით, თქვენ ისეთი გვარისა ხართ“, – უთქვამს თედოსათვის სკოლების ინსპექტორს დარსკის. მას, ეტყობა, კარგად ახსოვდა ლუკა რაზიკაშვილი ტოლათსოფელში დატრიალებული ამბების გამო. ერთი წლის შემდეგ ქართველთა შორის წერა-კითხვის გამავრცელებელმა საზოგადოებამ თედო დანიშნა მასწავლებლად გორის მაზრის სოფელ ხელთუბნის სკოლაში. იმავე წელს მშობლებიც დაეხიციათ და დარჩა თედო ობოლი და არაფრის მქონე უცხო ხალხ-ქვეყანაში. ვაჟას, ჩანს, შიში ჰქონდა, თედო, გამოუცდელი ბალღი, როგორ გაართმევდა თავს საქმეს, ცხოვრებას. შიში ჰქონდა იმისა, რომ თედოსაც ისევე გამოაგდებდნენ სკოლიდან, როგორც თვით ვაჟა გამოაგდეს, როგორც გამოაგდეს ბაჩანა ვეჯინიდან. იცოდა თავის ჯიმ-ჯილაგის ამბავი და იმიტომ. ამიტომ გადაწყვიტა თედო ჩარგალში დაებრუნებინა და მამის საქმე, მღვდლობა ჩაებარებინა. ამისათვის მზად იყო, როგორც უმცროსი ძმისათვის, ჩარგლის სახლ-კარიც დაეთმო, თავად კი, ჩანს ან ცალკე გასვლას აპირებდა, ან სხვაგან წასვლა ჰქონდა გუნებაში. ამ აზრით, სხვა ძმებთან მოთათბირების შემდეგ თედოსათვის მიუწერია:

„ძმაო თევდორე

გატყვებით, გამაგრებითა ხმალმა ბედენად არ გასჭრაო, ნათქვამია. მაშასადამე, რაც მე გითხრა და გიამბო, შენმა ძმამ, არასასიამოვნო ამბავი, როგორც ვაჟკაცმა, გულმტკიცედ უნდა მოისმინო. მართალია, ისეთი არაფერი შეგვმთხვევია, რომ სხვას არ შემთხვეოდეს. დედ-მამა უნდა დაიხოცოს, შვილები დარჩნენ. შენი სიზმარი გაგვიმართლდა. მართლაც, მინის ზვავი დაეცა ჩვენს სახლს: დედ-მამა დაგვეხოცა, ძმაო, მაგრამ რა ვუყოთ, მოთმინების მეტი არაფერი გვმართებს. მოთმინება და ამასთან გამოფხიზლება; მტერი ბევრი გვყავს, ბევრს გაუხარდა ჩვენი ზარალი, მაგრამ ჩვენ კიდევ იმას უნდა ვეცადნეთ, რომ მტერი გავაშავოთ და გავანბილოთ... აბა რა ვუყოთ სახლს და ოჯახს, მეც რომ თავი გავანებო, ხომ სულ გაოხრდა და გატივალდა იქაურობა. შენი იმედი მაქვს, რომ ჭკვიანი კაცი ხარ და გესმის მომავალი. შენ ეხლავე უნდა და, რაც შეიძლება მალე, თხოვნა გაუგზავნო არქიელს, მითუმეტეს, რომ შენ სალდათობა ნარგები გაქვს (61 ბილეთი) და „პრისუსტვიამ“ გამომიცხადა შენზე, თუ ამ ექვსი წლის განმავლობაში იმან მასწავლებლობას თავი დაანება და ყოველ წელს მონაწილეობა არ წარმოგვიდგინა მასწავლებლად ყოფნაზე, პირდაპირ სალდათად წავაო. რა ვიცით, კაცის თავს რა შეემთხვევა, ძმაო, იქნება დაგიტხოვონ, ხომ იცი, ჩვენი საზოგადოების ამბავი. შენს თხოვნაში არქიელს განუმარტავ ამ გარემოებას: და დამრჩა გასათხოვარი და ძმა – აღსაზრდელი-თქო. ამასთან, სამრევლო სკოლის გახსნასაც დაჰპირდი; რაც შეიძლება ჩქარა ეცადე, იმას ნუ იფიქრებ, ძმაო, რომ ჩემთვის მინდოდეს შენი მღვდლობა. არა, მე ის მინდა, რომ ოჯახში კაცი იყოს ვინმე. მე, საითაც იქნება, გზას გავიგნებ. ჩემი ძმური რჩევა ეს არის, მე, როგორც უფროსმა ძმამ, გირჩიე ჩემი მოვალეობისამებრ და ახლა შენ იცი და შენმა ჭკუამ.

შენი მარადის კეთილის მოსურნე ძმა
ლუკა რაზიკაშვილი”.

ვაჟა დარწმუნებული იყო ძმას ისეთი რამ ურჩია, რაზეც ის უარს არ ეტყოდა, მაგრამ თედომ მტკიცე უარი უთხრა.

თედოს ისე უყვარდა მასწავლებლობა და უკვე ისე ჩაერთო საქმეში, რომ სოფლის მასწავლებლის ბედკრული შრომა და

მოღვაწეობა არ გაცვალა მღვდლის, ასე თუ ისე მაინც, სახარბიელო თანამდებობაზე. ოჯახში თავიდანვე შრომას ნაჩვენებს არ ეშინოდა საკუთარი ოფლით ცხოვრების. ის, გარდა იმისა რომ ერთდროულად ოთხ ჯგუფს ამეცადინებდა სკოლაში, ცდილობდა ფიზიკური შრომითაც მაგალითის მიმცემი ყოფილიყო გლეხებისათვის ყოველგვარ საქმეში. ჯერ სკოლის ქვა-ლორლიანი შემოგარენი გაასუფთავა ბავშვების დახმარებით და ბალი გააშენა. მშობლების სიკვდილის შემდეგ წილში ნარგები ცხენი ვინმე აზნაურ იაშვილს გაუცვალა ერთ ჭაობიან მინის ნაკვეთში. ეს ბაყაყების ბუდე, ლელიანი ჭაობი, თედომ საოცარი თავგანწირვით დააშრო და ერთი დღიური ბალ-ვენახი გააშენა. გაიჩინა ფუტკარი.

მანამდე კი ხელთუბნელმა კეთილმა მეზობლებმა ამოურჩიეს ერთი ღარიბი, მაგრამ პატიოსანი, მშრომელი ოჯახი წყალობა იშხანიშვილისა და მათი თოთხმეტი წლის ქალიშვილი თინათინი გაურიგეს. ღარიბმა ოჯახმა შვილივით მიიღო ობოლი, ღარიბი სიძე და პირველ ხანებში, რაც კი შეეძლოთ, ხელს უმართავდნენ,



თედო

სანამ თვითონ შესძლებდა წელში გამართვას. მოლონიერდა და მარანში „ვაჟას საზედაზე“ ორმოცკოკიანი ქვევრი ხელუხლებლად ქონდა ხოლმე. მას მხოლოდ ვაჟას სტუმრობის ჟამს მოხდიდა. თედო მოიპატიჟებდა ხოლმე თავის საყვარელ მასწავლებელს ნიკო ლომოურს და სხვებს და იწყებოდა ლხინი და დროსტარება. მერე იწყებდნენ ვაჟას გადაპატიჟებას, მაგრამ ვაჟას არ უყვარდა სტუმრად სიარული, გაუთავებელი ქეიფები და მალევე უშველიდა ხოლმე თავს: აქ ჭამა-ყლაპვის მეტს ვერაფერს ვაკეთებო. „მისთვის ქეიფი წამება იყო.

ვერ იტანდა ვერც სმას, ვერც ხმაურს და აურზაურს, სუფრიდან პირველი ადგებოდა, გაივლ-გამოივლიდა, მეორე ოთახში გავიდოდა და თავის საქმეს ჩაუჯდებოდა ხოლმე... ძმები დაუნწყებდნენ ხოლმე დაცინვას: ვერ გაგვიძლო ვეფხვმაო. (36, 49).

“ერთმა ჩვენმა ნათლი-მამამ იგი დაპატიჟა და, როგორც ჩვეულება ჰქონდათ, ვაჟას ღვინო მიაძალეს. მასპინძლის მამამ ვაჟას თავის გამოსასყიდად ლექსის დანერა სთხოვა. ვაჟამ უარი არ უთხრა და იქვე ექსპრომტად თქვა:

**„გულიც მეყოფა საამოდ, ღვინოს ნუ მასმევთ უხვადა,
თუ დავთვერ, ეს მასპინძლობა მაშინ ჩაგივლის ფუჭადა...
ტვინს ნუ დავჩაგრავთ, ცოდვას, ნუ გადავიქცევით კუჭადა,
თორემ სმით ვერ შემაშინებთ, თედო აქა მყავ ბურჯადა.
მოართვიო, რამდენიც გსურდეთ, ღვინო ბიჭს ჩასაყლურჭადა!
(36, 50).**

თედოს ქეიფი ჰყვარებია, ბევრს სვამდა და ცოტა ღიპიანიც ყოფილა. ამაზე დასცინოდა კიდევ ვაჟა. თედო კი თავისებურად გემრიელად ჩაიკისკისებდა თურმე: მოგიკვდეს ძმა, თუ გიმტყუნოს, მოკლას ხარი თივამაო.

თედოსა და თედოს ოჯახს ძალიან უყვარდა ვაჟა, მათთვის ზეიმი იყო ამ გახუნებულჩოხიანი და თხელძირა ჩუსტებიანი, კეთილი გოლიათის გამოჩენა, მისი მონათხრობის მოსმენა. ექვსი ქალი ჰყავდა თედოს, ექვსივე გარს შემოეხვეოდნენ ხოლმე. ქალები ჰყავდა, მაგრამ ვაჟკაცებად ზრდიდა მათ მამა. იცოდა როგორ მძიმე შრომაში იყვნენ მთის ქალები და მათაც აჩვევდა ყოველგვარ საქმეს, ეუბნებოდა: „ქალები კი ხართ, მაგრამ თქვენი თავის იმედით უნდა იყოთო. ყოველთვის მე ხომ არ გეყოლებით და ქმრები კი, ვინ იცის ვინ შეგხვდებიანთო“.

ვაჟასაც ძალიან უყვარდა ისინი. „განსაკუთრებით უყვარდა ჩემი უფროსი და გულქანი, რომელსაც ჩვენი დიდების (მამაჩემის დედის) სახელი ერქვა და, როგორც თვითონ ვაჟა იტყოდა ხოლმე, თავისი მოსახელის ნამდვილი განსახიერება იყო ყველაფრით: დარბაისელი, ნიჭიერი, ბეჯითი. გიმნაზიას ოქროს მედლით ამთავრებდა, რითაც ვაჟა-ფშაველა დიდად ამაყობდა: დაენაცვლა ბიძა, პირნავარდნილი დედაჩემი გულქანია, ეს ნამ-

დვილად გვასახელებსო, – იტყოდა ხოლმე. ვაჟა-ფშაველა რომ ქუთაისსა და ფოთში მიიპატიჟეს, ისიც თან წაიყვანა”.

სამწუხაროდ, გულქანს დიდი ხნის სიცოცხლე არ ენერა. ვაჟას იმედისა და საყვარელი ძმისწულის მძიმე ავადმყოფობა თვით ვაჟას ავადმყოფობას დაემთხვა. ზუსტად იმ ხანებში „გულქანმა სისხლი ამოახველა და საჭირო გახდა მისი ცემში წაყვანა. ვაჟას ფილტვების ანთებაზე გართულება დაერთო. იგი ამ დროს თბილისში იყო. მთის ჰაერს შეჩვეული ვაჟა თბილისის სიცხეს ჯანმრთელიც ძნელად იტანდა და ზაფხულობით თავის დღეში თბილისს არ გაჰყარებია. სანდროსაც კი მთისკენ იწვევდა ხოლმე. ანთებამ ვაჟას მაგრად ჩასჭიდა ხელი და სიცხე აღარ უნელდებოდა. მამაჩემი დარდისაგან ადგილს ვეღარ პოულობდა, მეურნეობა კი თავისას მოითხოვდა. ხელთუბანში ფუტკრის ყრისა და გამრავლების დრო იყო, მკა მოახლოვდა, შემდეგ ბალი იყო დასამუშავებელი, თანაც ორი გაჭირვებული ავადმყოფი. საიდან რა დაენყო, არ იცოდა. ცემში ოთახი მაინც იქირავა: გულქანს წავიყვან, დავაბინავებ, მანამ ვაჟასაც სიცხე დაუკლებს და იმასაც იქ ჩავიყვან, თორემ თბილისის სიცხით ძმა მომიკვდებო. მაგრამ ეს უკანასკნელი ძმური ზრუნვა ვერ შეუსრულდა. სიცხე არ უკლებდა, პირიქით, უფრო და უფრო უძლიერდებოდა ვაჟას. ექიმები განძრევის ნებას არ ძლევდნენ.

როდესაც თედომ საბოლოოდ და მტკიცედ გადაწყვიტა აღარ დაეჯერებინა ექიმებისთვის და ძმა ცემში წაიყვანა, გორში გაიგო – ვაჟა გარდაიცვალაო. უზომო იყო მისი მწუხარება და კიდევ უფრო გაორკეცდა, როდესაც შეიტყო, ვაჟამ თავის „დეკა და ღვიანის“ ნატვრაში დალია სულიო. მამამ ვაჟაზე ზრუნვა ახლა ავადმყოფ პოეტ იროდიონ ევდოშვილზე გადაიტანა, რომელიც გულქანთან ერთად ცემში იყო და ნაძვნარის ჰაერით იხანგრძლივებდა უკანასკნელ დღეებს.

ვაჟა-ფშაველას სიკვდილის გაგებისას როგორც გულქანმა, ისე იროდიონმაც თურმე სისხლი აღებინეს, რის შემდეგაც დიდხანს აღარ უცოცხლიათ არც ერთსა და არც მეორეს”. (36, 51).

წერა თედოს ნ. ლომოურის ნაქეზებით დაუნყია ჯერ კიდევ სემინარიაშივე. ალბათ გრძნობდა სიკეთით სავსე მწერალი კაცი, რომ ვაჟასა და ბაჩანას ძმაც არ იქნებოდა უნიჭო. დაიწყო წერა, არც ურიგოდ გამოუდიოდა, უბეჭდავდნენ კიდევ, თვი-

თონ რედაქციები სთხოვდნენ, მაგრამ თავად იყო მოკრძალებული, განსაკუთრებით იმიტომ, რომ თავისი უფროსი ძმების, ვაჟა-ფშაველასა და ბაჩანას, ნაწარმოებების გვერდით საკუთარი პატარა ლექსებისა და მოთხრობების გამოჩენა უხერხულად მიაჩნდა, დროის ფუჭ კარგვად და მთელ დროს ისევ ფიზიკურ შრომას ახმარდა. „მაგრამ, აი, ლებულობს კიდევ ერთ პატარა ბარათს:

**„ვაჟა-ფშაველამ, ბაჩანამ დაჰმღერეს მალლა მთაშია,
შენც ბანი მიეც ბარიდან, ძმებს ამოუღე მხარშია!“**

სწერდა პოეტი ქალი განდეგილი და ეს გულწრფელი მომართვა მონოდების ხმად ჩაესმა თედოს, თითქოს მაშინ უფრო გაიფურჩქნა მისი ნიჭი” (36, 24). მისი შესანიშნავი მოთხრობები ი. გოგებაშვილმა ბავშვებისათვის საკითხავ „ბუნების კარშიც“ კი შეიტანა სხვა საუკეთესო ნაწარმოებებთან ერთად.

თედო რაზიკაშვილი საბავშვო მოთხრობებით არის ცნობილი თორემ, არც პოეზიაში იყო ურიგო. მისი ზოგიერთი ლექსი ქართველმა ხალხმა გაითავისა. აი, თუნდაც ეს ლექსი ბევრმა ზეპირად იცის და ის კი არ იცის, რომ თედო რაზიკაშვილისაა:

**„მიყვარხარ, ტკბილო კახეთო, დიდი ალაზნის ქალაო,
ირემო იალალზედა, ივრის პირებზე - ჩალაო;
ბარდებში მძრომო ხოხობო, ტურფაო ხარისთვალაო,
შირაქო, ცხვრების დედაო, - ზედ ჯვირნების ფარაო“.**

ამასთან ერთად, თედო რაზიკაშვილი „სადაც არ უნდა ყოფილიყო, ლხინსა თუ ტირილში, ქორწილსა თუ ნათლობაში, ხვნაში, მკაში მინდორში, ბაღში, გზაში, სკოლასა თუ დუქანში, ყოველთვის თან ჰქონდა ქალაღი და ფანქარი, იწერდა გაგონილ გონებამახვილურ სიტყვებს, ანდაზებს, გამოცანებს, თქმულებებს, ლექსებს, გადმოცემებს, ზღაპრებს. კარგი მთქმელები სახლშიც მოჰყავდა, ელაპარაკებოდა, ეშაირებოდა, აშაირებდა მათაც, რომ რაც შეიძლება მეტი ეთქვათ, თვითონ კი ჩაენერა”. (36, 19)

მისი ჩანაწერები, ქართლური და ფშაური ზღაპრები 1909 წელს გამოიცა ორ ტომად, ხოლო ხალხური პოეზია – გვიან.

შრომობდა თედო და უფასდებოდა, შრომობდა ვაჟა და არ უფასდებოდა, სიღარიბიდან ვერ ამოდიოდა, ოჯახი ვერ გამო-

ეკვება. ეს ალბათ აწუხებდა თედოს და, თავად ქართლის ბარაქიანი მიწით კმაყოფილი, ვაჟასაც მოუწოდებდა ჩამოსულიყო, ჩამოსახლებულიყო ბარად. ეს თავისი სურვილი მერე საჯაროდაც გამოთქვა – 1902 წელს გაზეთ „ცნობის ფურცლის სურათებიან დამატებაში“ გამოაქვეყნა ვაჟასადმი მიძღვნილი ლექსი „არყი“. არყს, მართალია, რუსულს ეძახიან, მაგრამ ჩვენ მთებშიც ბევრია, იზრდება მალლა მთებში და თანაც ჩრდილოეთის ფერდობებზე, თოვლ-ყინულიან მხარეს, მკაცრ პირობებში. თედომ ვაჟას ცხოვრება, თვით ვაჟა არყს შეადარა და თან გაკვირვებული კითხულობდა, რა აძლებინებს არყს ასეთ პირობებშიო. ვაჟა-ფშაველამ ძმას იმავე წელს, იმავე „ცნობის ფურცელში“ უპასუხა ლექსით:

პასუხი არყისა (ვუძღვნი თ. რაზიკაშვილს)

**რა გითხრა, ბიჭო, ისეთი, არ გავაჯავრო მსმენელი?
ის მასაზრდოებს, რომ დიდის ტრფობის ჭირის ვარ მთმენელი,
გულში რომ ცეცხლად მიღივის, სიცოცხლის გამომცემელი.
კლდეზე ვარ დაფუძნებული, იგია ჩემი მრჩენელი.
ეს გიკვირს? ტყუილად გიკვირს, უშრეტს მანოდებს ნექტარსა,
საით პოულობს, ვინ ჰკითხავს, მე ვენაცვალე დედასა!..
ქვევიდან დიდი ჭანდრები, შემომყურებენ შურითა:
რად ვდგევარ იმათზე მალლა ასეთ ამაყის გულითა,
თუმც ხშირად შემურვილი ვარ ნისლე-ჯანლების მურითა,
ტანმომცრო, გაბუებული, მხოლოდ ძლიერი სულითა...
ბრაზობენ მტკიცე რადა ვარ, შეურყეველი რჯულითა.
იქნება კიდევ ნატრობენ, რომ ვინმემ მომჭრას ცულითა?!
მე ვარდი გამიგონია – ტურფა ყვავილი ბარისა,
თვალ-გულის მახარობელი თურმე პირიმზეს ჰგავისა.
სხვაფრივ კი ხელსაყრელია და არასა რგებს არვისა.
ჩემი ბეჩავი ტოტებიც მქნელი როდია ავისა!..
იმათგან ცოცხნი იკვრება, კალოს საგველი, ხვავისა.
გაჰყიდის ვინმე ბეჩავი... წვრილი ცოლ-შვილი ჰყავისა,
მოუტანს საზრდოს იმათა, მზრდელი მშობლურის ვალისა,
რომ გაალალოს საწყლები, ცრემლი შეუშროს თვალისა...
იუბენ ცხოველმყოფელად, ძმა ამას გეტყვის თავისა“.**

1905 წლის რევოლუციას, როგორც ყველა, თედოც სიხარულით შეხვდა, რადგან მასაც ეგონა, რომ ბრძოლა საქართველოს დამოუკიდებლობისათვის მიდიოდა. ვაჟასი არ იყოს, ისიც აქტიურობდა. ისე მოხდა, რომ იმ ხანებში, როგორც იქნა, მოამთავრა სახლის მშენებლობა თედომ, საღმრთო გადაიხადა. სტუმრად ჩამოსული ვაჟა ქეიფის შემდეგ დარჩა, მითუმეტეს, რომ ერთი ოთახი საკუთრად გამოუყვეს, როცა სტუმრად ჩამოვიდოდა, იქვე შეეძლო ძილი და მუშაობა.

საღმრთოს მესამე თუ მეოთხე დღეს, ღამით პოლიცია დაეცა და მოჰყვინნ სახლის ჩხრეკას. „უეცრად ერთმა პოლიციელმა ბუხრიდან ნიკოლოზ მეორის სურათი გამოიღო, რომელიც თურმე თავდაყირა იდო. გაცეცხლებულმა პოლიციელმა ყვირილი ატეხა. ამაზე ვაჟამ დინჯი ხმით რალაცა წარმოთქვა, რის გამო პოლიციელი სწრაფად მიუბრუნდა და შეეკითხა: – რა თქვიო? ვაჟამ უპასუხა: ყრუებისთვის ორჯერ არ რეკავენო და სანამ პოლიციელი რამეს უპასუხებდა, მეორე ოთახში გავიდა...

შემდეგ ძმების ლაპარაკისა და სიცილის დროს გამოირკვა, რომ ვაჟას უთქვამს: „შე ვყჭკრდ ვენმ ყვრე სეყიო!“ ბაჩანას დაცინვაზე – რა ვაშკაცი ხარ, პოლიციელმა დაგაფრთხო და მეორე ოთახში დაიმაღე, ალბათ დონ-კიხოტი ეგონე, არა ჰგეგხარ, თუ რაო! – ვაჟამ მხოლოდ გაიღიმა და უპასუხა: განა დაგავინყდა: „საცა არა სჯობს, გაცლა სჯობსო, კარგისა ვაჟაკისაგან?“ უკეთესი იქნებოდა ჟანდარმს ჩავეარდნოდი პირშიო?”

ბუხარში თავდაყირა დადებული ნიკოლოზის სურათი კმაროდა მიზეზად, რომ დიდი ხნის სურვილი შეესრულებინათ და სოფლის მემბოხე მასწავლებელი საციმბიროდ გაემზადებინათ... ხელ-ფეხზე ბორკილდადებული ციმბირისაკენ, ოლენეცის გუბერნიაში გაამგზავრეს სამუდამო პატიმრობაში. მაგრამ 1905 წლის რევოლუციამ მოუსწრო და მანიფესტით ყაზანის ციხიდან უკან დააბრუნეს. ეს ამბავი თედოს აღწერილი აქვს თავის ერთ-ერთ მოთხრობაში „ყორანი“ (36, 29).

თედო კი დაბრუნდა, მაგრამ სკოლა დაუკეტეს, დაიწყო რეაქცია. დამსჯელი რაზმები მოედგნენ სოფელს. ხელისუფლების წინააღმდეგ ამხედრებულთ იჭერდნენ, ხვრეტდნენ, სახრჩობელაზე ჰკიდებდნენ. თედოსაც არ ასცდებოდა სიკვდილი, ფშავში რომ არ გაესწრო. ოჯახის თან წაყვანის დრო აღარ დარჩა, მაგ-

რამ ყველამ იცოდა მემბოხის სახლ-კარს ისე არ დატოვებდნენ. მეზობლებმა წინასწარ შეატყობინეს მათ: დამსჯელი რაზმი მოდის თურმე და სახლიდან გამოდით, ჩვენთან გადმოდითო. მათი ეზოდან გაყვანა და გაღმა სერიდან გულდაგულ დამიზნებული ზარბაზნის ყუმბარამ ჩიტის ბუდესავით აისროლა ჰაერში თედოსა და თინასაგან დიდი წვა-დაგვით, სიყვარულით ნაგებ-ნალოლიავეები სახლი. ნანგრევებს ცეცხლი წაუკიდეს, მთლად გადაწვეს – ასე ცდილობდა რუსის ხელისუფლება თავის მოწინააღმდეგეთა დედაბუდიანად ამოგდებას.

ჩუმად მოუტანეს თედოს მეუღლეს ამბავი, გორიდან მიხა რაზიკაშვილმა დაგიბარათ სასწრაფოდ ჩამოვიდეს და ბავშვებიც ჩამოიყვანოსო. მიხამ მატარებლით ჩაიყვანა მცხეთამდე, მცხეთას კი ვაჟა-ფშაველა ელოდა ცხენებით. ერთი ღამე დუშეთში გაათიეს, მეორე დღეს თვალვიამდე ძლივს მიაღწიეს. ზამთარი იყო, სახიფათო იყო მგზავრობა, თანაც ისეთი პატარა გოგონებისათვის, რომლებიც ჯერ ცხენზე არ მსხდარიყვნენ. კლდიან, თოვლ-ყინულიან ბილიკზე მგზავრობა ჭირდა.

– ფრთხილად, ფრთხილად! – მალ-მალ აფრთხილებდა ვაჟა, – თორემ დამემტვრევიო და თევდორეს რალა პასუხი გავცეო.

ცუდ ადგილებში, სადაც ცხენების გადავარდნა იყო მოსალოდნელი, ცხენებიდან ჩამოსხამდა, თითო-თითოდ გაიყვანდა ხელის კიდებით, მერე ცხენებს გაიყვანდა. მალაროსკარიდან თავის მეგობარი გოგოთური დაემგზავრა და იმან გაახარა ვაჟა: კართანის სახიფათო მონაკვეთზე, ყველაზე სახიფათოზე, მარტო აღარ იქნებოდა. დაილაღნენ მშვიერი ცხენები, დაიწყეს ბორძიკი. მალიმალ ამხნევებდნენ შეძახილებით ვაჟა და გოგოთური ცხენებს.

გული გადაელიათ მგზავრებს. ოღრო-ჩოღრო გზას დასასრული აღარა ჰქონდა. უკვე ღამდებოდა და ჩარგალი კი ჯერ არსად ჩანდა. მალე მივალთო ამხნევებდნენ ვაჟაც, გოგოთურიც, მაგრამ ბავშვებს აღარა სჯეროდათ. უკვე შიშს გვრიდა შავად წამოყუდებული მთები, თოვლი და ზვავები. და უცებ სიბნელიდან მოისმა ყველაზე სანატრელი და საყვარელი ხმა:

– ოჰ, მადლობა ღმერთსა, მოხვედით!

თედო შესახვედრად წამოსულიყო, შინ ვეღარ ისვენებდა თურმე. აღარ ეგონა, რომ კიდევ ნახავდა თავის საყვარელ გო-

გონებს. ეხლა კი სიხარულისაგან აცრემლებული სათითაოდ იხუტებდა გულში, ჰკოცნიდა.

თითქმის სამ წელს დარჩა თედო ფშავში. ხან ჩარგალს იყო ვაჟასთან, ხან აფხუშოში ბაჩანასთან. აქაც თავისებურად მუხლჩაუხრელად შრომობდა, ეხმარებოდა ძმებს სოფლურ საქმიანობაში. აფხუშოში ბაჩანას ქვა-ლორლიანი კარ-მიდამო გალორდა, ყორედ შემოავლო ეზოს. შემდეგ მოხნა. ნახევარში ხორბალი დათესა, ნახევარში – კარტოფილი. ხედავდა ძმების გაჭირვებას და ეხმარებოდა, უსაქმოდ არა ჩერდებოდა – უქმად ყოფნა მაშინაც მეყოფა, როცა მოვკვდებო.

1909 წელს დაბრუნდა თედო ხალთუბანში და შეუდგა დანგრეული, განადგურებული სახლ-კარის აღდგენას. იმას კი აღადგენდა, მაგრამ რა აღადგენდა ნანერებს, ლექსებსა და მოთხრობებს, უამრავ ჩანანერს ხალხური სიტყვიერებისას. კიდევ კარგი, რომ ძირითადი ნაწილი ამ ხალხური ზღაპრებისა და ლექსებისა ჩაბარებული ქონდა გამომცემლობისათვის და გამოვიდა კიდევ იმ წელს ორ ტომად ქართლური, კახური და ფშავური ზღაპრები.

„თედო 1905 წლიდან სკოლას ველარ დაუბრუნდა, მაგრამ ხელთუბნელები მაინც თედო მასწავლებელს ეძახდნენ. იმიტომ კი არა, ადრე რომ მასწავლებლობდა. არა, თედო სკოლაზე ისევ ზრუნავდა, ისევ ძველებურად უკითხავდა სოფლის ახალგაზრდობას ჟურნალ-გაზეთებს, წიგნებს, ესაუბრებოდა საჭირობოტო საკითხებზე... სკოლა ხელთუბანში ხელახლა 1913 წელს გაიხსნა. მასწავლებლად გამოგზავნეს ახალგაზრდა ქალი ოლლა მთიულიშვილი. გამოუცდელ, შეშინებულ მასწავლებელს თედო ამოუდგა მხარში, გაამხნევა, დაეხმარა.

თედო, ეს ყელამდე საქმეში ჩაფლული კაცი, საქართველოს სხვა სასიკეთო საქმიანობაში ჩასაბმელადაც იცლიდა. დამოუკიდებელ საქართველოს ხანაში კოოპერაციული საზოგადოება შექმნეს, თავისი ბაღების შემოსავალი შეიტანეს საერთო ფონდში. ასე ჩამოაყალიბეს სასოფლო სამეურნეო ბანკი: ხილი ერთიანად გაიტანეს აზერბაიჯანში, საიდანაც ცოცხალი საქონელი ჩამორეკეს და გლეხკაცობას დაურიგეს; ამან კი ნივთიერად ფეხზე დააყენა ხალხი. მალე ბანკის შენობა აშენდა, ამას მოჰყვა სკოლის შენობა, გაიხსნა სავაჭრო ცენტრი, გაიყვანეს გზები...

განზრახული იყო სამკითხველოს გახსნა...

საბჭოთა ხელისუფლების დამყარების შემდეგ „სოფლის ბოროტმოქმედებმა მამაჩემს შევიწროება დაუნყეს: ხან ფუტკარი მოჰპარეს და დაანელეს, ხან საქონელი გამოურეკეს და შეჭამეს, ხან საქონლის საკვები მთლიანად გადაუნვეს. იყო შემთხვევა გზაშიც დახვდნენ მოსაკლავად. 1922 წლის 19 იანვარს როდესაც ის ნასვამი ბრუნდებოდა გორიდან, ბოროტმოქმედები კვლავ დაესხნენ თავს, დანებით ორმოცდათექვსმეტი ჭრილობა მიაყენეს და ველურად მოკლეს. მკვლელობას მეთაურობდა კოტე თუმანოვი, რომელმაც იარაღის მუქარით ხალხს რალაცა შეთითხნინლ ბრალდებაზე მოაწერინა ხელი. მთავარი ბრალდება კი ასეთი იყო: „თედო რაზიკაშვილი მეგახშე იყო, სოფელმა ველარ გაუძლო და მოიშორა თავიდან!“ აი, ასეთი ბნელი ადამიანები, მძარცველები რევოლუციის სახელით ხოცავდნენ სამშობლოს ნამდვილ შვილებს და მათ ადგილს იკავებდნენ. ორმოცდათექვსმეტ ჭრილობას რომ მიაყენებენ ადამიანს, ისინი ხომ სადის-



სანდრო

ტები, სისხლს მონყურებულ კაცის მკვლელები არიან და აკი ამისთანა „რევოლუციონერებმა“, რევოლუციის დროსაც და რევოლუციის შემდეგაც. უზომოდ სვეს ქართველი ხალხის სისხლი.

„თბილისში მაშინ უკვე არსებობდა სრულიად საქართველოს მწერალთა კავშირის პრეზიდიუმი და ამ პრეზიდიუმმა ითავა თედო რაზიკაშვილის დაკრძალვა. მისი ცხედარი დედაქალაქში ჩამოასვენეს და დიდუბის პანთეონში დაკრძალეს“ (11, 74).

სასამართლოზე მკვლელის სიმამრმა გიგა სტეფანიშვილმა თქვა: მენშევიკე-

ბის დროს მე ცოლ-შვილი სიცივითა და შიმშილით მეხოცებოდა. რაზიკაშვილმა ორმოცდაათიათასი მასესხა არც თამასუქი და-უნერია და არც სარგებელი გამოურთმევიაო.

– მერე ასეთი კაცი მოჰკალითო! – იყვირა პროკურორმა. მკვლელების მიერ მოყვანილი ორმოცდაორი ტყუილი მოწმიდან ყველა გაიპარა.

სანდრო

სანდრო (ალექსანდრე) რაზიკაშვილების უმცროსი ძმა იყო. მშობლები როცა დაეხოცათ, სანდრო მცირეწლოვანი იყო, თელავში სწავლობდა, სამოქალაქო სასწავლებელში, ამიტომ აიღეს ძმებმა ერთნაირად მასზე მზრუნველობა. განსაკუთრებით ეს მზრუნველობა თედოს უკისრია, როგორც ჩანს, რაკილა მას ადრე მოუმაგრებია წელი თავისი გარჯისა და ქართლის მიწის მადლ-ბარაქიანობით. სანდრო კი ზარმაცია იყო, უფროსი ძმების გულშემატკივრობითა და ზრუნვით განებივრებული. ნიჭიერი კი იყო ძმებივით, მაგრამ სწავლა ეზარებოდა. ამიტომ სწერდა ვაჟა თედოს ერთ-ერთ წერილში: „სანდრო რას აკეთებს? მაგაზე ბრაზი მომდის, ზარმაცია, უღმერთოდ ზარმაცია“...

ძმები სანდროს ყოველთვიურად, თუ მორიგეობით, ათ-ათ მანეთს უგზავნიდნენ. ეს ირკვევა იაკობ მანსვეტაშვილისადმი მიწერილი თედოს წერილიდან, სადაც თავის გაჭირვებას უხსნის და ხელფასის დროზე გადმორიცხვას სთხოვს: „... დედ-მამა დამეხოცა და სულ მე მომეხვია თავს გასაზრდელი ძმაცა და დისწულიც, ამასთანავე თვით ოჯახსაც უნდა გაუნოდო ხელი. ეხლა თქვენ წარმოიდგინეთ, რალა დამრჩება, რომ ძმას 10 მან. ვუგზავნო თვეში და დას და დისწულს კიდევ ცალკე (ჩემი ძმები თავსაც ძლივს კმაობენ)“.

ვაჟას ყველაზე მეტად უჭირდა, მაგრამ შესაძლებლობის-დაგვარად, ისიც არ აკლებდა დახმარებას და ზრუნვას სანდროს. მისთვის თელავში სწავლისას ვაჟას ერთხელ, მაგალითად, ფულთან ერთად შემდეგი შინაარსის წერილი გაუგზავნია:

„ძმაო სანდრო!

გიგზავნი ექვს მანეთს. მეტი უნდა გამომეგზავნა, მაგრამ ვერა ვარ იმ ადგილას. შენც უნდა მომიტეო. მერე კიდევაც გამოგიგზავნი, ოღონდ თა-



სანდრო და ვაჟა

ვის საქმეზედ მუყაითად იყავი. ჩვენ კარგადა ვართ, მხოლოდ შენის ამბის გაუგებლობა გვანუხებს. წიგნი მომწერე. იყავ მშვიდობით. სააღდგომოდ წამოდი, თუ არ დაგეზარება

შენი ძმა ვაჟა-ფშაველა“.

სანდრომ შემდეგში „რეალური სასწავლებელი“ დაამთავრა და თბილისში დაიწყო მუშაობა ფოსტის მოხელედ. ხელფასი მცირე ჰქონდა, ღარიბულად ცხოვრობდა. როგორც მისი მე-

უღლე ბარბარე იგონებდა, მისი ქმრისათვის დუშეთში უკეთესი სამსახური შეუთავაზებიათ, მაგრამ სანდრო არ დათანხმებულა, გადანწყვეტით უთქვამს: ჩემს ძმებს თბილისში ბინას ვერ მოვუშლი, სხვაგან სად უნდა იწონიალონ, აქ რაზიკაშვილების თავშეყრის ადგილი უნდა იყოსო...

მართლაც, თბილისში ვაჟა-ფშაველას ჩამოსვლისთანავე სანდრო აფრენდა დანარჩენ ძმებთან წერილებს: ლუკა ახლა ჩემთან არის და ჩამოდიო. ძმები ბაჩანა და თედო, წერილის მიღებისთანავე დედაქალაქისაკენ გამოსწევდნენ...

დაახლოებით 1909 წელს ცოლად შეირთო ბაკურციხელი ბარბარე ილიას ასული პეტრიაშვილი და დასახლდნენ მლეთის ქუჩაზე 9 ნომერში (ახლანდელი ა. ხორავას ქუჩა). შვილი არ შესძენიათ და სანდროს უშვილებია თავისი ცოლის დის შვილები ქეთევან და ნათელა ფურცელაძეები.

დიასახლისი ქალბატონი ბარბარე, რომელსაც შინაურულად ბაბოს უწოდებდნენ, ყოველთვის ითვალისწინებდა მეუღლისა და მამულების თხოვნას და ხინკალს ამზადებდა... ერთხელ ვაჟას რძლისათვის მოუტანია საოჯახო წიგნი „სამზარეულო“ და ასეთი ავტოგრაფით მიუძღვნია:

**„გიძღვის ამ წიგნს სამახსოვროდ
შენი მამალი, რძალი ბაბო,
კაი ხინკალი მოხარშო,
მარილი არ მოაჭარბო,
ლოქოს სანელი ისწავლო,
ტკბილი იყოს და თან შამრგო“.**

გარეგნულად ძალზე ლამაზი კაცი ყოფილა სანდრო, ვაჟას ჩამოჰგავდა თურმე, მაგრამ მისგან იმითი განსხვავდებოდა, რომ ვაჟასავით ნაჯაფი არ იყო, თბილისელი მოხელის კვალობაზე კაი ჯანზე ყოფილა. ამასთან ძალზე უყვარდა ქეიფი, მხიარულება, სტუმარი. რაკი ძმებისაგან იყო გაზრდილი, სანდროც ცდილობდა სამაგიეროს გადახდას და თითოეული მათგანის ჩამოსვლა ზეიმად იქცეოდა. ხშირად წინასწარ დათქმულ დროზე ყველანი ერთად მოიყრიდნენ თავს, მოინვევდნენ თავის განუყრელ მეგობრებს: ვასო მათურელს, შიო მღვიმელს, ივანე ბუქურაულს, გიორგი ქუჩიშვილს და იყო ერთი მხიარულება და დროსტარება. ხორაგი და ღვინო თედოს ჩამოჰქონდა ხოლმე ჩვეულებრივ ქართლიდან, „მაგრამ თუ დაემთხვეოდა და ძმების ზეიმს შეესწრებოდა სანდროს სიმამრი ილია პეტრიაშვილი, თავის ბაკურციხული კახურით, მაშინ დაინწყებოდა ერთი ამბავი: გაამასხარავებდნენ „ხელთუბნურას“, ვითომ ღვინოებში წერი-აო, – იტყოდნენ და ელოდნენ, როდის იფეთქებდა მამაჩემი, მაგრამ მან კარგად იცოდა, რომ საყვარელი ძმა (ვაჟა-ფშაველა – გ. ხ.) მის დაყენებულ ღვინოს უფრო სიამოვნებით შეექცეოდა და მათ დაცინვას აინუნშიაც არ აგდებდა... იწყებოდა მხიარული სიცილ-საუბარი, ერთმანეთთან გაშაირება, ხშირად ცეკვაც. ამ დროსტარებაში რომ უფრო მეტი მხიარულება შეეტანა, მამაჩემი გადმოვიდოდა საცეკვაოდ და უნდა გენახათ მაშინ, როგორი სიცილ-კისკისი ატყდებოდა გარშემო. აძუნძულდა ჩვენი დათუ-

ნაო, დასცემდნენ ყიჟინას. ის კი უფრო უმატებდა ბრაცაბრუცს და ძალიან ახალისებდა იქ მყოფთ. (36, 55).

ეს ქეიფები მერე ქოსების დუქანსა და ორთაჭალის ბაღებში გრძელდებოდა. იქ მასპინძლობას ძირითადად ვაჟას ნათლიმა-მა, თიანელი კაცი ვასო მათურელი კისრულობდა. ის „სახელ-მნიფო პალატაში“ მუშაობდა, დიდ ხელფასს იღებდა (ოთხმოც მანეთს, ჩვენ ფულზე დაახლოებით რვაათასს). შვიდი-რვა კაცის მთელი ღამე ქეიფი კი ორმანეთ-ნახევარი, სამი მანეთიც არ უჯდებოდა.

ვასო მათურელი სანდროს მეზობლად ცხოვრობდა ვარდისუბნის ქუჩაზე (ახლანდელი ჯანაშიას ქუჩა) და ხშირი მისვლამოსვლაც ჰქონიათ. ვასო თავადაც მომლხენი კაცი ყოფილა, კარგი თამადა, კარგი მომღერალი. მას ჩამოუყალიბებია მომღერალთა გუნდი „ივერია“, თანამშრომლობდა გაზეთ „ივერიაში“, წერდა მოთხრობებსა და სტატიებს. დაგვიტოვა კარგი მოგონებები ვაჟაზე. ის ვაჟას გვერდზე უზის იხინჭობას 1914 წელს გადაღებულ ჯგუფურ ფოტოზე, კალთაში კი თავისი შვილი ირაკლი მათურელი უზის.

ვასო მათურელი 1916 წელს თბილისიდან თიანეთს გადასულა საცხოვრებლად, სკოლაში მასწავლებლობდა, იქაც გუნდი ჩამოუყალიბებია. 1926 წელს ახმეტაში გადასახლებულა. გარდაიცვალა 1946 წელს.

რაკი სანდრო თბილისში ცხოვრობდა, ვაჟას რედაქციებში გასარკვევი საქმეების შესახებაც ხშირი მინერმოწერა მასთან ჰქონდა.

1909 წელს ს. ფირცხალავას გამომცემლობა „სორაპნის“ პატრონის მ. გაჩეჩილაძისათვის ურჩევია ვაჟას ნაწერები გამოეცა. გაურიგებია კიდეც მათი საქმე და შედეგად გამომცემულა ვაჟას ნაწერები „ცრემლების“ სახელწოდებით. ვაჟას თურმე ახალი ნაწარმოებებიც უნდა ჩაერთო, მაგრამ რატომღაც აღარ მიუტანია. ამიტომ გაჩეჩილაძეს ჰონორარის ნაწილი დაუკავებია. ვაჟას უჩივლია და საქმე მოუგია. ფულის აღება შიო მღვიმელისათვის უთხოვია. მას ფული უნდა მიეტანა სანდროსთვის, სანდრო კი ფშავიდან ჩამოსულს ვინმეს გაატანდა ვაჟასთან. ამ ამბებთან დაკავშირებით ვაჟას მოუწერია სანდროსთვის სახუმარო კილოზე აწყობილი წერილი:

„ჰა, ბეჩავ, სანდროს, კვენესამე!

როგორა ხართ და რას კეთილ-გუნებას? მე კარგა არა ვარ. გულის ტკივილი დამჩემდა. მოგელით თქვენცა და აღარ კი მოს-დინართ. სიტყვა სხვაა საქმე სხვაა, – ეს რა ამბავია! შენ და გა-ჩეჩილაძე როგორა ხართ? გაძლევს ფულს თუ არა, მომწერე. ან შიოს საქმე როგორ არის? დემურია ნახე და უთხარი, რომ სამი თუმანი თუმცა გამომიგზავნა, ორი თუმანიც გამომიგზავნოს, ფული ჩემთვის ძალიან საჭიროა. აღლაძეც ნახე და უთხარი, რომ „კაი ყმის“ ფული გამომიგზავნოს. ჰა, ბეჩავ, ბაღლო, კაი ყმავ, ნაიკითხე კარგად, დედის კვენესამე, გამზრდლისა, ამ ლექსს რო ნაიკითხავ, თორმეტი ყური შაიბი, თორმეტი გული ჩაიდევე, ხო-ლო თვალებს მომატება არ ესაჭიროება.

ამ წერილს „პანანა“ გრიგოლს ვატან. დიად, იმ გრიგოლს, რომელმაც შუადღის დროს რომ დაუმიზნა შველს თოფი და შე-



სხედან(მარცხნიდან მარჯვნივ):არ. ევლოშვილი,ბაჩანა შიო მღვიმელი,ვაჟა ფშაველა,ვაჟას შვილი ლევანი,დგანან: თედო და სანდრო რაზიკაშვილები

მოყენებული ჩახმახი დაჭ-რჩა, რადგან ამჟამად წას-თვლიმა, თვლემამ ძილი შო-ბა და სალამო ხანმაც მოა-ტანა; მზე უკვე ჩასული იყო, როცა გაიღვიძა. ჰა, ბეჩავ, ბაღლო მონადირეო!

მომიკითხე ჩემი რძალი სიყვარულითა და პატივის-ცემით; გელით უსათუოდ. წამოდით, რალა ფეხს უკა-ნა სდგამთ, თქვე კაი კაცე-ბო, ახალი თევზი ბლომად არის, რძე და ერბო, ყველი და ხაჭო, დოვი და შრატი. თუ წამოხვალთ მომწერეთ – დუშეთში ცხენებს გამო-გიგზავნით.

სიყვარულით შენი ძმა ვაჟა”.

ძმები რაზიკაშვილების ბიძაშვილი გრიგოლი, რომლისათ-ვისაც ვაჟას წერილი გაუტანებია, ერთი აყლაყუდა, უვარგისი კაცი ყოფილა. „გრიგოლი მეტისმეტად მაღალია, საყენზე მე-

ტი. ცოტა მცონარა კაცია, ქალები უყვარს, არაფრის კეთება და ძილი. მუშტი ძალიან უჭრის”. (თედო რაზიკაშვილი). გრიგოლს ჰყოლია თავისფერი ზარმაცი და არაფრისმქონე მეზობელი ლუ-კა პეტრიაშვილი. ამ ლუკასთვის შეუღლექსებია ერთხელ ქავთარ რაზიკაშვილს, ვაჟას ბიძაშვილს და მშრომელ კაცს, რომელზეც ვაჟას ლექსიც აქვს დანერილი:

ქავთარი: – ლუკავ, შენ დაფარულზედა, გრიგოლს დაუდის ნახირი.

ლუკა: – გუშინაც გამოუვარდი არ მისდის კაცის ძახილი.

ქავთარი: – ლუკავ გრიგოლის ჩხუბობა, ნუ გეგონება ადვილი,

შენ მუშტით ვერას დააკლებ,

თუ არ იხმარე მახვილი, მოგიკვდი, მაინც რას უქამ

მაღლა სამ გაშვირს თავ-ცხვირი.

ლუკა: – საცა შავწვედები, იქ დავკრავ,

ახლა კიბისად სად ვილი.

ქავთარმა გაკილა ბიძაშვილი და მეზობელი იმის გამო, რომ არც ერთს ჰქონია ნახნავი და არც მეორეს საქონელი ჰყოლია. იმავე გრიგოლის ხელით უბრუნებს სანდრო პასუხს. წერი-ლი ასე მთავრდება: „შენი „ცრემლების“ კორიანტელი ისევ გა-ჩეჩილაძის „სორაპანში“ ტრიალებს, არაფერი არ ვიცი. შიოს ჟესტი მოაბეს. ჩემი დედაკაცი ცოტა მგლოვიარედ არის და, ხო იცი, რო გავისეირ-გამოვისეიროთ, თუ მე ჩემებურად არ ვიქეი-ფე, რა იქნება.

ბევრი რამის მოწერა მინდოდა, მაგრამ ეს პატარა ჯეელი ძა-ანა ჩქარობს.

თქვენი სანდრო”.

ასეთ წერილებს გარდა, გალექსება-გაბაასებაც ყოფილა ვა-ჟა-ფშაველასა და სანდროს შორის. კილოდ აღებული ჰქონიათ ვინმე მთიული ბურდულის უხეირო ლექსის ფორმა. ამ მთიულს ვაჟასთვის უძღვნია საკუთარი ლექსი, ჩამოუტარებია რედაქ-ციებში, მაგრამ არსად დაუბეჭდავთ. ბოლოს სანდროსთვის მიუტანია და უთხოვნია: „აჩვენე ვაჟას, შეასწოროს და შემდეგ

ეგების შენ მოახერხო სადმე დაბეჭდვით. ვაჟას ეს ლექსი ნაუ-კითხავს და ბევრი უცინიათ. თანაც ვერაფერი გაუგიათ. აი, ამ ლექსის თავ-ბოლო:

ვაჟა-ფშაველას დედობილთ მიერ კვნესამე

ბერავ... კვნესამე, ბალღებო,
თეთრი თმა შეგვიბენია,
და თქვენს ნაწოვსა ძუძუ-რძეს,
ძროხის რძეზე სცვლით ბნელნია...
და იღბალი გვიღალატებს
ნაგვლეჯს გამმარჯვე გვირგვინსა
დეე დილით ბრძოლის ველზე
დავრჩეთ კეთილად მაშვრალნი.

ლექსისა კი არაფერი გაიგებოდა, მაგრამ აქედან აღებული ფრაზები „დედობილთ მიერ კვნესამე“ და „ჰა, ბერავ,“ ძალიან გამოსდგომიათ ერთურთისათვის სახუმარო მიმართვისას. ეს ფრაზები იყო გამოყენებული სანდროსადმი გაგზავნილ ვაჟას ზემოთ მოყვანილ წერილშიც. ლექს-კაფია სანდროს დაუწვია. ფშაური წესის თანახმად ვერ გაუშვებდა ხელიდან ისეთ სალექსო ამბავს, რაც ვაჟას შეემთხვა გაჩეჩილაძესთან:

ვაჟა-ფშაველასა და გაჩეჩილაძის ბრძოლის გამო (ვუძღვნი ჩემს ძმას ვაჟა-ფშაველას. მიბაძვა ბურდულისა)

ჰა, ბერავ, ვაჟას კვნესამე – ცალ თვალს რომ ისა ჰხუჭავსა,
ლოქოს თევზს ძაან რო სწყალობს, ზედაც ნუნუას ჰყლურჭავსა
ლალად გაზრდილი მთაშია, სოფელს ჩარგალ რო ჰქვიანო.
წყაროს წყლით არის ნაზარდი, ჭიჭახევას რო დიანო,
იმის ნათიბი „თივები“ აფხუმოს ზოვზედ ჰყრიანო...
გაისეირნებს თბილისში, განა თუ პური ჰშიანო?
თვითონ იქ ქაშნიკებს შინჯავს, ცოლ-შვილნმშიერნი ჰყრიანო!
კვნესამე შენი, ვაჟაო, კვნესამე შენი ძმისაო!
შამაუძახებს ვაჟაი გაჩეჩილაძე ბიჭსაო:
„რა უყავ, ბიჭო, ფულები იმ ჩემი „ცრემლებისაო“?
არ გამოგადგა, ბერავო, მონმობა სამსონისაო,
დაგათვლევინო მთლიანად, მადლმა ლაშარის ჯვრისაო.

ამოდოდეს კუნელი მაგ შენი „სორაპნისაო“;
მათრახსაც კარგადა ვხმარობ, ხანჯარიც კარგად სჭრისაო.
შენ დღეში დარდის უნახავს, ახლა გაგჩინე ჭირსაო”.
ჭირიმე შენი, ვაჟაო, შურთხი ხარ მაღლის მთისაო,
იმედი მაქვს აიტან, არ გენყინება ძმისაო.
ამისი მალექსებელი ქალაქ თბილისში ზისაო,
შენფერა ბიჭებისასა, სხვასაც მრავალსა სთხზვისაო”.

ამაზე ვაჟამ უპასუხა, მაგრამ მიზეზი ხომ უნდა ჰქონოდა რაიმე. კონკრეტული ფაქტი არაფერი იყო, მაგრამ სასმლისა და ქალების სიყვარულიც იკმარებდა გასაკილად .

ვუძღვნი ალ. რაზიკაშვილს (მიბაძვა ბურდულისა. „ვაჟა-ფშაველას დედობილთ მიერ კვნესამე და ჰა, ბერავ, ბალღებო“)

ჰა, ბერავ, სანდროს კვნესამე, თვალების, უღვაშისაო:
ჰა, ბერავ, ბოთლების მცლელო და მტერო ქალებისაო.
ჰა, ბერავ, სანდროს კვნესამე, შე ჯიხვო შავის კლდისაო,
შეუდრეკელო სმაშია, პირის ოფლ გადაგდისაო.
ჰა, ბერავ, სანდროს მოუვა გორით წერილი ძმისაო
და სატრფიალო გოდება მიხასი, დისწულისაო.
ჰა, ბერავ, ბერავ ბიჭებო! არა ჰღალატობთ ჯიშსაო.
გიპატიყებენ სმაზედა, წერილი წერილს ცვლისაო.
ნეტევი თვალთა გნახოთ, დრო რო დადგება სმისაო.
თეთრიანი რო დაცლილა, ნითლიანს ქვევრსა ხდისაო.
თევდორე: „ღვინოს უყურეთ, გემო აქვს ბადაგისაო”.
გავარდა საქართველოში ხმა თქვენის ბიჭობისაო.
რა უჭირს ისეთს დედასა, ვინც თქვენფერ შვილებს ზრდისაო.
ჰა, ბერავ, ფშავლის შვილებო, თვალის მთხრელებო მტრისაო.

ვაჟამ თავის ძმა სანდრო, როგორც ფშავში იტყვიან, ალექსა, ან ნააკაფიავა ქალებისა და ღვინოს მოყვარულობის გამო. მას ზედ მიაყოლა თავიანთი ერთადერთი დის შვილი მიხაც, რომელიც დედიძემების მსგავსად კარგი მოხდენილი კაცი ყოფილა, ისიც ქალების მოყვარული.

ეს მიხა, რაზიკაშვილების ერთადერთ დას, მართას, ვილაცა ჩარგალში მასწავლებლად მისული ჯაფარიძისაგან გაუჩინია.



მისა

ის ვილაცა დამფრთხალი გაქცეულა. ძმებს გაუზრდიათ ბაღლი და რაზიკაშვილობაზე დაუნერიათ. ნიჭითა და გარეგნობით დედძმებს ჰგვანებია და ამიტომ დედძმებსაც ძალიან ჰყვარებით. მასაც ძალიან ახლობლობა და სიყვარული ჰქონია მათი. ისიც გორში მიუღებინებია ვაჟას სასწავლებელში და იქვე დაბინავებულა. სანამ დაოჯახდებოდა, ისიც თურმე სანდროს უბამდა მხარს მექალთანეობაში. ამიტომ მასაც საჭიროდ ჩაუთვლია ვაჟასათვის პასუხის გაცემა.

აქა ბრძოლა ვაჟა-ფშაველასი და გაჩეჩილაძისა (ვუძღვნი ვაჟა-ფშაველას, მიბაძვა ბურღულისა)

ჰა, ბეჩავ, ვაჟას კენესამე, შე ჯიხვო შავის კლდისაო, ქალაქში ჩამოვარდნილო, მალექსებელო ძმისაო. ქებითა მომხსენებელო, მიხასი დისწულისაო: „მე მაგას ვიტყვი მალი-მალ, ვფიცავ კახურის ძირსაო ჩემ გზაზედ მიდის ეგ ბიჭი, მსგავსია დედის ძმისაო“.

ჰა, ბეჩავ, ვაჟას ჭირიმე, მაგის ხირიმის, ხმლისაო: მაგის მოქნეულ ფრანგული, ქვიტკირ კედლებსაც სჭრისაო, მაგისი ცხენი ნიკორიც, ზვავია მალლის მთისაო, იქ არ იციან ბეჩავთა, აწყენინებენ გმირსაო, ველარა შეაგნებინა გაჩეჩილაძის ბიჭსაო უარს უშვრება ფულებზედ: „ვისი რა მოგცე, რისაო, ვინა ხარ, ვის დაჰკარგვიხარ, ანუ რომელი მხრისაო?“ არც ემონებება სამსონი, გადასულია პირსაო. ჰკარგავს ექვს თუმანს ვაჟაი, ბრაზით იხოკავს პირსაო, გულზე იმჯილავს მუშტებსა, „სორაპანს“ უკრეჭს კბილსაო:

„დავკრავ, დავვედრებ, ღმერთს ვფიცავ, მუშტით დავამტვრევ ცხვირსაო, სამსონსაც ზედ მივაყოლებ, მაგ გაუტანელ ფლიდსაო... გორში გავარდა ამბავი, ვაჟა-ფშაველას ცდისაო. დეპეშა-დეპეშას მისდევს, გაზეთი გაზეთს სცვლისაო. „არიქათ, ვაჟას უშველეთ, ვინა ხართ იმის მხრისაო!“ ძმანი იბრძვიან ერთადა, სანდროსაც ოფლი სდისაო, თითოსა შემოქნევითა ხუთ-ხუთ, ექვს-ექვსსა ჰყრისაო. ძმა-დისწულთ წამოიწიეს: ჩვენი მარჯვენაც სჭრისაო. ჰა, ბეჩავ, ვაჟას ჭირიმე, ვინ აწყენინა გმირსაო? ემზადებინა ქალაქში, თედო იპარსავს პირსაო, მიხა ინმენდავს მუნდირსა, ორმხრივ აისხამს ლილსაო. ტიკებსაც არ ივინყებენ დრო დაგვიდგება სმისაო; ბრძოლაში გამოგვადგება, გაგვიადვილებს ჭირსაო. ჰა, ბეჩავ, ფშავლის შვილებო, ჭირიმე თქვენის ხმლისაო, ასს მირჩვენისხართ თითონი, დრო რომ დადგება ცდისაო...

II

ჰა, ბეჩავ, ვაჟა-ფშაველო, შე ჯიხვო შავის კლდისაო, სიამაყეო ფშავისა, ბადალო მალლის მზისაო. ჰა, ბეჩავ, ვაჟა-ფშაველო, მარტო არა ხარ, ძმისაო, არწივი მხარკვერიანი ერთიც აფხუშოს ზისაო*, თავზე მუზარადს არ იდგამს, გრძელბუნვა ქუდზე სცვლისაო, თბილად ინახავს ქეჩოსა თან შეიმშვენებს პირსაო, ქავ-ციხეს შეჰფარებია, ნაყვევრალეების ძირსაო, გარს შემოუვლავ თხრილები, კედლები ქვიტკირისაო. ურდულით ჰკეტავს კარებსა, შემოლამების პირსაო. ძმობილისეულ ბერდენკას, კარისკენ უზამს ცხვირსაო. სიფრთხილეს თავი არ სტკივა, ნუ მიაწერავთ შიშსაო. სადლაც სწუხდება ვაჟაკაცი, ფერი ედება მგლისაო, ხშირად ცუდ სიზმრებსა ხედავს და აცემინებს ცხვირსაო. ამჟამად ვაჟას ამბავი, მოუტანია გზირსაო, ბაჩანას შეატყობინეს მოაჩაკჩაკებს ვირსაო. გრიგოლს გასძახის ბონახსა: ნუ მისცემიხარ ძილსაო! ლევანს კი ნურავინ ეტყვით არ მოაცდინოთ წიგნსაო, ოქროს მენდალზე ათავებს, პირველ რიგებში ზისაო.

III

ფშავით დაიძრნენ ფშავლები, კორიანტელი დისაო.
 ცრემლით დაცლილა ვაჟაი, რა გაუჭირდა გმირსაო!
 მუდამ მყვირალი ვაჟკაცი ეხლა რალაზე სტირსაო?
 შეყრილან ახალგაზრდები ვინ გამოუსწრებს ვისაო.
 ჯღრდები მოდის თოფისა, ვადები ბრჭყვინავს ხმლისაო,
 მოჰყავთ შეკაზმულ ნიკორი** ადგამენ უნაგირსაო;
 მაგრა უჭერენ თასმებსა, გმირ არ დაეცეს ძირსაო.
 სამ-სამთ უჭირავთ სადავე, ოფლი გადასდით პირსაო...
 სასოვეთავით მათ მისდევს სვაენი დარაჯნი მთისაო,
 კანალხევისკენ* დამწკრივდნენ, თავქვე იზამენ პირსაო,
 წინ ყორნებ გამოიმძღვარეს: იყავით მუდამ მზირსაო,
 თვალყურ ადევნეთ მასთანვე აფხუშოურსა გმირსაო.

IV

ხევსურთ მოუძღვის ძალლიკა, არწივი მალლის მთისაო,
 თავიდან ფეხებამდისინ ვეფხვი აბჯარში ზისაო,
 ხმალსა აღნება ქარქაში, ნალესს არაგვის პირსაო.
 მხარზედ ჰკიდია ხირიმი, ნაჩუქარია ძმისაო:
 ეხლა კი გაჩეჩილადეს რისხვა დაატყდა ღვთისაო,
 დარჩება ფშავლის შვილებსა მის ფულიანი ქისაო!
 ვაჟასაც შესწყდა ცრემლები, შუქ ეფინება პირსაო.

V

ქალაქს მოვიდა ამბავი: მოდის ფშავ-ხევსურთ ჯარიო,
 წინ მოუძღვება ფოცხვერა** და ხიმიკაურ***ხარიო.
 „სორაპნის“ რედაქციასა უნდა ამტვირიონ კარიო.
 სალუდის კარზედ ხევისბერთ გლოვის ჩამოჰკრეს ზარიო.
 დაჰკლეს შვიდი წლის კურატი, დაიმწყალობნეს ცხვარიო.
 არა ხუმრობენ ვაჟანი, დადგება ცოდვა-ბრალიო.

VI

მაგრამ ხომ ვიცით, ზოგჯერა, რომ სასწაულიც არიო:
 ბრძოლისა გადაუხდელად სახლში ბრუნდება ჯარიო.
 აქაც ის მოხდა, მთიელთა უკანვე ნავლეს გზანიო;
 მალე მივიდნენ სახლშია, არ დააყოვნეს ხანიო.

ბობოქრობს ხიმიკაური: რა რიგ ლაშქრობა არიო?
 უჩხუბრად რაად მავლიეთ საქალაქონი გზანიო!

VII

რა მოხდა, რისთვის ბრუნდება ომგადუხდელი ჯარიო
 საბედისწეროდ ხვარ იცნეს გაჩეჩილაძის შარიო.
 იქნებ მთებს გაუავდარდათ, ბარს კი დაუდგა დარიო?
 არა, არც ეგრე დამცირდნენ, სწყალობთ ლაშარის ჯვარიო.
 მტერი დამარცხდა უბრძოლოდ, მათაც შესწყვიტეს შარიო.
 უომრად გაჩეჩილაძემ დაბლა დახარა თავიო,
 იხდის, რაც მედიატორეთ კისრად დაადვეს ვალიო.
 ვაჟაც დამშვიდდა, აღარ ჰქუსს, დანმნდა ამღვრეულ წყალიო.
 – ჰა, ბეჩავ, ფშავლის შვილებო, თქვენ ხო არა გყავთ ცალიო,
 გაჩეჩილაძე რას გასძლებს, კლდე რომ ვერ გასძლებს სალიო.
 ჰა, ბეჩავ, ბეჩავ ბიჭებო, ბურღულიც თქვენთან არიო,
 ცისკარი ამომავალი, შოთა რუსთველის დარიო,
 შიო, ივანე, სევასტი — ქიზიყელები ძმანიო,
 გორით მოგელით ტიკები, თედომ დაკრიფა ზვარიო.
 ნაზუქი, ქადა, ნამცხვრები, გნოლი, კაკაბი, ვარიო...
 დისწულის ნანადირევი — შველი, ირემი ხარიო,
 ჩავაბერინოთ დუდუკი, დავაკვრევინოთ თარიო.
 ომსა ქეიფი სჯობია, სიკვდილს დაუდგეს თვალიო.

როგორც მიხა რაზიკაშვილის ამ გრძელი ლექსიდანაც ჩანს,
 ვაჟას სასარგებლოდ გადაუწყვეტია სასამართლოს საქმე, გა-
 ჩეჩილაძისათვის დაუკისრებიან დანარჩენი ფულის გადახდაც.
 როგორც ვთქვით, ამ ფულის აღება ვაჟას შიო მღვიმელისათ-
 ვის მიუხდვია. შიოს კი აუღია, მაგრამ თავადაც ხელმოკლე მწე-
 რალს, სანდროსთან მიტანამდე ფული შემოხარჯვია, ახლა იმან
 დაუგვიანა. ვაჟამ ამ ამბის გამო ფშავიდან გამოაგზავნა

ფშაური მუხამბაზი (ვუძღვნი ჩემ ძმას შიოს)

გაჩეჩილაძე ლილინებს მდგომი „სორაპნის“ კარზედა:
 „შენი ჭირიმი, უფალო, რომ დამარიგე ჭკვაზედა.“

ვაჟა-ფშაველამ მანვნია, მეც მოვექეცი ახზედა.
რაც ფული უნდა მიმეცა, გადავიტანე სხვაზედა.
ეტყვიან შიო მღვიმელსა განთქმული არის სმაზედა...
...ამ დროსა შიო მღვიმელი პადვალში იჯდა სკამზედა,
ადღეგრძელებდა რაც კი რამ არსებობს ქვეყანაზედა:
სამშობლოს, ლიტერატურას, ქვაც თუ სადმე ძევს ქვაზედა”...

ეს შიოს ამბავი. მაგრამ უყურადღებოდ არ შეიძლებოდა და-
ეტოვებინა დისწულის მიერ მონერლი ლექსი. ვაჟას მის პასუ-
ხად ასევე გრძელი ლექსი, ლექსი კი არა პოემა დაუნერია, რო-
მელშიც მიხასთან ერთად თავის ძმა თედო და სხვა ქართლელი
მეგობარ-ნათესავებიც არიან მოყოლილნი. საოცარია, ასეთი
სახუმარო ლექს-ნერილებსთვის როდისღა იცლიდა! აქ მხო-
ლოდ მცირეოდენს მოვიტან:

აქა ამბავი დისწულ-დედიძმითი

ქართლით მოიდა ამბავი, გადმაიარა მთანიო,
საით გაიგო, ბეჩავმა, ნეტავ, საჩარგლო გზანიო?
კითხვითაც აღარა მკითხა შემომიმტვრია კარიო.
იმ დროსა მე და ბაჩანა ერთად ვიყვენით ძმანიო,
ვანშამსა ვჭამდით ერთად იყო სალამოს ჟამიო,
ხონჩაზე ქერის პურ გვედვა, ხელში კაპრიან ჯამიო.
ვანხევს ერთგულის ნახვენი კაკლის ნუჟრისა არიო.
ვავლიეთ არაყისადა ვაჟი, ცოლი და ქალი.
რომ ვერ ვიშოვეთ ვერსადა, ვერ ვართ რომ აღარ არიო.
უსასმლოდ არას მოვიშლით, ტყავგარექცევან ყმანიო
დავლიეთ ღვინო-არაყი, მთელი იმის გვარიო
თუ მოვინდომეთ, იცით რად? რომ შეგვენყალა მკვდარიო.
თან გვედღეგრძელა ცოცხლები, რაზიკაანი ძმანიო.
და რომ არსაით აღმოჩნდა, არაყს ვარჩიეთ წყალიო.
ამ დროს გვესტუმრა ქართლიდან ამბავი ნაფრენალიო.
შუბლი შაიკრა სტუმარმა, როს გადაგვაველო თვალიო.
როდესაც გვანახა ფხიზლები, ერთიც არა ვართ მთვრალიო.
„მოიტათ, დამალევინეთ, – გვითხრა, – ხახა მაქვს მშრალიო.
აქ რისთვის წამოვჩერჩეტდი მე ეს თავმოსაკვდავიო.
აფსუსო, თედოს სუფრაო, მაისივითა ჰყვავიო...
რა გინდა, სულო და გულო, აწყვია როგორც ხვავიო,

დოში, სათალი, მოთალი, იხვრის სხვადასხვა ძვალიო.
კაკაბი, გნოლი, კურდღელი — მიხაის მონაკლავიო...
მიხეილს ჭლექი გაუჩნდა, მას გული სტკივა ცალია,
მარცხენას ძუძუს თავზედა ადგება რალაც მჭვალაია,
ღმერთმა დასწყევლოს დიაცი მაჩაბელისა ქალია,
ბიჭი იმისგან გაფუჭდა, ჭლექი იმის ბრალია...”

და ასე შემდეგ და ასე შემდეგ. ბევრი რამ არის მოთხრობი-
ლი, მაგრამ, როგორც ირკვევა, ვაჟას ის რატომღაც ადრესატე-
ბისათვის აღარ გაუგზავნია; ეს ლექსი ს. ყუბანეიშვილს აღმო-
უჩენია ვაჟას ხელნაწერებში. ერთი კია საინტერესო: ამ ლექ-
სის ერთი მონაკვეთი საიდანღაც გავრცელებულა ხალხში სულ
სხვაგვარი ინტერპრეტაციითა და ვარიანტით. მე თვითონ ჩამი-
წერია და გამომიქვეყნებია კიდევ „ვაჟასა და ბაჩანას” ლექსო-
ბის სახით.

აი, ეს კაფია, ვითომ ვაჟასა და ბაჩანასაგან ნათქვამი:

ვაჟა: ერთხელის მე და ბაჩანა,
ერთად ვისხედით ძმანიო.
ბაჩანა: წინ გვედგა გაშლილი სუფრა,
თითო კაპრიან ჯამია.
ვაჟა: ვგზავნენით არაყისადა,
ხან ქალი, ხანაც რძალია.
ბაჩანა: ერთმანეთს ვეუბნებოდით:
„ეგ ხო კაცისად მავნეა?”
ვაჟა: ნამეტნავად კი მაშინა,
როცა ის აღარ არია”. (54, 9).

ვაჟა და მუზა

ვაჟას მუზა ეძალეობდა, სანერად მუდამ ხელი ექავებოდა,
კალამი ეწეოდა მაგიდისაკენ. მაგრამ იძულებით საქმეს თავი-
სი გაჰქონდა, ოჯახს არ ელალატებოდა, შვილებს ვერ დახოცავ-
და სიცივითა და შიმშილით. მხოლოდ ღამე, ჯალაბთ დაძინების

შემდეგ, ძლივს მიუჯდებოდა მაგიდას მთელი დღის ნაჯაფი, ან-დაც უქმეებსა და წვიმიან ამინდებში. თავისი მეგობარი მიქაბერ-იძისათვის შეუჩვილია ვაჟას: „ზოგჯერ დიდი სურვილი მაქვს ჩავიმუხლო და რაიმე დავწერო, მასალა ბლომად მომეპოვება, მაგრამ განა შემიძლია გულდამშვიდებით ვწერო, როცა თვალ-წინ სახრჩობელასავით მეხატება ჩემი ნივთიერი უმწეო მდგო-მარობა, ჩემი ცოლ-შვილის ლუკმა-პურის მოსაპოვებლად ყო-ველდღიურად ტანჯვა და ვაება“.

ძირითადად ღამე წერდა ვაჟა, დღისით მოუცლელობის გა-მო, მაგრამ ხშირად ღამის ასანთები ნავთიც კი არა ჰქონდა. ასეთ დროს ბუხრის პირს მიმჯდარი ცეცხლის შუქზე წერდა. გულქანს, მის გამორჩევით საყვარელ ქალას, გამნათებლის, გამშუქებლის როლი ჰქონია დაკისრებული: მას ბუხარში ნელ-ნელა უნდა ემატებინა ცეცხლისათვის ხმელი ფიჩხი, ანდა ჩალა. ამის გამო ძალიან გაბეზრებული ყოფილა გულქანი და ჩუმ-ჩუმად ბუზღუნებდა. მას ბავშვებთან ჩურჩული უნდოდა, ან ეძინე-ბოდა დაღლილ-დაქანცულს, მამა კი არ უშვებდა, საწერს აღარ ამთავრებდა.

შემოელოდა ნავთი და ხან ფული არა ჰქონდა საყიდლად, ხან – დრო. ამას დაუძღურებაც დაემატა. ყოველთვის და მითუ-მეტეს ზამთარში ვერ შეძლებდა მხოლოდ ნავთისათვის მთის გადავლას და თიანეთში ჩასვლას. არადა უნავთობა მისთვის ცეცხლ-ნავთი იყო, განსაკუთრებით მუზის მოძალების ჟამს, ღამე რომ ძილს არ აძინებდა. ერთი ასეთი გასაჭირიდან მეზობ-ლის ბაღს ზ. ტოპეშაშვილს უხსნია; მისი ნაამბობია: „ერთ ზამთრის დილას ვაჟამ ადრე დამიძახა და მითხრა: დიდ რასმე წიგნსა ვწერ და ნავთი არა მაქვსო. თურმე მთელი ღამე ბუხრის ალზე ეწერა. უნდა მომეხმაროო, თიანეთს უნდა ჩახვიდე ნავ-თი მიყიდოო. მე სიხარულით დავთანხმდი, მაგრამ ვაჟას ფუ-ლი არა ჰქონდა. ნავთის ფულის საშოვრად ჯერ ქათმების ჭერა დავინყეთ, მერე კვერცხები მოაგროვა, კვერცხები რომ დააკ-ლდა, ცოლს ასესხებინა მეზობლებში. თავისი ცხენი შემიკაზმა, კვერცხები ხურჯინში ჩავანყვეთ, ქათმები კი უნაგირის კეხზე გადავკიდეთ და გავუდექი თიანეთის გზას ნავთის მოსატანად, მაგრამ დახე უბედურებას!

სულ ცოტა გზა მქონდა გავლილი, რომ თავდაღმართზე ერ-

თმა ქათამმა შეიკრიახა, ცხენი დაფრთხა და ორივენი, მეცა და ცხენიც მინაზე დავეციო. რასაკვირველია, კვერცხები მთლად დაიმტვრა და შერცხვენილი ისევ უკან დავბრუნდი. ვაჟამ ბევ-რი იცინა და ახლად ისესხა სათიანეთო კვერცხები, მეც მეორედ გავემგზავრე თიანეთს, რომ ვაჟასთვის ნავთი მომეტანა. როდე-საც ვაჟას ნავთი მოვუტანე, ძალიან გაეხარდა, დიდი მადლობაც მითხრა – ახლა კარგა დავწერო და რამდენიმე დღეს გამგელე-ბული მუშაობდა. ასე დანერა ვაჟამ „ბახტრიონი“ („ლიტ. გაზ“. 1956, 22).

ისეც მომხდარა, ცალკე მუხლჩაუხრელი ფიზიკური შრომი-საგან და ცალკე მოძალებული მუზისაგან სულშეხუთულს თავი მიუნებებია საქმისათვის და საწერს მისჯდომია. თავს დატეხილ ორთაჭიდილში, ვაჟას რომ აქეთ-იქით ეწეოდა, ხანდახან მუზა ძალავდა. ის უკვდავი ქმნილებები, როცა თავში მომწიფდებოდ-ნენ და დაბადებას ითხოვდნენ, ველარ უწევდა წინააღმდეგობას, ვერ აკავებდა ისევე, როგორც მშობიარე ქალი ვერ შეაკავებს ბავშვის დაბადებას. ასეთ შემთხვევაში ისე იქცეოდა ხოლმე, რო-გორც მოქცეულა ერთხელ მკის დროს. ვაჟას მეუღლე თამარი იგონებს: „ერთხელ მე და ლუკა ყანასა ვმკიდით სულა-კურდღე-ლაურთ მამულში. იმ ხანებში რომელიღაც პოემაზე მუშაობდა (რომელზე კარგად არ მახსოვს). ყანა ძალზე გადამწიფებული იყო. ორთავენი სამკალში ვიყავით. შუადღე გადასული იყო. და-ყოვნება აღარ შეიძლებოდა, ყანა უნდა მოგვემკო სასწრაფოდ. ლუკას უცებ რაღაც აზრი მოუვიდა, ნამგალ-სათითეები ძირს დაყარა და აჩქარებული ნაბიჯით დაეშვა თავქვე, შინისაკენ. მი-ვაძახე: კაცო, სად მიდიხარ?! ყური არ მათხოვა, გზა განაგრძო. მაშინ მივხვდი, რომ საწერად მიდიოდა... დამტოვა მარტოკა ყანაში: მომკალიც, მკონავიც და ძნის ამგებელიც, სამივე საქ-მე უნდა შემესრულებინა მარტოკას. მეც ხომ ვერ მივატოვებ-დი ყანას. ბაღლები საქონელთან იყვნენ: ზოგი ინდაურებში და ზოგიც ხბორებთან და ცხვრებთან. არავინ არ მშველოდა. მარ-ტოკამა ვმკე იმ დღეს ყანა. საღამოთი ავკონე, ავაგე წერებად და დაბინდებისას, ხურჯინ-საგძლით, წყლის ჭურჭლით ჩემი და ვაჟას ნამგალ-სათითეებით შინ ჩამოვედი.

საქონელი მოერეკათ და შეეყარათ ბაკში, რომელიც ახლოს, ხევს გაღმა, იფნის ქვეშ გვექონდა შემოღობილი.

ლუკა მაგიდას მიჯდომოდა, რაღაცას წერდა. ჩემსკენ არ მოუხედავს, თითქოს ვერც კი იგრძნო ჩემი მისვლა.

ავიღე ტაგნები ფურების დასანველად და როცა გამოვდიოდი, დამიძახა: ქალო, ხინკალი მინდა, ერთი ხინკალი მოვხარშოთო! დაღლილი ვიყავი ძალიან და დამეზარა, მაგრამ სიტყვა არ შემიბრუნებია, რადგან ლუკას თქმა ჩემთვის კანონი იყო.

გავედი ბაკში, ფურები დავწველე, გამოვიტანე რძე, სარძევეში ჩავწურე და დაღამებულში შევუდექი ხინკლის კეთებას. შეშა არ გვქონდა, მოვიტანე, დავჭერი, ცეცხლი დავანთე, ხორცი დავკეპე და ცომის ზელას შევუდექი. ძილი თავს მართმევდა, ძლივს ვახვევდი ხინკალს. როგორც იქნა, მოვხარშე ხინკალი და შევუტანე ხონჩით.

ლუკას სახეზე ღიმილმა გადაურბინა. შევატყვევ ესიამოვნა, შემომხედა და მითხრა: ყოჩაღ, დედაკაცო!

ლუკა ცოტას სჭამდა, მხოლოდ მალ-მალე უყვარდა პურის ჭამა.

ერთხელ გუთანი დააყენა კვალში, ხარები არ გამოგვაშვებინა, წავიდა მაშინაც შინ სანერად. მე და ბალები ხარებს ვედექით. შენუხდნენ ხარები, ულლიდან იზიდებოდნენ. ვედექით ხარებს და ვატრიალებდით ისევ კვალში.

მკაცრი იყო ლუკა, დაჟინებით ვერაფერს გავუბედავდით. სანამ თვითონ არ გამოვიდა გუთანთან (მაშინ სახლის ახლოს, გაღმა ყორულში ვხნავდით), ჩვენ ვერ გავბედეთ დაძახება.

ლუკას ხასიათი გაგებულნი მქონდა, ამიტომ ხელს ვუნწყობდი, ვერ ვუბედავდი მეთქვა, ოჯახს შენახვა სჭირდება, გაისარჯე და ცოლ-შვილს რჩენა უნდა-მეთქი.

როგორც იყო, ერთხელ გაბრაზებულმა გავბედე და ვუთხარი: რა არის, კაცო, ცოლ-შვილი მშიერ-ტიტველი გყავს, შინ არაფერი გაქვს, ყველაფერი თავდება, შენ კი ზიხარ, ჯღაბნი და სულ ჯღაბნი-მეთქი. მოველოდი ძალიან გაჯავრდებოდა, ჩემი ნათქვამისა მევე შემეშინდა, მაგრამ საქმე სხვაგვარად დატრიალდა. გაიცინა და მითხრა: ეჰ, შე სანყალო, უსწავლელი ხარ და რა გითხრა, ნასწავლი რომ იყო მაგ სიტყვას არ გაპატიებდიო”. (37, 35).

უბედურება ის იყო, რომ ნასწავლ ხალხს ბევრს არ ესმოდა ვაჟასი, უსწავლელთაგან რა გასაკვირი იყო. ვერ იგებდნენ

ვერც მის შემოქმედებას, ვერც მის ქცევას. ვერ უგებდა თვით მეუღლეს კი, რომელსაც ასეთი ლექსი უძღვნა: „გზადაკარგულის ნუგემო, შენს სხივებს ვენაცვალეო!”

ვაჟას მეუღლე თამარი რომ იგონებს, პოემაზე მუშაობდა და არ მახსოვს რომელზეო – „სტუმარ-მასპინძელს” წერდა მაშინ ვაჟა. იმ ადგილას სადაც ალაზა გაუმხელს თემისაგან მოკვეთილ ჯოყოლას, შენი მეგობარი ზვიადაური დავიტირე სასაფლაოზეო, ვაჟამ აღარ იცოდა რა ეპასუხებინა ჯოყოლასათვის. უცხო კაცის დატირება ხომ ასევე მძიმე დანაშაული იყო თემის წინაშე, მითუმეტეს, თემის მოსისხლე მტრისა. რა უნდა ეპასუხა ჯოყოლას? კარგი გიქნიაო? ვერ იტყოდა – დანაშაული იყო! ეთქვა ცუდი გიქნიაო? – ვერც ამას ეტყოდა, რადგან თვითონაც თემის შეხედულების წინააღმდეგ წავიდა. ორი-სამი თვე უფიქრია ჯოყოლას პასუხზე, სამი თვე იტანჯებოდა. და, აი, ამდენი ტანჯვის შემდეგ, მკის დროს, უცებ იელვა თავში: „იტირე?! მაღლი გიქნია, მე რა გამგე ვარ მაგისა?” გაიხსნა სამი თვის შეგუბებული ნაფიქრალი და ნიაღვარივით დაიძრა, დაიძრა და წამოიღო თავქვე სულა-კურდღელაურთ ყანიდან. ველარ შეაკავა ველარც ცოლის ბუზლუნმა და ველარც იმან, რომ შეიძლებოდა ერთ ღამეში დაღუპულიყო საჩქარო სამკალი.

ლოდი რომ მოსცილდა გულიდან ვაჟას, შვებით ამოისუნთქა, გუნება დაეწმინდა, დამშვიდდა, გახალისდა, ხინკალიც მოუნდა და ჟიპიტაურის დაყოლებაც.

თამარმა სიბნელეში დაწველა ძროხები, რძე პინებზე დაწურა, დილანდელი რძე წანაღბა, შესაყველებლად დაადგა; ამა-სობაში ხინკლის გული დაკაფა, შეაზავა, მერე ცომი მოზილა, გუნდა მოჭრა და ქერქები დაათხელა, ხინკალი მოახვია, ჩაყარა, მოხარშა; მერე ხონჩაზე ამოიღო და ორთქლავარდნილი რომ მიართვა, მაშინლა შეწყვიტა წერა ვაჟამ და მეუღლეს შესცინა.

თამარმა ჩათვალა, რომ ეს იყო ღიმილი მისი კარგი მეუღლეობით კმაყოფილებისა. არა, ეს მართო ამით გამონწვეული ღიმილი არ იყო. ეს ღიმილი იყო შინაგანი მტანჯველი ცეცხლისაგან განთავისუფლებისა, რომელსაც შემოქმედი კაცის მეტი ვერავინ გაიგებს.

ეს ერთი და გამონაკლისი შემთხვევა არა ყოფილა. ასე სხვა დროსაც მოქცეულა ვაჟა. ისევ თამარის მოგონება: „საკვირველ

კაც იყო ის სანყალი... ერთხელ, აი, ზენ, კარისპირში გუთანი შევაბით. ხუთი-ექვსი კვალი კი გავავლიეთ, რომ ელდიანივით მაიფიქრა რაიმა.

–თამარო, – მითხრა, –ცოტახანს ეს ხარები შევასვენოთ, რალაცა მამაგონდა, შინ ჩავივლი და თუ დავიგვიანო, ხარებს სამხარ ამაუტანოდი ბარემ დასამხრდებიან კიდევცაო.

გაუშვა ხელი გუთანსა, ხელში სახრის დაჭერა იცოდა უღლის ხარებისადა, ის სახრეც დააგდო და ჩაეფარა შინასაკა. მე ხარებ გავაჩერე, კარგახანს ვიჯე გუთანთანა, კინალართ ერთ ტერფ ნინდა მოვქსოვე. რო აღარა-დ აღარ ამაიარა, ვთქვი ხარებს მაინც დავასამხრებო და ნავედ შინასაკა თივის ამოსატანადა. ეზოს რომ მიუახლოვდი, იქ ბაღლებს, ვახტანგსა და ბეკურთ ბაღს, ხბუები ჰყვანდა, იმათ მითხრეს: ვაჟამ გამოგვყარა აქ აღარ შემოხვიდეთ, ხბუებიც თამართან არეკეთო. სახლისაკ ნავედ და კარებზე ელქეშად მივედ, კარებში ნელ-ნელა შავინედე. ვაჟას ტახტთან „სტოლ“ მიედგა და თავჩალუნული რალაცას წერდა. ჯერ ვთქვი, ვკითხო – აღარ ამავივლიო? მაგრამ ვეღარ გაუბედე – ვაი თუ ეწყინოსო და ისევ ნელნელა უკან გამოვბრუნდი, საბძლიდან თივა გამოვიტანე და ხარებს ნაფულე. დავუყარე სამხარი ხარებს და ვუცდი იქნება ამაიაროსო, რომ ქვენაით ძახილ მამედინა:

– თამაროო! ხარებ გაუშვი ხვალ გამოვხნათო!

ყვეარს ვაბამდით. გაუშვი ხარები და სახლისაკ ნავედი. სახლთან რო მივედი, გამოვიდა შინიდანა და სიტყვა წინ დამახვედრა: არა უნდა-რა, თამარო, ხვალ გამოვხნათ რა ბევრი მანდ არი. დღეს მაგაზე ათჯერ მეტ კაი საქმე გავაკეთეო”. (ლევან ბოძაშვილი).

აი, ასეთი დაუოკებელი ჟინი და ცეცხლი იყო ის ძალა, რამაც ვაჟას ამდენი დაანერინა, ამდენი შეაქმნევინა. მაინც გასაოცარია, ამდენ წვრილმან საოჯახო საქმეში ჩაფლულმა კაცმა, რომელიც არც მთასა და არც ბარში არ აკლდებოდა არც ჭირსა და არც ლხინს, არც კერძოსა და არც საქვეყნო საქმეს და თანაც ახალგაზრდა გარდაიცვალა, როდის ან როგორ მოასწრო ამდენის დაწერა. უკვირთ ხოლმე პუშკინისა თუ ლერმონტოვისა: ახალგაზრდები დახოცეს და ამდენი რამე როდის მოასწრესო. მათი არ არის გასაკვირი, არისტოკრატები იყვნენ და წერა-კით-

ხვის მეტი საქმე არა ჰქონდათ-რა. მათი სასმელ-საჭმლისათვის ყმა-გლეხები, მოსამსახურენი ზრუნავდნენ. ვაჟას კი თვითონ უნდა ეღვარა ოფლი იმ ყმა-გლეხივითაც, პუშკინისათვის რომ შრომობდა და უნდა ეფიქრა და ეღვანა იმგვარადაც, როგორც პუშკინი იღწვოდა. ვაჟას ნაფიქრალ-ნააზრევი არაგვივით მოსჩქეფდა და მისი შებრკოლებაც კი არაფერს შეეძლო ისევე, როგორც ვერაფერი შეაჩერებს არაგვის დენას. ძლიერ ნიჭს ვერ უშლის ხელს ამქვეყნიური განამანია, მას ვერ შეაფერხებს მოუცლელობა, ოჯახური საქმე. და ეს უწყვეტი დენა იყო სათავე მისი სიუხვისა. ბევრზე ხელსაც კი არ აწერდა, ერთი პოემა „ივერიელი“ თიანეთიდან ჩარგლისაკენ მიმავალმა დაკარგა სადლაც.

ვაჟას თავის სამუშაო ოთახში, რომელიც თვითონ გადაიტინრა საცხოვრებელი სახლის ცალ მხარეს და ფანჯარაც თვითონ გამოჭრა, ხის ტახტზე თავისი მოკლული დათვის ტყავი ჰქონდა დაგებული, ზედ ვეფხვის გამოსახულებიანი ქერა ეფინა. მუშაობისაგან დაღლილი დროდადრო ამ ტახტზე წამოწვებოდა. დათვის ტყავი რომანტიკისთვის არ იყო – მაშინ რწყილი იყო ბევრი მთაში, კაცს რწყილი არ დააძინებდა თუ დათვის ტყავზე არ დაწვებოდა – დათვის ტყავს რწყილი არ ეკარებოდა. საპატივცემულო სტუმრის დაწვენაც ამიტომ იცოდნენ დათვის ტყავზე. როგორც ყველა მთიელის სახლი, ვაჟას სახლის უკანა კედელიც მიწაში იყო, ნესტიანი, წყალი ჟონავდა. იმ კედელთან ედგა ტახტი და იმ ნესტიმაც შეუწყო ხელი მის გაციებასა და გვერდში წყლის ჩადგომას, პლევრიტს. ახლა გვერდებსაც ეტყობა ყეყავდა ფიცრები, დიდი ღრიჭოები გასჩენოდა ტახტს. ავადმყოფობის დროს, ბოლო ნელს თვითონ დაუწყია ტახტის შეკეთება, აკანკალებული ხელებით ხერხავდა თურმე ფიცრებს. ამ სურათს ჩუმად უთვალთვალებდა მისი საყვარელი ქალა გულქანი და სიბრალულისაგან ცრემლად იღვრებოდა.

ბუხრის თავზე ირმის რქები ჰქონდა მიკრული. რქის ტოტებზე ეკიდა ფარ-ხმალი და თოფები: დათვზე სანადირო საუკეთესო თოფები ჰქონდა ვაჟას – „ბერდენკა“ და „აინალი“. კარს უკან კუთხეში კი ოთარშენში ყოფნის დროს ნაყიდი ორლულიანი ჰქონდა მიყუდებული ღამე შემოტევილებული ნადირისა თუ ქორისათვის გამზადებული. ირმის რქების გვერდით კედელზე ეკიდა

მამა-პაპური „მჭვარტლიანი ფანდური“, რომელსაც მალ-მალ ჩამოიღებდა ხოლმე წერის დროს და „თითს აჩქამებდა ბერასა“; წყნარი ღიღინით ააყოლებდა ხმას, მერე ისევ წამოხტებოდა და წერას აგრძელებდა. როგორც პიანინოსა თუ როიალზე წერენ მუსიკას, ისე წერდა ფანდურზე ლექსებს. ამიტომ არის, ალბათ, რომ მისი გმირები ხშირად უკრავენ ფანდურს და მის ლექსებსაც ბევრს „სიმღერა“ აქვს სათაურად.

თუმცა ისიც აღსანიშნავია, რომ ვაჟასათვის „სიმღერას“ კიდევ სხვა მნიშვნელობაც ჰქონდა. მისი „... ყველა „სიმღერა“ უსაშველო სევდითაა შექმნილი. ნუთისოფლის ამაოება, შავი ვარამით გადანისლული დღეები და საკუთარი პიროვნების არარაობის უკიდურესი შეგრძნება წარმოადგენს ვაჟას სიმღერის ძირითად ჰანგს... „სიმღერას“ ვაჟა მხოლოდ იმ ლექსებს უწოდებს, რომლებშიც საკუთარ დარდს, ტანჯვას, გაცამტვერებას, არარაობას გამოხატავს. ამიტომ ითხოვს თამამად ტირილი არ დამიშალოთო...

**„მე რომ ტირილი მენადოს,
თქვენ ვის რა გინდათ ნეტარა“.**

... ვაჟას სიდიადე იმაშიც გამოიხატება, რომ დარდიანსაც სიმღერა შეუძლია. მისთვის ვარამი უბედურების სანყისი როდია. უგრძობი და გალალებელი ადამიანი სძულდა ვაჟას. დარდი და სევდა მისთვის ადამიანობის ყველაზე დიდი საზომი იყო. მისი ბედნიერების სანყისიც დარდის სიბრძნეშია ჩასახლებული:

**„ნუ დამასვენებ ნურასდროს,
მამყოფე შეძრწუნებული,
მხოლოდ მაშინ ვარ ბედნიერ,
როცა ვარ შეწუნებული“.** (12)

მგზავრობის დროსაც წერდა ვაჟა, სტუმრად ყოფნის დროსაც. თბილისში თავის ძმა სანდროსთან ერთი ოთახი ჰქონდა ამოჩემებული. იქ სადილის შემდეგ ცოტას წაიძინებდა, მერე მაგიდას მიუჯდებოდა, დაწერილს მეორე დღეს სანდროს უკით-

ხავდა: „– აბა, ყური დაუგდე შენ ძმასა, რა დავწერე, ერთი წაგიკითხო!“ – ეტყოდა ხოლმე.

ვაჟას არ უყვარდა თუ ვინმე შეესწრებოდა მისი შემოქმედებითი წვის მომენტს. თუ ვინმე ამ პროცესიდან გამოიყვანდა, საშინლად ღიზიანდებოდა. მითუმეტეს საქვეყნოდ ამაზე არც არაფერს იტყოდა, ალბათ, რომ არა იპ. ვართაგავას კრიტიკული წერილი, რომლის პასუხშიც ვაჟამ გამოამჟღავნა თავისი შემოქმედებითი მეთოდის ზოგიერთი მხარე. გათქვა ზოგიერთი საიდუმლო, რაც არ არის ინტერესმოკლებული არც მკვლევართა და არც ჩვეულებრივ მკითხველთა მხრიდან. შემოქმედებითი ქმნადობის ამბავი ისევე გამჟღავნებული აქვს წერილებში „როდომო სუა“ და „ფიქრები „ვეფხისტყაოსნის“ შესახებ“. აზრი ერთია, ვაჟას მუზა ისევე ლაღად, თავისუფლად მოედინებოდა, როგორც მთის ანკარა წყარო. მას აღარ სჭირდებოდა დაწმენდა, დალექვა. ახალი იმდენი ჰქონდა დასანერი, ძველების შეკრეჭა-შელამაზებისათვის აღარ ეცალა. იპ. ვართაგავასადმი გაცემულ პასუხში ამიტომ წერდა: „მას ძალიან გულით უნდა გაიგოს. როგორი წესი მაქვს წერისა – ერთბაშად ვწერ თუ, რამდენჯერმე გადავწერ ერთხელ დაწერილს, რაც ხშირად შესწორებას მოსდევს. უნდა მოგახსენოთ, ძალიან დიდ ნაკლადაც რომ ჩამეთვალოს, არც ერთი ჩემი ნაწარმოები ერთხელის მეტად არ გადამიწერია შავად დაწერილიდან და ნაკლებად მქონია შემთხვევა დაწერილი ადგილები შემესწორებინოს... წერის დროს ზოგიერთ ნაწარმოებს რამდენიმე ხნით შეუყენებივარ, ცოტა რამეს, ერთ ორ ტაეპს, ზოგისას დასასრულს“. (15, 364).

ოჯახის წევრები, ახლობლები გადმოგვცემენ, რომ ვაჟა ყველაფერზე ლექსსა წერდაო. რაც გინდა მომხდარიყო, მეზობელი რომ მეზობელს წაეჩხუბებოდა, ვაჟა მაშინვე სანერ-კალამს ეცემოდაო. იმათ არ იცოდნენ რას წერდა ვაჟა და ამიტომ ეგონათ ამ რალაცა ყოფით ამბებს ლექსავდა, როგორც ეს ხალხშია მიღებული. სინამდვილეში კი ვაჟას სწორედ ასეთი უბრალო, ყოფითი ამბები აძლევდა ბიძგს, აზრებს უჩენდა, რაც სრულიად სხვაგვარ, ამაღლებულსა და განზოგადებულ გამოხატულებას პოულობდა. ყველა მოვლენა, ყველა საგანი ვაჟას არსებაში თავისებურ პრიზმაში გადატყდებოდა. სულითხორცამდე პოეტი ამ სამყაროს არიდებდა თვალს და სადღაც, შორეულ სივრცეში,

ლამაზი ანარეკლების სამყაროს ხედავდა. ხანდახან უმნიშვნელო წვრილმანში ისეთ მნიშვნელოვან რაღაცას შენიშნავდა და აღმოაჩენდა, რომ თვითონაც ვერ წარმოიდგენდა, თვითონაც არ მოელოდა, ყოველ წუთს შემოქმედებით წვას განიცდიდა მისი პოეტური ქურა, ქურა კი არა ბრძმედი გამუდმებით აღნობდა ცხოვრებისეულ ჯვართს და ქმნიდა „ხელოვნურ“ მარგალიტებს.

...მოუკვდა საყვარელი მეუღლე და ამ ამბავთან დაკავშირებით დაწერა ლექსი „იას უთხარით ტურფასა“. პოეტურად არის დანახული საყვარელი არსება – მომცრო ტანისა და ძალზე მოხდენილი, ლამაზი, სათნო, კეთილი, ნაზი ქალი, ასევე თავის ყველაზე საყვარელ ყვავილს, იას შეადარა. კეკეს სახით იას ხედავდა. რომ არ იყოს გადმოცემა – ეს ლექსი კეკეს გარდაცვალებას მიუძღვნაო, ალბათ, მართლა ყვავილისადმი, იისადმი, მიძღვნილ ლექსად ჩავთვლიდით და სხვა რამის ძებნასაც არ დავინწყებდით, იმდენად განყენებულია. მასაც სათაურის ქვეშ „სიმღერა“ უწერია.

...ცხენი მოუკვდა და ამანაც შესანიშნავი ლექსის დაწერის ბიძგი მისცა.

ვაჟას ცხენი ძალიან უყვარდა. სადმე სტუმრად მისული, როგორც გინდა დასველებული ან გათოშილი ყოფილიყო, შინ არ შევიდოდა სანამ ცხენს კარგად არ დააბინავებინებდა მასპინძელს.

ვახტანგ რაზიკაშვილი წერს: „მამას ყოველთვის კარგი ცხენი ჰყოლია. ცუდ, ჯაგლაგ ცხენებს შინ არ გააჩერებდა. მე „ნიკორი“ მახსოვს. შავი, იორლა ცხენი, მხოლოდ ჩემს ხსოვნაში უკვე ბებერი იყო, იმდენად ბებერი, რომ ზამთარში გომურის წინ გამოსული დაეცა და ველარ ადგა. მამამ ბევრი უტრიალა, მაგრამ ველარაფერი უშველა. მამას ცრემლი მოერია იმ ცხენის სიკვდილზე. შეახვია ფარდაგში და ისე დამარხა“.

ეს ამბავი ნიშანდობლივია. ერთი ცხენი „ბედნიერმა“ რომ დაუავადა, ადრე მოკვდა, ისიც დამარხა და იმ შთაბეჭდილებით დაწერა ლექსი „იმედი რაზიკაული“. თავისი განცდები თავის გმირ წინაპარს გადააბრალა. მის მთებზე მოელვარე თეთრი ცხენის სიკვდილი წარმოიდგინა და უიმცხენოდ დარჩენილი გმირი. ლექსის შინაარსი ასეთია: გმირი გულჯავრიანია, დაღ-

ვრემილია, მხოლოდ ოხრავს. კითხულობენ – მტერს ხომ არ დაუჯაბნიაო? არაო. შვილი ხომ არ მოჰკვდომიაო? არაო. მაშ რაღაზე ტირისო?

„– შვილს ვინ ახსენებს ან ცოლსა? მეტი დარდი აქვს მაზედა: ცხენი მაუკვდა ლურჯაი, აღარა ჯდება სხვაზედა... ცხენს გაუთხარა სამარე, დამარხა თავის ხელითა, დაულბო ლურჯას ლოგინი, მამსქდარის ცხარის ცრემლითა... ცხენს გლოვობს რაზიკაული იმიტომ არის ავადა!“

... სრულიად უბრალო შემთხვევას დაუნერინებია ერთ-ერთი უბრწყინვალესი ლექსი „ჩივილი ხმლისა“, უფრო სწორედ, ბიძგი მიუცია დასაწერიანებლად, რადგან გმირ წინაპრებზე, მათ დიდ მამულიშვილურ საქმეებზე, მათ უანგარო თავდადებაზე ფიქრი ყოველთვის თან სდევდა ვაჟას.

მისა მთიბელაშვილი, ვაჟას საყვარელი მონაფე, შემდგომში ფშავის მღვდელი, იგონებს: „ბიძაჩემი ლუკა უსაქმოდ არასოდეს მინახავს, როდესაც უნდა ჩამომეგლო იმის კარზე, ყოველთვის რაღაც საქმით იყო გართული.

ერთხელ გზად ჩამოვიარე ვაჟას სახლთან, თორმეტ-ცამეტი წლისა თუ ვიქნებოდი მაშინ, ეზოში ვაჟა ლასტს ქსოვდა.

– გამარჯობა ბიძავ-მეთქი! – შევუძახე. ლუკამ თავი ასწია, მიცნო და დამიძახა:

– აბა, ძმისწულო. აქეთ გადმოდი, წნელი მომიჭერი, საცაა ზამთარი კარზე მომადგება, მე კი გომურისათვის კარები ჯერაც არ გამიკეთებია, მოდი, დამეხმარეო.

ლობზე გადავხტი, სწრაფად მასთან გავჩნდი.

ლუკამ მომიწონა სიმარდე, თავზე ხელი გადაამისვა, ხმალი გამომიწონდა და მითხრა:

– აი, ამით მოსჭერო!

– ბიძაჩემო, ამით როგორ მოვჭრი, ხმალი წელშია გადატეხილი-მეთქი. ლუკამ გაიცინა, თვალეში ჩამაცქერდა:

– ეგ ხმალი სამშობლოს იცავდა. მაგ წელში გადაწყვეტილმა და გადაქანცულმა ხმალმა თავისი ვალი მოიხადა, შრომასა და ჯაფას წელში გაუნყვეტია, ახლა მაგისი ნახევარი შეგვრჩა და მაგისი პატივისცემა გვმართებსო, – მითხრა ვაჟამ.

ჩამაფიქრა ვაჟას სიტყვებმა. ორი დღის შემდეგ, როცა მას-თან სახლში მივედი, შესანიშნავი ლექსი წამიკითხა „დაჟანგე-ბულხარ, გორდაო“, რომელიც ჩემთან ლაპარაკის შემდეგ დაუ-წერია” (49, 23-24).

...ლექსი „არწივი” თვითონ ვაჟასაც ძალიან ჰყვარებია და ხშირად ამბობდა ხოლმე, როცა ლექსის თქმასა სთხოვდნენ სუფრასთანა თუ სცენაზე. ამ ლექსში, რა თქმა უნდა, სამშობ-ლო, საქართველო, იგულისხმება, ათასი ჯურის მტრებისაგან ნაჯიჯგნი და განანამები. მართლაც, საოცარი სომბოლიკაა: დაჭრილი არწივი და ყვავ-ყორნები!

ამ ლექსის შექმნისთვისაც, როგორც გადმოგვცემენ, პირად ინციდენტს მიუცია ბიძგი. ერთნი ამტკიცებენ, რომ შექეიფი-ანებული ვაჟა, ოცდაექვსი წლის ჯან-ღონით სავსე, ძლიერი, შეუპოვარი, მართლაც, არწივის მსგავსი, მგზავრ ხევსურებს რატომღაც მოშარებია ჩარგლის კარს, ხევსურებს უცემიათ და ამაზე დაუწერიაო.

მეორენი ამტკიცებენ, ნადირობის დროს თავად დაუჭრია არწივი და მისი წვალებისათვის რომ უცქერია, ძლიერ შებრა-ლებიაო.

ვაჟას ქალიშვილი თამარი კი გადმოგვცემს, როცა მეტყევე ხიზანიშვილმა ხელშეკრული ჩაიყვანა თიანეთში, იქიდან დაბ-რუნებულმა დაწერაო.

იმისი დადგენა, თუ რომელი ამათგანი შეეფერება სინამდვი-ლეს, ძნელია. ერთი კი აშკარაა, რომ, მართლაც პირად ინცი-დენტს მიუცია ბიძგი ამ შედეგის შესაქმნელად.

და ვინ მოთვლის, რამდენი ასეთი შემთხვევაა ვაჟასთან. „გოგოთურ და აფშინაც” ხომ პირადმა ინციდენტმა დაანერი-ნა – კანალხვეველ გიორგი ხორნაულთან მჟავენწყლის თაობაზე შეხლა-შემოხლამ.

თუნდაც „გველისმჭამელი”. აქ ხომ მთელი დიალოგი ქმარსა და ცოლს, ანუ მინდიასა და მზიას შორის, ზუსტი ასლია ვაჟა-სი და მისი მეუღლის, თამარის, დავისა. ვაჟა ქვეყნის დიდი სამ-სახურისთვის იღვწოდა, ცოლი კი სულ იმას ეჯიჯღინებოდა, ოჯახს შენახვა უნდა, ჯღაბნას მოეშვიო.

ყველაფერს რომ ცხოვრებიდან იღებდა, სინამდვილიდან და იმას უდებდა საფუძვლად თავის ნაფიქრალს, ამიტომაც არის

მისი შემოქმედება ასე ახლოს ხალხის გულთან.

ასეთი იყო ვაჟა და ასეთები იყვნენ მისი დიდი წინამორბე-დები: რუსთაველი, გურამიშვილი. ისინიც იმიტომ იყვნენ საყვა-რელნი ქართველი ხალხისათვის, რომ ხალხის წიაღიდან იყვნენ ამოზრდილნი. ყველაზე დიდი მწერლები ყველაზე მეტად გასა-გებნი იყვნენ ხალხისათვის.

გარდა ამისა, რუსთაველსა და ვაჟას შორის რაღაც საერ-თო შენიშნა ჩვენი მწერლობის ბურჯმა, უდიდესმა მოაზროვნემ ილია ჭავჭავაძემ, როცა ამბობდა, „რუსთაველის შემდეგ ასეთი პოეტი ჩვენ არა გვყოლიაო”. ილიამ, ღრმად ჩახედულმა კაცმა, რაღაცა ისეთი დაინახა, რასაც სხვანი ვერა ხედავდნენ. მაინც რა არის ეს საერთო? გარდა ზოგადსაკაცობრიო იდეებისა და პრობლემებისა, უდიდესი ჰუმანიზმისა და ოპტიმიზმისა, ვაჟას რუსთაველთან ანათესავებს პოეტური ხატვის უმაღლესი ხე-ლოვნება.

არც რუსთაველი და არც ვაჟა არ იძლევიან პერსონაჟთა პორტრეტულ აღწერას. არ გაცნობენ, რანაირი თვალები, რა-ნაირი ცხვირი, რანაირი უღვაშები და ა. შ. აქვთ მათ გმირებს, ისინი ასე არ აქუცმაცებენ თავიანთ იდეალურ გმირებს: ავთან-დილს, ტარიელს, ნესტანს, თინათინს, ალუდას, ჯოყოლას, ალა-ზას, ლელას და სხვა. ამ და სხვა მათი მსგავსი გმირების დახა-სიათებას ისინი რაიმე ერთი მოქნეული ფრაზით, „გენიოსური კალმის მოსმით”, როგორც ბრძანებდა დიდი ილია, აღწევდნენ გაუგონარ შთამბეჭდაობას. მაგალითად, როცა შოთა რუსთავე-ლი იტყვის „ავთანდილ იყო... საროსა მჯობი, ნაზარდი მსგავსი მზისა და მთვარისაო”, – უცებ თვალწინ წარმოგვიდგება კვიპა-როსზე უფრო ლამაზად აშოლტილი ულამაზესი ვაჟკაცი. აქ უკ-ვე ზედმეტია რაიმე დეტალური აღწერა. ერთი და ორი სიტყვით მთლიანობაშია მოცემული სრული სურათი.

ზუსტად ასევე ხატავს ვაჟა თავს პერსონაჟებს. ერთ-ერთი თავისი საყვარელი პერსონაჟის – ალუდა ქეთელაურის მიმართ იტყვის „კაცია დავლათიანო” და თვალწინ წარმოგვიდგება ღმერთთან წილნაყარი, დინჯი ვაჟკაცი, წარმოგვიდგება თავისი ხასიათითაც და გარეგნობითაც.

ამ გარეგნულ დაუკონკრეტებულობასთან ერთად ვაჟას გმი-რები შინაგანადაც არ არიან კონკრეტულნი. მიუხედავად დიდი

სოციალური ტკივილები, მისი გმირები არ არიან სოციალურნი. „ისინი არ არიან ჩვენთვის ნაცნობი კონკრეტული ეპოქისა და საზოგადოებრივი ფენის შეხედულებათა მატარებელი, ეს კი მათ თითქოს დროისა და სივრცის გარეშე აყენებთ და მონუმენტურ ზოგადადამიანურ ხასიათებს ანიჭებთ“.

(34, 90).

ტარიელი ამბობს:

„მზესა მე ვჯობდი შვენებით, ვით ბინდსა ჟამი დილისა, იტყოდეს ჩემნი მნახავნი: „მსგავსია ედემს ზრდილისა“.

ამ შედარებათა შედეგად წარმოგვესახება რაღაცა არაამქვეყნიური სილამაზის, ჯადოსნური ხელით შექმნილი საოცრება. და ასეა ყველა იდეალური პერსონაჟი. ტარიელი, ავთანდილი, ფრიდონი – მზესთან და მთვარესთან არიან შედარებულნი. ერთნაირ ეპითეტებს, ერთნაირ საღებავებს ხმარობს სამივეს მიმართ, მაგრამ საოცარი ის არის, რომ სამივე განსხვავებულ პიროვნებად წარმოგვიდგება. რუსთაველი ამას რაღაცნაირი უაღრესად დახვეწილი ოსტატობის, დიდი ტალანტის წყალობით აღწევს. ასევე არიან ვაჟას პერსონაჟებიც. ვაჟა ზვიადაურის შესახებ იტყვის: „ფშავ-ხევსურეთის ფარხმალი, ცით ჩამოსული სვეტადაო“ და წარმოგვიდგება ასევე ღვთაებრივი წარმოშობის იდეალური ვაჟკაცი. ასე ერთი შტრიხით თავის გმირს ისეთი საოცარი სიცხადით, ისე შთამბეჭდავი ფერებით წარმოგვიდგენს ვაჟა, რომ მათი მეხსიერებიდან ამოშლა შეუძლებელია: „ბერი ლუხუმი“, „ხოშარეული ხარია“, ლელა „ქალი ჰგავს სამოთხის ყვავილს“ და სხვა.

მწერლური ხელოვნების ეს გენიალური, უმაღლესი მეთოდი ახსნილი და გაანალიზებული აქვს XVIII საუკუნის უდიდეს გერმანელ მოაზროვნესა და განმანათლებელს ლესინგს. ამიტომაც იყო, რომ ვაჟა მის „ლაოკოონს“ ხელიდან არ უშვებდა თურმე, როგორც ზემოთაც აღვნიშნეთ, საგზალთან ერთად დაატარებდა ნადირობის დროსაც კი. ლესინგთან ხედავდა თავისი ნააზრევის დადასტურებას და ამიტომ მოსწონდა ასე ძლიერ. ლესინგი იქ წერს: „ის პოეტი, ვინც ცდილობს სილამაზის შემადგენელი ელემენტები თანმიმდევრულად აჩვენოს, მან, რა თქმა უნდა,

იმედი არ უნდა იქონიოს, რომ ამით შეძლებს სხეულის მთლიანი სილამაზის ჩვენებას. მან უნდა იცოდეს, რომ ეს ნაწილები, გამონახულნი დროით თანმიმდევრობით, ვერავითარ შემთხვევაში ვერ მოახდენენ იმ შთაბეჭდილებას, როგორსაც ახდენენ ერთდროულობაში, ერთიანობაში; რომ მათი ჩამოთვლის შემდეგ ჩვენი შთაბეჭდილება ვერ შესძლებს სილამაზის ელემენტების თავმოყრას მწყობრი სახით; რომ მიზნად დასახვა იმისა, თუ როგორ ეფექტს მოახდენს ასეთი და ასეთი პირი, ცხვირი, ასეთი და ასეთი თვალები – ერთად შეერთებულნი აღემატებიან ადამიანის წარმოდგენას და რომ ეს შესაძლებელია მხოლოდ მაშინ, როცა მსგავსი ნაწილები შერწყმულია ბუნებაში ან ხელოვნების ნაწარმოებში. ამ შემთხვევაში ჰომეროსი სანიმუშოთა შორის სანიმუშოა. მაგალითად, ის ამბობს: ნირეი იყო უმშვენიერესი, აქილევსი უფრო მეტად მშვენიერი, ხოლო ელენე – ღვთაებრივად ლამაზი. მაგრამ ის არსად არ აღწერს სილამაზეს წვრილმანებში. ეს მაშინ, როცა მთელი პოემა ელენეს სიყვარულზეა აგებული. ამ შემთხვევაში რას გაიფურჩქნებოდა ახალი თაობის პოეტი!“ (27, 233).

ე. ი. ვაჟაც ისევე სურათებით აზროვნებდა, სურათებს ხედავდა თავისი შემოქმედებითი წვის ჟამს და იმ სურათებს აღწერდა. ამ თეორიულ ნააზრევს გვიდასტურებს თვით ვაჟას ნათქვამი, რომელიც ივ. გომელაურის მოგონებებშია შემონახული. ის წერს: „მე პატარაობიდანვე მაინტერესებდა საკითხი იმის შესახებ, თუ როგორა ხდება პოეტის შემოქმედება: ისე, როგორც სიტყვიერების თეორიაში სწერია, თუ სხვანაირად.

ჩემ კითხვაზე ვაჟა ჯერ ცოტა ჩაფიქრდა, შუბლი შეიჭმუხნა და შემდეგ დაბეჯითებით მითხრა:

სხვებისა არ ვიცი, მაგრამ მე კი როცა ვწერ, სურათები მომდის თავში და მე მხოლოდ ვცდილობ, რომ ეს სურათები კარგად გამოვიყენო... როცა დავწერ და ნავიკითხავ, მერე მეც მივხვდები, რა აზრიც არის გატარებული.

ეს ახსნა-განმარტება ძალიან მომეწონა, ქვეაში დამიჯდა, მითუმეტეს, რომ ემთხვეოდა რუსეთის დიდი კრიტიკოსის ბ. ბელინსკის აზრს: *Поэт мыслит образами*“ (52, 100).

პოეტური ხედვისა და მეთოდების თურმე რა საოცარი მსგავსებაა გენიოსებს შორის, როგორა ჰგვანან ისინი ერთმანეთს.

მათ ხომ ერთურთისაგან დამოუკიდებლად, ქვეშეცნეულად გააკეთეს აბსოლუტურად ერთი და იგივე. მათ აერთიანებთ უმაღლესი პოეტური ხედვა და ალლო.

აი, ეს არის ის, რაც ლესინგმა, ევროპის აზროვნებაში რევოლუციის მომხდენმა, შენიშნა ჰომეროსის „ილიადასა“ და „ოდისეაში“. ეს არის ის, რასაც ილია ჭავჭავაძე, რევოლუციის მომხდენი ქართულ აზროვნებაში, ხედავდა რუსთაველისა და ვაჟაფშაველას შემოქმედებაში. რუსთაველთან რომ შენიშნა ილიას, ეს არ იყო გასაკვირი. გასაკვირი ის იყო, რომ ვაჟას სამწერლო ასპარეზზე გამოსვლისთანავე შენიშნა მან ის სიღრმისეული და ქვეყანას განუცხადა, მაგრამ ვინ იყო მისი ნააზრევის გამგები. მოაზროვნეთა ნილაბაფარებულნი ჩუმ-ჩუმად ქირქილებდნენ ვაჟას შემოქმედებაზეც და ილიას ნათქვამზეც.

ლესინგის ნააზრევი მარტო პერსონაჟების ხატვის მეთოდს არ ემთხვევა ვაჟასთან. დამთხვევაა მოვლენათა ხატვაშიც.

ლესინგი ერთმანეთს უდარებს სკულპტურას, მხატვრობას და პოეზიას და დაასკვნის, რომ, მართალია, სამივე ერთ საწყისზეა აღმოცენებული, სამივე ერთ მიზანს ემსახურება, მაგრამ მათი გაიგივება არ შეიძლება. მხატვარს სურათზე დეტალურად გადააქვს დასახატი ობიექტი, ეს მისთვის აუცილებელია, მაგრამ პოეზიისათვის ეს აუცილებელი არ არის, პირიქით, პოეზიაში დანერვილებითი აღწერა უსუსურობაა, უნიჭობაა. ნიჭიერი პოეტი რაიმე მთავარ დეტალზე ხაზგასმით წარმოგვიდგენს სრულ ხატს რაიმე მოვლენისა, მას მთელი სიღრმით განგვაცდევინებს.

ლესინგის ნააზრევს აქაც საოცრად ანხორციელებს ვაჟას პოეტური ალლო. მაგალითად, თემისაგან მოკვეთილი მარტოდ დარჩენილი ალაზა როდესაც ჯოყოლას დამარხავს კლდის თავზე და „ლაშდარენილ, სასტიკ“ მთის მდინარეში გადაეშვება, ვაჟა სულ ორიოდ სიტყვით ამბობს: „ნაილო წყალმა ალაზა, ლამსა და ქვიშას შაჰრია“... აქ რიგითი პოეტი დიდ აღწერას მოგვცემდა იმისას, თუ როგორ აქცია მდინარემ ნაფლეთებად, ნაქუც-ნაქუც ალაზა. ვაჟა კი ერთი სიტყვით გვიჩვენებს, რომ უმცირეს ნაწილებად ქცეული ალაზა ლამსა და ქვიშაში აირია.

გარდა პოეტური მეთოდისა, ლესინგის „ლაოკოონში“ ვაჟა ბევრ ისეთ ნააზრევს პოულობდა, რაც მის სულსა და გულს ეხ-

მიანებოდა. აი, თუნდაც ეს ადგილი: „კანონმდებლობას არ უნდა ჰქონდეს არაფითარი უფლება მეცნიერებაზე მბრძანებლობისა, რადგან მისი საბოლოო მიზანი ჭაშმარიტებაა. ჭეშმარიტება – ადამიანის სულის მოთხოვნილებაა და ოდნავი შეზღუდვაც კი ამ მოთხოვნილების დაკმაყოფილებისა, ტირანიაა“.

მეფის რუსეთში მკაცრი ცენზურა იყო დანესებული, განსაკუთრებით გაფაციცებულნი იყვნენ დამონებულ პერიფერიებში, სადაც თავისუფალი აზრის გაფაჩუნებაზეც კი ელეთმელეთი მოსდიოდათ. ასეთთა მიმართ დიდ სიმკაცრეს იჩენდნენ. ვაჟამაც ბევრჯერ იწვინა ეს სიმწარე. ამიტომ იქ, ჩარგალშიც, შემოქმედებითი პროცესის დროს, ცენზურის შავი აჩრდილი ყოველთვის თავს დასტრიალებდა, ბოჭავდა, ბორკავდა, მიუხედავად იმისა, რომ ვაჟა ლაჩრულად არ ემონებოდა მბრძანებლობას, მაინც იძულებული იყო ანგარიში გაენია მისთვის, იძულებული იყო მოეთოკა, მოეზომა თავისი სათქმელი, ზოგი რამ კი საერთოდ არ ეთქვა. შემდეგში, ერთ საპოლემიკო წერილში წერდა: „ბევრს ჩემს ნაწერებს ცენზურის თვალის ასახვევად განგებ ვაწერდი „ძველისძველი ამბავიო“, „ზღაპარიო“ „თქმულებანიო“, იმ მოსაზრებით, რომ დაბეჭდვის დროს დაბრკოლება არა ჰქონიყო“.

ცენზურამ იმთავითვე თვალი დაადგა ვაჟას ნაწერებს. მისი ნამდვილი პოეზიის საწყისი ლექსი „ამირანი“ 1885 წელს უნდა დაბეჭდილიყო ჟურნალ „თეატრში“, მაგრამ ცენზურამ აკრძალა და რამდენიმე თვით გადაიდო მისი დაბეჭდვა.

მეორე წელს „ივერიაში“ იბეჭდებოდა ლექსი „სიმღერა“ – „ერთხელც იქნება მოვკვდები, მივებარები მინასა“... მაგრამ ცენზორმა ლუკა ისარლოვმა, იმის შიშით, ეგ ზარხოსი სამსახურიდან გამაგდებსო, სიტყვა „ერთხელც“ შეცვალა „როცა“-თი. ასეთი გადაკეთების, შეცვლის შემდეგ დაიბეჭდა „ხმელი წიფელი“, „მთის წყარო“, „სოფლის სურათები“ და სხვა.

იმედას მხრიდან „ნათესავები“

ვაჟა თბილისში ჩვეულებრივ ორჯერ ჩამოდიოდა – გაზაფხულზე სააღდგომოდ და მერე საშობაო-საახალწლოდ. არა იმიტომ, რომ თავისი თბილისში გამოჩენა საზეიმო დღეებისათვის დაეკავშირებინა. ალბათ უფრო იმიტომ, რომ აღდგომის შემდეგ საგლენო საქმეები იწყებოდა – ხვნა-თესვა, მკა, თიბვა, ჭირნახულის დაბინავება, თივის მოზიდვა შეშა და – საშობაოდლა შესძლებდა ამოსუნთქვას. ჩამოვიდოდა თბილისში და ჩამოუვლიდა რედაქციებს, მეგობრებს. მეგობრები კი, ისეთნი, ვისთანაც გულს გადაშლიდა, ღამის გასათევად დარჩებოდა, ჩანს, ცოტა ჰყავდა და მკაცრად შერჩეული. სანამ უმცროსი ძმა სანდრო თბილისელი გახდებოდა, მანამდე ასეთ მეგობრებთან დგებოდა ბინად. შიო მღვიმელის გარდა, რომელსაც სიყვარულით „პატარა დიდკაცს“ ეძახდა (ტანად პატარაა მაგრამ მწერალი დიდიყო), ერთ-ერთი ასეთი გულითადი მეგობარი ჰყოლია იოსებ იმედაშვილი, თვალსაჩინო მოღვაწე, დიდი მამულიშვილი, შეუპოვარი ვაჟკაცი, ილია ჭავჭავაძის საქმის ერთგული. სულიერმა ერთიანობამ, ურთიერთ სიმპათიამ განსაზღვრა, როგორც ჩანს, მათი მეგობრობა. თუ რამ განაპირობა ვაჟას მეგობრობა იოსებ იმედაშვილთან და მის ოჯახთან, კარგად ჩანს მისი შვილის, ცნობილი მკვლევრის პროფ. გაიოზ იმედაშვილის, წიგნიდან „იოსებ იმედაშვილის ცხოვრების გზა“. მოვიყვან ვრცელ ამონაწერს, რადგან ის ტიპურია და კარგად დაგვანახებს არა მხოლოდ კონკრეტულ შემთხვევას, არამედ იმას, თუ ვაჟა რა პრინციპით ირჩევდა მეგობრებს, ვისი ნახვა უხაროდა თბილისში ჩამოსულს და ვისი – არა.

ჯერ თვითონ იოსებ იმედაშვილი ვინ იყო:

„როგორც ქალაქში ჩამოსული გლეხი, იოსებ იმედაშვილი, მოქალაქეობრივად მუშათა წრეებში ჩამოყალიბდა და პრესაში თუ წიგნებზე მუშაობამ ინტელიგენტად რომ აქცია, შინაგანი სწრაფებით მაინც გლეხთა წარმომადგენლად თვლიდა თავს. ალბათ ამიტომაც მისთვის მთავარი იყო გლეხობისა და მუშების ეროვნული გათვითცნობიერება, მათში ცოდნა-განათლების შეტანა. მისი გულისყური მარად უბრალო ხალხის ჭირ-ვა-

რამს დასტრიალებდა და არასოდეს არ წყვეტდა პრაქტიკულ ურთიერთობას ხალხთან, თავის მოღვაწეობის დასასრულამდე ყოველდღიური ცხოვრების ინტერესებით გლენებთან და მუშებთან იყო დაკავშირებული.

ჩვენს საზოგადოებრივ ცხოვრებაში არ იყო არცერთი რაიმე კულტურული ღონისძიება თუ საჭირობო საკითხის გადანიშნულება, რომ იოსებ იმედაშვილს მხურვალე მონაწილეობა არ მიეღოს და კეთილი კვალი არ დაეტოვებინოს. თუკი საქმე საზოგადო ინტერესს ეხებოდა, მისთვის სიძნელე არ არსებობდა, არაფერს უშინდებოდა და დასახულ მიზანს მაინც აღწევდა, ყოველთვის გამარჯვების იმედით იყო სავსე, სხვებსაც აიძულებდა და რაც არ უნდა ეკეთებინა, არასოდეს არ ცდილობდა პირად სარგებლობასა და გამოჩენა-გამორჩენას. ეს იყო მისი საზოგადოებრივი მოღვაწეობის ურყევი პირობა, რასაც სხვებისაგანაც მოითხოვდა.

თანამედროვენი გაოცებულნი იყვნენ მისი დაუცხრომელი ენერგიით, შრომის უნართა და უანგარო მოღვაწეობით მშობელი ქვეყნის, საზოგადოებრივი ცხოვრების ასპარეზზე. მის თავდადებულ ღვაწლს ხალხის სამსახურში განსაკუთრებული მადლიერებით იგონებდნენ იმდროის საზოგადო მოღვაწენი, რომელნიც ერთხმად აღნიშნავდნენ, რომ ერთი პიროვნებისათვის მეტისმეტი იყო ყველაფერი ის, რისი გაკეთებაც შეძლო ადამიანმა, რომელსაც არავითარი თანამდებობა და ქონება არა ჰქონდა, ჯიუტი მოწოდებისა და შრომის უნარის მეტი. ხალხისა და ეროვნული კულტურის უსაზღვრო სიყვარული აძლევდა მას ძალას, რომ მთელი თავისი პირადი ცხოვრება, აწმყო და მომავალი მხოლოდ ხალხის კეთილდღეობის ზრუნვასთან დაეკავშირებინა.

ეს იყო მიტინგებისა და მანიფესტაციების მეთაურობა, პოლიტიკური აგიტაცია, რევოლუციური მოძრაობის მონაწილე რიგებში დგომა, არალეგალური ლიტერატურის ბეჭდვა-გავრცელება, ხალხის დარაზმვა მომავალი ბრძოლისათვის, საკუთარი ჟურნალისა და გაზეთის გამოცემა, რევოლუციური პოეზია, ლიტერატურული კრიტიკა, დრამატურგია, თეატრის, ოპერის და კინოს აღორძინებისათვის ხელის შეწყობა, პროვინციის კულტურულ-საგანმანათლებლო ცხოვრებაზე წერა, სა-

ქართველოს დაბა-სოფლებში სახალხო ლექციებით გამოსვლა, აჭარლების, ინგილოების, ფერეიდანელი ქართველების ბედ-ილბალზე ზრუნვა”. (22, 4).

1905 წლის 6 დეკემბერს ს. საგარეჯოს მამასახლისთა კრების დადგენილებით ივრის ხეობის რევოლუციური თვითმმართველობის წარსამართავად „ყველა მამასახლისთა მოქმედების გასაერთიანებლად და გასანესრიგებლად, მთელი ივრის ხეობის მამასახლისთა ხელმძღვანელად არჩეულ იქნა მამასახლისი ი. იმედაშვილი, რომელსაც მამასახლისთა მამასახლისად რაცხდნენ (22, 65).

იმავე ხანებში აჯანყებულ გურიაში რუსის მთავრობის ბრძანებით გაიგზავნა დამსჯელი ექსპედიცია გენერალ ალიხანოვ-ავარსკის მეთაურობით. გაზეთებში გაჩნდა ცნობები ყაზახთა მხეცურ მოქმედებასა, გურულების ხოცვა-ჟლეტვასა და მათი სოფლების გადაწვა-გადაბუგვაზე. ამან აღაშფოთა მთელი ქართველი საზოგადოება.

იოსებ იმედაშვილმა მოინვია ივრის მამასახლისთა კრება სოფ. ხაშმში, სადაურიც თვითონ იყო და იქვე გადაწყვიტეს, რომ თბილისს წასულიყვნენ მეორე დღესვე... რადგან გურიის მდგომარეობა დაყოვნებას არ ითმენდა. ნოემბრის დასაწყისს ივრის ხეობის გლეხთა მრავალრიცხოვანი დეპუტაცია იოსებ იმედაშვილის მეთაურობით ცხენებზე ამხედრებული თბილისში ჩამოვიდა, მეფისნაცვალ ვორონცოვ-დაშკოვს წარუდგა”...

„კახელ გლეხთა ამ ღირსახსოვარ შემოსვლას თბილისში შემთხვევით შესწრებია მაშინ ჯერ კიდევ მონაფე სანდრო შანშიაშვილი, რომელიც შემდეგ იგონებდა: „მაშინ მონაფე ვიყავ... უფროსი ამხანაგები ლაპარაკობდნენ – ლევ ტოლსტოი გურულებს გამოესარჩლა და ქვეყანა შესძრა მათ დასახმარებლადო... ერთ დღეს ყოფილ ალექსანდროვის ბაღთან, სადაც ეხლა ძნელადიძის ძეგლი დგას, გაველ და შინ მივდიოდი, ვგონებ, ნაშუადღევს უნდა ყოფილიყო... დავინახე ჩემ პირდაპირ ცხენოსნები მოემართებოდნენ, ყველანი ჩოხებში იყვნენ გამონწყობილნი, მათ წინ მოუძღოდათ თეთრ ცხენზე მჯდომი მხედარი, მკერდზე ჩამოკიდებული ქონდა მამასახლისის ყვითელი ჯაჭვი. შეატყობდით, რომ ის იყო ამ ცხენოსანთა მეთაური. მათ მძიმე-მძიმედ ამოიარეს ეხლანდელი ჯორჯიაშვილის ქუჩით, გამოუხვიეს პროსპექ-

ტით და გაემართნენ მეფისნაცვლის სასახლისაკენ, რომელშიც ამჟამად მოსწავლეთა სასახლეა. ასეთი რაზმის გამოჩენაზე პოლიცია დაფაცურდა. მე ფეხდაფეხ მივდედი. არც ცხენოსნები ჩქარობდნენ... ცნობისმოყვარე ხალხი აედევნა უკან. ერთი პოლიციელი წინ გადაუდგა, ჰსურდა შეეჩერებინა. თეთრ ცხენოსანმა რუსულად უთხრა – მამასახლისი ვარ, ჩამომეცალეო და გასწიეს სასახლისაკენ... მთავარ შესასვლელს რომ მიადგნენ, ახლა იქ შეიქმნა პოლიციელებისა და დარაჯების ფაცი-ფუცი, მაგრამ ამ ცხენოსნებთან ვერაფერს გახდნენ... ცხენოსნების მეთაური ერთ ოფიცერს, რომელიც სასახლიდან გამოვიდა, რუსულად ეუბნებოდა – ჩვენ გლეხების დელეგაცია ვართ და მეფის ნაცვალს უნდა ვნახოთო... მცირე ხანში ვილაცა უფროსი გამოვიდა აივანზე, ცხენოსნებმა ქუდები მოიხადეს, ხოლო თეთრცხენოსანმა არ მოიხადა ქუდი, ცხენი წინ წააყენა და თავისი სათქმელი უთხრა, რომლის მთავარი შინაარსი ასეთი იყო: აღშფოთებულმა კახეთის ხალხმა დელეგაცია გამოგზავნა, რომელიც მოითხოვს ბრძანება გასცეთ, რათა დაუყოვნებლივ შეწყვიტონ გურიაში ხალხის ხოცვა-დარბევა და გამოყვანილ იქნას გურიიდან დამსჯელი რაზმები, წინააღმდეგ შემთხვევაში იძულებული ვიქნებით გურულების დასაცავად იარაღი აღვმართოთ... თეთრ ცხენზე მჯდომი ეს მხედარი იოსებ იმედაშვილი იყო, შემდეგ გავიგე, რომ იგი დაეპატიმრებინათ”... (22, 69).

მხედრებს ზღვა ხალხი შემოუერთდა და თავისუფლების მოედანზე მიტინგი გაიმართა. მეფის მთავრობა დათმობაზე წავიდა და გურიიდან ჯარები გამოიყვანეს.

ი. იმედაშვილი 1905 წელს აირჩიეს პირველ სახელმწიფო სათათბიროს ჯერ სამაზრო, შემდეგ საგუბერნიო ამომრჩეველად, შემდეგ დაასახელეს დეპუტატად. ის თავის გამოსვლებში, როგორც ერის კაცი, ითხოვდა საქართველოს ტერიტორიულ ავტონომიას, მოითხოვდა ჩვენი ერის შელახულ უფლებათა აღდგენას. ამის გამო სოციალ-დემოკრატებმა გარიცხეს თავის რიგებიდან „როგორც გამყიდველი იუდა და ამხანაგების საზიზღარი მოლაღატე”. დაიწყეს ცილისმწამებლური აგიტაცია მის წინააღმდეგ და დაუნიშნეს ტერორი. „პირველად სოფელში (ხაშმში – გ. ხ.) ყოფნისას შუალამით მის ბინას დაეცნენ, ტყვია დაუშინეს და ცოლშვილიანად უნდა ამოეხოცათ, მაგრამ ხალხი ჩქარა მიემ-

ველა და იმედაშვილი გადაარჩინეს. მეორედ, 1907 წლის 5 დეკემბერს, კახეთის გზატკეცილზე სოფლიდან მომავალს, მთელი ბანდა დაეცა მოსაკლავად და დიდი სროლა აუტეხეს. ი. იმედაშვილმა ეტლში ჩაიჩოქა და ნაბადი მალლა ასწია თურმე. ისე რომ ტერორისტების ტყვიები ცარიელ ნაბადში გადიოდა. ორგან მაინც დაჭრილა, მხარში და ცხვირში, მაგრამ რევოლვერმომარჯვებული სროლითვე დასდევნებია გაქცეულებს.

თვითონაც საქართველოს დამოუკიდებლობისათვის დაუღალავად მებრძოლ ვაჟას, რა თქმა უნდა, უთუოდ დიდ სიამეს გვრიდა ასეთ პიროვნებასთან მეგობრობა და ეს მეგობრობა ასევე დიდად სასიამოვნო იყო იოსებ იმედაშვილისათვის.

ვაჟა-ფშაველას გაცნობას იოსებ იმედაშვილი ასე იგონებს: „ვაჟა-ფშაველა 1895 წელს გავიცანი, როდესაც ალა-მაჰმად-ხანის მიერ თბილისის აოხრების 100 წლის თავის პარაკლისზე აბჯარ-ჩაჩქანოსანი თუშ-ფშავ-ხევსურნი ჩამოიყვანა. შემდეგ უფრო ახლოს შიო მღვიმელმა გამაცნო. გაცნობისთანავე ვაჟას ჩემი დიდი ნატვრა გაფუზიარე – ნება მომეცი პოემა „ბახტრიონი“ ცალკე წიგნად გამოვცე–მეთქი. ჩემი საქმიანობა და გვარი რომ შეიტყო, სიამოვნებით შემომლიმა და მითხრა: „ჩემი წინაპარი იმედა იყო, იქნებ ჩვენ ნათესავეები ვართ“...

„ასეთ უეცარ შეკითხვაში ცხადია ვაჟა-ფშაველამ მაშინ იოსებ იმედაშვილისადმი ერთგვარი სიმპათია გამოხატა, მისი გაცნობა-დამეგობრებისადმი მზადყოფნა, მაგრამ მოულოდნელობით ერთგვარად დაბნეული მამაჩემი სერიოზულად ჩაჰკითხვია „იმედას“ ასეთი საერთო ძირის შესაძლებლობაზე, რაზეც შენიშნავს: „იხუმრა თუ მართლა თქვა, არ ვიცი, მაგრამ იმ დღეს მეგობრულად ერთად ვისადილეთ... ვაჟას ჰონორარის ანგარიშში ფულის ნაწილი მივეცი, თან ას ცალ წიგნს შევპირდი. ამიერიდან მეგობრები შევიქენით და როცა კი ჩამოვიდოდა, ჩემთან იყო ხოლმე მთანმინდაზე“.

იოსებ იმედაშვილმა „ბახტრიონი“ ანტონ გოგიაშვილს დაასურათებინა. პოემის გმირთა ჩაცმულობა, იარაღი და სხვა ვაჟასთან შეათანხმებინა. წინოლას ხეზე ჩამოხრჩობის სცენა რომ წაუკითხავს „მუხაზე ჩამოკიდული, კაცი სჩანს სამკლავიანი,“ – გოგიაშვილს წამოუძახნია: „დახე, ფშავლებში სამ მკლავიანი ხალხიცა ყოფილაო“. ვაჟას გაუღიმიდა და დინჯად უთქვამს:



ვაჟას ჯალაბი

„სამ მკლავიანი კი არა, სამკლავიანი, მკლავზე წამოცმული საომარი სამკლავით, რკინის საფარითაო“. „ბახტრიონისათვის“ სპეციალური წერილი დაანერინა გ. ყიფშიძეს. იმავე წელს ამ გამოცემაზე თბილისის რუსულმა გაზეთმა „ნოვოე ობოზრენიემ“ გულთბილი ცნობა მოათავსა.

„ერთხელაც ვაჟა შემეკითხა: – ჩემმა „ბახტრიონმა“ ხომ არ გაზარალაო?

– ვაჟას სახელი მაზარალებს-მეთქი?

– ჰოდა, – მომიგო ნასიამოვნებმა, – უნდა გადავეშვათ ბახტრიონ-გალავანზედა... ახლა მომისმინე, – მითხრა და გადაშალა „ჰაოს და ქართლოს!“

ვაჟამ თავისებური, სადა, მაგრამ მეტად მეტყველი კილოთი დაიწყო კითხვა, თითქოს ბაგეთაგან სიტყვები კი არ მოისმოდა,

ცხოველი სურათები გამოკრთოდა, ცეცხლის ნაპერწკლები სცვიოდა... ეს პოემა შევიძინე და ოცი მანეთი მივეცი... მაგრამ ამ პოემის გამოცემა ცენზორმა აკრძალა და ვაჟას ხელნაწერი ამჟამად ინახება საქართველოს ცენტრალური არქივის საცენზურო კომიტეტის ფონდში...

ვისაც ვაჟა-ფშაველას ეს პოემა ყურადღებით წაუკითხავს, მიხვდება, თუ 1899 წელს, „ბახტრიონის“ გამოცემის ორი წლის შემდეგ, ვაჟამ რა აზრითა და მნიშვნელობით უთხრა იოსებ იმედაშვილს პოემის „ჰაოს და ქართლოსის“ წაკითხვის წინ: „უნდა გადავეშვათ ბახტრიონ-გალავანზედაო“. აქ არაფერია დაფარული და გასიმბოლოებული, პოემის ფაბულის ნასკვი ისტორიულ ანალოგიას შეიცავს. ბახტრიონიდან თათრები რომ გავდევნეთ, ისე უნდა მოვექცეთ ქართლოსის მოღალატე სტუმრებსაო, რომელიც ომიდან ჭრილობებით დაბრუნებულ ქართლოსს თავისივე სახლში არ უშვებდა...

მათი ახლო ნაცნობობა, დაწყებული „ბახტრიონის“ გამოცემის სამზადისში, ჩქარა ახლობელ-მეგობრობაში გადაიზარდა. თუ ზაქარია ჭიჭინაძეს არ მივიღებთ მხედველობაში, განსაკუთრებით სანდო, უშუალო და გულითადი მეგობრობა მამაჩემს ვაჟა-ფშაველასთან ჰქონდა, რომელიც, როდესაც კი თბილისში ჩამოვიდოდა, მამაჩემს უზიარებდა ხოლმე თავის ახალ პოეტურ სიტყვას, თუ რაიმე პირადულ საოჯახო საჭიროებას, მით უმეტეს, რომ არა იშვიათად ღამის გასათევად ჩვენს ბინაზე რჩებოდა ხოლმე”.

იოსებ იმედაშვილი იგონებს: „დანოლისას მეტყოდა ხოლმე: – სანთელი და სანერ-კალამი დამიდუო. ასე იყო პირველ ხანებში, შემდეგ, რაკი მისი ხასიათი გავიცან, სანთელ-სანერ-კალამთან ერთად ქალაქსაც მოვუმზადებდი ხოლმე, მაგრამ ვაჟა ხშირად ყაბალახიდან იღებდა ქალაქს, ან როგორი ქალაქიც შეხვდებოდა, დასწერდა. უმეტესად კი ვაჟას ლექსები, პოემები ან სხვა მასალები, უკვე მთაში დანერილი, მზამზარეული ჩამოჰქონდა ხოლმე. ვიდრე კალამს აიღებდა ხელში ლექსის დასაწერად, ზოგჯერ ცალი თვალით ცად (ჭერს) მიბჯენილი გარინდებული იყო, თითქო ვიღაცას თვალი შეეასწრო და უთვალთვალებს, ანუ ფიქრით ესაიდუმლოება, ფუჩუნებდა, ბაგეთ მიძიმედ

არხევდა, ხანდახან წამომდგარი, სახლში ბოლთის ცემით, ძლივს გასაგონი ხმით ლაპარაკობდა”. (46, 274).

„ვაჟას და მამაჩემის პირადი მეგობრობა ეროვნული პრობლემის ერთნაირი გაგებაც იყო, რაც მათ პრაქტიკულ ცხოვრებაშიც გამოამჟღავნეს. ეს თვით ვაჟას შემოქმედებაშიც საკმაოდ შთამბეჭდავადაა გამოხატული – ეროვნული იდეალების მხატვრულ ინტერპრეტაციაში და საერთოდაც მის თემატიკას ახასიათებს როგორც ჭაშმარიტ ჰუმანისტს.

რასაკვირველია, ვაჟა-ფშაველა, თავისი დიდი ნიჭისა და ფშაური უბრალოების გარდა, არანაკლებად დიდბუნებოვნებით იპყრობდა ყურადღებას, რაც მით უფრო იყო შესამჩნევი, რომ, როგორც მამაჩემი შენიშნავდა, იგი კერძო ცხოვრებაში სხვებს არა ჰგავდა გარეგნობით, ჩაცმა-დახურვით, მიხვრამოხვრით, ლექსთა კითხვით – საიდუმლოებით შთაგონებული, ქურუმის იდუმალი ლოცვა იყო... მის მიხვრამოხვრასა და ლაპარაკს რომ ვუკვირდებოდი, უნებლიეთ ზეზვა, ლუხუმი და სხვა მსგავსნი გმირნი წარმომიდგებოდნენ ხოლმე... ციმბირის წყლულით ცალთვალატირებული, დინჯი, დარბაისელი, თავაზიანი... თავმდაბალი და ამავე დროს, ზვიადიც.

იმ ხანებში ვაჟას უფროსი ვაჟიშვილი ლევანი თბილისში სასწავლებლად უნდა ჩამოსულიყო, მაგრამ რადგან ქალაქში საკუთარი ბინა არა ჰქონდა, ერთ გასაჭირად გადაექცა მისი სადმე საიმედო ოჯახში სრულ ხარჯზე ქირით მოწყობა. ეს საქმე მალე მამაჩემს მოუწყვია – ლევანი თავისი სახლის პატრონის ივანე გოგიაშვილისათვის სრულ კმაყოფაზე მიუბარებია. ამის შემდეგ ვაჟას უფრო გაუხშირებია თბილისში ჩამოსვლა და მუდმივმა შეხვედრებმა მამაჩემთან, კიდევ უფრო დაახლოვა ისინი, ერთმანეთის ავ-კარგი გააგებინა და ძმადნაფიცებით შეაყვარა.

ერთხელ ვაჟა მეტად აღელვებული სწვევია მამაჩემს და შეუჩივლია – ამასა და ამას ვესტუმრე და ნეტა არ წავსულიყავიო... თურმე ვახშამი რომ გაუთავებიათ, მასპინძელს ვაჟასთვის უთქვამს, ახლა ამაღამ ჩვენთან მოისვენეთ და ხვალ როგორც გენებოთ, ისე გაუდევით თქვენ გზასაო... ამ დროს მასპინძლისათვის გვერდით მდგარ ცოლს რაღაც ჩაუჩურჩუ-

ლებია აშკარად უსიამოვნო გამომეტყველებით. ეს გაუგია, თუ უგრძობია ვაჟას და უღირსი დიასახლისისაგან გულნანყენს, მაშინვე დაუტოვებია მათი ბინა...

იმ ღამეს მამაჩემთან ტკბილი საუბრის შემდეგ დამშვიდებულ ვაჟას კარგად ჩასძინებია და მეორე დღეს დიდად ნასიამოვნები წასულა.

ვაჟასთან შეხვედრებიდან მეტად სასიამოვნოა მისი ერთი გამოსვლა, რომელსაც მამაჩემის ბინაზე გამართულ, რევოლუციურად განწყობილ ინტელიგენტების შეხვედრაზე ჰქონია ადგილი. ეროვნული საკითხების გარჩევას ცხარე კამათი მოჰყოლია. რ. დოლიძე, ალ. ჯაფარიძე, არ. ორმოცაძე და სხვები ეროვნულ საკითხს ხელალებით უარყოფდნენ, სამშობლოს ხსენებას და, კერძოდ, საქართველოს გამოსარჩლებას სამარცხვინოდ სთვლიდნენ – ხალხთა ურთიერთობა ეროვნული კი არა, კლასობრივი თვალსაზრისით უნდა განვიხილოთ... ამ კამათში ვაჟა-ფშაველაც ჩარეულა და, მამაჩემის მოგონებით, შემდეგი უთქვამს.

– ყმანვილებო, ძალიან კარგს უბნობთ – ხალხთა ძმობა და ერთობა რომ ჩვენი მცნება არ იყოს მამაპაპით გადმოცემული, არც ასე გავიქვლებოდით და ყველა გამვლელის ჩასაყლაპი არ შევიქნებოდით... არ დაივინყოთ, რომ ვინც თავის თავს არ ცნობს და პატივს არა სცემს, ვერც სხვას სცნობს. ვისაც სამშობლო არა აქვს, შემოდგომის მონყვეტილი ფოთოლივით ქარს გაჰყვება და გაისრისება, ესეც იცოდეთ, რომ სამშობლო სწორედ გლეხებისაა, მუშისა, რომელიც თავის მინაზეა მიკრული, თავის მამულში, და არა მდიდრისა, რომელიც თავისი ქონებით მსოფლიოში იქ ჰპოვებს სამშობლოს, სადაც კარგად ეცხოვრება... თქვენი მცნება კარგია, მაგრამ თავისუფალი საქართველო არ უნდა დაივინყოთ...

ვაჟას ეს შენიშვნა ყველამ ყურადღებით მოვისმინეთ, ზოგს არ ესიამოვნა, მაგრამ ველარა პასუხი შეჰკადრა, მხოლოდ, ვგონებ, არ. დოლიძემ დაიწყო იმაზე მსჯელობა, რომ მცირე მდინარეები დიდს უერთდებიან, დიდი თევზნი პატარებს ჰყლაპავენ, საქართველო რას გააწყობს იმპერიალიზმის ამ გააფთრებულ ხანაში... ამაზე ვაჟამ ისევ შეუბრუნა: ყმანვილო, ძალიან ჩამი-

ფილოსოფოსეთ, მაგრამ ერის უნარიანობა მხოლოდ სიმრავლეზე არ არის დამოკიდებული... (22, 29-32).

„ივერიასთან“ დაუმძრახება

ვაჟა თავის ქმნილებებს სხვადასხვა რედაქციებს აწვდიდა – „დროებას“, „კვალს“, „თეატრს“, „ჯეჯილს“, „მწყემსს“, მაგრამ ძირითადად „ივერიაში“ მიჰქონდა, ილიასთან, და „ივერიაც“ ყველაფერს უბეჭდავდა, თუ ცენზურა არ აკრძალავდა. ასე გრძელდებოდა 1894 წლამდე. სამსახურიდან მისი განთავისუფლების შემდეგ დათქმულ ჰონორარს უხდიდნენ და ვაჟაც კეთილსინდისიერად ასრულებდა დანაპირებს – სისტემატურად აწვდიდა მასალას. წელიწადში ერთ-ორჯერ ჩამოდიოდა ქალაქში, ჩამოურიგებდა რედაქციებს თავის ნაღვანს. თუ რაიმე გროშებს გაიმეტებდნენ, იმასაც აიღებდა და ქოსების დუქანში დაპატიჟებდა ნაცნობ-მეგობრებს, რედაქციის თანამშრომლებს. მეგობრების, ადამიანების პატივისცემისათვის არაფერი ენანებოდა. თუკი ფული ექნებოდა, დანახარჯს სხვას არ გადაახდევინებდა. ამას ბევრი იგონებს, ხშირად ისეც მომხდარა, ის რალაცა კაპიკები ქალაქშივე დაუხარჯავს და მთაში ხელცარიელი დაბრუნებულა. ამის გამო ცოლიც ბევრჯერ წასჩხუბებია – „შენ რა იმის დრო გაქვს, ეგრე ხარჯო, მშიერ ჯალაფნ შამოგტირიანო!“

– მაშ, რა ვქნა, დედაკაცო, ხალხს პატივისცემა უნდაო! – თავს იმართლებდა ვაჟა.

1893 წლის ბოლოს „ივერიაში“ გაანაწყენა ვაჟა-ფშაველა: აღარც მიწოდებული ნაწარმოებები დაუბეჭდეს და აღარც კუთვნილი ჰონორარი მისცეს. ამით ვაჟა უკიდურესად ცუდ მდგომარეობაში ჩააყენეს.

ამ დროს „ივერიას“ ე. წ. ახალი მიმართულება ჰქონდა აღებული; მისი თანამშრომლებიდან ბევრნი „მესამე დასელების“ მომხრენი იყვნენ, ილიასაც უკვე დიდი ხანია უტევდნენ და მის თანამოაზრეთაც. ისინი ილიას და მის თანამებრძოლთ ძველი, დრომოჭმული აზრების მქადაგებლებად მიიჩნევდნენ. მესამე

დასელები მარქსისტულ იდეებს, პროლეტარიატის მიერ მჩაგვრელთა დამხობის საკითხებს ეპოქის საკითხებად მიჩნევდნენ, ხოლო ეროვნული დამოუკიდებლობისათვის ბრძოლას – ნაციონალისტობად. იმდენად აღარაფრად აგდებდნენ ილიას, რომ რედაქციაში შესულ ბევრ მასალას, და მათ შორის ვაჟა-ფშაველასაც, ისე ინუნებდნენ ან ინონებდნენ, რომ მას აღარც კი ეკითხებოდნენ. ვაჟა „კვალის“ რედაქციამ დაიცვა. მის საპასუხოდ გამოქვეყნებულ სტატიაში „ივერიის“ თანამშრომელი „მეველე“ თავს იმართლებდა:

„ვაჟა-ფშაველამ გამოგვიგზავნა რამდენიმე ფელეტონი, რომელიც დანუნებული იყო სარედაქციო კომიტეტისაგან და ვერ დაიბეჭდა. ამას გარდა, მოიტანა ერთი ლექსი, რომელიც მე და ერთმა ქართველმა პოეტმა, რომელიც ამ დროს რედაქციაში იყო შემთხვევით, თუმცა ხუთჯერ თუ ექვსჯერ გადავიკითხეთ, მაგრამ არათუ პოეზია ამ ლექსისა ვერ შევიგნეთ, არამედ ვერც იმას მივხვდით, რისი თქმა უნდოდა ავტორს. ამიტომ, არც ეს ლექსი დავბეჭდეთ, რასაკვირველია, ამის შემდეგ ვაჟა-ფშაველა რედაქციაში აღარ გვინახავს“...

ვაჟამ წყენაც ადვილად იცოდა და „ივერიას“, მართლაც ახლოს აღარ გაჰკარებია. ეს ზურგის შექცევა ივერიელებმაც იწყინეს და ვაჟას ძველი შარი გაუხსენეს. საქმე შემდეგში იყო: პეტერბურგში ყოფნის დროს, როგორც უკვე ვთქვით, ვაჟამ „სტუდენტთა კასისაგან“ სესხად 50 მანეთი აიღო. 1892 წელს მათ ყველა მევალისათვის დაუგზავნიათ წერილები და ვალის გადახდა შეუხსენებიათ, მათ შორის ვაჟასთვისაც: ვაჟა-ფშაველამ ასეთი შინაარსის წერილი მიიღო:

„მონყალეო ხელმწიფეე!

თქვენზედ ირიცხება პეტერბურგის ქართველი სტუდენტების ხუთი თუმანი. უმორჩილესად გთხოვთ მოგვანვდინოთ ნაწილ-ნაწილად მაინც, თუ ერთად გამოგზავნა ვერ შეიძლოთ. შვიდ ყმანვილს არავითარი ცხოვრების სახსარი არ მოგვეძვეება“.

ვაჟამ ეს წერილი უკიდურესი გაჭირვების ჟამს მიიღო. ახალი ნაავადმყოფარი იყო, ოჯახიც ახალი გაყრილი. ერთი ძროხა დარჩა ოჯახის მარჩენლად. რასაც ცოტაოდენ ჰონორარს იღებდა, მეზობლებს აძლევდა იმასაც, იმით აკეთებინებდა საქმეს,

რადგან თვითონ არ შეიძლო. ნავთისა და მარილისთვის ძლივს რალაც რჩებოდა და ამ დროს... ორმოცდაათი მანეთი გამოგვიგზავნო. ქვეყანამ იცოდა რა დღეში იყო ვაჟა, იმათაც კარგად იცოდნენ, მაგრამ მაინც მოსთხოვეს ათი წლის წინანდელი ვალი. ახლა ისინი მიემატნენ ვაჟასთვის ყელში წამჭირებლებს. ამით გაბრაზებულმა ვაჟამ საპასუხოდ ეს მისწერა:

„ბატონებო!

ფრიად ვწუხვარ, თქვენს თხოვნას რომ ვერ ვასრულებ უქონლობისა გამო, რასაკვირველია, და თუნდაც მქონდეს, მაინც არაფერს არ გამოგიგზავნიდით. რისთვისაო? იკითხავთ. იმისათვის, რომ ეს ფული ვალად არ ამიღია სტუდენტების წრისაგან; თუ ვალის თხოვნაა და ვალად ჩასაგდება ხუთი თუმანი, ამ ვალს ეხლანდელეები კი არ უნდა თხოულობდეთ, ისევ იმათ უნდა ითხოვონ, ვინც ეს ფულები გაიღო და არა თქვენ, რომელთაც არავითარი ნაწილი არა გაქვთ იმ 50 მანეთში. ეს ერთი, მეორე: ვთქვათ ვიშოვე ხუთი თუმანი და გამოვიგზავნე, რომელი ერთი მშიერი უნდა გაგაძლოსთ იმ ხუთმა თუმანმა? შვიდს კაცსა გვემთანო, შემომტირით, – არავითარი საშუალება ცხოვრებისა არა გვაქვსო. მერე რას აკეთებთ მანდ ეგ შვიდი კაცი, მშიერებმა რა უნდა ისწავლოთ? შიმშილ-წყურვილით მიღებული სწავლისა მე არაფერი მწამს, რადგან ასეთი სწავლა-დიპლომით შეიარაღებული მხოლოდ კუჭის გაძლომაზე ჰფიქრობს და უთქვენოდაც მრავალნი გვეყვანან კუჭის მსახურნი, მუცლის მალმერთებელნი. ცხრა მთას იქით რომ შიმშილით არ იხოცებოდეთ და ჩემისთანა ღარიბს მომეტებულად არ აღარიბებდეთ, არა სჯობს ჩამოხვიდეთ თავის სამშობლოში და აქ დაიხოცნეთ. თუ სხვა ხელობას ვერას მიიღებენ ეგ მშიერნი, ხელები ხომ ასხიათ ტანზედ, იმუშაონ და იცხოვრონ. თუ ვაჟა-ფშაველა არა თაკილობს, ხმარობს თოხსა და ნიჩაბს, გუთანს იჭერს, მაგათ რატომ არ უნდა იკადრონ?

თქვენი კეთილისმოსურნე ვაჟა-ფშაველა“.

ვაჟას ამ წერილს განანწყენებული ტონი დაჰკრავს აშკარად. შეიძლება ერთგვარად მოუზომავიც, მაგრამ ვაჟა პირდაპირი იყო და არ უცდია ლობე-ყორისათვის მიღება-მოღება, სტუდენტების დაშოშმინება, მოტყუება. უნდა სცოდნოდეთ იმათაც, რა

მძიმე პირობებში ცხოვრობდა ვაჟა. თუ იცოდნენ და მაინც ითხოვდნენ, ესეც არაფრად ჩაგდება იყო ვაჟა-ფშაველასი.

ვაჟას წერილი პეტერბურგის ქართველმა სტუდენტებმა გამოუგზავნეს „მწყემსის“ რედაქციას. მათ გამოაქვეყნეს ეს წერილი და თან მიიწვეს დაურთეს: „ვთხოვთ „ივერიის“ რედაქციას ამ წერილის გადაბეჭდვასო“. „ივერიამ“ გადაბეჭდა და თანაც ერთგვარად დაიცვა კიდეც ვაჟა. რუსულმა გაზეთებმა კი უკუღმართად გააზვიადეს ვაჟას წერილი. „ნრვრე რქრზპენმე“ თავის კომენტარში ასკვნიდა, თითქოს ვაჟა უარყოფდა სწავლავანათლებას და ქართველ სტუდენტებს ურჩევდა, წიგნები გადაეყარათ და თოხისა და გუთნისათვის მოეკიდათ ხელი.

ეს მაშინ. ორი წლის შემდეგ კი, ვაჟას ზურგის შექცევით განაწყენებულმა „ივერიის“ რედაქციამ და, კერძოდ, მისმა თანამშრომელმა „მეველემ“ (დ. მიქელაძემ), ძველი ამბავი რატომღაც გაიხსენეს, ვაჟასათვის სამაგიეროს მიზღვის სულმდაბლურ გზას მიმართეს და ვითომ სტუდენტთა ფულის გადაუხდელობის გამო ვაჟა მიწასთან გაასწორეს. „მეველის“ წერილი ასე მთავრდებოდა:

„დასასრულ, ვაჟა-ფშაველა გაკვირვებული ამბობს: „თუ ვაჟა-ფშაველა არა თაკილობს, ჰხმარობს თოხსა და ნიჩაბს, გუთნს იჭერს, მაგათ რატომ არ უნდა იკადრონო?“ ასე ეგონება ადმიანს, ამისი დამწერი ან ცინცინატი უნდა იყოს, ან გარიბალდი და ან მთავარსარდალი სამხრეთის შტატებისა, გენერალი მაინც, რომელნიც გუთანზე მუშაობენ. მაგრამ ამას ამბობს ვაჟა-ფშაველა, რომელსაც, უეჭველია, ცოტა არ იყოს, დავინწყებია თავისი ხარისხიცა და თავისი მდგომარეობაც და მთელს განათლებულს ქართველ ახალგაზრდობას ახლის ცხვირ-პირში კადნიერ და უაზრო სიტყვებს“.

მართლაცადა, რა ბრიყვული, რა კადნიერი და თავხედური პოზიცია უკავია „მეველეს“. ვაჟას ახლის პირში, შენ ნუ გავიწყდება, რომ „ხარისხითა და მდგომარეობით“ არაფერს არ წარმოადგენო. „მეველე“ და მისი ბანაკისანი უარესს აკადრებდნენ ილიას და რა გასაკვირია, ვაჟასთვის ეკადრებინათ. ვაჟას „შავი დაანვა ღრუბელი“. მას ვერ გაეგო, რამ გააბოროტა ეს ხალხი, რას ერჩოდნენ.

„შხამიან ისრებს მესვრიან, გამიპეს გულის ფიცარი, თუ დამეშაოს მე რამე, ძალნი მრისხავდენ ღვთისანი“.

იმდენი მითქმა-მოთქმა შეიქმნა, იმდენი სალანძღავი აკადრეს ვაჟას, რომ იძულებული გახდა ჟურნალ „კვალში“ პასუხი გაეცა მათთვის. ამ პასუხიდან კარგად ჩანს, თუ რა დღეში იყო ვაჟა.

„ივერიას“ სწორეთ თავის სამტვრევლად გაუხდა ჩემი წერილი სტუდენტებთან 50 მან. შესახებ მიწერილი, რომელიც მე მმართებს და მოვალედაც ვრაცხ ჩემ თავს გადავიხადო. აქამდინაც უნდა მომეშორა ეს ვალი, მაგრამ საიდან და როგორ, როცა არა მაქვს და არცა მქონია არასდროს იმოდენი, რომ დღიურ ლუკმას მოჭარბებოდეს?...

... ნუთუ იმის თქმა „მხოლოდ დიპლომისათვის სწავლა არას არგებს ქვეყანას“ უარყოფაა განათლებისა?! არა, ვერ ვიტყვი იმას, რომ ჩემი წერილი ღმობიერია, სასტიკი პასუხი მომივიდა, რაიც ახლა მე თვითონ მენანება; მაგრამ რა მექნა? თხოულობდნენ ფულს და დაკმაყოფილება კი არ შემეძლო, რადგანაც არა მქონდა და რატომ არა მქონდა, ეგ „ივერიის“ რედაქციას ჰკითხეთ. წამლების ფულიც კი არ მომეძვევებოდა, ექიმიც ვერ მოვიწვიე უქონლობის გამო... „ივერიის“ რედაქციაში მივანერინე წიგნი ჩემს ძმას თ-ს და ვათხოვინე ფული, მაგრამ ყურადღება არ მომაქციეს...

... ვაცხადებ საჯაროდ, ვთხოვ კიდევაც „კვალის“ რედაქციას, ეს ჩემი წერილი ისე შეინახოს, როგორც თამასუქი და, როცა დაინწყება ჩემი ნაწერების ცალკე წიგნად ბეჭდვა, ჩემი კუთვნილი ჰონორარიდან ხუთი თუმნის მაგივრად გაუგზავნოს შვიდი თუმანი...

... ამასთანავე, როგორ არ მერჩია ჩემის, როგორც თვითონ იწერებოდნენ, შიმშილით შეწუხებული თანამოძმეთათვის, ჩამოდით თავის სამშობლოში და, თუ სხვა ხელობას ვერ იშოვნით, გუთანს მაინც მოჰკიდეთ ხელი-მეთქი, როცა მე პირად კალმის მსახურად ცნობილი, ამ მხრივ მომდურავი ვარ კალმისა და მხოლოდ მადლობელი გუთნისა, რადგან თავსა და ცოლ-შვილს იმით ვარჩენ...

...არ ვიცი, რად მოუნადინებია „მეველეს“ გამაშაოს საზოგა-

დოების თვალში, როდესაც, თუ საზოგადოებამ არა, ჩემმა და-
ახლოებულმა ნაცნობებმა კარგად იციან ჩემი ხელმოკლეობა,
სიღარიბე და ისინი მაინც არ გამამტყუნებენ; იციან იმათ, რომ
დღეს სიღარიბის გამო საკუთარი შვილებიც ვერ მიმიცია სას-
ნავლებელში და სხვას რა დახმარება შემიძლია აღმოუჩინო, ძა-
ლიანაც რომ მინდოდეს და გული მტკიოდეს – ეს ერთი. მეორე:
თუ სიღარიბე და ამის გამო ვალების გადაუხდელობა დანაშაუ-
ლად ჩასათვლელია, ამ დანაშაულში „ივერიის“ რედაქციაც მო-
ნაწილეა. რათა? მათა, რომ ჩემი ძალ-ღონე ამ გაზეთს შევალე
7 წლის განმავლობაში და თვეში ჩემი შემოსავალი 10-15 მანეთს
არ ასცილებია. თქვენ მიბრძანეთ, ამ ფულს რას გადაარჩენს
ცოლ-შვილის პატრონი კაცი? ვიმეორებ, არ არის კარგი ამაზე
საუბარი, ამის გამომჟღავნება, მაგრამ, როცა ძალას გატანენ,
გინვევენ, უნდა ითქვას, რას იზამ კაცი?! განა ტყუილად სდებენ
„ივერიას“ ბრალს, რომ იგი უმადლოდ და უმადურად მოეპყრა
განსვენებულ ნინოშვილს?..

...„მეველე“ უკვე ჩემი კერძო ცხოვრების, – „დაბინავებას“
დაებლაუჭა, რის გამო მეც მეძლევა საბუთი გავიხსენო მისი ბი-
ნადრობა. განა „მეველე“ არ იყო დაბინავებული, რომ ბინა მო-
იშალა, ჩაბუდდა „ივერიის“ რედაქციაში ლუკმის გულისათვის
და მოუშალა ბინა იმათ, ვისაც უფრო მეტი შრომა, ღვაწლი მი-
უძღოდა, ვინც უფრო მეტი ამაგი დასდო გაზეთს?! დღეს იგი
მარტო თვითონ დანავარდობს „ივერიის“ ფურცლებზე, წერს
აჭია-ბაჭიას, გაიძახის ალთა-ბალთას, ედება ლობე-ყორეს და
ჰგონია, ვითომ მწერალია თავის ჭკუაში...

...მერე რა დაცინვით მიხსენიებს... ნუ ეშინია „მეველეს“,
მისდა სასიხარულოდ არავინ ცდილობს საქართველოში გარი-
ბალდ-ცინცინატობას. ჰაი, თუ გაუხარდებოდა, რომ ასეთი ახი-
რებული ადამიანი გამოჩნდებოდა, რათა მიეცემოდა საბუთი ერ-
თი კარგი მეთაური გამოეცხო, აღელო ბაგე და ეთქვა: სახრჩო-
ბელა მაგასაო! მეველეს რას არ ეამებოდა მათი „პრეტენზიები!“
ნუ გეშინია, მეველე, მე არც ერთი გახლავარ, არც მეორე, არც
მესამე, არამედ ვარ უბრალო მოკვდავი და არა თქვენსავით დი-
დებული არსება” (16, 189).

ბევრი რამ ჩანს ამ წერილიდან და ჩანს ისიც, რომ „მეველე“
და მეველესთანა მედროვენი თავხედურად პარპაშობდნენ და

თავხედურად უტევდნენ სწორედ იმათ, ვინც ეძვირფასებოდა
სამშობლოს, ვინც სამშობლოზე ფიქრში ათენ-ალამებდა. ისინი
თავის თავს მაღლა აყენებდნენ ვაჟაზეც და ილიაზეც. მართლაც,
„აჭია-ბაჭია“ სტატიებში სამჯერ მეტს იღებდნენ იმასთან შედა-
რებით, რასაც ვაჟას აძლევდნენ, ხშირად იმის მესამედსაც არ
აძლევდნენ – რომ დაგიბეჭდეთ, იმისიც მაღლობა თქვიო.

ერთი წლის მანძილზე – 1895 წლის ივლისამდე ვაჟას ყო-
ველგვარი ურთიერთობა ჰქონდა განწყვეტილი „ივერიასთან“.
მის ფიზიკურ თვალს არ გამოჰპარვია, რომ აქ „ძალის თავი“
„ახალი“ მიმართულების მომხრეთა დამოკიდებულებაში იყო
დამარხული, იმ ახალი თაობის დამოკიდებულებაში, რომლის
შესახებ 1894 წელს „კვალი“ წერდა: „ისინი უარპყოფენ ძველს
ჩვენს ინტელიგენტებს – მეთაურებს და მათი მოქმედება უკვე
მავნებლად მიაჩნიათ ჩვენი საზოგადოების წარმატებისათვის...
ეს მესამე დასი ჰხდება დაუძინებელ მტრად ახლანდელი ჩვენი
ინტელიგენტი-მეთაურებისა“...

მაღევე მიხვდა ვაჟა ყველაფერს, მაღევე გაერკვა საქმის
ვითარებაში და დაუყოვნებლივ აღადგინა ძველებური კეთილ-
განწყობილება „ივერიასთან“. მან სამშობლოს, ქვეყნის ინტე-
რესებისათვის ილიასთან დგომა უფრო მაღლა დააყენა, ვიდრე
პირადი წყენა და ვილაც ქვეგამხედველებთან ანგარიშსწორება,
ვიდრე თავისი გაჭირვება და ჰონორარები. აღადგინა ურთიერ-
ობა და სიცოცხლის უკანასკნელ დღემდე ძველებურადვე დი-
დი პატივისმცემელი იყო ილიასი. ილიასადმი მიძღვნილ ლექსში
სწორედ ის უკუღმართობანი იგულისხმება:

„ვერაფერს ვიტყვი, ენა სდუმს, თავზე დაგვიჩხავის ყორანი,

**გაღმა გასვლისა მსურველთა უკულმა მიგვყავს ბორანი,
გავვიბატონდა, მგოსანო, სირეგვნე შეუნონარი“.**

ძალად ლხინი

ვაჟა-ფშაველა მძიმე ავადმყოფობამ და ზედაც მიყრილმა მძიმე შრომამ ფიზიკურად მოტყენა, მაგრამ სულით ძველებურად უტეხი დარჩა, ბუნება არწივული შერჩა. ბეჩაურს დღეში ჩავარდნილს სიამაყე და ღირსება არასდროს დაუკარგავს. ბევრი უსამართლობა, ბევრი წყენა შეხვდა, მაგრამ „გული ვერ მოკლა მტრის ხელმა, გული გულადვე რჩებოდა“. ვაჟა არ გაურბოდა ხალხთან ურთიერთობას, ხალხსა და ქვეყანაზე გული არ გაავებია, დიდსულოვნად ყველას ყველაფერს აპატიებდა. დიდი ბავშვივით იყო. იოლად ავინწყებოდა ყოველგვარი წყენა, იოლად მიუტყევებდა. მაინც უყვარდა ადამიანები. რაღა გული უნდა ჰქონოდა, ან დრო, მაგრამ ქორწილ-ნათლობებს, დღეობა-ხატობებს, ჭირსა თუ ლხინს არსად დააკლდებოდა. უყვარდა ნათესავების მოკითხვა. ვაჟას მეუღლე თამარი გვიამბობს: „თუ ვინმე ნათესავი მოუკვდებოდა, ჩაისვამდა ხურჯინში საკლავს (მამალ ბატკანს ან თოხლს), ტიკში არაყს ჩაისხამდა, გამომაცხობინებდა ქადა-ხმადს, დამაკეთებინებდა ან თვითონ დააკეთებდა სანთლებს, შეჯდებოდა ცხენზე და წავიდოდა დაზარალებულ ნათესავთან“.

მოლხენაც კარგი იცოდა. სადღეგრძელოების თქმა ლექსებით უყვარდა. თითოეულ სადღეგრძელოზე უამრავი მისადაგებული ლექსის თქმა შეეძლო, ხალხურის, სხვისი თუ საკუთარის. გრძელი სადღეგრძელოები არ უყვარდა. ღვინის დასხმის დროს კი ჩვეულებრივ შესძახებდა თავისი ლექსის „ქეიფის“ სტროფს:

**„დამისხი, დამალევიწე, ეგ ღვინო ოხერტიალი,
ეგება წალმა ვიფიქრო სოფლის უკულმა ტრიალი!“**

მართალია, ვაჟას ზეპირი კაფია არ ემარჯვებოდა, მაგრამ შემორჩენილია ხალხის მეხსიერებაში თითო-ოროლა ნიმუში მისი კაფიაობისა. სოფ. ღულელების მკვიდრმა ვანო ქისტაურმა გაიხსენა ერწოში ყოფნის დროს როგორ ეკაფიავა ვაჟა თორღვა ქისტაურს.

**ვაჟა: თქვენთან მნადიან ბაასი,
ეხლა ძლივს შეგხვდით სწორთაო.
თორღვა: – დიდი ხარ, ვაჟა-ფშაველა,
მხარბეჭიანი, კოხტაო,
ხელმწიფეს უნდა უმღერდე,
რო თამარ მეფეს შოთაო.
ვაჟა: –დიდთან დიდია ვაჟაი,
პატარიასთან – ცოტაო,
მოსისხლეს არას ვუმღერებ,
მეცა ვცნობ თავის სწორთაო.**

მოლხენის დროს უბრალოება უყვარდა, თავმდაბლობა, თავშეკავება, გაკრიალებულ რესტორანში შესვლა ერიდებოდა, სიამეს უფრო უბრალო სუფრა ჰგვრიდა. ასეთ დროს ერთთავად ღლინებდა. უყვარდა ფანდურზე დამღერებაც, დინჯი დაბუბუნება. ყველაზე მეტად ორი სიმღერა უყვარდა, ამ სიმღერებს ღლინებდა ყოველთვის. ერთი იყო რუსული სიმღერა:

„Казбулат удалой, бедна хижина твоя“ ...

და მეორეც ქართული: „გალმა ერთი მტრედია, ჩემი საყვარელია“... ერთიცა და მეორეც იმიტომ უყვარდა, რომ მის პირად მდგომარეობას ესადაგებოდა. პირველი – მის გაჭირვებულ ცხოვრებას, მეორე კი – უიმედო სიყვარულს. ჩარგლურას გაღმა, ვაჟას სახლის მოპირდაპირედ ცხოვრობდა მისი სიყრმის-დროინდელი სატრფო, მოლოდინაანთ სალომე; მეზობლის ცოლად შერთვას კი მთის კანონი კრძალავდა. სალომეს ტრფიალს მიუძღვნა ცნობილი ლექსი: „გამოღმით მე ვარ, გაღმით შენ“.

ბესარიონ ტუქსიშვილის ნაამბობი მიამბო ლევან ბოძაშვილმა: „ხატობებში სიარული ვაჟას ძალიან უყვარდაო. მე პირადად შუაფხოს ხატში, იახსარში ვნახე პირველად. სუფრასთან იჯდა. ხელში ვილაცის ფანდური აიღო, ჩამოჰკრა და თან ნელ-ნელა ააყოლა:

**„კიდევაც დაიზრდებიან
არწივთა ბარტყნი კლდეშია,
ისე არ დაკნულდებიან,
ჩაცვივდნენ ვინმეს ხელშია“.**

პირში შევეყურებდი კიდევ რას იტყვისო, მაგრამ ფანდური გვერდზე გადადვა და სუფრაზე წილობას დაენვადა”.

თბილისში „ქოსების დუქანი“ ჰქონდა ამოჩემებული, იქ უყვარდა ქეიფი. სხვაგან იშვიათად შევიდოდა. ეს დუქანი დღევანდელი ზაარბრიუკენის მოედანზე (ყოფილი ვორონცოვის) ხიდის ყურთან იყო. იქ ძმებს, ხელაშვილებს, ჰქონდათ ცნობილი დუქანი. ქოსები გათვითცნობიერებულნი ყოფილან და ამიტომ, როგორც სანდო ხალხთან, თავს იყრიდნენ პროგრესულად მოაზროვნენი, მწერლები, საზოგადო მოღვაწენი.

ვაჟა ვერ იტანდა მდიდარ ხალხთან ურთიერთობას, მითუმეტეს პურობასა და ქეიფ-დროსტარებას. მაგრამ თუ შემთხვევით აღმოჩნდებოდა მათთან ერთად სუფრასთან, უსათუოდ რაიმეს ეტყოდა გულის მოსაფხანს. განსაკუთრებით ხალხის ძარცვა-გლეჯით გამდიდრებულებს ვერ ურიგდებოდა. ამიტომ იყო, რომ მდიდრებიც უფრთხოდნენ მასთან ურთიერთობას. ეს კარგად ჩანს ვეფხო აკობაშვილის მოგონებიდან:

„ვაჟა და მამაჩემი აბრამი დიდი მეგობრები იყვნენ. მამაჩემი თიანეთის მამასახლისი იყო. მამაპაპეული ქონებაც ბლომად ჰქონდა: გუთნეული, საქონელი, წისქვილები, კარგი სახლ-კარი და სახნავ-სათესი მიწები. სოფლისთვის ამოღებული ხმალი იყო. სოფელსაც უყვარდა და აფასებდა, ოც წელიწადზე მეტს მამასახლისად იყო არჩეული”.

ერთხელაც სტუმრები ჰყოლია დაპატიჟებული აბრამს, ხინკლის სამზადისი ჰქონდათ. პირველი წყება ჩაუყრიათ და თავად აბრამი დასტრიალებდა თურმე თავს. ზუსტად იმ დროს, შემთხვევით ვაჟა-ფშაველაც მოსულა. გაჰხარებია აბრამს, გაჰხარებიათ სტუმრებს. მხიარული სუფრა და დროსტარება გამართულა.

„ამ დროს შემოგვესწრო პავლე გუგუდაშვილი, – განაგრძობს ვეფხო აკობაშვილი — პავლე გუგუდაშვილი მდიდარი გლეხი იყო თიანეთის მაზრაში. მას ოციათასზე მეტი ცხვარი ჰყავდა, უთვალავი ცხენის ჯოგი, ძროხა, ღორი. ერწოში ცხოვრობდა, სოფელ მაგრანეთში. ერწოშიც სახლი ჰქონდა, თიანეთშიც, თბილისშიც. თბილისში ბაკიც ჰქონდა თავისი სასადილო-თი და ღამის გასათევით. ეს ბაკი იჯარით აღებული ჰქონდა სახელგანთქმულ მოჭიდავეს კულა გლდანელს.



წამოწოლილია ვაჟა, თეთრ ჩოხაში ქაინოსრო (მისეილ) ზანდუკელი ვინც ფოტოებს უღებდა.

ჰოდა, ეს პავლე გუგუდაშვილი ამ ქეიფის დროს მოვიდა ჩვენსა, თან მწყემსი ახლდა.

პავლეს არ ესიამოვნა ვაჟას დანახვა, რასაკვირველია, არც ვაჟას გახარებია. პავლემ მაინც თავაზიანად მოიკითხა ვაჟა, ვაჟამაც თავაზიანი პასუხი გასცა და სავსე მათარა მიანოდა. პავლემ დალოცა, მათარა გამოცალა, მამაჩემს რალაცა გადაულაპარაკა და წასასვლელად მოემზადა. ყველანი წამოდგნენ სუფრიდან და სტუმარი ეზოში გააცილეს. პავლე შეჯდა ცხენზე, მწყემსიც უცებ მოაჯდა გაუხედნავ ცხენს. მაგრამ ცხენი ყალყზე შედგა, შემდეგ გააფთრებული წინ გაიჭრა, წაიბორძიკა, მწყემსი ძირს გადმოვარდა. ცხენმა უზანგში ფეხგარჩილი მწყემსი მოითრია. პავლემ თავისი ცხენით გზა გადაულობა დამფრთხალ ცხენს და შეაჩერა. ფეხნადრძობი მწყემსი აივანზე დასვეს. დედაჩემმა ამოვარდნილი ძვალი ისევ თავის ალაგას

ჩაუსვა და მალამოთი დაუზილა.

პავლემ მწყემსს უსაყვედურა:

– რას გადაეკიდე ამ გაუხედნავ ცხენს, ძალად ხომ არ უნდა შეაკლა თავიო.

ამაზე ვაჟამ უპასუხა:

– შენთან ძალღურად სიცოცხლეს, სიკვდილი უჯობს ცდა-შიაო.

– რატომაო?

– იმიტომ, რომ ამდენი დოვლათის პატრონი მშვიერი ჰკვდება და მწყემსებსაც მშვირებსა ჰხოცავო.

– ასე რომ არ მოვქცეულიყავი, მეც შენსავით ვიქნებოდი, კატა არ გიჩხავის სახლშიო, – უპასუხა პავლემ.

ბევრი იცინეს” (24, 18).

მდიდრებსა და გაზულუქებულებს ვერ იტანდა ვაჟა, თორემ უბრალო ხალხთან ურთიერთობა სიამოვნებას გვრიდა. მათ არავის დააჭარბებდა თავს თავის პოეტობით, არც რაიმეს აკადრებდა მდიდრების მსგავსად, ხოლო თუ უნებლიედ რაიმეს აკადრებდა, ბოდიშს მოუხდიდა, დანაშაულს პატივისცემით გამოისყიდდა. ამის საილუსტრაციოდ ისევ ვეფხო აკობაშვილის მოგონება გამოგვადგება.

„ერთხელ თურმე ვაჟა თიანეთიდან ახმეტაში მიდიოდა. ივრის გაღმა ჩვენი წისქვილი იყო. ვაჟა რომ წისქვილს მიუახლოვდა, ხედავს მენისქვილეს ჩვენი ცხენი დაუჭერია და სცემს. ვაჟამ შორიდანვე დაუტაცა:

– რას ერჩი მაგ ცხენს, აბრამამ რომ გაიგოს, ვერ გადაურჩებიო!..

– ვერც შენ მომჭამ ფეხებსა და ვერც შენი აბრამაო! – ეთქვა მენისქვილეს და უარესად დაენყო ცემა ცხენისათვის.

ეს კი ველარ მოეთმინა ვაჟას, ცხენდაცხენ მისულიყო მენისქვილესთან და მათრახი გადაერთყა, გაბრუნებულიყო და თავის გზას გასდგომოდა. მენისქვილეს მიეძახნა:

– დამაცადე, თუ აბრამას შენი თავი გომურში არ ჩავაგდებინოო.

– ვერც შენ მომჭამ ფეხებს და ვერც შენი აბრამაო! – უპასუხა თურმე ვაჟამ.

ახმეტიდან რომ ამოიარა ვაჟამ, მამაჩემს შეხვედროდა ივ-

რის პირას, ბოგირზე. მამაჩემს ეთქვა:

– მე და ჩემი მენისქვილე გიჩივით სასამართლოშიო.

– რას მიჩივითო?

– მენისქვილე ცემას გიჩივის, მე კიდევ წისქვილის გაცდენას, სამი დღის მინდი დამაკარგვინეო.

– ვერც შენ მომჭამ ფეხებსა და ვერც შენი მენისქვილეო, – სიცილით ეთქვა ვაჟას და თან დაეყოლებინა, – მართლაც მეტი მომივიდა. მოდი, გავიდე თ წისქვილში, შეგვარიგე, ცუდი გულით რატომ უნდა იყოს ჩემზეო.

მართლაც მისულიყვნენ მენისქვილესთან. მენისქვილე დიდ უარზე დამდგარიყო:

– შერიგება კი არა, შენი ხათრი რომ არაო, – მამაჩემისათვის ეთქვა, – ამას აქედან ცოცხალს არ გავუშვებდით.

– იცი ეს ვინ არის? – ჰკითხა თურმე მამაჩემმა.

– ვინც უნდა იყოს, შენზე დიდი კაცი ხომ არ იქნება, – უპასუხა მენისქვილემ.

– ჩემზედაც დიდია და შენზედაც, ჩვენ „ნაჩალნიკებზედაც“ დიდია..

– რაში ეტყობა, რა ვიცი, ჩინები მაგას არ უჩანს და მედლები.

– ვაჟა-ფშაველა გაგიგონია?

– მერე რა რომ გამიგონია, ეგ რა შუაშია?

– რა შუაშია და ეგ არის ვაჟა-ფშაველა.

– თვითონ ესა?

– დიახ, თვითონ ესა.

განცვიფრებული მენისქვილე თავიდან ფეხებამდე ზომავდა ვაჟას, ხან მამაჩემს შეხედავდა გამომცდელი თვალით, ხომ არ მამბრეყვებსო, ბოლოს ვაჟას მიუბრუნდა და ჰკითხა:

– გამაგებინე ვინა ხარ, მართლა ვაჟა ხარ?

– მართლს გეუბნება აბრამი, ვაჟა ვარ.

– რაზიკაშვილი?

– რაზიკაშვილი.

– პოეტი?

– პოეტი. – და ერთმანეთი გადაკოცნეს. შერიგდნენ.

ვაჟამ პურ-მარილი ამოალაგა ხურჯინიდან და თან პატარა ტიკჭორაც მოაყოლა ახმეტური ღვინით სავსე.

სუფრაზე გამოიკვია, რომ მენისქვილე მოლექსეც ყოფილიყო, ვაჟას რამდენიმე ლექსიც იცოდა ზეპირად.

და გაიბა ქეიფი. სადღეგრძელოს სადღეგრძელო მოჰყვა, ლექსი ლექსსა, ერთს თუ ვაჟა იტყოდა, ორს მენისქვილე ამბობდა და ვაჟა განცვიფრებული შეჰყურებდა უკვე არა ვილაც უბრალო მენისქვილეს, არამედ პოეტს, და სირცხვილი უფრო მეტად სწვავდა. ვაჟა წარამარა ბოდიშს უხდიდა მენისქვილეს, ეუბნებოდა, მაპატიე, დამნაშავე ვარ შენს წინაშეო. მენისქვილე კი ღმერთს მადლობას სწირავდა – ეს შემთხვევა რომ არა, მე შენ გაცნობას ვინ მალღრსებდაო”. (1, 21).

ვაჟა ლხინის დროს აყალ-მაყალსა და არევ-დარევას ვერ იტანდა, არ უყვარდა ყოყლოჩინობა და თუ ვინმე გაბედავდა, არ მოუთმენდა, მაშინვე ჭკუაზე მოიყვანდა ან ბარაქიანი სილით, ანდა ისევ ბარაქიანი მათრახით. ერთ-ერთ ქორწილში მაყრები ვერა და ვერ დააწყნარეს, იწევდნენ ერთმანეთისაკენ, არც ხვეწნამ გაჭრა და აღარც მუდარამ. მოთმინებადაკარგული წამოხტა ვაჟა, მათრახით დაერია და იმავე წუთს წესრიგი დამყარდა.

ცნობილმა ბუკინისტმა კიმოთე მახაურმა გაიხსენა ზენამხრელი კაცის გიორგი (კიკია) ბუჩუკურის ნაამბობი: „წოვა ჭინჭარაულმა, განთქმულმა ყაჩაღმა, თავადი ზანდუკელი რომ მოკლა (ე. ი. 1908-09 წლებში), იმ ხანებში იყო – კვირა დღეს შარახეულაზე ნიკო ბოძაშვილს კალმასი დაეჭირა ნემსკვით და მეც რალაცაზე ჩამოვიარე, შევხვდით. მითხრა, თვალივის ძირს ჩავიაროთ შანიძის დუქანში, თევზი მოვახარშვინოთ და ნაუქეიფოთო.

ამ დროს ზევიდან ცხენოსანი გამოჩნდა, ვილაცა ფაფახიანი. მე ვუთხარი ნიკოს: ხო დასდგამ ერთ ჩარექიანს, თუ ამ კაცს გზა ავაქცევინეო. კაი ბიჭი ვიყავ თავი მომწონდა.

– დავდგამო, — მითხრა.

დავდექი ბილიკზე ვინროში და დოინჯემოყრილმა გავიბოტიტნე. უცნობმა ცხენი ზედ მომაგდო და მკლავის სიმსხო, შავი მათრახი გადმომიჭირა. მე გზის ძირში დავეცი, იმან კი ვითოც არაფერიო, გაიარა. მე ტკივილისაგან ვიგრძობოდი, ნიკო – სიცილისაგან. ნიკოს ვუთხარი: გავიაროთ ერთი, დუქანში იქნებ გაჩერდეს, ვინ არი, იქ ვუჩვენებ სეირსო. გავიარეთ, ვიკითხეთ

და მჭედელი იყო ერთი, იმან გვითხრა: ის ვაჟა-ფშაველა იყო, მოეშვით, თორემ უარესს მიიღებთო”.

თუ პატივისცემაზე მიდგებოდა საქმე, ვერც ამაში შეედრებოდა ვინმე ვაჟას, გინდა შინ და გინდა გარეთ. ვაჟას ლამაზი პატივისცემა არ დავიწყებია მიხა ტურაშვილს: „ვაჟას ჩარგლელმა მეზობელმა და მეგობარმა ოსა ზურაბაშვილმა ცოლად შეირთო ჩვენი სოფლელი ფრუშკა წვეროშვილის და ნინო. ჩვენც, მე, ჩემი ძმა გამიხარდი და სხვები გავყვევით ქალის მაყრებად.

მეორე დღეს ვაჟამ ნეფე-დედოფალი და ქალის მაყრები შინ მიგვინვია. მაყრების გარდა სხვებიც ბევრი წამოვიდა ვაჟასთან. ვაჟამ თავიდანვე გაგვაფრთხილა: ერთი ბოთლის მეტი არაყი არა მაქვს და საწყენად არ დაგრჩეთო.

– გულს ნუ დავაკლებთ, გავყვევითო! – წამოიძახა გამიხარდიმ და გავყვევით.

ვაჟას ადრევე შეეკვეთა ოჯახში ხინკალი. როცა შინ შევედით, მალე სუფრაზე ცხელი ხინკალიც მოიტანეს. ვაჟამ ფრუშკასა და გამიხარდის უთხრა:

– არიქათ, ბიჭებო, აგერ, კუთხეში, ბოთლია არყიანი და მოიტანეთო!

ფრუშკამ და გამიხარდიმ ძლივს მოიტანეს ოცლიტრიანი მოქსოვილი წნელის გოდორში ჩადგმული შტოფი, რომელიც არაყით იყო სავსე. ხალხმა სიცილი ატეხა:

– კაცო, ჩვენ მართლა ერთი ბოთლი არაყი გვეგონაო!

– სანამ ამ ბოთლს არ დასცლით, ფეხს აქედან ვერ მოიცვლითო! – თქვა ვაჟამ და მართლაც, ასე მოხდა: სანამ ის შტოფი არ გამოგვაცლევინა, არ მოგვეშვა”.

მეზობლების გადმოცემით, ვაჟა ქორწილსა და ჭირს არ დააკლდებოდა, პატივისცემას არ დააკლებდა არავის, მაგრამ ეკლესიაში შესული კი არავის გვინახავსო.

...პავლე ჟამიაშვილის ქორწილი იყო ჩარგალში. ჯვრის დასაწერად ნეფიონი ჩარგლის საყდარში წავიდნენ. ვაჟა სხვა ხნიერ კაცებთან ერთად შინ დარჩა. მღვდელმა ჯვრისწერაზე უარი განაცხადა: დღეს პარასკევია, არ იქნებაო. აღარც თხოვნამ გაჭრა, აღარც ქრთამმა. ეჯიბი გაიქცა შინ ამ ამბის შესატყობინებლად. ვაჟამ დააბარა, მიდი და გადაეცი მღვდელს ჩემგან, თავის მოვალეობა შეასრულოსო. მღვდელი მაინც ჯიუტობდა, – მე ვაჟა არ

ვიციო. ესეც მოახსენეს ვაჟას. ნამოხტა ვაჟა და გაბრაზებული გაემართა საყდრისაკენ ჩოხის გრძელი ბოლოსა და სახელოების ქნევით.

– პარასკევს მე მოგცემ შენა, შე პირძალლოო! – შეუყვირა ვაჟამ.

მღვდელი აფაცურდა – ეხლავე, ეხლავეო და ჯვრისწერა ჩაატარა.

მეორე შემთხვევა. იოსებ ნაყეური იწერდა ჯვარს დედუკა ბაჩიაშვილზე. რატომღაც ჩარგლის საყდარში საქორწინო გვირგვინები არ აღმოჩნდა. „ვაჟა-ფშაველა მეფის ნათლია იყო. ეს რომ შეიტყო დაუძახა დედოფლის ბიძას ფოცხვერას და უთხრა: რასა ღონდებით, რომელი გვირგვინი იქნება ყვაფილების გვირგვინზე უკეთესიო! ვაჟამ ყვაფილები მოაკრეფინა, უცებ დაწნა ორი გვირგვინი და ღვდელს მიართვა: ესენი დაადგი თავზეო. ჯვრისწერა იმ ყვაფილის გვირგვინებით ჩატარდა (42, 54).

...ერთხელ კიდევ ჭირის ამბავი იყო. მღვდელი და დიაკვანი წესს უყენებდნენ მიცვალებულს. ვაჟა შორიახლოს იდგა და ყური მოჰკრა, რომ დიაკვანი რაღაც ნაცნობ სიტყვებს ბუტბუტებდა. კარგად მიაყურა და თავის პოემის „სტუმარ-მასპინძლის“ სიტყვები ჩაესმა ყურში: „მოვსდექით შენნი მოძმენი, შენის სამარის კარსაო“... ვაჟას უადგილოდ გაეცინა და გაამხნევა დიაკვანი: ეგრე, ეგრე, ეგრე სჯობია, ამ სიტყვებით უფრო გაუნათდება საიქიოს შესასვლელიო...

ვაჟაც ისევე, როგორც სხვა ფშავლები, ყოველთვის და ყველგან დადიოდა ხატობა-დღეობებში საკლავითა და სანთელსანირავით. წესის შესრულების შემდეგ ჩამოჯდებოდა ხნიერ ხალხთან, უსმენდა იმათ საუბარს და შიგადაშიგ ბლოკნოტში იწერდა თავისთვის საინტერესო ამბავს, ლექსს, ანდაზას თუ სიტყვას.

სმა არ უყვარდა, არაყს ბევრს არა სვამდა, ლუდს უფრო ეტანებოდა, როცა შეთვრებოდა, მერე წვეთს აღარ ჩაუშვებდა პირში. ხოლო როცა ღრეობა დაინწყებოდა, ადგებოდა და წავიდოდა სუფრიდან: სასმელიც აიძღვრა და ხალხიცაო.

ასეთ დროს, ვისაც უნდა ეთხოვა, დაეძალებინა, არაფერი გამოუვიდოდა, პრინციპული იყო, ნებისყოფიანი. პაპიროსს ახალგაზრდობიდან ეწეოდა, მაგრამ 1890 წელს, ავადმყოფობის

შემდეგ, აკრძალა და აღარასოდეს მოუწვია.

ვაჟა ჩუბინი და მონადირე

ნადირობისა და თოფ-იარაღის სიყვარულითაც ვაჟა-ფშაველა ნამდვილი მთიელი იყო.

ფშავის თითოეული თემი (თორმეტიდან) რაღაც ერთი მთავარი თვისებით ყოფილა გამორჩეული. გოგოლაურები ლექს-კაფიით იყვნენ ცნობილი, ქისტაურები – სილამაზით, მათურელნი – სიმამაცით, ჭიჩოელნი – სიბრიყვით, ჩარგლელნი – ნადირობით, თოფის სროლით. ვაჟა ამ მხრივაც გამოემსგავსა თავის წინაპრებს. თუმცა ვაჟა მთელი ფშავის, ყველა თემის, საუკეთესო თვისებების გამაერთიანებელი იყო, ფშაველთა ყველა ნიშან-თვისებას მოიყარა მასში თავი.

ბუნების მესაიდუმლე იყო ვაჟა, ბუნებაზე უსაზღვროდ შეყვარებული. ბუნე-



ბის განცდა კი იმაზე მძაფრი არ შეიძლება იყოს, ნადირობის დროს რომ არის. ეს მძაფრი განცდები სჭირდებოდა ვაჟას, ბუნების სილამისეული წვდომა და ამიტომაც გადაჰქონდა ასე ლამაზად და დამაჯერებლად ქალაქდზე. ბევრი მისი შედეგური სწორედ ნადირობისას მიღებულ შთაბეჭდილებებზეა აღმოცენებული. რად ღირს თუნდაც მისი „შვლის ნუკრის ნაამბობი“, რომლის საფუძველიც ასევე პირადი შემთხვევა ყოფილა. როგორც მისი მეზობლები გადმოგვცემენ, ასეთი შემთხვევა პირადად ვაჟას ჰქონია: შვლისათვის უსროლია ისე, რომ ვერ გაურჩევია წვრილიანებში დედალი იყო თუ მამალი. დედალ შველს არც თვითონ ესროდა და არც სხვას ასროლინებდა. ახლოს რომ მისულა და უნახავს შველი დედალი იყო, ძუძუებიც ნაწოვი ჰქონია, ძალზე შეწუხებულია. სადღაც მაყვლიანებში დამალული ნუკრიც აღარ უძებნია. მას შემდეგ ვაჟას შვლისთვის თოფი აღარ უსროლიაო.

დათვზე ნადირობა განსაკუთრებით ჰყვარებია ვაჟას. ეს, ალბათ, იმიტომ, რომ დათვზე ნადირობისას უფრო მეტია სიმძაფრე და აზარტი, უფრო მეტად დათვთან შეტაკებისას მყლავნდება ვაჟკაცობა, შეუპოვრობა. თურმე თითო გასროლით ხოცავდა დათვებს; იმისი თოფი რომ გავარდებოდა, იმედი იყო, დათვი ვერ წავიდოდა. ეს კი იმას ნიშნავს, რომ უშიშარი იყო ვაჟა, ნადირის გამოჩენაზე არ აკანკალდებოდა და არც თვალი აუხამხამდებოდა.

ფშავის გარდა, ვაჟა კახეთის მდიდარ ტყეებშიც ხშირად ნადირობდა. მისი და, მართა, ყვარელში იყო გათხოვილი და იმასთან სტუმრად ჩასვლისას შემთხვევას არ გაუშვებდა, იქაურებთან ერთად ტყეებში რომ არ გაევილო.

ერთხელ ძმები, ვაჟა და ბაჩანა, ჩასულან სტუმრად და-სიძესთან და სანადიროდაც გაუვლიათ. ამ ნადირობის ამბავს მართას უფროსი ვაჟი მიხა ასე გადმოგვცემს: „ვაჟას ნილში ბოლოზე სიარული შეხვდა, ბაჩანას-შუაში და სიძეს-თავში. ყველანი მიდიან წინდახედულად, აურჩარებლივ, მონადირულად. დიდი მანძილი არ გაუვლიათ, რომ ზევით სიძის თოფი გავარდა. ცოტა ხნის შემდეგ მოჰყვა ბაჩანას თოფის ხმა. ეს ცოტა ზევით და წინ იყო. ვაჟა წინ გაიქცა მის წინ პატარა ტაფობი გადაიშალა. ზევიდან ფეხის ხმა მოესმა. დაინახა, რომ რაც ძალი და ღონე აქვს,

მისკენ დათვი მორბის. ვაჟა მოემზადა. გაუსწორდა თუ არა, გავარდა მისი თოფიც. დათვა ერთი კი შეჭლირიალა და დაგორდა. ცოტა ხნის შემდეგ ბაჩანაც გამოჩნდა, ის დათვს კვალდაკვალ მოსდევდა. დაინახა რა, რომ დათვი მკვდარი გდია, დაიძახა: ჩემი უნდა ჰქონდეს მოხვედრილიო! მივიდნენ, ნახეს, დათვს მარტო ერთი სჭირდა, ისიც შიგ ილლიაში. ნასროლი ვაჟას ეკუთვნოდა. დაუმასრავეს სიძეს (ცარიელი ვაზნით დაუსტვინეს, მიიხმეს – გ. ხ.), გაატყავეს დათვი, ცოტა შეისვენეს, შემდეგ აიკიდა სიძემ ტყავი და ისევ წინ გაემართნენ.

ვაჟა ეხლა შუაში მოექცა. კარგა მანძილი გაიარეს და დანიშნულ ქედამდის, სადაც საბოლოოდ უნდა შეხვედროდნენ ერთმანეთს, ბევრი აღარ უკლდათ. ყოველ ნაბიჯზე დათვებისა და ღორების ნაჩიქნი და ნათხარი იყო... ყოველ წვრილმანს ათვალეიერებდა, ყოველი ამობრუნებული ხე, ნამოყუდებული ხის ძირი იქცეოდა მის ყურადღებას, ნიავიც არ იძვროდა. რამდენჯერ გამოიძრო ქუდიდან ბენვი და გაშინჯა მიმართულება ქარისა. ბენვი სწორედ ეცემოდა... არა, ნიავის მხრით საშიში არ არის, გაიფიქრა, მარტო ფეხის ხმას უნდა ვუფრთხილდე...

ამ ფიქრებში გადაადგა პატარა ტაფობს, შესდგა ათვალეიერებს. წაინია წინ. ერთს ხმელ ტოტს თავისდა უნებურად დაადგა ფეხი. ტოტი გატყდა, ოდნავ ახმაურდა. უცებ შეასწრო თვალი, რომ განოლილი ხის ქვეშიდან დათვი წამოდგა, გასაპარავად ემზადებოდა, მაგრამ ვაჟამ არ აცალა: იგრილა თოფმა და დათვი მიწაზე დაეცა. ღრიალებს, ნატყვიარს სწვდა პირით და იჯენჯავს. გავარდა მეორეც – დათვი ჩაიკეცა. გამარჯვება ისევ ვაჟას დარჩა”. (46, 362).

ფშაველ-ხევსურთა ხატობა-დღეობებში, ანდა მკვდართ დღეს ყაბახის დადგმა იცინან. ნიშანს დასდგამენ ორას-სამასი მეტრის მანძილზე და ყველა ესვრის, ვისაც „თავი აქვს ცდისა“. ჯილდოდ დაწესებულია ან ძროხა, ან ცხვარი, ან მიცვალებულის რაიმე ნივთი, ან ფული. ნიშანს ვინც მოარტყამს, დათქმული ჯილდო მას დარჩება.

თიანელი რევაზ გოჯიაშვილი ვაჟას შეუდარებელ სროლასა და ყაბახზე გამარჯვებასთან დაკავშირებით ერთ ეპიზოდს იხსენებს: „ერთხელ, სოფელ ჩაბანოში იოსებ ტერელაშვილის ღაბახი დაიდგეს. ერთი კვირის განმავლობაში მთელი მაზრის

ჩაფრები და გამოჩენილი მსროლელნი მოდიოდნენ, მაგრამ ვერას გზით ვერ მოარტყეს ნიშანში. ამ დროს თიანეთს ჩამოვიდა ვაჟა და, როგორც ნათლიმამა, მესტუმრა. მოსვლისთნავე შევძახე: „ვაჟავ, ასე და ასეა საქმე, ნამოდი, ესროლე და მასახელე კაცი-მეთქი!“ ვაჟა დამთანხმდა. შევსხედით ცხენებზე და ნავედით ლაბახთან. ბევრი მსროლელი და მაცურებელი დაგვიხვდა. ვაჟა გადმოხტა ცხენიდან, მოიზომა თოფი, ესროლა ერთი და ნიშანიც გადავარდა. ყველას გაუკვირდა ეს ამბავი. მეორე დღეს საჩუქრად კარგი ქედილა მოართვეს”.

ასე ბევრჯერ აუღია ყაბახი ვაჟას ფშავში და ხევსურეთში. ერთხელ ხანმატშიც გაუოცებია ხევსურნი. აფხუშოობას, ჩარგლის თემის მთავარ სალოცავში, კი ვინ მოსთვლის, რამდენჯერ უსახელებია თავის „აინალს“. ერთ ბოლო დროინდელ ყაბახის აღების ამბავს კი ვაჟას მეუღლე თამარი გადმოგვცემს:

„ნატობაში, აფხუშოობას ყაბახი (ფშაურად – ლაბახი) იცოდნენ. ყაბახს მრგვალი პურის ხმიადს ვეძახდით. ხმიადის შუაგულში მრგვალად გამოჭრილი (ჭიქის პირზე შემოჭრილი – გ. ხ.) პატარა ქალაღი აკრავს. სწორედ ამ ქალაღს უნდა მოარტყას მსროლელმა ტყვია. აი, ამ ყაბახს ესროდნენ მეხატე მამაკაცები თოფებს.

ეს ნატობა იმართება სამი დღით. თითქმის ყოველდღე იდგმებოდა ყაბახი. ზოგს მკვდრის პატრონი დასდგამდა, ზოგი შესანიშნავს იძლეოდა ყაბახში გამარჯვებულის სასარგებლოდ. ამ შესანიშნავს შეადგენდა წინდა-საფუხარი ან ფული (სამი მანეთიდან ოცდახუთ მანეთამდე), ჩოხა-ახალუხი, ქამარ-ხანჯალი ან სხვა რამ ნივთი, ხანდახან კურეტიც იცოდნენ.

მეთოფეთაგან ვინც უკეთესად ესროდა და მოარტყამდა ყაბახს, იმას დარჩებოდა ყაბახში დადგმული ფული და ნივთი.

თოფოსნობა (თოფის სროლა) იმართებოდა საჯარე ბინებიდან ცოტა მოშორებით. მსროლელებსა და ნიშანს შორის მანძილი უნდა ყოფილიყო დაახლოებით ორასი-სამასი მეტრი.

მასსოვს, ერთხელ კაი ხანი გაგრძელდა ყაბახზე სროლა. ვერავინ ვერ მოარტყა. სთხოვეს ლუკას, ჩასულიყო სასროლ გორაზე და ესროლა. ლუკა ადგილიდან არ დაძრულა, თუმცა მანძილი უფრო შორი რჩებოდა. მოითხოვა თოფი და მწვანეზე დამჯდარმა სუფრის გვერდიდან ესროლა ყაბახს. ყაბახი დაგორდა.

ყარაულმა დაგორებული ხმიადი დაიჭირა, აიტაცა მალლა ხელში და დაიძახა: გაუმარჯოს! ხმიადს ქალაღზე ეტყობოდა ნატყვიარი. ყაბახი აღებული იყო. სუფრის გარშემო მსხდომმა ხანში შესულმა ფშავლებმა მხიარულად შესძახეს ლუკას: „ყოჩაღ, ლუკავ!“

ბოლო დროს სანადიროდ აღარ დადიოდა. მარტო მტრედებზე გაივლიდა ხოლმე ნახნავეებში, ანდა ჯეჯილობის დროს კურდღლებზე ნადირობდა... ლუკას საკუთარი საყუჩი (საფარი) ჰქონდა სახლის ახლოს სულა-კურდღელათ ციხის კაკალთან. ამ კაკალზე სხდებოდნენ მტრედები დილა-სალამოს. ლუკაც ამ დროს უსაფრდებოდა თავის საფანტიანი თოფით. მტრედებს რომ არ შეენიშნათ, საფარს ფოთლები ჰქონდა გაკეთებული საზარეში. ეს საზარე ახლაც არის, ოთხ სვეტზეა აშენებული და თავზე ქვის სახურავი აქვს თაღებზე გადაყვანილი. ამ საზარეში ჩაუსაფრდებოდა კაკლის წვერზე შემომჯდარ ქედნებს”. (37, 54).

საარაყე ქვაბს რომ შემოსდგამდნენ, ვაჟა თავის სასაფანტე თოფს აიღებდა – კურდღლის შესანველი ცეცხლიაო და ჭიჭახევს აუყვებოდა ხოდისა და საძერიათ ველტყვიანებისაკენ. არ გავიდოდა დიდი ხანი და, სად ნახულობდა ისე გეზად, თითქოს გალიაში ჰყოლოდეს დამწყვდეული, ერთს ან ორ კურდღელს მოიტანდა. იცოდა ნადირ-ფრინველის ალლო, ზნე და ამიტომ ემარჯვებოდა ნადირობა. წამომხტარ კურდღელს კი, ოღონდაც თვალი მოეკრა, არ ააცდენდა.

თევზაობაც უყვარდა ვაჟას. ბავშვობიდან მიჩვეული იყო ანკესით თევზაობას და შემდგომშიც უფრო ხშირად ანკესითვე იჭერდა კალმახს. საკალმახოდ კი ჩარგლურას გარდა არაგვს გადაღმა კანალხეურაზეც დაიარებოდა. ბადით არაგვზე იჭერდა ფიჩხულს და მურნას. ბადის სროლა კარგი იცოდა. წყალდიდობა, წყალმურღვობის დროს კი ორაგულს დაეძებდა მორევეებში თხილის წკეპლით. აღმოაჩენდა, ფრთხილად მოუგანებდა გვერდში გრძელ ჯოხზე დამაგრებულ წვერბასრ ჩანგალს, გამოჰკრავდა და გამოითრევედა – მოჩანგლავდა.

ტყისთვის ბრძოლა მეტყევეებთან

ვაჟა-ფშაველა იმთავითვე ვერ ურიგდებოდა მეფის მოხელეებს. სულიერად ვერ იტანდა მათ მგლურ დამოკიდებულებას ხალხისა და ქვეყნის მიმართ, ვინც მხოლოდ თავის კეთილდღეობაზე ფიქრობდა. მათთან ბრძოლაში, მართალია დიდი სიმწარე იწვნია, მაგრამ ამან გული ვერ გაუტეხა, ხელი ვერ ააღებინა ცხოვრების პრინციპზე. მას სხვაგვარად არ შეეძლო. თვითონ ვაჟაზე იყო ყველაზე მეტად ზედ გამოჭრილი მისივე ნათქვამი: „ვერ მანონებთ კარგ ყმასა, რაც არ უჯდება ჭკვაშიაო“. მამასახლისებს – მამაძაღლისებს ეძახდა, მღვდლებს – მგლებს, მეტყევეებს – მეტყავეებს.

ლევან ბოძაშვილის ნაამბობი: მამაჩემი დავითი საზოგადოებრივ მოსამართლედ ყოფილა არჩეული მაღაროსკარში კიდეც სხვა ორ კაცთან ერთად. სამნი ყოფილან. იმათ ევალეობდათ კვირაობით ადგილზე ყოფნა, ხალხიც კვირა დღეს ჩამოდიოდა საქმეებზე. ერთხელ ვაჟა-ფშაველაც ჩამოსულა ჩარგლიდან, მხარზე გუდა ჰკიდებია, გუდაში საგზოად პური და დამბალი ხაჭო ჰქონია. მისულა ძმასთან, ბაჩანასთან, რომელიც მაშინ მაღაროსკარის სკოლაში ყოფილა მასწავლებლად და თან პრისტავთან ყოფილა მდივნად („პისრად“). ბაჩანას გაჰხარებია ვაჟას დანახვა, უთქვამს: რა კარგია რომ ჩამოხვედი, ველარსაით შეგატყობინე – დღეს ჩვენი პრისტავი ოზიევი მყავს დაპატიჟებული, სუფრას ვამზადებთ, პური ერთად ვჭამოთო. ვაჟას ხმა არ ამოუღია, ცოტა საქმე მაქვსო–უთქვამს, მალე მოვალო, გუდა რძლისთვის (ბაჩანას ცოლისთვის) მიუბარებია.

პრისტავი ოზიევი და ვაჟა ერთმანეთთან კარგად ვერა ყოფილან, რადგან ცუდი კაცი ყოფილა, ფშავლებს ცუდად ეპყრობოდა თურმე, მათრახით სცემდა ხანდახან უმიზეზოდაც კი. არ მიეცა ვაჟას მასთან შეხვედრის საშუალება რომ ეთქვა სათქმელი.

ვაჟა რომ დაბრუნდა, სუფრა გაშლილი ყოფილა, იმასლა ელოდებოდნენ თურმე. ბაჩანას ოზიევის გვერდით, მარცხენა მხარეს დაუსვია. რა თქვეს, რა ილაპარაკეს და ვაჟას რძლისთვის უთქვამს, ჩემი გუდა მომიტანეო. ამოუღია ვაჟას დამბა-

ლი ხაჭო, დაუჭრია და ოზიევისთვის შეუთავაზებია – სცოდნია თურმე ძალიან ეჯავრებოდა. ოზიევს სახე იქით მიუბრუნებია: მოაშორე, ეს რაღა ააყროლო! ვაჟას ხელუკუღმა დაუფარებია სახეში და სკამიანად დაუხეთქებია იატაკზე. ამდგარა ოზიევი და უხმოდ წასულა. გაბრაზებულა ბაჩანა, სცემია ვაჟას: რა უგემური ხარ, ეს რა ჩაიდინეო! ვაჟაც ამდგარა: შენ ხმა ჩაიწყვიტე, თორემ შენც იმას მიგაყოლებო; ფშავლები ცემით ამონწყვიტა, შენ კი მაგას უძვრებო! – ამდგარა ვაჟა და შინ წასულა.

ოზიევთან ამ ამბის შემდეგ ვაჟას შეხვედრას ეხება სოფელ გუდარახში მცხოვრებ ნინო ნიკლაურის ნაამბობი: „ვაჟასა და ჩემ ძმას ძალიან მიაჩნდათ ერთურთი. ქალაქში იყო სამუშაოდ წასული „ბუნტოვშიკებთანაც“ სადამ ჩაება და როცა მოვიდოდა, ვაჟას სანახავად რო არ გასულიყო, ისე არ იქამდა. ვაჟამაც ხშირად იცოდა ჩვენსა მოსვლა. დედაჩემს ძალიან უყვარდა ვაჟა, როგორც შვილის მეგობარი.“

ერთხელ ვაჟა შუადღის ხანს მოვიდა ჩვენსა. დედამ შინ შემოიპატიჟა, ერბო-კვერცხი გაუკეთა, ერთი ბოთლი არაყიც მოუტანა. ამ დროს კარებზე ვილაცეები მოხმაურდნენ. დედამ გაიხედა და „პრისტავი ოზიევი და სტრაჟნიკებიაო“, – უთხრა ვაჟას. „ნულარ გახვალ გაანებე თავიო“, – ვაჟამ უთხრა. „ვაიმე, კარზე მოსული სტუმრები ეგრე როგორ გაუშვა პურუჭმელებიო“. „მაგ ძაღლებს ეგრე შაუხდებაო“.

ცოტა ხნის შემდეგ პრისტავი და ერთი სტრაჟნიკი თვითონ შემოვიდნენ სახლში, გამარჯობათო, თქვეს. ვაჟას ხმა არ გაუცია. მერე უთხრა ოზიევს: „რა არის, რას დასწანწალებთ, რას აუგემურებთ ხალხსაო!“. პრისტავი ფეხზე იდგა, ვაჟა იჯდა, ისე ლაპარაკობდნენ, ხან ქართულად, ხან რუსულად. ხმასაც აუწიეს. ბოლოს პრისტავმა უთხრა: „რა იყო, კაცო, შენ დასაჭერად ხომ არ მოვედი! ცხენები დაუპარიათ და ხევსურეთში წასასვლელად ცხენები გვინდაო!“

„ცხენები ვინც დაიპარა, იმათ წაართვით, ამათ რაზე ართმევთო... ან ჩემ თავს ვინ დაგაჭერინებთ, ძალიან კი გინდათ, მაგრამ კოვზი ნაცარში გივარდებათო!“, – მიაძახა ვაჟამ უკვე კარში გასულებს. დედამ უთხრა: „ვაიმე, ვაჟავ, რადარ სუფრასთან მაიპატიჯენ, ი პრისტავს ჯერ სუ გულ-მუცელნ ერევიან ჩვენზე, ეხლა სუ გაჯავრებულ წავიდა, ი ბაღლს აუტეხს რასა“...

„ნუ გეშინიან, ვერაფერს იქამს, ეგ სუფრის ღირსი არ იყო, ჩემზედაც გულ-ნანღევ ერევა, მაგრამ ვერასა მრჩებაო“.

ვაჟა რო წავიდა, დედაჩემი სულ იმას ამბობდა, როგორ მე-შინოდა ჩხუბი არ მოუფიდესთო, აღარ ვიცოდი რა მექნა. ვაჟა მაგ პრისტავსა შურობს, ფშავლებს რადა სცემსო. აბა, ვაჟა ყველას დამცველია, ღმერთმა აცოცხლოსო. წასულ შაბათსაც მალაროსკარში მგონი ჩხუბი მოსვლიათ, ვაჟას დაუტყლემავისო, იმას ამბობდნენო“.

ვაჟას მთაში განსაკუთრებით მეტყვევებთან ჰქონდა ხელჩართული ბრძოლა. მას მიაჩნდა, და სამართლიანადაც, რომ მთაში მთავრობის მოხელეებისაგან ტყის დაცვა არ იყო აუცილებელი; რომ ტყეს მთაში მთიელები თვითონ უკეთესად იცავენ. სადაც არ შეიძლება ტყის გაჩეხვა ზვავისა თუ ნიაღვრების საშიშროების გამო, იქ ხეს არ მოჭრიან, ასეთ ტყეებს ხატს „გადასცემენ“, „დაცულად“, „ხატის ტყედ“, „მკვრივად“ გამოაცხადებენ და წინკარსაც კი აღარავინ გაიტანს იმის შიშით, ხატი დაგვამიზეზებსო. ისედაც, მთიელი კაცი თუ მოჭრის ხეს, მხოლოდ აუცილებელი საჭიროებისათვის – შეშად ან სახლისა და გომურისათვის. ამაზე კი გადასახადი არ უნდა იყოსო. ვაჟამაც კარგად იცოდა, რომ მეტყვევები ტყის დაცვისთვის კი არ იყვნენ, არამედ გადასახადებისათვის, ხალხის ყველფისათვის. იცოდა, მეფის მთავრობას ვერაფერს შეაცვლევინებდა, მაგრამ მაინც იბრძოდა, არ მოსწონდა ხალხის საძარცვა კანონი, არ მოსწონდა მეტყვევთა საქმიანობა და ებრძოდა, ებრძოდა იმიტომ, რომ შერიგება არ შეეძლო. იცოდა, არაფერი გამოვიდოდა, მაგრამ მაინც გულს იოხებდა.

ცამდე მართალი იყო ვაჟა, მაგრამ ვინ უსმენდა. მეტყვევები თავისას განაგრძობდნენ, ხალხს ტყის მოჭრაზე ბილეთს უწერდნენ, აჯარიმებდნენ. ვაჟა ამას ვერ ითმენდა. რას გამორჩებოდა მეტყვევებს, როცა ზურგს უკან მათ მთავრობა ედგა, მთავრობა, რომელიც ხალხიდანაც და ბუნებიდანაც ყველაფრის გამოწოვას ცდილობდა ობობასავით. მთავრობას შემოსავალი აინტერესებდა და არა ფშავ-ხევსურეთის კეთილდღეობა, ვაჟას კი თავისი ქვეყნის სიკეთე უნდოდა მხოლოდ. აბა როგორ შეიძლებოდა შერიგება ამ ორი სრულიად სანინალმდეგო ინტერესისა.

ის, რის წინააღმდეგაც ვაჟა იბრძოდა, ათმაგად და უფრო მეტად არის გაუარესებული ჩვენს დროში. ფშავ-ხევსურეთს თუ მაშინ ერთი ტყის მცველი გიორგი ხორნაული ემსახურებოდა, ეხლა ორი სატყეო მეურნეობაა თავისი სარაიონო და რესპუბლიკური სამმართველო-სამინისტროებით, ვინც ძირითადად ამ ტყეების ხარჯზე არსებობენ. სადაც უნდათ და როგორც უნდათ იჭრება ტყეები და ხალხს სულაც არაფერს ეკითხებიან. თან ადიდებენ ვაჟას, — ბოროტებას ებრძოდაო, იმავე ბოროტებას კი აათმაგებენ. ეს იყო საბჭოთა წყობილების ცინიზმი ვაჟას მიმართაც და ხალხის მიმართაც.

ერთხელ თიანეთის მაზრიდან მეტყვევ ლევან ხიზანიშვილი გადმოსულა ჩარგლის ტყის დასაბეჭდად, რათა ხალხს უნებართვოდ არაფერი მოეჭრა. თან ხლებია თორმეტი ტყის მცველი. მამასახლისიც გამოუყოლებია, რადგან ვაჟას შიში ჰქონიათ. ვაჟას გაუგია მათი გადმოსვლის ამბავი და თოფით წასდგომია თავს ხეების ბეჭდვის დროს.

– ერთს, არ გაგიშვებთ ცოცხალს, მოშორდით ეხლავე აქედან, რა საქმე გაქვთ აქ რომ დაეხეტებითო!

– ა, ვაჟავ, ვაჟავ, რას შვრები, კაცო, რაზე გვბოცავ, ეხლავე წავალთო! – შეეხვეწნენ თურმე და თავისთან მიიტყუეს. უცებ ეცნენ, ხელები შეუკრეს და ოთხ ტყის მცველს თიანეთში წააყვანინეს. ჩარგლიდან თიანეთისაკენ მაღალი მთაა გადასავალი და ერთი დღის სავალია, ხელშეკრული ჩაიყვანეს „ნაჩალნიკთან“. „ნაჩალნიკმა“ დატუქსა ტყის მცველები და ვაჟა მაშინვე გამოუშვა. ამასობაში კი ხიზანიშვილმა ჩარგალში თავის საქმე მოასწრო.

არ გასულა დიდი ხანი და ვაჟა ხიზანიშვილს მალაროსკარში, დავით ჯანაშვილის დუქანში შეხვდა. სანამ ვაჟა მიიხედ-მოიხედავდა, ხიზანიშვილი უცებ სადღაც გამქრალა.

– რა იქნაო? – იკითხა ვაჟამ.

– შენი შეეშინდა და თავქვე ჩაეფარა გაჭენებულიო, – უთხრეს.

ვაჟა გამოვარდა, მოახტა თავის „ნიკორს“ და ორ-სამ კილომეტრშივე წამოეწია. ხიზანიშვილმა თოფი მოუღერა: არ მოხვიდე, თორემ დაგკრავო!

– კაცი არ იყო, თუ არ დამკრაო! – ზედ მიაგდო ცხენი ვაჟამ,

ააგლიჯა თოფი და მათრახით მიაცოცხალმკვდარა, თოფი კი შინ, ჩარგალში, წაიღო.

ხიზანიშვილი წავიდა თიანეთში, მაგრამ სამსახურიდან გაგდება ელოდა, თუ გაუგებდნენ, რომ სამსახურებრივი იარაღი, „ბერდენკა“, აჰყარეს. გადაწყვიტა სასწრაფოდ როგორმე მოეგვარებინა საქმე ვაჟასთან. გაამზადა კარგი პურ-მარილი, სასმელი, აჰკიდა ცხენს და ჩარგალს გადმოვიდა. მივიდა ჩარგლის თემობის წევრთან, ოსა ზურაბაშვილთან, და სთხოვა, ვაჟასთან შემარიგე როგორმე, ეგების თოფი დამიბრუნოს, თორემ ვიღუპებიო. ოსა გაჰყვა. ჯერ მარტოდ მივიდა ვაჟასთან. მეზღვნე კი ჭალაში, წნორთან დატოვა.

ვაჟა გაბრაზდა და ოსა გალანძღა: თქვენ როგორ მეუბნებით შეურიგდიო, როცა მთელი ხალხი მე უნდა მიბამდეთ მხარს მაგათთვის აქედან ფეხის ამოკვეთაშიო!

ოსამ ნელ-ნელა დაიყოლია ვაჟა. მისი დაყოლიება არ იყო ძნელი, წყენა მალე გადაუვლიდა ხოლმე. შევიდა ხიზანიშვილის მდგომარეობაშიც, შეეცოდა. უთხრა ოსას: ეხლა მიპატიებია, რაკი ეგრეა საქმე, მხოლოდ შემდეგში აღარა ჭამოსო... შევეურიგდები იმ პირობით, თუ წნორიდან მუხლისკვრით ამოვა აქამდეო. ოსა წავიდა ხიზანიშვილთან... და ვაჟამ იქვე მყოფი ივანე მოლოდინაშვილი დაადევნა: ჩადი იმ კაცმა მანდ ბობღვა არ დაინყოს, არ შემარცხვინოსო.

მოიყვანეს ხიზანიშვილი, ვაჟა მხიარულად შეხვდა, გაეხუმრა, შინ შეიპატიჟა, ხინკალი გააკეთებინა, იქეიფეს, იცინეს და ბოლოს ის წართმეული „ბერდენკაც“ დაუბრუნა.

ვაჟას ერთი მტერ-მოყვარე „აბეშიკი“ იყო ჩარგლის მეზობლად, სოფელ კანალხევში, მცხოვრები გიორგი ხორნაული, პოემა „გოგოთურ და აფშინას“ პერსონაჟის, ბლოელ აფშინას პროტოტიპი.

ხორნაულები ხევსურეთიდან, ბლოს ხეობიდან, სოფელ კანალხევში მეცხრამეტე საუკუნის შუახანებში ჩამოსახლებულან. გადმოცემის თანახმად, ხორნაულებს კაცი გამოუგზავნიათ ფშავში ამ ხეობის კარგად დასათვალიერებლად, მოსწონებია ხეობა მზირს და უკან დაბრუნებულს თავისიანებისთვის უთქვამს – კა წყალ-ხევიანო, ე. ი. კარგი წყალი და ხევიანო.

ჩამოსახლებულ ბლოელთ მეზობელი სოფლის მცხოვრებნი

– აფშოვლები, მიგრიაულები, ჩარგლელები – გამუდმებით ეკინკლავებოდნენ სათიბ-საძოვრების, წყალ-ჭალების გამო, ედავებოდნენ მიჯნებზე, საზღვრებზე, არ იხდენდნენ. მიგრიაულკანალხევლებს ბევრჯერ ჰქონიათ შეტაკება, ხოცვა-ჟლეტა. ხმლის ნაცვლად ხანდახან ლექსა და კაფიას იშველიებდნენ, ერთურთს ალექსებდნენ, მწარესა და სასენოს არ იშურებდნენ. აქ უკვე ფოთოლათ მერცხალას, მიგრიაულთა „ფალავანს“ გაუჭრეინებია ხმაღზე მეტად. მწარ-მწარედ, საოცარი ენამახვილობით ალექსებდა კანალხევლებს, ულექსებდა ქალებს, რითაც პირდაპირ სიშმაგემდე მიჰყავდა ხევსურეთში სიფიცხით ცნობილი ხორნაულები. სადაც შეხვდებოდნენ, მიბეგვავდნენ, მიჰკეჭნიდნენ, მაგრამ ვერ აშლევინებდნენ. ის კიდევ უარესსა და უარესს ამბობდა.

ხორნაულთ ქალები დასალაპარაკებლადაც კი არ იკარებდნენ თურმე ახლოს, ის კი ისე ლექსობდა, თითქოს იმათთან „ვნანლობო“, „ვსწორფრობო“. „ნანლობა“ ფშაურია, ფშავლებმა იცოდნენ, „სწორფრობა“ ხევსურული – ქალ-ვაჟს ერთურთი რომ მოეწონებოდათ, მეგობრობდნენ, ჩუმად ერთადაც წვებოდნენ, მაგრამ ხვევნა-კოცნის მეტი არაფერი შეიძლებოდა. „ნანლობასა“ და „სწორფრობას“ არავინ უშლიდა, მაგრამ თუ თავს შეირცხვენდნენ, ხიდის ყურზე ჩაქოღვა არ ასცდებოდათ. ჰოდა, აი, ფოთოლათ მერცხალა (გამიხარდი ფოთოლაშვილი) ტყუილ კაფიებს უვრცელებდა ხორნაულთ ქალებს.

**„კანალხევს გადავიარე, გომურ ავიღე ქირითა,
ხარი მყავ გასაკვებავი, უნდა გავკვებო თივითა.
თამარისძის ქალ ციკაი არაყს მიზიდავს მინითა.
საბძელში შამამიჩნდება, როგორც ცისკარი დილისა;
დედა დაუნყებს ძახილსა: – ციკავ, ქათმები ყივისა!
– მერცხალის მკლავზედა ვწევარ დაძეხით ჩემის ჭირითა!“**

თავადაც ცნობილმა მოლექსემ, მიგრიაულთელმა მოხუცმა მარიამ ბუთხაშვილმა („ნინიას ქალმა“) ჩამანერინა: „მერცხალასთან კანალხეველი ქალები არავინა წვებოდა, მაგრამ ისე ალექსებდა, ხევსურებს აბრაზებდა. მოიგდებდნენ კანალხევლები მერცხალას სადმე, მიბერტყავდნენ, მიაძკვდარებდნენ –

რატო გვიღიქვებ ქალებსო, ის კიდევ უარესსა და უარესს იტყოდა. თავიც რო მოეჭრათ, ლექსობას მაინც ვერ მათაშლევიანებდნენ”.

**„ნეტავ ფშაველი არა მქნა, კანალხევს მამცა აღწერა,
მანდაურ ჩოხამც ჩამაცვა, ხევსურეთულად სამწვერა.
„კუდაის ხარით მიფუდგე” - გულად დავყარე სამწვერა.
სუმელჯათ ბანზედამც დამსვა, ხან ზენ მეხედნა, ხან – ქვენა,
თამარსამც კარზე ქსელნ ედგნეს, ლელიკას მისცნა ფარტენა”.**

ეს ის ფოთოლათ მერცხალა იყო, ვისი ნიჭითაც ვაჟა-ფშაველა აღფრთოვანებული იყო და თავის პირველ კორესპოდენციებში ვისი პიროვნებითაც დაიწყო ფშავლების გაცნობა საზოგადოებისათვის.

... ჩარგლისკარის ცოტა ზემოთ დღესაც ამოდის მლაშე ვედა, რომელსაც ვაჟას დროსაც საქონელს ასმევდნენ სამარილებლად, მარილის მაგივრობას ის ეწეოდა, იმ უმარილობის ჟამს.

ერთხელაც, ერთი ვინმე მწყემსი ხორნაული ასმევდა საქონელს ამ მარილიან წყალს. ვილაც ჩარგლელმაც თავისი მორეკა და ხორნაულს უყვირა: მოაშორე წყალს შენი საქონელი, ჯერ მე უნდა დავალევინო! „მოიცა დალევენ ბარემ და მერე დაალევინო”, – უთხოვია ხორნაულს.

– კაცო, არ გეყურება რო გეუბნები! – მივარდნია საქონელს და ჯოხითა და ქვით დაუნყია გამოყრა. გაცეცხლებული ხორნაული სწვდომია ჩარგალელს, თავით ჩაუყუდებია კოდში და შიგ ჩაუხრჩვია – ვერც ეხლა გასძლებიო!

იმ კაცის თავში მიუციათ კანალხევლებს სოფ. გუდარახის ადგილი ჩარგლელებისათვის.

მოუთმენელი ხასიათის გამო ქორწილ-ნათლობებში თუ სხვა ამბებში ხორნაულს არ ეპატიჟებოდნენ ფშავლები – აგვირევენ სუფრას ციციებიო. ასეთ დროს ხორნაულები თვითონ მიდიოდნენ – მრავალრიცხოვანი სოფლიდან 25-30 თავმომწონე ახალგაზრდა ყოველთვის გამოდიოდა. აისხამდნენ ფარ-ხმალს, მოახტებოდნენ დარახტულ ცხენებს და მიიტანდნენ ძგრიალს, სადაც ქორწილ-ნათლობას დაიგულებდნენ. არაფერი ეწყინოთო, საუკეთესოდ ხვდებოდნენ, რადგან ისიც იცოდნენ, ქორწილის წესის დაყენებასა და პატივისცემაშიც ვერავინ შეედრებო-

და მათ. ხალხურ სიტყვიერებაში ცნობილია ასეთი ლექსი:

**„ხორნაულთ ახალგაზრდანი ჯღანს ინროდ ბანდევნინა,
იმათი შიშით ლეკები გზაზე ველარა დინა”.**

ვაჟას დროს ხორნაულთ ახალგაზრდებს შორის ვაჟკაცობითა და უნარიანობით გამორჩეული ყოფილა გიორგი ხორნაული. თვითგანათლებულს წიგნი ჰყვარებია და ბიბლიოთეკაც კარგი ჰქონია. შემდეგში მეტყვევებდა – „აბეშიკად” დაუნიშნავთ და მთელი ფშავ-ხევსურეთის ერთადერთი მეტყვევე ისა ყოფილა. ცხვარიც ბლომად ჰყოლია და ქონებაც დიდძალი შეუძენია. მას დუშეთიდან აუყვანია ხელოსნები და კანალხევში აუშენებინებია ორსართულიანი, მოჩუქურთმებულ აივნისანი სახლი, თუნუქით გადახურული. ეს ისეთ დროს, როცა ჟინვალს ზემოთ კრამიტით გადახურული სახლებიც კი თითებზე ჩამოსათვლელი ყოფილა. ამ სახლის სანახავად ისე მოდიოდნენ ფშავ-ხევსურნი, როგორც რალაცა საოცრების. საოცრებას აქ ისიც ემატებოდა, რომ გიორგის პირველად მოუტანია „მომღერალი ყუთი” – გრამაფონი. ამას გარდა, თბილისში იმ დროს რაც კი წიგნი და ჟურნალ-გაზეთი გამოდიოდა, ყველა გამოწერილი ჰქონია.

საფერნი ყოფილან ვაჟა და გიორგი და დამეგობრე ბუღან კიდევც. ვაჟა

ხშირად დაიარებოდა კანალხევში ძმობილთან, მისი ბიბლიოთეკით სარგებლობდა. გიორგის შვილი ვანო ხორნაული იგონებს: „ერთხელ თოვანაში მოვიდა ვაჟა, ერთმანეთი მოიკითხეს, გადაჰკრეს. ქულაჯა გაიხადა, წითელ ახალუხიანი იჯდა. წიგნებში ი. გოგებაშვილის „ბუნების კარი” იპოვა, გადაშალა და თავისი ძმის, თედოს, „ფითრი” წაგვიკითხა. მერე თავისთვის რალაცა წიგნები გადმოარჩია, მეორე დღეს წაიღო და წავიდა”.

გიორგი ხორნაულს ვაჟაზე არანაკლებ პატივისცა სცემდნენ და აფასებდნენ და არა მარტო ფშავსა და ხევსურეთში. შემოსავალი იმდენი ჰქონია, რომ მისი ფული თბილისის ბანკებში „არ ეტეოდაო”.

გიორგის სოფელ თვალისში, ბესო შანიძის დუქანში, უყიდა პარიზული კედლის საათი (ეს საათი დღესაც მის აშენებულ სახლში ჰკიდია და გასაოცარი სიზუსტით მუშაობს). საკმაოდ



გიორგი ხორნაული

ძვირიც ყოფილა – ათი მანეთი მიუცია, როცა ცხვარი სამი მანეთი ღირდა. ყიდვის დროს შესწრებია ერთი შარახვევლი ფშაველი, იმასაც მოსწონებია საათი და ბესოსთვის უთქვამს:

– არიქა, ე, მენაც მინდა ეგეთა საათი, გამამიტანე მენაცა!

– ეხლავო! – უთქვამს ბესოს, გასულა საქათმეში და მამალი შემოუყვანია, მიუნვდია ფშაველისათვის და უთქვამს, – აი, შენი საათი, დილით იყივლებს ადექი, ქანდარაზე შეჯდება და შენც დაიძინე – პარიზული საათი ისეთ კაცს უნდა, როგორიც ხორნაულია და შენ რაში გჭირდებაო?!

ვაჟას და გიორგის მეგობრობასაც მისდგომია ჩრდილი, რაკილა ვაჟა მეტყვევების წინააღმდეგ იბრძოდა. ამ დაპირისპირების გამო ერთხელ ფშაველ-ხევსურთა საერთო სალოცავში „კოპალის ქვობაზე“ დატაკებულან, ხმლები უშიშვლებიათ და ფარებიც ჩაუბლუჯიათ. მეშველიც ვერ ჩარეულა, ვერაფერი გაუწყვიათ, სანამ თვითონვე არ უთქვამთ, გვეყოფაო. ხევსბერს ვერცხლი ჩაუთლია ხანჯლის ბუნიდან არყიან თასში და ძმად გაუფიცნია, ფიც-ვერცხლი უჭმევია – სხვანაირად არ შეიძლებოდა ნაჩხუბრების ხატიდან გაშვება.

სწორედ ეს პირადი ინციდენტი იყო, რაც ვაჟამ „გოგოთურსა და აფშინაში“ გამოიყენა და რალა თქმა უნდა, თავის პოეტურ ქურაში გადამდნარი. თუმცა ვაჟა ამას არ ამჟღავნებდა. ჯერ ერთი, ძველი მეგობრობა არ აძლევდა ამის ნებას და მეორეც, მთაში ტყუილ გალექსებას დიდი მტრობა და მკვლელობაც კი მოჰყვებოდა ხოლმე. ამიტომ იყო, „იპოლიტე ვართაგავას კრიტიკაში“ ვაჟამ თითქმის ყველა პოემის ამოსავალზე თქვა რალაც, „გოგოთურ და აფშინაზე“ კი... „თუ რა პირადმა განცდამ, რა შემთხვევამ დამანერინა“ გოგოთური და აფშინა“ ან ვინა მყავს გოგოთურად, ვინ აფშინად დახატული, ეგ ჩემი საიდუმლოებაა და საფლავში თან ჩავიყოლებ, მაგას არ ვიტყვი და არც საჭიროა, რადგან თქმა არაფერს შეჰმატებს საქმეს და უთქმელობითაც არაფერს დააკლებს“.

ვაჟასა და ხორნაულს შორის ურთიერთობა კიდევ უფრო გამწვავდა მჭავენწყალთან დაკავშირებით.

იმ მჭავენწყალს, რომელიც ბეშახევაზე, არაგვის მარჯვენა მხარეს, გამოდის და დღეს „ვაჟას წყაროს“ სახელით არის ცნობილი, უხსოვარი დროიდან მთის ხალხი სამკურნალოდ იყენებ-

და. ქარებიანი და დახუთული აბაზანებს იღებდნენ, ვისაც კუჭი სტკიოდა, სვამდა და ყველას ძალიან შველოდა. ვაჟას დროსაც ბევრნი მოდიოდნენ აქ. სამკურნალოდ მოსულნი ფიჩხის ქონებს დგამდნენ და, აბაზანებისათვის წყლის გასათბობად თუ საჭმლის მოსამზადებლად, ტყეს ჭრიდნენ. გიორგი ხორნაული, როგორც „აბეშიკი“, ტყის ჭრისათვის მათ ერთ საერთო ბილეთს უწერდა. ეს თანხა ძალზე უმნიშვნელო იყო, ბევრზე განაწილებული მით უმეტეს, მაგრამ გიორგი მაინც აფრთხილებდა თურმე, მდიდრებმა გადაიხადეთო. სოფელ ლახატოელმა ფშაველმა ალექსი ხუციშვილმა გადმოცა: „ექვსის წლისა, ვიქნებოდი, მამამ გამიყოლა ვეძახე. იმოდენა ხალხი იყო, ხატობა თუ არიო, ვთქვი. ყველას თავთავისი ქოხი ედგა, ჩვენც დავჭერით თხილები და ფოთლის ქოხი დავდგით.“

მეორე თუ მესამე დღეს კარგად ჩაცმული კაცი მოვიდა ცხენით, თოფ-იარაღში იყო ჩამჯდარი. თქვეს – ხორნაულიაო, „აბეშიკიო“. კუნძზე ჩამოჯდა და ქვითარი გამოწერა. თუში მეცხვარე იყო ერთი, იმას მიაწვავდა და უთხრა: ეგ ბევრი არაფერია, მაგრამ, ვინც მდიდრები ხართ, იმათ გადაიხადეთო. აემას წილში ნუ გაიყვანთ, ექვსი შვილი ჰყავსო, – მამაჩემზე უთხრა. იმის წასვლიდან არ გაუვლია დიდ ხანს და ვაჟა მოვიდა, ქვითარი მატანინა და დახია: ჩვენი ტყისა არავის რა ესაქმებაო“.

მთაში ბევრს მუდმივად ცხვრის ხორცის და ცარიელი პურ-ყველის ჭამით, არაყის სმით, კუჭი ჰქონდა დაავადებული, ზოგიც უზომო ჯაფისაგან დახუთული იყო, დაქარიანებული. ექიმი და წამალი სად იყო. ისევ ბალახ-ბულახით მკურნალობისა და ვეძის აბაზანების იმედად იყვნენ – ერთადერთი „კურორტი“ ჩარგლისკარი იყო. იქაც ფიჩხის ქონებში აბაზანამიღებულთ ხშირად წვიმა ასველებდა, ცივდებოდნენ და უარესი ემართებოდათ. ამიტომ გიორგი ხორნაულს განუზრახავს აქ კურორტის აშენება და თავისი ფულების დაბანდება. სატყეო უწყებისაგანაც მიუღია ამის თანხმობა, ინჟინრებიც მოუყვანია, დაუპროექტებინებია და შესდგომიან მუშაობას. მოსულა ვაჟა. იმ დროს გიორგი იქ არა ყოფილა. ვაჟას გამოუყრია მუშები: მამაჩემის მამულში მჭავე წყალია, თუ ტკბილი წყალი, არავის საქმე არ არისო. ცემენტით ამოშენებული დაუნგრევი, ტყვიის მილი წაუღია და ხორნაულისათვის ორაზროვნად დაუბარებია: ამ მილისაგან

ჩემი „აინალის“ ტყვიებს ჩამოვასხამ და ერთს შენ გამოგიგზავნიო!

გიორგი ხარნაული რომ მოსულა და ეს ამბავი გაუგია, გაბრაზებულს მიუბრუნებია ცხენი და პირდაპირ ჩარგალს წასულა ვაჟასთან. „შემოსვლისას მე დამიძახა, – მამაბო ოსა პაპამ, – გაცეცხლებული იყო. მითხრა, –წამოდი, ჩვენ ლაპარაკს დაესწარი, თორემ ხომ იცი მერე კუდებს რამეს გამოაბამენო. წავედით. გიორგი ცხენიდან არ ჩამოსულა, პირდაპირ ისე მიადგა ვაჟას კარზე. ვაჟაც გამოვიდა.“

– რატომ გამიყარე მუშები, ხელი რატომ შემეშალეო? – ჰკითხა.

– იმიტომ გაგიყარე, რომ მანდ არაფერი გესაქმება. გასაკეთებელს მე თვითონ გავაკეთებ. მაგ წყლის შემოსავლით შენ კი არა, მე უნდა ვიცხოვრო, კურორტს მე ავაშენებო! შენ არა გჭირდება, მე კი მიჭირსო!

– რისი ამშენებელი ხარ, ცოლ-შვილი მშიერ-ტიტველი დაგიდის. მე ხალხისათვის მინდოდა ამეშენებინა, რალაცა დარჩენილიყო, თორემ მე არაფერი მაკლია. მე ხალხისათვის მინდოდა, შენ კი შენთვის გინდაო! – მილანძლა, შემოაბრუნა ცხენი და წამოვიდა“.

საქმე მაინც სასამართლომდე მისულა. ვაჟას თიანეთის მაზრის სასამართლოსთვის აცილება მიუცია – აქ მე ყველას ვეჯავრები, გიორგი ხორნაულს კი ყველა მიუდგებაო და დუშეთში უთხოვია საქმის გარჩევა. ჩანს, ვაჟას თავიდანვე ეეჭვებოდა ამ საქმის მოგება, გრძნობდა, რომ ტყუოდა. ახლომახლო მყოფთაგან, ახლო სოფლებიდან, რომ აღარაფერი ვთქვათ, თვით ჩარგლელებზე, მონმედ არავინ დასდგომია, ამიტომ მონმეების ძებნა შორს დაუნყია. ლევან ბოძაშვილის მოგონება:

„ეს იყო 1914 წელს. მე მაშინ 9 წლისა ვიყავი. შემოდგომის პირი იყო. ადგილზე მოთიბული თივა უკვე საბძელში გვქონდა შეტანილი.“

შუადღე იქნებოდა. ძაღლები ახმაურდნენ. მამაჩემმა შინიდან დერეფანში გამოძახა: გახედე, შვილო, ვინ არისო!.. გადავიხედე და დავინახე ცხენზე მჯდომარე კაცი. ძაღლები ცხენს გარემემო უვლიდნენ. მე ის კაცი არასოდეს მენახა, სახლისკენ მოვბრუნდი და მამაჩემს შევძახე, ვილაც უცხო კაცია, აქ მოდი-

სო. მამა მაშინვე გარეთ გამოვიდა და ცხენოსანი კაცისკენ წავი-
და, ძაღლებს დაუთათანა, ჩამოქვეითებულ მგზავრს მიესალმა.

– კაცო, რა ავი ძაღლები გყოლია, პავლე, ცხენიდან ჩამოს-
ვლის საშუალება აღარ მომცეს, – უთხრა მამაჩემს. ამ საუბრით
დერეფნის კარებთან მოვიდნენ, ცხენი მამაჩემს ეჭირა, შავი
ცხენი იყო, შუბლზე თეთრი; ასეთ ცხენს ჩვენში საღარს ეძა-
ხინ. მამაჩემმა ცხენი დერეფნის ბოძზე დააბა, მომიბრუნდა და
მითხრა: ნადი, შვილო, თივა ჩამოუტანეო! იქვე გვერდზე იყო
საბძელი, მივირბინე და ახლად შეყრილი თივა ავიღე, რასაც მო-
ვერეოდი და ცხენს დავუყარე. მოვიდა მამაჩემი, ცხენს აღვირი
წამოჰყარა და თივა კარგად მოუჩოჩა. შემობრუნდა დერეფანში
და სტუმარს ამბის კითხვა დაუწყო.

– კაცო, ვაჟავ, მაშ აქ საიდან, შენუხებული ხო არაფერზე ხა-
რო?

ამასობაში დედაჩემმა დერეფანში მდგარ ტახტზე ნაბადი
დააგო და მამამ დასაჯდომად მიიწვია სტუმარი.

– მადლობთ, პავლე, არა გვიშავ დღევანდლამდე, ვცოც-
ხლობთ კია. აბა, უსაქმოდაც არავინ გაირჯება. შარახევში მე-
ორედ ეხლა შენთან მოვედი, შარშანწინ ლახატოში ვიყავ ყრუვ-
გიორგისთან. შენი სახლი არ ვიცოდი, ბესარიონს ვიცნობ, იმან
მომასწავლა ჭალიდან, პირველად იქ მივედ.

ამ დროს დედაჩემმა საჩქაროდ ერბო-კვერცხი გააკეთა, მახ-
სოვს, ქვის ჯამში, ერთი ბოთლი არაყი, პური და ყველი გაამზა-
და. მამამ ტახტის წინ სამფეხა ჩიკა დადგა და დედაჩემმა ხონჩა
რომ გამოიტანა, მამამ ამ ჩიკაზე დადგა ხონჩა. მამაც გვერდზე
დაუჯდა ვაჟას. მე იქვე ვიდექ, დერეფნის ბოძზე მქონდა ცალი
ხელი შემოხვეული და ყურს ვუგდებდი იმათ საუბარს. მამამ
დამსაქმა: ნადი, შვილო, თუნგით ახალი წყალი მოგვიტანეო. მე
სწრაფად დავეშვი და წისქვილის წყალგადასადგებიდან შარა-
ხეულას ანკარა წყალი ამოვკრიფე და მოვუტანე. თუნგი რომ
დავდგი, ვაჟამ მითხრა: ყოჩაღ, შე მამაძაღლო ბოლშევიკო! ერ-
თი შენი ტოლი ბოლშევიკი მეცა მყავს სახლშიო. ცხადია მე ვერ
გავიგე რა მითხრა, შევედი სახლში და დედასა ვკითხე – ვინ არი,
დედავ, ეგ სტუმარიო?

– ეგ, შვილო, პოეტია, ვაჟა-ფშაველა, მამაშენი რო გიამბობ-
და გუშინა, ის მაგის დანერჩილიაო.

ისევ გარეთ გამოვედი, ისევ დერეფნის ბოძთან დავდეგ და
უფრო ინტერესით ვუყურებდი სტუმარს. ვაჟას შავი ჩოხა ეცვა,
მასრებიც შავები ჰქონდა, შიგადაშიგ აკლდა. თავზე გრძელბენ-
ვა შავი ტყავის ქუდი ეხურა. ქუდი მაიხადა და იქვე გვერდზე და-
იდო, თმა-წვერზე ხელი ჩამოისვა, უბის ჯიბეში მარჯვენა ხელი
ჩაიყო და ჭრელი პირსახოცი ამოიღო (შემოღებული იყო მთაში
წითლით ჭრელი, არშინის სიგრძე-სიგანის ნაჭრები, რომლებ-
საც პირსახოცებს ეძახდნენ), თვალისკენ წაიღო და კი არ მოის-
ვა, მიიდო, ისე შეიშრო თვალიდან მომდინარე ცრემლი. ეს პირ-
სახოცი მთელი პურის ჭამის მანძილზე უბეში აღარ ჩაუდვია,
შეიმშრალებდა გადმობრუნებულ თვალს და მარჯვენა მუხლზე
დაიდებდა ხოლმე.

პური ჭამეს, ვაჟამ სამი არაყი დალია და ძალიან ეხვეწა მამა,
მაგრამ მეტის დაღევაზე უარი თქვა.

პურის ჭამის დამთავრებისას ვაჟამ მამას უთხრა:

– პავლე, შენ კარგად იცი მე უსაქმოდ არ მოვიდოდი... ეგ
სუნიანი ხევსური რომ დაგვაჯდა თავზე და ხალხს საშუალებას
აღარ აძლევს ბუნების დოვლათით თავისუფლად ისარგებლოს...
აღბათ იცი, მე და მაგისი დავის ამბავი. ეხლა საქმე „სუდამდე“
მივიდა.. მე თიანეთიდან საქმე დუშეთში გადმოვიტანე, რად-
განაც მაგას თიანეთში ბევრი ძაღლები ჰყვანან. ეხლა „ლაზ-
ბორი“ დუშეთში იქნება მომავალ შაბათს. გიორგი ხორნაული
ცდილობს ეგ მჟავენწყალი სატყეოს მიაკუთვნოს, მე ვუმტკიცებ,
რომ ეგ წყალი ჩვენი ადგილისა და ხალხისაა. მე ყველა სოფლის
მონინავე კაცები ვნახე, აქ შენ და ბესარიონილა დამრჩით და,
აი, შენთანაც მოვედ. თქვენ „სუდში“ მოწმეთა ხართ ჩანერილე-
ბი. პავლე, ძალიან ცოტა გექნებათ სათქმელი, მარტო ის უნდა
სთქო, რომ ეგ მჟავენწყალი ჩარგლის საგოგოჭურო თემის გასა-
დევარშია, ე. ი. ჩარგლის ხევი რასაც გასდგამს, არავცს გაღმა
და გამოღმა – საგოგოჭუროაო. მეტი არაფერი.

მამა, მახსოვს, ფეხზე ადგა, მაიხადა ქუდი და ვაჟას უთხრა:

– შენი ჭირიმე, ვაჟავ, მოდი მაგ საქმეში ნუ გამრევ. მე სა-
ქონლიანი კაცი ვარ და ტყეში ვცხოვრობ. არ შეიძლება ისე ვი-
ყო, რომ რაიმე დანაშაული არა მქონდეს. კაცო, ეგ კაცი მთელი
ფშავის სატყეოს უფროსია, ერთი „პრატაკოლის“ შედგენა ჩემ-
თვის დალუპვა იქნება და მე ეხლა იმის თავი არა მაქვს, მაგას

ვეჭიდავო. მაპატიე, შენი ჭირიმე, და მე ვერ წამოვალ სასამართლოზეო.

– პავლე, შენ მოწმედ იმით დაგანერინე, იმედი მქონდა ისე იტყოდი, როგორც ჩვენი ხალხისად კარგი იქნება და ეხლა მეტი ჩარა არ არის ეს უნდა გააკეთო. ნუ გაშინებს, თუ რამე დაგინყოს, მე აქ ვიქნებიო.

მასსოვს, მამაჩემი კიდევ ეხვეწებოდა, მაგრამ ვაჟა დაჟინებით მოითხოვდა მამას სასამართლოზე გამოცხადებას. მამამ ვაჟა გამოაცილა, დაიგვიანა, ალბათ კიდევ ილაპარაკეს ამ საქმეზე. რო მოვიდა, მამამ თქვა:

– უჰ, ეს რა საქმეში გამხვია, მაგისი ხათრი ძალიანა მაქვ, მაგრამ მოწმედ მაინც ვერ წავალო.

შემდეგ გავიგე, რომ მამა მოწმედ წასულა, მაგრამ როცა დაუნახია მოწმეებს მღვდელი აფიცებდა – მას გაგონილი ჰქონია, ვინც ტყუილად დაიფიცავს, მოდგმა არა რჩებაო – ამოუღია მანეთი, სასამართლოს მაგიდაზე დაუდვია: ვიხდი ჯარიმას, თქმით არაფერს ვიტყვიო, გამოსულა გარეთ, ცხენი იქვე ჰყოლია, შემჯდარა და გამოქცეულა. უთქვიათ ეგ უფრო სიმართლეს იტყვისო, კაცი დაუდევნებიათ, მაგრამ ველარ დასწევია. ისიც გავიგე, მერე, მალევე სადღაც, შარახეულაზე შეხვედრია ვაჟას მამა. მამას მოუბოდიშებია და თან უკითხია, რა ჰქენი, როგორ გადაწყდა საქმეო?

– როგორ გადაწყდებოდა, გამამტყუნეს პ...ჭ კომბოსტოიანებმა! (ე. ი. ბორშიჭამია რუსმა მოსამართლეებმა) მაგრამ ეგ არაფერი, დედას გიტირებთ ყველას, იმთაც და თქვენცაო!

ამოჰკრა ცხენს მათრახი და გამცდაო”.

ამის შემდეგ ხორნაულმა სულ მიაწება თავი მჟავენყალს. ვაჟამ კი დადგა ფიცრის ფარდული, აბაზანებისათვის საჭირო კასრები შეიტანა და სამკურნალოდ მოსულ ხალხს იქ იღებდა. თვითონაც სჭირდებოდა აბაზანების მიღება და ფიქრობდა, ძირითადად იქ ვიქნებიო. ფული მაინც არა ჰქონდა ექიმებთან მკურნალობისა. ავადმყოფებს ქვითრებს უწერდა და მცირეოდენ ბაჟს ახდევინებდა. ვაჟას მოჯამაგირედ ჰყოლია ვიღაც უძილაური. ერთხელ მისთვის მიუცია ქვითრები და უთქვამს: გადი ბეშახევაზე, წყაროს თავზე დაჯექ და ვინც მოვა წყლის დასალევად, ქვითრები მოუხიე და ფული გამაართვიო.

არა, ეს არ იყო არც ხალხის ძარცვა, არც სიმდიდრის გროვება. ეს იყო უკიდურესად გაჭირვებული კაცის მიერ საარსებო სახსრების ძებნა. ვაჟა მიდიოდა იმაზე, რომ მომსვლელ ხალხს რალაცა გროშების ფასად მომსახურებოდა: შეშა მოეტანა, დიდ ქვაბებში წყალი ჩაესხა, გაეთბო, იქიდან კასრებში გადაეტანა, მეორესათვის წყალი შეეცვალა და ა. შ. ამაყი ვაჟა სადამდე უნდა მიეყვანა გაჭირვებას, რომ ასე დაემცირებინა თავი. მიგრიანულებმა კი სულ სხვა თვალთ შეხედეს ამ ამბავს: სამკურნალო წყალს თვითნებურად დაეპატრონა, ჩვენ ფარგლებში შემოიჭრა ჩარგლელი კაციო, ფარდული დაუნგრის და არაგვში გადაუყარეს, თვითონ ვაჟას კი მუქარა შეუთვალეს: ცალთვალა დევო, თუ არაგვს გამოლმა გამოსული დაგინახეთ, ცოცხალს არ გაგიშვებთო!

ვაჟამ ეს ამბავი სასწრაფოდ აცნობა თიანეთის მაზრის უფროსს, მაგრამ პასუხმა დაიგვიანა, პირადადაც არ მიიღო სალაპარაკოდ. ვაჟას ამ დროს მთავრობა, როგორც არასაიმედო პირს, უთვალთვალებდა. ვაჟამაც იფიქრა, ვაითუ ჩემს წინააღმდეგ რაიმე არის ჩაფიქრებულიო და მეფის ნაცვალთან აფრინა დეპეშა:

„Гударахи злоумышленники разрушили мое помещение для больных, об этом хател заявить Тионет. уездн. начальнику, не доп-устил к себе... жизнь моя в опасности. Прошу распоряжения“.

მეფის ნაცვალმა, მართლაც, არ დატოვა უყურადღებოდ ვაჟა-ფშაველას საჩივარი და თიანეთის მაზრის უფროსს დაავალა საქმის გამოძიება. თიანეთის მაზრის სასამართლომ განიხილა საქმე. მოწმეებად ვაჟას ჰყვანდნენ ისინი, ვისაც თავის დროზე წყლით სარგებლობისთვის „ბაჟი“ გადაახდევინა. საქმე ვაჟამ მოიგო და მის სასარგებლოდ მიგრიანულებს გადაახდევინეს ასი მანეთი (46, 390).

ფშავ-ხევსურეთში ყველამ იცოდა ვაჟა-ფშაველასი და ხორნაულის მტრობის ამბავი და ამას ხშირად ლექს-კაფიებში იყენებდნენ მასალად. გადმოცემის თანახმად, ცნობილ ხევსურ მოლექსეს, ლულელ ნია ქისტაურს შუაფხოსკენ მიმავალი ვაჟა ხომის ძირს დუქანში უნახია და შეუღექსებია:

**ნია: – ხორნაულმ არსად მოგასწროს
არავგს აღმე ნუ მიჰყვები,
შუაფხოს შავლილს ამბობენ
ნინ სადმე გადაეყრები.
ვაჟა: – რას დამაკლებენ ჩარგლელსა
კანალხვევლი ბრიყვები,
სულ ეგრე დანანნალებენ
ხელმწიფის აბეშიკები,
ბევრ დაუჭერავ ვაჟასა,
ე მაგისტანა ციყვები,
კიდევაც ავყრი აბჯარსა
სახლის კარამდე მივყვები.**

მთიელები, საერთოდ, ვერ ითმენდნენ თავისი თანამოძმის გადიდკაცებას, გამდიდრებას, წამოყვლელებას. თუ ვინმე ასეთი გამოჩნდებოდა, მოიშორებდნენ, მოჰკლავდნენ. ვაჟა იოლად ჩაანყნარეს, თანამდებობა არ უწყობდა ხელს, გიორგი ხორნაულს კი მთავრობაც იცავდა. მის მეტობას, ცხვარ-საქონლის სიმრავლეს და „დიდკაცობას“ ვერც ვაჟა ურიგდებოდა და ვერც თვით გიორგის თანასოფლელები, მიუხედავად იმისა, რომ საკმაოდ ხელგაშლილი ყოფილა. შობა-ახალწელს ყველასათვის საჩუქარი მიჰქონდა თურმე, სახლის ასაშენებლად უფასოდ აჭრევიებდა ტყეს ყველა გაჭირვებულს, თავისიანს. ამის გამო ბევრს ჰყვარებია კიდევ და როცა ჩუმი შეთქმულება წამოუწყიათ მის წინააღმდეგ, კანალხვევის ორმოცდაჩვიდმეტი კომლიდან ორმოცდაათს უარი უთქვამს, მხოლოდ შვიდს შეუკრეფია მანეთ-მანეთი. იმ შვიდ კაცს მოუწვევია ზენაური, ყაჩაღად გასული ხევსურები მის მოსაკლავად. ერთი ბარისახოელი ყოფილა, სულხანაური. შვიდი მანეთი უჩვენებიათ და დანარჩენ ორმოცდაათ მანეთსაც შეჰპირებიან ტყუილად. მკვლელები უთენია გაუყვანიათ გ. ხორნაულის სახლის პირდაპირ და კლდეში ჩაუსაფრებიათ. იმ დღეს გვიან ამდგარა გიორგი, ხელში აყვანილი პატარა გოგონა ეზოში გამოუყვანია. ერთ-ერთ მკვლელს მაინც დაუპირებია სროლა, მეორეს ხელი აუკრია თოფისათვის: არ ესროლო, ამ კანალხვევლთიც რა ვთქვა, ამათ მოსაცემს მე მოგცემო. ამდგარან და იქიდან ტყედატყე გადასულან კილდოვანზე.

ეს მკვლელობა რომ ჩაშლიათ, თანასოფლელთ მეორედ სხვა მკვლელები უნახავთ – გაყაჩაღებულები შარახვევლი ხთისიკა ლიქოკელი და კეველიანელი უქათ მამუკა (ბურდული), ბარისკენ ჩამოსახლებული ხევსურები. არა თმობდნენ, რადგან არეული დრო იყო, ბარიდანაც ხმა მოდიოდა-მდიდრები, თავადები უნდა მოისპონო. სპობდნენ კიდევ, ეს საზარელი კაცთა კვლა „მესამე დასელებმა“ უფრო ადრიდან დაიწყეს, ხოლო ილია ჭავჭავაძეზე ხელის აღმართვის შემდეგ, რა თქმა უნდა, აღარავის მოკვლა და მოსპობა აღარ წარმოადგენდა სიძნელეს. ასეთი ძმათამკვლელობისათვის ნაქეზებული ხალხი აღარ ეცდებოდა მოთმინებას, თავის შურისა და მტრობის გულში ჩაკვლას, თანაც თუ ეს მკვლელობები ხდებოდა დიდი საქმისათვის, კაცობრიობის ნათელი მომავლისათვის ბრძოლის ლოზუნგით. ნ. ჟორდანიამ ილიას მკვლელობაც კი სრულიად კანონზომიერად ჩათვალა, ხოლო ვინც მათ ამ საზარელი მოქმედებისათვის გამობდა – რეაქციონერებად. აი რას წერდა ის ილია ჭავჭავაძის დაკრძალვიდან ერთი თვის შემდეგ სოციალ-დემოკრატების გაზეთში – „ჩვენი გზა“. „როგორც ჰხედავთ, მთელი ეს ბრალდება ეხება ქართველ სოციალ-დემოკრატებს. ვთქვათ: ყველა ეს მართალია, ვთქვათ სოციალ-დემოკრატების მიერ მომზადებულმა ნიადაგმა დაბადა ეს მკვლელობა, მერე ამისთვის დასაგმობია თვით ნიადაგი?.. ამ ნიადაგზე აღმოცენდა კავკასიის რევოლუცია, მთელი ახალი ისტორია, და თქვენ გსურთ ყველა ეს უკუაგდოთ, დაგმოთ იმიტომ, რომ სადაც ხე იჭრება იქ ნაფოტებიც ცვივა? დიდმა რევოლუციამ სიკვდილით დასაჯა დიდებული ქიმიკოსი ლავუაზიე, მარა ამიტომ რევოლუცია არავის დაუგმია, გარდა რეაქციონერებისა“.

ამრიგად, ერთი ნაფოტი იმ დიდი ხის ქრაში, რომელსაც საქართველო ერქვა, გიორგი ხორნაულიც აღმოჩნდა. სხვა მდიდრები, ბევრი ცხვრის პატრონი ხალხი, შემდეგში მიაყოლეს.

ეს ვაჟას სიკვდილის მეორე წელს მოხდა, 1916 წლის გაზაფხულზე. გიორგი ხორნაული ჩვეულებრივ ჩავიდა შირაქში თავის ცხვრის ფარების გამოსაცილებლად. მშვიდობით იმგზავრეს ფშავის ხევამდე, თვალვიამდე. იქ ბესოს დუქანში სუფრა გააშლევინა, გაზაფხულისა და ცხვრის მოსვლა დაალოცვინა ყველას, ვინც იქ შეესწრო. სიზმარი ჰქონია ცუდი ნანახი და ისიც

უთქვამს, სახლამდე ვერ ავალწევო. დუქანში საეჭვო ადამიანები გამოჩენილან და საეჭვოდვე გამქრალან. უშალეს თურმე წასვლა, მაგრამ არ დაიშალა. ცხვარს წინ წაუძღვა. ცხენი აღვირით მიჰყავდა. ბუსნის ქალას ტყიდან ესროლეს. პირახვეულს ჩამოურბენია უქათ მამუკას თოფის დასატაცებლად და წამით დაშტერებია მომაკვდავს. მერე უთქვამს: ლამაზი ვაჟკაცი ყოფილიყო, ადრე რომ მცნობოდა, მოსაკლავად არ გავიმეტებდიო. გიორგი ხორნაულის სიკვდილზე ხმით ნატირლის კილოზე ლექსიც არის ნათქვამი, რომელიც პირველად ვახტანგ კოტიტიშვილმა შეიტანა თავის „ხალხურ პოეზიაში“:

**„ლომო, შე ლომის მოკლულო, ბუსნის ქალაის პირსაო,
ვინ შაგილება მხარ-ბეჭი წითელი ატლასითაო,
ვინ გაგიმეტა სათოფედ, პატრონი ბევრი ცხვრისაო?
ლამაზად დაგიტირებდი ხათრი არ მქონდეს ქმრისაო“.**

გიორგი ხორნაულიც ვაჟა-ფშაველასავით ლამაზი ვაჟკაცი ყოფილა. იგი ცოლ-შვილიანი თავის სოფელს, ქორიათ მზექალას, ჰყვარებია. ისიც ლამაზი ქალი ყოფილა, ვაჟკაცური. საქონლის სამწყემსოში თოფი დაჰქონდა თურმე. გიორგი ხორნაულის მოკვლის ამბავი კანაღხევის ქალაზე სამწყემსურში ნამყოფისთვის უთქვამს ვილაცას. მოუტრიალებია თოფითოფს ზიდავდა თურმე, და გულში დაუკრია, თუმცა ცოცხალი როგორღაც გადარჩენილა და მერე მიაგრიაულთაში გაუთხოვებიათ.

აი, ასეთი პიროვნება იყო ვაჟას „ბლოელ აფშინას“ პროტოტიპი გიორგი ხორნაული და არა ისეთი მხდალი და გაიძვერა, როგორადაც წარმოდგენილია ვაჟას შესახებ არსებულ ზოგიერთ გამოგონილ „მოგონებაში“.

საქვეყნო გულისტკივილი

მთაში გამომწყვდეულ, გლეხურ საქმეში ჩაბმულ ვაჟა-ფშაველაზე ისეთი შეხედულება ჰქონდა ბევრს მაშინაც და შემდგომშიც, თითქოს ის რომანტიკული, ცხოვრებით გალალეული არწივივით ნავარდს სცემდა მალლა ცაში, დღენიადაგ ფანდურზე დამლეროდა და ქვეყნის ავ-კარგი აღარ აინტერესებდა, არაფერს კითხულობდა, არაფერში ერეოდა. მართლაც, ისეთ პირობებში მყოფი კაცისაგან მოულოდნელი იყო კონტაქტების შენარჩუნება საქვეყნო საქმეებთან. სინამდვილეში კი ვაჟას არასდროს შეუსუსტებია კავშირი ბართან, ყოველთვის ფხიზლად ადევნებდა თვალს მოვლენებსა და ფაქტებს, ყველაფრის საქმის კურსში იყო, ყველას და ყველაფერს ეხმიანებოდა ლექსებითა თუ სტატიებით. ლექსებით გამოეხმაურა ბარათაშვილის ნეშტის გადმოსვენებას განჯიდან 1893 წელს, იმავე წელს ალ. ყაზბეგის გარდაცვალებას, 1907 წელს ილიას მკვლელობას და სხვ. ვაჟას გულს უკლავდა სამშობლოს რჩეულ შვილთა მწარე ხვედრი, მაგრამ განსაკუთრებით მწარედ განიცადა თავისი „მხრისა“ და თავის მსგავს სიდუხჭირეში მყოფი კაცის აღსასრული. კაცისა, ვინც მოძულეებული ჰყავდა შინაურსაც და გარეულსაც, ბინა არა ჰქონდა და საჭმელად პური. დის ქმარი, „დიდი კაცი“ შინ არ უშვებდა, როგორც „გიჟს“. დავით კლდიაშვილი ალ. ყაზბეგისადმი ასეთი უსულგულო დამოკიდებულების გამო წერდა: „ბევრი უსამართლოდ ექცეოდა სანდროს და ხანდახან ცხარე ცრემლითაც ატირებდნენ მას“. ვაჟამ კი სისხლ-ცრემლიანი ლექსი მიუძღვნა:

**„შვილო ტანჯულის ქვეყნისავე, სული დაჰლიე ტანჯვითა,
მიუხვალ მამა-პაპათა, ამოღებულის ხანჯრითა,
ცრემლად დამდნარის გულითა, დაღლილი მტრისა ჯავრითა!..“**

ვაჟა-ფშაველა ასევე ეხმაურებოდა ან მონაწილეობას ღებულობდა გამოჩენილ ადამიანთა საღამო-იუბილეებში, თუკი შეატყობინებდნენ, მიიწვევდნენ. მას მონაწილეობა მიუღია შიო მღვიმელისათვის გამართულ „საბავშვო დილაში“, ე. ჩერქეზიშვილის „საბენეფისოდ გამართულ საღამოზე“ და სხვა, მაგრამ

მათგან მაინც ყველაზე ალსანიშნავია ვაჟას მონაწილეობა აკაკი წერეთლის იუბილეში.

1908 წლის 7 დეკემბერს ქართველმა ხალხმა დიდი ზარ-ზეიმით გადაიხადა თავისი საყვარელი პოეტის სამწერლო-საზოგადოებრივი მოღვაწეობის 50 წლის იუბილე. ეს საერთო სახალხო ზეიმი მარტო საქართველოში კი არა, მთელს რუსეთის იმპერიაში აღინიშნა. თბილისში გამართულ ზეიმში მონაწილეობის მისაღებად საიდანღა არ ჩამოვიდა დელეგაციები, ხალხი. წესით ვაჟაც აქ უნდა ყოფილიყო, მაგრამ ეჭვობდნენ, აკაკისაგან განწყენებული შეიძლება არც ჩამოვიდესო. ვაჟა დიდბუნებოვანი ადამიანი იყო და პირად, წვრილმან გრძნობებს არ აჰყოლია. მას არ შეეძლო თავყვანი არ ეცა ერის საამაყო პიროვნებისათვის, არ ეზეიმა სამშობლოს ზეიმით. ვაჟა ჩამოვიდა, მიუხედავად იმისა რომ ზამთარი იყო. მთაში ამ დროს თოვლისა და ყინვების გამო ხშირად გზებია ჩაკეტილი, ვინრო, ყინულიან ბილიკებზე ცხენ-კაცის გადაჩეხვა იოლად მოსალოდნელია, არაგვის სიო ძვალ-რბილში გამტანია, ცხვირ-პირისა და ხელფეხის მომზრობი. ცხენზე ვერ გაძლებს კაცი და ვერც შეჯდება, ფეხით უნდა იაროს, თუ თავისი თავის სიკეთე უნდა, ცხენი კი აღვირით ატაროს. ვაჟასთვის ეს ორმაგად ძნელი საქმე იყო, რადგან იმ დროს ხშირად ავალობდა.

თავი გადადო ვაჟამ, რადგან მისი სიძნელეებისა და გასაჭირის გამგები არავინ იყო.

ს. მშველიძე იგონებს: „მე, მიხა და თედო რაზიკაშვილებმა ერთი თვით ადრე დავიკავეთ ბილეთები შიო მღვიმელის ხელით. ჩავედით ტბილისში სანდრო რაზიკაშვილის ოჯახში, მაგრამ ძალიან გულნატკენები დავრჩით, რომ ვაჟა არ დაგვხვდა იქ, თანაც გვითხრა სანდრომ, რომ ვაჟა არ ჩამოვაო, ამან უფრო მოგვიკლა გული. რას ვიზამდით, დავემორჩილეთ ბედს და შევუდექით ვახშმის ქამას... ღამის თორმეტი საათია, ჩვენ ყველანი ღვინით შეხურებულნი ვართ. კარებზე ვილაცა აკაკუნებს. სანდროს ცოლი კარებს მივარდება და გააღებს. მობრუნდება და გვეუბნება: მაზლიაო... ვაჟას ჩამოსვლამ ძალიან გაგვახარა ერთის მხრით, მაგრამ მეორე მხრით კი მოგვიკლა გული: გვითხრა, რომ აკაკის მე ძალიან პატივს ვცემ, მაგრამ იუბილეზედ კი არ წამოვალო. დავიხოცენით ყველანი, ჩავქინდრეთ თავები. თედო მაინც ჭეჭს:

გათენდეს, წამოვა, აზრს შეიცვლისო! ვაჟა მაინც უარზეა. მე მომაგონდა, რომ ვაჟა ნაწყენი იყო აკაკისაგან...

გათენდა, მეორე დღესაც უარზე იყო. ჩვენ ვუთხარით, ნუ წავალთ, ისე გავიაროთო. როგორც იყო წამოგვეყვა. სახელმწიფო თეატრს აუარებელი ხალხი ეხვევა, ვინ იცის, რომელი კუთხიდან არ იყვნენ ჩამოსულები. ვაჟა ჩუმად არის. ჩვენც ჩუმად ვართ. გავცდით თეატრს, შევხვდით სამსონ ფირცხალავას. სამსონს ძალიან გაეხარდა ვაჟას ჩამოსვლა. დიდი ხვენის შემდეგ დავიყაბულეთ, ბილეთიც ვუშოვეთ საჩქაროდ და შევედით თეატრის კარებში.

დაიწყო მილოცვები, მაგრამ გვწყინს, რომ ვაჟა არა ჩანს. პირველ ანტრაქტზე მივედით ვაჟასთან და ვუთხარით: რას შვრები, ვაჟა, მთელი ერის დღესასწაულია, ნუთუ შენ არ უნდა აღნიშნო შენი აქ ყოფნა უბრალო რამით მაინც-თქო.. ვაჟამ მითხრა, კარგი, აბა, ავიდეთ ბუფეტში და ერთი ბოთლი ღვინო დამალევინეთ, რომ მუზა მოფრინდესო. მე ხუმრობით ვუთხარი ფული არა მაქვს-მეთქი.

– ვაი, თქვე ბეჩავო ჩინოვნიკებო! მაშ, მოიტათ ქალაღი.

უცებ ვილაცამ ამოიღო უბის წიგნაკი და მიაწოდა, მისცეს ფანქარიც და ჩემ ზურგზე დაწერა ის ლექსი...

სცენაზე ვაჟას გამოჩენამ ხომ სულ გადარია ხალხი; ხანგრძლივი ტაში და ოვაციები ვაჟას, ყვავილების სროლა, აღფრთოვანება და სიყვარული” . (46, 327).

ვაჟა დიდი მგზნებარებით ეხმაურებოდა ყოველ აქტუალურ საკითხს, მაგრამ მის პუბლიცისტურ წერილთა უმეტესობა მაინც ეროვნულ საკითხებს ეხება, რადგან ერი და ერის სიყვარული თავისი „კაცობის გვირგვინად” მიაჩნდა. მარტო კალმით არა, ვაჟა ყოველთვის მზად იყო საქმითაც გამოსდგომოდა ქვეყანას, სადაც კი ხელი მიუწვდებოდა, სადაც კი რამეს ეკითხებოდნენ.

ვაჟამ დიდი ამაგი დასდო შირაქში მთიელთა დასახლების და შირაქის შენარჩუნების საქმეს. შირაქის ველ-მინდვრები ოდითგანვე ქართველ მთიელთა – თუშ-ფშავ-ხევსურთა და მთიულ-გუდამაყრელთა – საზამთრო საძოვრებად ყოფილა. აქ იზამთრებდა ხოლმე მათი ცხვრის ფარები. შირაქში დასახლება



ვაჟა-ფშაველა ლეო და დათიკო ცისკარიშვილებთან

არსად იყო და არც რაიმე კვალი არსებობდა. შემდეგში სახლებისათვის საძირკვლების გაჭრის დროს აღმოჩნდა დაახლოებით პირველი საუკუნის დროინდელი ქართველთა სამოსახლოების კვალი, სამარხები.

1899 წელს მეფის მთავრობამ განიზრახა შირაქში ჩამოესახლებინა რუსები ისევე, როგორც ეს საქართველოს სხვადასხვა კუთხეებში მოიმოქმედა.

მეფის რუსეთი გარუსების, ადგილობრივთა რუსებში აღრე-

ვის მიზნით სხვა ხალხებშიც აკეთებდა ასეთ ოპერაციებს.

გარდა რუსებისა, ევროპიდან და აზიიდან ჩამოყვანილ კოლონისტებსაც ასახლებდა საქართველოში – მაგალითად, გერმანელებს.

შირაქის ნაყოფიერი მიწა რომ სამოსახლოდაც კარგი იყო, ეს მთიელებმაც იცოდნენ, მაგრამ არა სახლდებოდნენ იქ, რადგან საზამთრო საძოვრად უნდოდათ. ესლა კი შეიქმნა საფრთხე შირაქის მთლიანად დაკარგვისა. ამას კი სჯობდა, იქ ისევე მთიელები დასახლებულიყვნენ.

თავის სამოსახლოდ ვერ იმეტებდნენ შირაქს მთიელნი, „სამაგიეროდ მეფის რუსეთი აქ ასახლებდა შიგა გუბერნიებიდან მოსულებს (მან რუსების დასახლება ჯერ კიდევ 1899 წელს დაიწყო). აგრეთვე შირაქში დაბანაკებული ჯარის ნაწილის ჯარისკაცებს სამხედრო სამსახურის გავლის შემდეგ, რის დამადასტურებელია ის, რომ დღეს აქ მცხოვრებ რუსებს ქართველები „ასტავნოის“ („რიყითვნრლ“) უწოდებენ (19, 23).

მთავრობის განზრახვას ყური მოჰკრა ილია ჭავჭავაძემ. მან ჩუმად გაანდო ეს საქმე ვაჟა-ფშაველას და სთხოვა, ასევე ჩუმად ჩაეგონებინა მთიელებისათვის შირაქში დასახლებულიყვნენ. მთიელებმაც რაკი იგრძნეს მოსალოდნელი საფრთხე, გადაწყვიტეს, უმალ თავად დაეკავებინათ შირაქი და ნელ-ნელა იწყეს დასახლება. გაჩნდა პატარა სოფლები – ზემო ქედი, ქვემო ქედი, არხილოს კალო. მეფის მთავრობას არ ესიამოვნა ქართველ მთიელთა თვითნებობა, მისი პოლიტიკის საწინააღმდეგო მოქმედება და განიზრახა მათი იქიდან აყრა. ამასვე ითხოვდნენ თუშებიც, რომელთაც მხოლოდ ცხვრის საძოვრების აღდგენა უნდოდათ და სხვა არაფერი. მათ მტრობა გამოუცხადეს იქ დასახლებულ ხალხს და ჰაერში უკვე სისხლის სუნი ტრიალებდა – შეტაკება იყო მოსალოდნელი. რამდენიმე მოთავე ქურდულად მოკლეს, რამდენიმეს წამოსვენება მოუხდათ მთაში. დიახ, მთაში მიასვენებდნენ შირაქში მოკლულსა თუ გარდაცვლილს, თავიანთ საგვარეულო სასაფლაოზე, თავის წინაპართა გვერდით ასაფლავებდნენ. უცხო მიწაში ჩასაფლავად, „გადასაგდებად“ ვერ იმეტებდნენ თავის მკვდარს, მით უმეტეს, რომ არ იყო გარკვეული დასტოვებდნენ მათ აქ, თუ აჰყრიდნენ. შირაქიდან ფშავამდე მკვდრის ატანას კი ცხრა-ათი დღე სჭირდებოდა. ამ

ხნის მანძილზე, განსაკუთრებით ზაფხულში, მკვდარი მეტად იხრწნებოდა; ზამთარში კი წარმოუდგენლად დიდ სიძნელეებთან იყო დაკავშირებული თოვლითა და ზვავებით ჩაკეტილ ბილიკებსა თუ მთებზე საკაცის ზიდვა.

ცალკე სიძნელემ, ცალკე კიდეც იმან, რომ მკვდართ იქ დამარხავად მიწას მყარად ვერ ემკვიდრნენ, ჩააგონა ფშავლებს, რომ იქ დამარხვა იყო საჭირო. ვილაცას უნდა გაეწინრა თავი თუ თავისი მკვდარი. და, აი, ხვნის დროს თოფი დაჰკრეს შირაქში დასახლების ერთერთ მოთავეს პავლე იანვარაშვილს. მან სულთმობრძავმა ანდერძი დატოვა: „აქ დამმარხეთ! ჩემი ცოდვა ჰქონდეს, ვინც აქედან ფშავში მათრიოს. სანამ აქ არ დავიმარხებით, შირაქს ვერ დავემკვიდრებით!“ შეუსრულეს ანდერძი და პირველი ის დამარხეს იქ. მას შემდეგ სხვებიც დაასაფლავეს და სოფელმა ფესვი მოიკიდა, დაემყარა მთიელი შირაქს. მერე უფრო გულდაგულ დაიდრნენ მთიელნი შირაქისაკენ. მთაში უპურობით შეწუხებულებმა გაიგეს შირაქის მიწის ბარაქიანობა და რალა დაიჭერდა. ვაჟა წერდა: „ფშაველიც სთესავს ოთხი-ხუთი წლის გადალალულ-გადაბრუნებულს მიწას და წესისამებრ ჰმკის, ლენავს, მაგრამ მაინც ისევ ნახევრად მშიერია, რადგან უღონო, გამოლალული მიწა უხეირო, მცირე მოსავალს იძლევა.

აი, ეს გახლავთ მიზეზი, რომ აქაურებმა მიაშურეს ხამს და ნაყოფიერს შირაქის მიწებს და განა მარტო ფშავლებმა, არა, მთის ხალხი გამგელებული მიიწვეს შირაქისაკენ, როგორც, მაგალითად, მთიულები, გუდამაყრელები, მოხევენი და სხვა”,

მაგრამ თუშებსა და ფშავლებს შორის ბრძოლამ დიდხანს გასტანა. თუშების მხარეს იყო მთავრობა, ძალა, ფული და გამოცდილი ადვოკატები. ფშავლების მხარეს კი – ქართველი ინტელიგენცია, სიმართლე და ვაჟა-ფშაველა. იმართებოდა სასამართლო პროცესებიც, ერთ-ერთი ასეთი პროცესის დროს, როცა თუშების ნაცადმა ადვოკატმა, თავადაც თუშმა, სანდრო ცისკარიშვილმა, მთელი თავისი იურიდიული ცოდნა და გამოცდილება მოიშველია და საქმე თუშთა სასარგებლოდ გადახარა, ვაჟამ უკიდურეს ძალას მიმართა: ბარაქიანი სილა შემოჰკრა ადვოკატს. აქვე ისიც წამოაძახა თუშთა დამცველს, ქრთამად რამდენი ჰქონდა აღებული. ამით საქმე თავიანთ სასარგებლოდ შემოაბრუნა, მაგრამ ბიუროკრატიულ ქვეყანაში სიმართლის

პოვნა ასე ადვილი არ იყო. ამიტომ ვაჟას ხშირად უხდებოდა ჩასვლა შირაქში, წერილების გამოქვეყნება პრესაში, ბრძოლა...

რაკი მართალი გზით ვარაფერი გააწყვეს, მოწინააღმდეგენი ახლა ცილისწამებაზე გადავიდნენ, შეეცადნენ ვაჟა შირაქის საქმისათვის ჩამოეცილებინათ. გაზეთში „ნმა კახეთისა“ 1914 წელს გამოაქვეყნეს წერილი, სადაც ცილი დასწამეს ვაჟას, თითქოს ქედელებისაგან ათასი მანეთი აეღოს ქრთამად, საქმისათვის კი არ მიეხედოს. ამ წერილის ამბავი ქვემო ქედიდან მიწერილი კერძო წერილიდან გაიგო ვაჟამ და „სახალხო გაზეთის“ რედაქციას „დაგვიანებული პასუხი“ გაუგზავნა. ამ საქმის ვითარების გასარკვევად დაწერილ კორესპონდენციაში ვკითხულობთ: „ქედში მთის ხალხის ჩამოსახლებით დიდი საქმე გაკეთდა, მეორე საქართველო შეიქმნა თითქმის. ვისაც კი ჩვენგან იოტისტოლა შეგნება აქვს, სიყვარული თავისი ხალხისა, ამ ფაქტს სიხარულით უნდა ეგებებოდეს. საუბედუროდ, ყველა არ მიეგება სიხარულით და ზოგიერთი მოხელე ქართველთაგანი სწორედ ავაზაკურად ეპყრობოდა ქედელებს. უწოდებდა მოძალეებს (თავის ნებით დასახლებულთ), ჰყველფდა, ჰღვერავდა და ბევრი გადმოსახლებული იძულებული გახდა, ისევ მთაში დაბრუნებულიყო. ჩვენდა საუბედუროდ, ზოგიერთი მოხელე დღესაც ამ გზას ადგია, ხოლო არ ვიცი ამისთანა ქართველმა როგორ უნდა ატაროს ქართველის სახელი?

შარშან მკათათვეში რამდენიმე წერილი მივიღე ქედიდან; მთხოვდნენ იქ ჩასვლას; ბოლოს წერილებს კაციც მოჰყვა, სახელდობრ ბაზიერ ბაიაშვილი. იმან მომიტანა 30 მან. საგზაო ფული და თითქმის ძალიძალად წამომიყვანა: ეგები რამ გვიშველოო. რისთვის, რა საქმეზე? აი სწორედ ამ საქმეზე წერა და საუბარი მეზარება. მეზარება, რადგან საქმეს ძმათა მოძულეების სუნი უდის, არ არის საქვეყნოდ გამოსატანი. ამისთანა საქმე არ უნდა გახდეს თავის დღეში საგაზეთოდ, არამედ უნდა შინაურულად გამოკეთდეს. ხომ მოგეხსენებათ, საქვეყნოდ გატანილ სახალხუს პერანგიც აღარ გამოსდის. დღეს რა გაენყოფა, უნდა გავიხსენო ის უმსგავსი საქმე, რამაც მე ძალაუნებურად ქედელების ვექილად გამხადა.

თურმე თუშებს არ გაეშოთ სათიბად ქედელები შირაქში, გათიბული თივებიც ჩამოერთოთ ადმინისტრაციულის წესით და

საჯაროდ გაეყიდათ. ამ ნიადაგზე უნდა შეტაკება მოეხდინათ და გარეშე პირებს ხელი მოეთხოვოთ. ღვთის მოწყალებით ეს არ მოხდა და დღეს ქედელეებს თიბვის ნება აქვთ შირაქში...

შარშან შირაქში 300-400 ვერსის სიშორიდან სამჯერ მომიხდა ჩასვლა, ხან ცხენით, ხან ფეხით. წელს მეოთხედ ჩავედი. ალბათ აქედან წარმოსდგა ის ცილისნამება, ვითომც მე ფული გამომერთოს ქედელეებისათვის და კი აღარ ჩამოვსულიყავი?

შარშან პირველად რომ ჩავედი ქედში, ხალხს ჩემთვის დიდძალი ფული დაემზადებინათ – 2400 მან. მაგრამ მე ამ ფულიდან მხოლოდ 800 მანეთი ავიღე და დანარჩენი ისევ უკან დავუბრუნე. ავიღე იმიტომ, რომ თავად ღარიბი კაცი ვარ და სხვაც რომ არა ვსთქვათ, გზას, მისვლა-მოსვლას დიდი ხარჯი სჭირდება.

ჩემს მოკამათე „მეთვალყურეს“ კი იმას მოვახსენებ პირველად და უკანასკნელად: მე რომ ხალხისათვის ფულების დატყუვნაზე მევლო, ს. ჩარგალში საქათმეში არ ვიცხოვრებდი და დაგლეჯილი ჩოხითა და ჩუსტებით არ ვივლიდი, ფიზიკური შრომით ხელეებზე და ზურგზე ტყავი არ მექნებოდა გადამძვრალი”. (46, 375-380).

ვაჟას ბრძოლამ და ამაგმა დიდი შედეგი გამოიღო. დღეს საქართველო წარმოუდგენილია „პურის ბელად“ წოდებული შირაქის გარეშე; საზამთრო საძოვრებიც ბევრია და ზვრებითაც განთქმულია. ამიტომ ლოცულობენ შირაქელნი დღესაც ვაჟას სახელს და ყოველ წელს ზეიმობენ „ვაჟაობას“.

ვაჟა და არტისტობა?

ვაჟა-ფშაველას მრავალმხრივ ინტერესთა სფეროში იყო მოქცეული ქართული თეატრიც, დრამატურგია. მას ახლო მეგობრული ურთიერთობა ჰქონდა გამოჩენილ მსახიობთან ვასო აბაშიძესთან, დუშეთში დაბადებულ-გაზრდილ კაცთან. ვასო აბაშიძის მეშვეობით იგი დაუმეგობრდა ვალერიან გუნიასაც. თბილისში ჩამოსვლისას აუცილებლად მოინახულებდა ხოლმე მათ, წვეულებაშიც მათ გარეშე არსად წავიდოდა და თეატრშიც ყოველთვის დადიოდა. 1889 წელს, როცა ვასომ გააცნო თავისი ოჯახი, თავისი მომნიშნავი მეუღლე მაკო საფაროვა, რომელ-

საც ასევე თურმე ენატრებოდა ვაჟას გაცნობა, ვაჟა უფრო მეტად ჩაერთო თეატრის ცხოვრებაში. სწორედ მათ მისცეს ბიძგი, რომ იმავე წელს ზედიზედ დაენერა და გამოექვეყნებინა მცირე ზომის დრამატული ნაწარმოებები: „სცენა მთაში“ (ხევსურების ცხოვრებიდან), „სცენები“ (სცენა ხევსურეთში, სცენა ბარში).

ამ „სცენებით“ მაშინ არავინ დაინტერესებულა. თვით „მოკვეთილიც“ კი, ქართული დრამატურგიის მშვენიება, ვაჟას სიცოცხლეში სცენაზე არ დადგმულა. მაშინ თუ ბევრს ვაჟას მთლიანი შემოქმედება ეთნოგრაფიულ ღირსებად მიაჩნდა, ჩვენს დროში ეს მცდარი შეხედულება „სცენებს“ მაინც შეუნარჩუნეს. აი, რა წერია ჩვენი დროის ყველაზე ავტორიტეტულ, ასე ვთქვათ, კანონდებლურ გამოცემაში – „ქართული ლიტერატურის ისტორიის IV ტომში“: „ვაჟა-ფშაველას „სცენები“ სიუჟეტისა და მოტივების მხრივ არ სცილდებიან ეთნოგრაფიულ-საყოფაცხოვრებო ეტიუდების ჩარჩოებს. ავტორს არ უცდია ამ „სცენებში“ რაიმე ღრმა პრობლემის ან თემის გაშუქება“... (44, 486).

ასე მარტივად არის გაგებული ეს „სცენები“. ჩვენს ცნობილ მკვლევართაგან ზოგს ასე ესმის, ზოგი კი საერთოდაც არ ახსენებს ამ „სცენებს“. სინამდვილეში კი ვაჟას აქ, ისევე როგორც სხვა ყველა თავის მხატვრულ ნაწარმოებში, ღრმა ჩანაფიქრი აქვს, „ღრმა პრობლემა“, რომელსაც ჩაკვირვება და ჩანვდომა უნდა. ვაჟამ კარგად იცოდა, რისთვის იდგმება სცენაზე სპექტაკლი, რა როლი ეკისრება მას მაყურებლის მიმართ. უშინაარსო ეთნოგრაფიული სცენის წარმოდგენით ხალხისა და სცენის მოცდენა არასაკადრისი იქნებოდა.

მაინც რა ჩანაფიქრი აქვს ვაჟას ამ „სცენებში“, რომლის ამოკითხვაც ასეთი შეუძლებელი შეიქმნა? რა ხდება „სცენაში“: ორი თანასოფლელი ხევსური აბიკა და მამასწვერა „მთას“ უთიბავენ ფშაველ მამუკას. ღამე მამასწვერას ავსული, დევი მოეჩვენება და აბიკას ურჩევს, დასაძინებელი ადგილი შევიცვალოთ, ცუდ ადგილას მოვხვდითო. შელაპარაკებიან, საცერულებით ეცემიან ერთმანეთს და დასისხლიანებულებს შემოსწრებული მამუკა გააშაველებს. შორიდან კი ისმის რუსების ზარბაზნების ხმა. თურმე იმ ხმას დაუფრთხია ბარიდან დევები და მთას შემოხიზნვიან. ესენი არიან, რომ ხალხს რევენ და ძმას ძმას აკვლევინებენ. ამიტომაც არის, რომ ვერ გაუგია მამასწვერას: „ქვე რა

გვექონდ დღეს საშუალოარი! დასწყისს ღმერთმა, დევ-ეშმაკთ გადაგვლახეს, იმათ ქვე გვაქნიეს შუღლი”.

რუსთ ხელმწიფესაც რაღაც ეშმაკეული გზით მოელიან თიანეთს – „ღურბლით მოვალისავე, რკინის ყუთჩი იჯდებისავე”.

ავტორიტეტულ „ტომეულეში” კი ვკითხულობთ: „ვაჟა-ფშაველამ ამ სცენაში დიალოგების მეშვეობით გამოხატა ის ფაქტი, რომ ბევრ მთიელს „უბრალო კუნძი დევად ერგენებოდაო”...

მეორე „სცენები” (ფშაველის ცხოვრებიდამ) ასევე არასწორად არის „შეფასებული”. თურმე ისიც „არ სცილდება საყოფაცხოვრებო მოტივის სფეროს, ლალატის ცნების ჩვეულებრივ გაგებას”...

მცირე პიესაში მოთხრობილია, თუ როგორ დასაჯა ფშაველმა შალვამ ცხვირის მოჭრით მოლაღატე ცოლი, ხოლო ცოლის საყვარელი, ბარელი კაცი, ხანჯლით მოკლა. მერე კი თავისი ფეხით მიდის პრისტავთან და ეუბნება: „ცოლი გავასახიჩრე და მისი კურო კი მოგვკალ... გთხოვთ დამიჭიროთ... მართალია, ეხლა ძველი დრო აღარ არის, რუსობაა, მაგრამ ვერ მოვითმინე... მამა-პაპის ჩვეულება ეგ იყო ჩვენი”... პრისტავი „დათვს” უნოდებს მამაპაპური წესის აღმსრულებელ ფშაველს და ჩაფარს უბრძანებს, გათოკეო – საციმბიროდ გაამზადებენ.

ამ „სცენებში” დაყენებულია ის დიდი სოციალურ-ეროვნული საკითხი, რაცა დგას ილია ჭავჭავაძის „მგზავრის წერილებში”, ალ. ყაზბეგის მთელ შემოქმედებაში, მიხ. ჯავახიშვილის „არსენა მარაბდელში” და სხვაგან – ქართველთა ადათ-წესების შეუგუებლობა რუსთა მიერ ძალად თავს მოხვეულ კანონებთან. ეს პრობლემა, რომელზედაც ვაჟას იურიდიულ ინტერესებთან დაკავშირებით გვექონდა საუბარი, უმნიშვნელო არ იყო. პირიქით, ერთ-ერთი მტკივნეული საკითხი იყო იმ დროისათვის და გარკვეულწილად ასეთადვე რჩება დღესაც.

აქვე უნდა აღინიშნოს ისიც, რომ ამ მცირე ზომის ნაწარმოებებში მჭლავნდება ყველაზე მეტად ვაჟას გასაოცარი იუმორი. ამ სცენებში, ამ ჟანრში მიეცა ვაჟას საშუალება ფშაური დახვეწილი თუ ილიასეული ღრმა იუმორის გამომჟღავნებისა.

თუ დღეს ამდენად გაუგებარია ვაჟას „სცენები” ჩვენი მკვლევრებისათვის, რაღა გასაკვირია, რომ ისინი ვერ გაეგოთ

მაშინ, როცა ვაჟას შემოქმედებისა ბევრი არაფერი ესმოდათ საერთოდ. ამიტომაც სცენისათვის ისინი არავის შეუმზადებია. რაკი „სცენები” ვერ გამოიტანეს სცენაზე, გადაწყვიტეს, თვით ვაჟა გამოეყვანათ. ჯერ ერთი, რომ იმ ხანებში მზადდებოდა დასადგმელად პიესა „ხევსურთა ქორწილი” და მთიელის როლში მთიელს რომ ეთამაშა, უფრო დამაჯერებელი იქნებოდა (იმ ხანებში გამოაქვეყნა ვაჟამ წერილი „ხევსურული ქორწილი”, ალბათ, პიესაში დაშვებულ უზუსტობათა კორექტირებისათვის.), მეორეც, ვაჟა-ფშაველა-მსახიობი მაყურებელს მოიზიდავდა და ყოველთვის გაჭირვებულ ქართულ თეატრს ცოტა შემოსავალს გაუზრდიდა. ეს ვასო აბაშიძეს მოსვლია აზრად და ვაჟასთვის შეუთავაზებია:

–სულ რომ ქართული თეატრის სიყვარულზე ლაპარაკობ, მოდი, ერთი კარგი საქმე ქენი – ჩვენს ახალ სპექტაკლში ითამაშეო.

– თუკი შევძლებ, არ დაგზარდებითო! – თანხმობა მიუცია ვაჟას.

– ამ სპექტაკლში, – უთქვამს ვასოს, – ჩემი მეუღლე მაკო პატარძალია, შენ ნეფე იქნებიო.

– თუკი ამისთანა პატარძალი მეყოლება, იქნება გავბედო თამაშიო, – უთქვამს ვაჟას, – ოღონდ ქორწილის დროს თუ სულმა წამძლიოს და პატარძალს ვაკოცო, არ გენყინოსო.

ვაჟა დათანხმებულა, მართლაც შეუსრულებია ხევსური ნეფის როლი, მაგრამ ძალიან უღიმღამოდ. მსახიობობა ყველაზე შეუფერებელი იყო მისთვის. დიალოგებს, სიმღერებს ისე აჭიანურებდა თურმე, ხალხი უხერხულობისაგან იშმუშნებოდა დარბაზში. ვასოსაც რაღაცა როლი ჰქონია ამ სპექტაკლში და ერთ-ერთი სცენის დროს ჩაუჩურჩულებია:

– ჩქარა, კაცო, ხმა ამოიღე, თორემ ხალხს დაეძინაო.

იმ დღიდან ვაჟა სცენას აღარ გაჰკარებია, იმ დღეს კი, მართლაც კარგი შემოსავალი მიუღია თეატრს.

ყველა რაღაც შემოსავალს იღებდა, ხშირად ვაჟას წყალობითაც, თვით ვაჟა კი ბევრს ვერსაიდან რას იღებდა. ამიტომ წუხდნენ მისი მეგობრები, ცდილობდნენ რაღაცაში ჩაებათ, რაღაცა საქმე მიეცათ. წერა-კითხვის გამავრცელებელმა საზოგადოებამ ვერც რაიმე სახსრები გამოუძებნა ვაჟას, ვერც წიგნი გა-

მოუცა. საზოგადოების კიდევ ერთი წევრი სამსონ ფირცხალავა იგონებს: „ვაჟა-ფშაველას მძიმე მდგომარეობას რომ ვხედავდი, მინდოდა რითიმე დაეხმარებოდი. ერთხელ ვურჩიე, შილერის ტრაგედია „ორლეანელი ქალი“ გადმოეთარგმნა და წარმოედგინა გამგეობაში, ეგებ გამოეცათ და სასყიდელს მისცემდნენ. ვაჟამ მოკლე დროში შეასრულა თარგმანი და მოუტანა გამგეობას, რომელმაც ი. ჭავჭავაძეს გადასცა გასასინჯად. ილიამ არაფერი დასკვნა არ წარმოადგინა და წიგნი გამოუცემელი დარჩა”.

ილიას, როგორც ჩანს, თარგმანი არ მოსწონებია. აზრიც ამიტომ არ გამოუთქვამს. თუმცა რაღა აზრი იყო იმაზე მეტი საჭირო, რომ ილიამ არ მოიწონა, დაინუნა. მან ვაჟას თარგმანი დაუბრუნა „საზოგადოებას“ და თან დააყოლა: „თარგმანი „ორლეანელი ქალისა“ მე არ მომეწონა, მაგრამ უმორჩილესად ვთხოვ გამგეობას, მარტო ჩემს აზრს არ დასჯერდეს და სხვა-საც ვისმე გაასინჯოს თარგმანი. ვაჟა-ფშაველა ჩემს თვალში იმდენად პატივსაცემი მწერალია, რომ მისის ნაწარმოებების დასაფასებლად საკმაო არ არის მარტო ერთი კაცის აზრი და შთაბეჭდილება”.

სამსონ ფირცხალავა მონდომებული ყოფილა, გამოცემით თუ ვერა, დადგმით მაინც ვინმე დაეინტერესებინა, რომ ვაჟას შემოსავალი რაიმე გასჩენოდა. მას დაუინტერესებია კიდევ ამ პიესით დრამატული საზოგადოება და სასწრაფოდ მიუწერია ვაჟასთვის ფშავში: „ძმაო ვაჟა! როგორც კი მიიღო ეს წერილი, დაუყოვნებლივ აფრინე შენი „ორლეანელი ქალი“. მაგ პიესით გაიხსნება სეზონი 23 სექტემბერს. ამიტომ ეხლავე უნდა შევუდგეთ მზადებას. მერე „საზოგადოებასაც“ გამოვაცემინებ. შენი ს. ფირცხალავა. 1904 წ. VIII. ტფ”.

ვაჟა ამ პიესის თარგმანზე ძალიან გატაცებით მუშაობდა. მას არ შეეძლო რაიმეს ზერეღედ, მხოლოდ ფულისთვის კეთება. „ერთხელ, დეკემბრის თვეში, – წერს მიხ. შამანაური, – ამხანაგთან ერთად შუალამისას მომიხდა ვაჟასთან შესვლა. ვაჟას ოთახიდან სინათლე გამოდიოდა, შევედით შიგ, გულით მიგვიღო. ვაჟას მაგიდა ბუხართან მიედგა, მაგიდაზე ლამპა ოდნავ ბჟუტავდა, ვაჟას მურყნის ჩხირი გაეთალა, ზედ კალმის წვერი შავი ბანრით მიება და შილერის „ორლეანელი ქალს“ სთარგმნიდა. ვა-

ჟამ თარგმანიდან რამდენიმე ადგილიც წაგვიკითხა. ეს ლექსად წყობა ისეთი მშვენიერება იყო, რომ დაღლილობა მთლად გადაგვაგინწყდა და აღფრთოვანებულებმა ვაჟას დავუნწყეთ კოცნა. ვაჟამ გვითხრა, მე ამას იმიტომ ვთარგმნი, რომ ჩვენს საზოგადოებას დავანახო, თუ როგორ უნდა თარგმნა. ამავე დროს მე ვგრძნობ, – განაგრძო ვაჟამ, – რომ შილერთან მე უფრო ახლოს ვდგევარ, მე უფრო ღრმად ვწვდები იმის სულსა და გულს, მე უფრო მესმის იმის გულის ძვერა, ვიდრე მას, ვინც უშუალოდ ნემენცურიდან ეს ნაწარმოები რუსულად თარგმნაო”.

სპეციალური სხდომებიც მოიწვიეს, დადგენილებებიც გამოიტანეს, მაგრამ „ორლეანელი ქალი“ მაინც ვერ გამოსცეს. ამ შრომამაც ფუჭად ჩაუარა ვაჟას.

კეკეს დაღუპვა. თამარი

ვაჟა ყოველ შემოდგომაზე ჩადიოდა კახეთში, ყვარელში, თავისი დის მართასა და სხვა ნათესავების მოსანახულებლად, სანადიროდ და რაც მთავარია, საოჩხროდ. ოჩხრობა ისეთ დროს იცოდნენ მთიელებმა, როცა ოჯახს უბედურება შეემთხვეოდა: საქონელი გაუნყდებოდა, ხანძრისაგან დაენვებოდა სახლ-კარი, სარჩო-საბადებელი. ასეთი ოჯახი ჩამოივლიდა ნათესავებს, ახლობლებს და ვისაც რითი და რამდენით შეეძლო, შეენვოდნენ, ხელს გაუ-



ვაჟას და მართა

მართავდნენ. ვაჟას სულ საოჩხროდ ჰქონდა საქმე. მასაც სხვა მოლექსეებივით შეიძლებოდა თავის თავზე ეთქვა ფოთოლათ მერცხალას ნათქვამი: „კარჩი მგელ ვერას შამიჭამს, შინ შამოტანილს – ციცაო“. ამიტომ მართა და სხვა ნათესავები კახეთიდან ატანდნენ ხოლმე ოჯახის სარჩენად ხახვ-ნიორს, ლობიოს, ჩურჩხელას, ღვინოს და სხვა.

1902 წელს გვიან შემოდგომაზეც ასეთი მიზნით ჩავიდა ვაჟა ყვარელში. ოჯახიდან ოჯახში ეპატიუებოდნენ, ლხინობდა, დროს ატარებდა, შიგადაშიგ სანადიროდაც დაჰყავდათ. ოჯახისთვის იმარაგებდა სანოვაგეს.. ოჯახი კი მრავალრიცხოვანი ჰყავდა უკვე – ოთხი შვილი: თამარი, ლევანი, გულქანი და მარიამი. კეკე მებუთეზე იყო ფეხმძიმედ.

დეკემბრის პირველ რიცხვებში დიდი თოვლი მოვიდა მთაში, ჩარგალში. ველზე დარჩენილი თივის მოზიდვა ზურგით მოინდომა კეკემ. ამ ციციქნა ქალმა მძიმე ტვირთი აიკიდა ჩვეულებისამებრ. ორსულობისჟამს მთიელი ქალები სამუშაოს ეძალებიან – მშობიარობა იოლი გვექნებაო. მართლაც, იოლი აქვთ ხოლმე მშობიარობა. ხშირად ბავშვები სამკალს და სამწყემსოს ნამყოფებს გაუჩენიათ მარტოდმარტოდ, სალამოს ბავშვიც მოუყვანიათ, საქონელიც მოურეკიათ, დაუბინავებიათ, და არც არავის შეუმჩნევია, რომ მშობიარეა, სანამ ბავშვი არ აჩხავლებულა. მთიელი ქალის ასეთ ყოფას, ჩანს, კიდევ შეეგუა კეკე და ვერც მთლად შეეგუა. მებუთე შვილზე უმტყუნა: მუცელი მოსწყდა და ვინ რას უშველიდა. უცებ გათავდა. ლუკასთან კაცი აფრინეს, თუმცა კი იცოდნენ, დიდი დრო დასჭირდებოდა მის მოსვლას, უმისოდ დაასაფლავა ბაჩანამ.

ყვარელში როცა ავი ამბის მაცნე ჩავიდა, ვაჟა და მისი დისწული მიხა სანადიროდ იყვნენ. ეს ცუდი ამბავიც სანადიროში შეატყობინეს. მიხა იგონებს: „ჩამოვართიე შველი ტყიდან და ჩამოვკიდე ხეზე გასატყავებლად. ვაჟა იქვე ჩამოჯდა და პაპიროსს მოუკიდა. დავინყე ტყავება. უკანა ფეხებიც არ მქონდა ჩატყავებული, რომ ქვევიდან ფშავლის ქალმა დამიძახა: აქ ჩამოდი, შენთან საქმე მაქვსო!

– არა მცალიან, – ვუპასუხე მე, – და თუ რამე საქმე გაქვს, მოდი და აქ მითხარო.

– მოდი, ჩემმა ძმამ იოსებმა დამაბარა, უნდა რამე გითხრაო.

ვაჟამ ეჭვის თვალთ გადმომხედა მეუბნება:

– ჩადი, გეძახისო.

მეც ჩაველ. ქალი მეუბნება:

– ფშავიდან კაცი ჩამოვიდა, წერილიც ჩამოიტანა, რომ ლუკას ცოლი მოჰკვდომია და ნიკოს — ქალიო. ნუთუ თქვენ ჯერ არაფერი გაგიგიათ, ასე არხეინად რომ ნადირობთო?!

მე გავშრი, კინალამ გული შემინუხდა. მუხლები ამიკანკალდა და ხეს მივეყუდე. ქალი წავიდა. მე კიდევ რამდენიმე ხანი გაშეშებული ვიყავი ერთ ადგილას. შემდეგ შევტრიალდი, მიველ შველთან და ტყავება დავუნყე. ხელი მიკანკალებდა. დანას ხან სად წავატაკებდი, ხან სად. ვაჟა მიცქერის. უკვე ჩემ სახეზე ამოიკითხა, რომ რაღაც არასასიამოვნო ამბავი მითხრეს”.

მიხამ ვერ გაუმხილა ვაჟას ეს ამბავი. ფშავლის ბიჭი ვილაცა მოვიდა და იმას წამოსცდა. ვაჟამ ერთი ამოიგმინა, ყველაფერს თავი მიანება და ბინაში მისვლისთანავე ცხენი მოითხოვა. იმ ღამესვე უნდოდა წასვლა. ძლივს დააშოშმანა მართამ იმ პირობით, რომ სვალე მეც გამოგყვებითო, ერთი ღამით სიჩქარეს და დაგვიანებას კი აღარაფერი მნიშვნელობა აქვსო. ვაჟა დაემორჩილა დას. მეზობლებიც მოვიდნენ მისასამძიმრებლად, სანუგეშებლად. სასმელი მოიტანეს, შესანდობარი სუფრა გაანყვეს. ვაჟამ პირი არაფერს დააკარა. მხოლოდ ღვინოს სვამდა და პაპიროსს-პაპიროსზე ეწეოდა. შიგადაშიგ თავისებურად გადაკეთებულ ლექსს ბუტბუტებდა:

**„ემაში ბანარა დავდევ, აის ბანარა რა იქნა?
სიკვდილი მაიპარავდა, მაინც ქურდია, მაინცა!“**

მართა არიგებდა, ამშვიდებდა, უნდა გამაგრდეო, დარდით აღარაფერი ეშველებო. ვაჟა კი ოხრავდა: „ეჰ, დაო, შენ რომ ახლოსა მყავდე, მე რალა მიშავდა, ჩემ შვილებს ობლობა არ შეეტყობოდა, მაგრამ ეხლა რა ვქნა, ადამიანი არ არის სახლში, რომ პური გამოაცხოს, ბავშვებს გაურეცხოს, დაუკეროს და და-

აძინოს... ადვილია?... ხომ იცი, ოჯახისა არა მესმის რა და არც შემიძლია გავაკეთო ის, რაც ქალის საქმეა; ნიკო რომ ახლოს მყავდეს, მაშინ კიდევ არა ჭირდა რა. (ნიკო – (ბაჩანა) აფხუშო-ში მუშაობდა მასწავლებლად, ჩარგლიდან სამ კილომეტრზე – გ. ხ.), ეხლა იმათაც თავის დარდი ანუხებს. ნიკოს ხომ იცი, როგორ გაგიჟებით უყვარდა ის ბავშვი. მე კიდევაც მეშინიან, თავს არა აუტენოს რა”.

მას მერე ვაჟა ყვარელში აღარ ჩასულა, გული აღარ მისწევდა და აღარც ხალისი ჰქონდა. ალბათ საყვარელი მეუღლის სიკვდილში თავსაც ადანაშაულებდა და ყვარელსაც – შინ რომ ვყოფილიყავი, გვერდს რომ ვყოლოდი, იქნება ეგრე არ მოსვლოდა, იქნება რამეს ვუშველიდიო. ებრალებოდა მთლად ვაჟას მინდობილი სუსტი ქალი უვაჟაოდ რომ აღმოჩნდა სიკვდილის პირისპირ. ნუგეშად ისევ ლექსი ექნა ვაჟას, ლექსს გაანდო თავის ნუხილი:

**„იას უთხარით ტურფასა, მოვა და შეგჭამს ჭიაო...
მინავ, შენ გებარებოდეს ეგ ჩემი ტურფა იაო,
შენ უპატრონე, უმშობლე, როგორაც შენი ზნეაო”**

ჯერ მანამდე რა დღეში იყო ვაჟა და ეხლა მეუღლის სიკვდილის შემდეგ უფრო ცუდ დღეში ჩავარდა. მართალია, უფროსი ქალი თამარი თოთხმეტ-თხუთმეტი წლისა იყო, ამ ხნის ქალებს კი მთაში ყოველგვარი საოჯახო საქმე უკვე ეხერხებათ, მაგრამ ოჯახის გაძღოლას მაინც რას შესძლებდა. უდიასახლისოდ ოჯახი ვერ იქნებოდა, რადგან მთიელის ოჯახში კაცისაგან ქალის საქმის ტვირთება ძნელზე ძნელი საქმეა; მით უმეტეს ვაჟასნაირი კაცისთვის. როგორ შეძლებდა ძროხების წველას, რძის დღვებას, პურის ცხობას და ბავშვების ტანსაცმლის რეცხვას. ამიტომ ნათესავთა და ახლობელთა დაძალებით ვაჟამ გადაწყვიტა მეორე ცოლის მოყვანა. ურჩევდნენ კიდევ ზოგი ვისა და ზოგი ვის. თავისმა კარგმა მეგობარმა, ბესო შანიძემაც ურჩია თავის მხრივ – საშენო ქალი ხორხში გიორგი დიდებაშვილსა ჰყავსო შინ მობრუნებული, და სათხოვნელად გაყოლაც აღუთქვა. თავადაც ხორხელი ქალი ჰყოლია ცოლად.

ეს იყო 1904 წელს. ბესო შანიძე ცნობილი ენათმეცნიერის აკაკი შანიძის ბიძა იყო. მას განთქმული დუქანი ჰქონდა ფშავის

არაგვის ხეობაზე სოფელ თვალივთან. ბესო ცნობილი ყოფილა თავისი კარგი კაცობით, შეგნებულობით. სხვა მედუქნეებივით მეტისმეტად გავაჭრუკანებული არა ყოფილა. უფულო მგზავრისთვის შეეძლო უფასოდ ეჭმია. ფულს არ ახდევინებდა არც ვაჟას და არც ცნობილ მოლექსეებს, მათ ყოველთვის სიხარულით ხვდებოდა. თვითონაც საკმაოდ განათლებული ყოფილა, კულტურული. აკაკი შანიძე ახალგაზრდობაში, პეტერბურგის უნივერსიტეტის სტუდენტობის დროს, ზაფხულობით მასთან ჩამოდიოდა დასასვენებლად და ფოლკლორული მასალის შესაგროვებლად. ბესოც ყოველწლიურად ხელს უწყობდა, სპეციალურად იზარებდა ცნობილ მოლექსეებს, აქეიფებდა და ამით ახალგაზრდა აკაკის ხელს უწყობდა იმ ძვირფასი მასალის შეგროვებაში, რომელიც შემდეგში ბრწყინვალედ გამოცა და გამოიყენა ქართული ენის კვლევა-ძიების საქმეში.

თბილისისაკენ მიმავალ-მომავალი ვაჟა ბესოს დუქანს არ გასცდებოდა, აუცილებლად შეისვენებდა, ცხენსაც შეასვენებდა, ხშირად ღამესაც ათევდა.

დუშელი ნინო წვერაძე იგონებს: „თვალივში ჩასვლისას ვაჟა პირველად ბესოს დუქანში მივიდოდა. კამფეტების ყუთში პატრონის დაუკითხავად ხელს ჩაჰყოფდა და ბავშვებს ორი ხელით კამფეტებს გადაუყრიდა: აჰათ, ბალღებო, დაიჭით, ჭამეთ, ღორი გლეჯითა, თორო რას იპარსებო, – ნაიხუმრებდა. თუ ვაჟას შეამჩნევდა ბესო შორიდანვე, უმაღ დაიძახებდა: აბა, მიშველეთ, მოდის ის ცალთვალა დევი; კაცო, ოჰ, ოჰ, დამალეთ ეგ კამფეტები, თორემ სულ დალუპავს აქაურობას! მერე ვაჟას გულითადად მიესალმებოდა და ხუმრობით შინ შეიპატიჟებდა: ოჰ, ოჰ, მოხვედი, უმი ხორციტ გაზრდილო? მოდი, მოდიო!

ერთმანეთი ძალიან უყვარდათ ბესოს და ვაჟას.

ერთხელ ვაჟამ საახალწლოდ ბესოს დამბალი ხაჭო გაუგზავნა და მილოცვის ბარათიც თან გააყოლა: ძმაო, ბესო, გილოცავ ახალ წელს, გიგზავნი ძველ დამბალ ხაჭოს. დაბერდი ამ სუნით და ამ გემოთიო. ბესოს მისალოცად კევი გაუგზავნია ვაჟასათვის: აი, ძმაო, საჭმელი მაინც არა გაქვს, დაადექი ამ კევის და ღეჭეო!” (37, 90).

ჰოდა, თუ ვინმე ამოუდგებოდა ვაჟას გაჭირვების ჟამს გვერდში, რა თქმა უნდა, ასეთი გულითადი მეგობარიც უნდა ამოს-

დგომოდა და ამოუდგა კიდეც. დათქვეს დრო და ერთ შაბათ საღამოს ვაჟა, ბაჩანა და მღვდელი კავკასიძე დარახტული ცხენებით მიადგნენ ბესოს დუქანს. მანაც დარახტა თავისი ცხენი, წაუქეიფეს, მოგულადდნენ, მოფშავლდნენ, საგზაოც ჩაიდგეს, არაგვი გატოპეს და ფაცხაფუცხით შეუყენეს ცხენები სწროფავის აღმართს, მოკლედ გადავლეს საყვირილოს ქედი და ჩაეშვნენ ხორხის ხეობაში. ძმები ვაჟა და ბაჩანა თოფ-იარაღში იყვნენ ჩამსხდარნი



– მაშინ ასე დადიოდა ყველა მთიელი.

კი გამოეგება სტუმრებს დიდებათ გიორგი, მაგრამ წარბი შეიკრა გუდამაყრელმა, მიხვდა მათი მისვლის მიზეზს, სხვანაირად ისინი მასთან რად მივიდოდნენ? შეიძლება უკვე ყურიც ჰქონდა მოკრული, შეიძლება ბესომ ან მისმა მეუღლემ შეატყობინა ჩუმად, ვაჟა რომ მისი ქალის თხოვას აპირებდა.

– საით გაგინვეიათო? – ჰკითხა გიორგიმ და ამით ის უთხრა, ჩემთან თქვენ არაფერი გესაქმებათ, თქვენი გზა ნახეთო. მიუხვდა ვაჟა ქარაგმულს და ბრაზიანადვე მიახალა:

– საითაც გაგვინვეია, იქ მოვედით – შენი ქალი თამარი უნდა წავიყვანო, არცა მრცხვენიან და არც მეშინიანო!

გიორგი გაშრა, კიდეც უფრო აიმრიზა, მაგრამ ველარაფერი ქნა, სტუმრები შინ შეიპატიჟა, უმასპინძლა კიდეც, მაგრამ გუ-

ლი ვერ გახსნა. არც თანხმობა უთქვამს და არც უარი. ეს უკვე თანხმობას უდრიდა.

გიორგის უნდოდა ალბათ ოჯახისათვის ფასის დადება, წესისა და რიგის დაყენება. მთხოვნელების რამდენჯერმე უარით გასტუმრება, პირის სანახავის მიტანინება და მისთანები, რაც, ჩვეულებრივ, სამ წლამდე გრძელდებოდა ხოლმე. ვაჟას კი სად ჰქონდა ამის დრო და გული. მისი ოჯახი არ ითმენდა. მეორე მისვლაზე უკვე იმ აზრით მივიდნენ, რომ თამარი წამოეყვანათ და წამოიყვანეს კიდეც. ბაჩანამ მოძებნა ბიძაშვილ ქალებთან დამალული თამარი და ხელჩაკიდებული ძალად შემოიყვანა სტუმრებთან. მიიყვანა და ვაჟას დაუსვა გვერდით მოჩუქურთმებულ სკამტახტზე. თვითონაც გვერდით მიუჯდა – ჩვენიო! ვაჟამ პირველად მაშინ ნახა თამარი და ჩუმ-ჩუმად შეათვალიერა. როგორსაც ეუბნებოდნენ, მართლაც ისეთი ზორბა ქალი აღმოჩნდა თამარი, მართლაც შესაფერისი მეწყვილე ვაჟასი. გიორგი ფეხზე წამოიჭრა და კედელზე ჩამოკიდებულ ხანჯალს მისწვდა:

– დამძიმდით, ფშავლებო, თორემ არწივის ბუნებისა ვარო!

ვაჟას და ბაჩანას მხოლოდ ელიმებოდათ გუდამაყრელის ტყუილ ფაფხურზე, არაფერი უთქვამთ: გაუშვი გული მოიოხოსო. მხოლოდ ოჯახის წევრები ეცნენ გიორგის, ასუსუებდნენ, ემუდარებოდნენ — გონი დაიტანე, ხათაბალა არაფერი ასტეხოო! თამარმა ცრემლები ჩამოყარა, რაკი მამამ იმასაც დაუნყო ლანძღვა, მოკვლით იმასაც ემუქრებოდა.

– მომკალი, მე მომკალი, ამათ რას ერჩიო! – ტირილის ხმაზე ამოჩქამდა თამარი და ამით ისიც თქვა, ჩემ თავს ესენი მირჩვენიანო.

დაამშვიდეს გიორგი. თან და თან სასმელმაც გაჭრა, გამხიარულდნენ. „ბუზიკაც“ ააჩქამეს. ცეკვა-თამაში გაიმართა. თავისებურად ლამაზად ცეკვავდა ბაჩანა, ვერცხლის ძენკვებით მორთულ ჩოხაში გამოწყობილი. ყველა მას მისჩერებოდა. ტაშს უკრავდნენ. მარტო ვაჟა და თამარი ისხდნენ წყნარად. ვაჟამ შენიშნა, რომ შორიახლოს ჩამომჯდარი თამარის პატარა და, ქეთო, მას მისჩერებოდა მოღუშული.

– რას მიბღვერი, ცალთვალა რო ვარ, იმით ხო არა მწუნობო? – ჰკითხა ვაჟამ.

– არა გწუნობო, – უპასუხა ქეთომ.

გიორგი დიდებაშვილმა ვაჟა გაიხმო მეორე ოთახში და ხელწერილის დაწერა სთხოვა, რომ ქალს შეინახავდა. ვაჟამ დაწერა:

„1904 წლის 31 მარტს გაძლევ ამ ხელწერილს მე ამისა ქვემოთ ხელის მომწერელი სოფელ ჩარგალში მცხოვრებელი, მღვდლის შვილი ლუკა პავლეს ძე რაზიკაშვილი, შენ, ხორხში მცხოვრებელ გიორგი დიდებაშვილს მაზედ, რომელიც მე ზემოთ აღნიშნულმა პირმა წავიყვანე ხასად შენი ქალი თამარი, რომლისაც თანხმობა იყო სრული და უნდა შევიწინაბო წესიერად, არაფერი გაუფუჭვო არც ცუდის ქცევით, არც სიმშლით და სიტიტვლით. აგრეთვე შენის ქალისაგან მოველი ამასვე, რომ თავისი ყოფა-ქცევით არ მიმიყვანოს იქამდე, რომ დავითხოვო სახლიდან და თუ შევნიშნე სიკეთე და მოხერხებული იქნება, უნდა ჯვარი დავინერო შენს ქალ თამარზე. შვილები იმასთან ნაყოლი ვიშვილო და სხვა შვილებიც არ გავაბედენო. აგრეთვე, უკეთუ ჩემ სიკვდილამდე არაფერი მიზეზი მივეცი შენს ქალს და ვიცოცხლე, ჯვარ-დაუნერელიც რომ დარჩეს ჩემთან, როგორც კანონიერ ცოლს უფლება ჰქონდეს ჩემს მოძრავ და უძრავ ქონებაზე და არასდროს არც შვილს და არც ძმებს, ჩემს ბიძაშვილებს არ შეეძლოთ კანონიერი ნაწილი დააკლონ, რომელზედაც ჩემს საკუთარ ხელს ვანერ ლუკა პავლეს ძე რაზიკაშვილი.“

ბაჩანამ შეიხედა რაკი შეაგვიანდა ვაჟას. წააკითხეს მასაც, გიორგიმ სთხოვა შენც მომიწერე ხელიო. ბაჩანამ კალამი ჩაანო სამელნეში: „მეც დამსწრე ვარ და ყაბულადაც ვარ ზემოთ მოხსენებულს პირობაზე“, ნიკო რაზიკაშვილი.

მეორე დილით კიდევ პურის ჭამის, ოჯახისა და წაღმართის დალოცვის შემდეგ თამარს საპატარძლოდ შეუკაზმეს ცხენი, ლამაზი ჯეჯიმი გადაუფინეს უნაგირზედ, ლამაზი ხურჯინი აუკიდეს და ზედ შესვეს შიბით მკერდაყვავებული ქალი. მანაც ვაჟაკაჯურად მიაყოლა ცხენი ქმარ-მაზლს. მზითვი და სათავნო შემდეგისთვის გადადეს, მამა-ბიძაშვილებიც მერე დაავლენდნენ თვალს.

პატარა გოგონები, გულქანი და მარიამი, ბაჩანას ცოლისათვის დაეტოვებინათ მალაროსკარში – იმჟამად უკვე იქ იყო ბაჩანა მასწავლებლად. თამარი და ლევანი ჩარგალში ოჯახს უვლიდნენ. თამარი იგონებს:

„მალაროსკარში რომ მივედით, ბაჩანამ და ვაჟამ ბავშვებს ახარეს: შვილებო, დედა მოგიყვანეთო! და ბავშვები სიხარულითა და კანკალით შემომხევივნენ. შემრცხვა: ახალგაზრდა ვიყავ და მეთაკილა.“

ბაჩანას ცოლი მარიამი სათნო და კეთილი ადამიანი იყო. გვერდით მომიჯდა და მითხრა: გული უჩვენე, ცოდონი არიანო. მეც შემეცოდნენ ბავშვები, ვანუგეშე, მოვეფერე და ლუკას ვუთხარი: აქ ნუ დავტოვებთ ბავშვებს, მინდა ესენი ჩემთან იყვნენ, წასვლისას თან წავიყვანოთ-მეთქი. მართლაც ბავშვები ცხენებზე შემოვისხით და წავედით ჩარგალში. შინ ლუკას უფროსი ქალ-ვაჟი, თამარი და ლევანი დაგვხვდნენ. დამხვდა ღარიბი, არეული, აწენილ-დანწილი ოჯახი, უდედო, დაუბანელი, მოუვლელი ბავშვები. მისვლისთანავე დავაკრიალე სახლი. სისუფთავეს და საოჯახე საქმეს ბავშვობიდანვე ვიყავ მიჩვეული“.

თამართან ვაჟას ერთი შვილი შეეძინა – ვახტანგი. ეს იყო ვაჟას მეხუთე შვილი. თუმცა ამის შესახებ სხვა რამესაც ჰყვებიან – მუცლით მოყოლილს ეძახდნენო – ქმრიდან შინ მობრუნებული თამარი თურმე უკვე ფეხმძიმე ყოფილა. ვაჟას ეს ძალიან სწყენია და ბავშვსათვის თავისი გვარი არ მიუცია.

ვაჟას შვილები

ვაჟას შვილებზე, ბუნებრივია, ზოგი რამ ითქვა და კიდევაც ითქმება თვით მათი ოჯახის ყოფასთან დაკავშირებით, მაგრამ ცალკე სათქმელიც რჩება. მათ ხომ ვაჟას სიკვდილის შემდეგ ზოგმა ცოტა ხნით, ზოგმაც დიდი ხნით კიდევ გააგრძელეს იმთავითვე გაუხარელი ცხოვრება. მემკვიდრეობით ვერაფერ ქონება-ცხოვრებას უტოვებდა შვილებს, ამიტომ გრძნობდა მძიმე განსაცდელი მოელოდათ მათ. ცდილობდა ასეთი ცხოვრებისათვის შეემზადებინა, გამოებრძმედა, შეეგუებინა. მკაცრად ეპყრობოდა, მოფერება და შებრალება არ იცოდა, პატარობიდანვე საქმეში ჰყავდა, ქალებსაც და ვაჟსაც შვიდი-რვა წლისებს სათიბ-სამკალში ატრიალებდა.

როგორც უკვე აღვნიშნეთ, პირველ ცოლთან, კეკესთან ვაჟას ოთხი შვილი ჰყავდა, სამი ქალი და ერთი ვაჟი. მარიამს

დიდხანს არ უცოცხლია, 1935 წელს ახალგაზრდა გარდაიცვალა მაგრანეთში, სადაც ის იყო გათხოვილი.

თამარი

კეკესა და ვაჟას პირველი შვილი თამარი იყო. ოთხი კლასის განათლება ძლივს მიუღია, მაგრამ ძალზე ნაკითხი და ნიჭიერი ყოფილა. გარეგნულადაც ლამაზი, თავდაჭერილი, მოყვარული თავისიანებისა. მის შესახებ ერთხელ გ. ლეონიძეს უთქვამს – არისტოკრატად დაბადებულიაო.

თამარიც ერწოში იყო გათხოვილი შალვა ბენუკლიშვილზე. ვაჟა-ფშაველას როგორ არ უყვარდა თავისი სიმდიდრით განთქმული მძახალი გეჯა ბენუკლიშვილი, როგორ არად აგდებდნენ ერთმანეთს (ვაჟა გეჯას იმის გამო რომ მდიდარი იყო, გეჯა ვაჟას – რაკი ღარიბი იყო), ამის შესახებ სხვაგან ვამბობთ. არც თამარს ჰყვარებია თავისი ქმარი შალვა ბენუკლიშვილი. მას თავიდან ვაჟას მეგობარი, რომელიღაც თუში ჰყვარებია, თავისზე ბევრად უფროსი. შემდეგში იხსენებდა თურმე, შალვა რომ მოვიდა ჩემს სათხოვნელად, გოდორში დავიმალე, სანამ არ წავიდოდნენ, არც ვაპირებდი გამოსვლას, მაგრამ დედინაცვალმა ძალად ამომათრია იქედან, იმან შეუწყო ხელი, ერქარებოდა ჩემი მოშორებაო.

თამარს არა ჰყვარებია, თორემ არც შალვა ყოფილა ურიგო კაცი. მდიდარ მამას მისთვის პეტერბურგის უნივერსიტეტი დაუმთავრებინებია, ბრწყინვალედ სცოდნია გერმანული ენა (მისი დამსახურება ყოფილა ძმისწულს, ცნობილ ქართველ მთარგმნელს, ვახტანგ ბენუკელს, გერმანული ენა რომ ასევე შეუსწავლია). მოწინავე ინტელიგენციასთან ჰქონდა თურმე ურთიერთობა, გარეგნულადა და ჩაცმულობით კი გლეხისაგან არ გამოირჩეოდა. შესაძლოა ეს მამის გასაოცარი სიძუნწისა და სიხარბის ბრალიც იყო.

ერთხელ შალვა თიანეთისაკენ მიემგზავრებოდა თურმე ცხენით. ივრის პირას სუფრა ჰქონიათ გაშლილი თიანელ კომკავშირელ-კომუნისტებს. მიუპატიჟებიათ და უთხოვიათ: ერთი ისეთი სადღეგრძელო გვითხარი, ჩვენ რომ არა გვექონდეს ნათქვამიო.

– აბა, მაშინ ქაქუცა ჩოლოყაშვილს გაუმარჯოს, ვიცი თქვენ



ვაჟა-ფშაველას სიძე შალვა ბენუკლიშვილი

იმის სადღეგრძელოს არ იტყოდითო!

მესამე დღეს წაუყვანიათ შალვა და მას შემდეგ იმის შესახებ აღარავის რა გაუგია.

დიდ ჯაფაში ყოფილა თამარი ბენუკლიშვილების ოჯახში. ძალზე გაუხარელი სიცოცხლე ჰქონია. უამრავი მწყემსის, მოჯამაგირის მოვლა-პატრონობა გარკვეულწილად მის კისერზე გადადიოდა. „მოჯამაგირეების მოჯამაგირეები ვიყავითო“ – იტყოდა თურმე თამარი. ერთხელ მოსაკითხად, სანახავად ასულან თამართან ვაჟა, ბაჩანა და ლევანი, ვაჟას შვილი. ამ არაადამიანურ ჯაფაში რომ უნახავთ, ვაჟა ძალიან დაღონებულა.

გეჯასთვის საყვედურიც უთქვამს, გეჯას მასხრად აუგდია: შენ რალა იცი, ცხოვრება როგორ უნდაო.

– ეგ შეიძლება არ ვიცი, მაგრამ ის კი ვიცი, რაც უნდა დიდი ცხოვრება-ქონება გქონდეს, ერთხელაც იქნება დაპატარავდებაო.

– მაშ, მითხარ ბარევალ, როდის დაპატარავდება ჩემი ცხოვრებაო? – შეუცინია თავის ქონების ულევლობაში დარწმუნებულ გეჯას ვაჟასთვის.

– შენი ცხოვრება მაშინ დაპატარავდება, როცა მე გამადიდებენო, – ბრაზიანად უპასუხნია ვაჟას. გაბრაზებულა ბაჩანაც. თამარისათვის უთქვამს, ადექი, შენცა და შინ წამოდი, მოშორდი ამათაო!

– ვაიმე, როგორ წამოვიდე, მამა-ბიძები როგორ შევარცხვინო... ჯანდაბას ჩემი თავი, რასაც ვიზამ, ვიზამო.

დარჩენილა თამარი და ოჯახი არც ქმრის სიკვდილის შემდეგ მიუტოვებია. ან კი სად უნდა წასულიყო? მისი მთავარი საზრუნავი თავისი დაობლებულ-დანიოკებული ძმის შვილები, 1923 წელს დახვრეტილი ლევანის ობლები ყოფილან.

თამარი 1961 წელს, მამის ფართოდ აღნიშნული იუბილის შემდეგ გარდაიცვალა. ანდერძი დაუტოვებია ჩარგალში დამმარხეთო, მაგრამ არ შეუსრულებიათ, ვახტანგი წასულა რატომღაც წინააღმდეგი.

ლევანი

კეკეს და ვაჟას 1887 წელს შეეძინათ მეორე შვილი ლევანი. მემკვიდრე განსაკუთრებით ეამაყებოდა ვაჟას და დიდ მზრუნველობასაც იჩენდა მის მიმართ. ცდილობდა შვილებიდან მისთვის მაინც როგორმე მიეცა განათლება, სამსახურში სადმე ჩაეყენებინა, თანაც ჩაეყენებინა ისეთ საქმეში, რომელიც ქვეყანას, განსაკუთრებით კი მთას, გამოადგებოდა. 1910 წლის 5 ნოემბერს ნიკო ცხვედაძეს, შემდეგში თბილისის უნივერსიტეტის ხუროთმოძღვარს სწერდა: „შეუძლებელს მე არაფერს ვთხოვლობ. პირადად ჩემი თავი ჯანდაბას, ხოლო ჩემმა შვილმა რა დააშავა, რომ როგორც მისი მამაა გარიყული და მივიწყებული, ჩემ შვილსაც ასე გულგრილად ეპყრობა საზოგადოება, ნორჩ, ახალგაზრდა კაცს, რომელსაც სწავლა-განათლება ეჭირება, რომელიც შეიძლება ფრიად სასარგებლო კაცი დადგეს. ჩემმა შვილმა, როგორც სხვა ათასმა, მონუმბით დაამთავრა სათავადაზნაურო გიმნაზია და უსახსრობის გამო ორი წელიწადია შინა მყავს სოფელში და ლამის, რაც უსწავლია, ისიც დაივიწყოს.

ეს ჩემთვის მეტისმეტად გულსაკლავი მოვლენაა და ვგონებ, ვისაც ცოტაოდენი ჩემი პატივისცემა აქვს, არც უნდა ესია მოვნოს ეს ამბავი.

ამიტომ მოგმართავთ თქვენ, როგორც პატიოსან ქართველ კაცს, უანგარო მუშაკს, და გთხოვ, რომ როგორმე გამგემ სარაჯიშვილის სტიპენდიებისა, დაუნიშნოს ჩემ შვილს სტიპენდია, რომ გავგზავნო სწავლის გასაგრძელებლად ყირიმში ან სხვა-



ვაჟა და მისი მეორე მკუდლე თამარი. დგანან: ლევანი და ვახტანგი

უმართნია, იქ მიუციათ სამსახური, სოცურუნველყოფის გამგეობა ჩაუბარებიათ, ბინად კი ბიძა თედოსთან ცხოვრობდა. აქვე სოფ. ხელთუბანში გაიცნო თამარ თვარელიძე, 17 წლის ქერა, ცისფერთვალეა, ძალზე ლამაზი გოგონა. ლევანიც არანაკლებ ლამაზი ყოფილა. გორელი თანამედროვის, ექვთიმე გეგიას მოგონებით, თაფლისფერი ცხენი ჰყოლია და როცა სოფელზე

გან სადმე, რათა შეისწავლოს პრაქტიკულად ყველის ან ერბოს კეთება და მისთანები, რაც ფრიად საჭირო და გამოსადეგია მთაში, რათა ეს ცოდნა გაავრცელოს თავის თანამოდმეთა შორის.

იმედი მაქვს, ჩემს თხოვნას არ დანიხლავთ და არც მე დამგობთ ამგვარი თხოვნისათვის.

თქვენი მარადის პატივისმცემელი ვაჟა-ფშაველა”.

ვაჟას ამ თხოვნას, ჩანს, მაინც არ მიაქციეს ყურადღება, რადგან ლევანსაც ისევ გორისათვის მი-

ამოივლიდა, მთელი გოგოები გზის პირზე გამოეფინებოდნენ. ეგეთი ლამაზი ვაჟკაცი ჩემ სიცოცხლეში არ მინახია. ცოლი ხომ ლამაზი ჰყავდა, მაგრამ ლევანს მაინც ვერ შეედრებოდა. ეგეთი დახვეწილი ინტელიგენტი კაცი იშვიათიაო.

რთვლობის ქეიფისა და დროსტარების შემდეგ თედო რაზი-კაშვილს მთელი ახალგაზრდობა, თავისი ქალებიც, ერთ ოთახში იატაკზე დაგებულ ფარდაგზე დაუნვენია. დაუნყიათ ხუმრობა თამარისა და ლევანის დანაწლებზე, ფშაურად ერთმანეთთან დანვენაზე და ამ ხუმრობა-ხუმრობაში ლევანსა და თამარს ერთ-ერთი კი შეჰყვარებიათ.

თამარის ძმა იოსებიც კარგი ვაჟკაცი ყოფილა, კარგი მეგობარი ლევანისა. ამ საბაბით ლევანს მოუხშირებია მათთან სიარული, მაგრამ თამარი დამფრთხალი ხოხობივით გარე-გარე უვლიდა. „ეს ის დრო იყო, – იგონებდა ღრმა სიბერის ჟამს თამარი, – ქალებს რომ გვაშინებდნენ, ახალგაზრდა კაცის ჩოხის კალთა არ შეგეხოთო, თორემ დაფეხმძიმდებითო...“

ერთხელ ლევანი ჩვენთან მოვიდა, ჩოხაზე ღილი ასწყვეტოდა. დედამ მითხრა აიღე ნემს-ძაფი, დაუკერეო. მივედი, ხელის კანკალით ვუკერებდი, შორიდან თან გული ამოვარდნაზე მქონდა, ვშიშობდი ჩოხის კალთა არ შემხებოდა”.

გაუმჟღავნეს თუ არა ერთურთს სიყვარული ლევანმა და თამარმა, ნიშნობა ისე სწრაფად გადაიხადეს, ვაჟა-ფშაველასაც კი ვერ, უფრო კი, ვფიქრობ, არ შეატყობინეს, რადგან დედინაცვლის ენის გამო ლევანი იმ დროს განაწყენებული იყო, ამიტომ მალევე გადახდილი ქორწილი ერთ კვირას გაგრძელდა, რაც უმთავრესად ვაჟასთვის მოწყობილ ზეიმს უფრო ჰგავდა. ეკლესიაში ჯვრისწერის დროს რაკი შვილ-რძალს ვაჟაც მიჰყვებოდა, ფეხქვეშ სულ ხალიჩა-ფარდაგებს უფენდნენ ეკლესიამდე მისასვლელ გზაზე და ზედ ვარდ-ყვავილს უყრიდნენ. მღვდელმა ჯვარი დასწერა, ვაჟამაც დალოცა, კისერზე ოქროსძენკვიანი საათი ჩამოჰკიდა რძალს. ხალხი თურმე გაიძახოდა: ვაჟა-ფშაველასაგან დალოცვილებს, ჯვრისწერა რადლა უნდაო. ქორწილის შემდეგ სამახსოვრო სურათიც გადაიღეს. ვაჟა შუაში ჩასვეს შვილ-რძალმა. მან მოიბოდიშა და ოდნავ გვერდმექცევით დაჯდა – ჩამოფხავებული თვალის გამოჩენა ერიდებოდა. ეს იყო 1915 წლის 14 მაისს.

ქორწილიდან ვაჟა ისევ თბილისში დაბრუნდა სამკურნალოდ.

გორში ლევანს ამბავი ვილაცამ მოუტანა: მამაშენი კვრინჩხის შეჭამადსა ნატრობსო, იქნებ უშოვოთ და ჩაუტანოთო. ხმელ კვრინჩხს თბილისის ბაზრებშიც როგორმე უშოვიდნენ და საჭამანდსაც როგორმე გაუკეთებდნენ, მაგრამ ეს, ჩანს, ვაჟასეული მოკრძალებული და ლამაზი მანერა იყო მონატრებული შვილ-რძლის ხილვისა. გვიანი შემოდგომის ხილია კვრინჩხი, ზაფხულში ძნელად საშოვნელი. მაინც უშოვიათ, შეჭამანდიც გაუკეთებიათ და თბილისში ჩასულან ვაჟას სანახავად. ვაჟა ფეხმძიმე რძალს მოჰფერებია და უთქვამს: „ამბობენ მალე ლუკა გაჩნდებაო”. ამ ნათქვამიდან ისიც ჩანს, რომ ვაჟა გრძნობდა სიკვდილის მოახლოებას – მთაში (და, ალბათ, ძველ საქართველოში ყველგან ასე იყო) მხოლოდ გარდაცვლილთა სახელებს არქმევდნენ ახალდაბადებულებს. ლევანმა მართლაც ლუკა დაარქვა თავის ვაჟს, რომელიც ვაჟას სიკვდილის შემდეგ დაიბადა. მას მოჰყვნენ ქალები: ქეთევანი, პეპელა (ეკატერინე).

ლევანი თავისი ცოლ-შვილით მამის კერაზე, ჩარგალში, დაბრუნდა საცხოვრებლად. ეს მომხდარა 1920 წელს, გორის მინისძვრისაგან დანგრევის შემდეგ. მესამე შვილი, პეპელა, სწორედ ჩარგალში დაიბადა, პაპისეულ ტახტზე.

ლევანი გამორჩეულად უყვარდათ თურმე თანასოფლე-



ბუბათი ვაჟა (ხორნაული).

ლებს. ყოფილა ძალზე ნიჭიერი, გონიერი. ამასთან ფიზიკურადაც ძლიერი, მარდი. „ისეთი მარდი იყო ლევანი, ჩარგლელები ამბობდნენ აღმართში გაქცეული კურდღელი დაიჭირაო. ეს არ ვიცი რამდენად მართალი იყო, მხოლოდ ის კი ჩემი თვალთ მიწინაა, ორ გაშლილ ნაბადზე როგორა ხტებოდა“, იგონებს მეუღლე თამარი. ყოველივე ამ სიკეთის გამო ხალხს ფშავის კომისრად აურჩევია.

არეული დრო იყო რევოლუციისა და მისი შემდგომი ხანები; ძარცვა, ყაჩაღობა, კაცის კვლა ჩვეულებრივი მოვლენა იყო. ქისტები, ლეკები, ოსები და სხვანი ამ არეულობით სარგებლობდნენ, გადმოდოდნენ და ცხენებს, ცხვარ-ძროხას იპარავდნენ. ამიტომ უკანაფშავის მთაზე ქისტეთისაკენ მიმავალი გზა-ბილიკები შეკრული ჰქონდა თუმ-ფშავ-ხევსურთა გაერთიანებულ რაზმებს, რომელთან ერთადაც ყოფილა ლევან რაზიკაშვილი. ქისტებს ფშავიდან წაუსხიათ ცხენები ღამით და მათურაზე გადაურეკიათ. მაცნეს ეს ამბავი შეუტყობინებია რაზმისათვის. იქიდან ქისტებისათვის დადევნება მიუძღვიათ ყველაზე მუხლადი და გულადი ვაჟებისათვის – გაგა ხორნაულისა, ივანე გორზამაულისა, ლევან რაზიკაშვილისა და გიგია ჭინჭარაულისათვის. გაგა ხორნაული, ბუბათ გაგად ნოდებულის (ობლად გაუზრდია დედას, სახელად ბუბას) მთელ ფშავ-ხევსურეთში ცნობილი იყო როგორც მგლის მუხლა მონადირე – კვირისტავეები არა ჰქონდა და გაქცეულ ნადირს ეწეოდაო. დასწევთან ქისტებსაც ხახაბოს ჭალაზე.

შორიდანვე დაუნახავთ, ვილაცხეებს ცხენები ბალახზე მიეშვათ, თავად პურის საჭმელად დამსხდარიყვნენ. მაინც არ მოვტყუვდეთო, გიგიასთვის უთქვამთ, შენზე უფრო ეჭვს არ აიღებენ, ნადი და თუ ხევსურები არიან, ჩამოჯექ იმათთან, თუ ქისტები – გასცდი, იმაზე გავიგებთ და დავთოფავთო. ჩაუვლია გიგიას, მისალმებია და გზა გაუგრძელებია. ამათ გაუგიათ რომ ქისტები იყვნენ და უსროლიათ. ორი მათგანი მოუკლავთ და მესამე, დაჭრილი, ლოდს ამოჰფარებია და საპასუხო სროლა აუტენია. ქისტის ნასროლს ლევანისთვის ქუდი გაუხვრეტია, მოუგდებინებია. გაგას დაუყვირია: – კლდეს მათფარე თავიო! – ისე ვერ ვუმიზნებო, – უთქვამს ლევანს და თავამოყოფილს გაუგ-

რძელებია სროლა. გაგას ძალად დაუხრეინებია თავი. იმ ერთ ქისტსაც შეუნყვეტია სროლა, კიდევ მოხვედრია ტყვია. გიგიას უთქვამს, როცა მისულან, ბარემ დავასრულოთო, თოფიც მოუღერებია. გაგას ხელი უტაცნია, არ დაუკვრეინებია. პირიქით, ჭრილობები შეუხვევია ქისტისთვის და ნაბადი წაუხურებია, რომ სიცხეს არ შეენუხებინა. დაჭრილისათვის არც იარაღი აუყრევნებია გაგას – ვაჟკაცობას ნუ ჩამოყვრითო. სხვა ნადავლი კი, იარაღი და სხვა რაღაცეები, წილით გაუყვიათ. ლევანს ყარნიკა შეხვედრია, გაგას – ნაგანი, ივანეს – ხანჯალი, გიგიას თათრული შაშხანა. დანარჩენი ალბათ წილში დანამატად გადიოდა, სართად.

რამდენიმე დღის შემდეგ თუმ-ფშავ-ხევსურთა გაძლიერებული რაზმი, რუსის ჯართან ერთად ჯარეგოში ჩასულა. ის დაჭრილი ქისტი უკვე იქ ჰყოლიათ ჩაყვანილი. ერთი ქისტის ბაღლი კი თურმე გიგიას თოფს დააშტერდა – უცნია მამის თოფი. ცოტახნის შემდეგ კომკიდან საიდანლაც გავარდნილა თოფი და გიგია უსულოდ დაცემულა. მოვარდნილა ის ქისტის ბაღლი და მამის თოფი აუტაცნია, ჰკოცნიდა და თანა ტიროდა თურმე. ხმა ვერავის გაუღია, რადგანაც ქისტებთან შეტაკებას მორიდებინა. შებინდების ხანს ერთი ქისტი მისულა გაგასთან და უთქვამს: დაღამდება თუ არა, აქედან წადი, თავს უშველეო. მხოლოდ იცოდეს სხვას არავის უთხრა, თორემ შენც აქ მოჰკვდებო. გაგას ლევანისათვის მაინც უთქვამს, არ მიუტოვებია და როგორც შეღამებულა, ცალცალკე გამოპარულან. იმ ღამეს იქაურ ქისტებს მაისტის ქისტებიც წამოშველებიან და იქ მდგომი ჯარი მთელერთიანად ამოუნყვეტიათ.

ქისტთა მდევრობასთან დაკავშირებით ფშაველ მოლექსეს ხოტბა შეუსხამს ვაჟების სიმამაცისათვის:

**„ქისტებ იპარვენ ცხენებსა ქუჯეგათ სახლის ძირსაო,
გაუღის ხევსურეთზედა, ბილიკ იციან მთისაო.
შაატყობინეს პოსტზედა გაგას, ბუბაის შვილსაო,
ქისტების ოინ გაიგო გული აძგერდა ყმისაო,
მუხლად მარდია მავალი, შავარდენია მთისაო.
მალედვე წამაენია, ხან იყო შუადღისაო,
ეგრე მათყრის ტყვიასა, როგორც ხორხოშა ცისაო...“**

**ორნი ჰყვან ამხანაგები, ქორ-შავარდნები მთისაო,
მაგათაც უნდა შაქება, კვალი გაიგეს მტრისაო:
ივანეს გორზამაულსა, ლევან რაზიკაშვილსაო”.**

გიგია ჭინჭარაული ძმადნაფიცი ყოფილა მიხა ხელაშვილი-სა. მისი დალუპვა მძიმედ განუცდია და ლექსიც მიუძღვნია. როგორც ამ ლექსის დათარიღებიდან ჩანს, ეს ამბავი 1918 წელს მომხდარა.

მას შემდეგ კიდევ უფრო დამეგობრებულან ბუბათ გაგა და ლევანი. თუმცა მანამდეც ჰქონიათ ნათელ-მირონობა – გაგა მონათლული ყოფილა ვაჟას მამის პავლესაგან.

ერთხელ, სწორედ ბუბათ გაგასთან წვეულებაზე ყოფილან სოფ. კანალხევეში ვაჟა და ლევანი, მამაშვილნი. ლევანს თავისი კარგი ცეკვით ხალხი აღტაცებაში მოუყვანია. ვაჟას კი ჩაჰღიმებია: „მე ის მინდოდა, სწავლა თავში შესვლოდა, მაგას ფეხებში წასვლიაო. თუმცა ჩვენ დროში ფეხებს უფრო ფასი დაედო, ვიდრე თავსაო”.

1921 წლის თებერვალში საბჭოთა რუსეთის მიერ დამოუკიდებელი საქართველოს ვერაგული ანექსიის შემდეგ ეროვნული გმირის ქაქუცა ჩოლოყაშვილის მეთაურობით 1922 წელს დაიწყო ბრძოლა სამშობლოს ხსნისათვის. მისმა „საქართველოსთვის შეფიცულთა” რაზმმა უთანასწორო ბრძოლები ჩაატარა კახეთში ბოლშევიკურ ძალებთან და თანდათან მთაში გადაინაცვლა. ქაქუცას მონოდებაზე აჯანყდა ხევსურეთი. მათ ზოგიერთი ფშაველიც შეუერთდა, მათ შორის მიხა ხელაშვილი. ამის გამო რუსის ჯარმა კომკავშირელ კონსტანტინე ლესელიძის მეთაურობით ზარბაზნები დაუშინეს ხევსურთ სოფლებს. დაიწყო დახვრეტები მთელ საქართველოში. თუკი ვინმემ თანაგრძნობა გამოხატა ქაქუცას გამოსვლებისადმი, თუკი ვინმე თანამოაზრედ დაიგულეს, ყველას დაუნდობლად სპობდნენ.

ქაქუცა ჩოლოყაშვილი და ლევანი თურმე ერთად სწავლობდნენ ჯერ თელავში, მერე თბილისის სათავადაზნაურო გიმნაზიაში, იქ დამეგობრებულან და, ბუნებრივია, ფშავზე შევლისას მეგობრები სიხარულით, მაგრამ მაინც საიდუმლოდ შეხვედრიან ერთ-ერთს. სიფრთხილისათვის ქაქუცას რაზმი ჩარგლის მალა, საყდართ გორზე დაბანაკებულა ლამის გასათევად, თვითონ

კი შელამებულში ლევანთან მისულა სტუმრად, უქეიფიათ, ლევანს ერთი ახალ-ახალი ნაბადიც უჩუქებია. მეორე დღეს ლამინადვე გასულა ქაქუცა. ორჯონიკიძესა თუ ფილიპე მახარაძეს დაურეკიათ მალაროსკარში ლევანისთვის, პარტიულ კომავშირელთა რაზმი შეადგინეთ და ქაქუცას ბანდას გზები შეუკართო, ამოხოცეთ, მოსპეთო. რაკი ბრძანება იყო, ლევანს ვალის მოხდის მიზნით შეუდგენია რაზმი და ვითომ დასდევნებია. ხალხის თვალის ასახვევად უნდოდა ქაქუცას დევნის ინსცენირება. ამ დევნაში ჩარგლის ზევით სადღაც არაგვის ქალაზე თვით ლევანის რაზმი აღმოჩენილა ქაქუცას ხალხის ალყაში. ლევანს მოუსწრია დაძახება:

– ლენკო! (ასე ეძახდნენ თურმე ქაქუცას გიმნაზიაში), რას შვრები! თუ ამ ხალხის ამოხოცვას აპირებ, პირველი ტყვია ბარემ მე დამკარო!

გამოსულა საფარიდან ქაქუცა და ლევანსა და მას ერთმანეთი გადაუკოცნიათ. ჩეკისტებს და მათ მოყურიადეებს რა გამოეპარებოდათ? 1922 წელს აფხუშოს თავს სათიბზე ნამყოფი ლევანი დაუპატიმრებიათ. ხელშეკრული ლევანი სათიანეთოდ ახუნის მთაზე გადმოუყვანიათ და რატომღაც ივრის ხეობით კი არა, შარახევზე ჩამოუტარებიათ: სოფელ ლახატოში ცნობილი მოლექსის ყრუ-გიორგის შვილთან, ივანე მგელიაშვილთან მისულან ლამის გასათევად. სტუმართმოყვარეობით ცნობილი ოჯახი იყო, მაშინაც გახარებიათ კარგი სტუმრების მისვლა, მაგრამ ვაჟა-ფშაველას სახელოვანი შვილის დატყვევების ამბავს ძალზე შეუწუხებია.

პოლიციელები ნაცნობები ყოფილან. ივანეს კი ჯერ უცნობნი სცემდნენ თურმე პატივს, როგორც ნამდვილ მთიელ კაცს, ნაცნობები და მის ოჯახში ბევრჯერ ნაპურმარილენი ხათრს არ გაუტყებდნენ. უთხოვია ივანეს, ვაჟას შვილს ხელშეკრულს ნუ მაყურებინებთ, შეუხსენით, სუფრასთან წესზე დაჯდეს, ნუ გეშინიათ, ეგ ისეთი მამის შვილია, გაქცევას არ იკადრებსო. მაშინ ჯერ კიდევ, ჩანს, მთლად ადამიანობა დაკარგულნი არ იყვნენ ჩეკისტები, ლევანისათვის ხელები შეუხსნიათ და მთელი ღამე ქეიფში გაუტარებიათ. გათენებულა, გამოსულან და ლევანს მასპინძლისთვის უთქვამს, შენი შაშხანა გამომიტანეო. დაფეთებულან პოლიციელები – ნეტავ რას აპირებსო! ივანეს



ვაჟას შვილიშვილი ლუკა რაზიკაშვილი მეუღლესთან, ქალიშვილებთან: თამარ, მარინე და ნინოსთან; შვილიშვილებთან: ლევან, მაია და მალხაზთან.

ერთი კი შეუვლია თვალი ყველასათვის და ისევ და ისევ ლევანის რწმენით დაიმედებულს უყოყმანოდ გამოუტანია თავისი „ხუთსროლიანი“. თვით ვაჟასაგან იარაღში განვრთნილს სხარტი მოძრაობით, თითქმის დაუმიზნებლად ხუთი უსროლია ეზოს ბოლოში მდგარი ახალგაზრდა მსხლის ხისათვის და ხუთივე დაუკრია. თოფი ივანესთვისვე დაუბრუნებია და უთქვამს: ერთხელაც კიდევ ხომ გავახმიანე მთები... ეგ ნატყვიარები ჩემ სამახსოვროდ დარჩეს... მე აქეთ ვეღარ ამოვივლიო. კი შედავებიან, მაგას რად ამბობო, მაგრამ ლევანის ეჭვი უსაფუძვლო არ იყო.

ის ნატყვიარი მსხალი მალლა გამხმარა, დაბლა ყლორტები ამოუყრია. ივანეს გადაუჭრია და ხელახლა დაუმყნია, ლევანის სახელზე გაუხარებია. სიკვდილამდე სულ იმ ხეს ეფერებოდა თურმე თავისი დაკოჟრილი ხელებით და თან თვალცრემლიანი ბუტბუტებდა: რა ვაჟკაცი დალუპესო. (ცნობა მოგვანოდა ივა-

ნეს შვილიშვილმა თინათინ მგელიაშვილმა).

კარგახანს თიანეთში ჰყოლიათ, მერე თბილისში, მეტეხში ჩამოუყვანიათ და დახვრეტა მიუსჯიათ. შეშფოთებულა ქართველი ინტელიგენცია, უცდიათ ლევანის ხსნა. შალვა დადიანი, პავლე ინგოროყვა და ალექსანდრე აბაშელი – იმ დროისათვის ყველაზე სახელოვანი მწერლები – მისულან ინტელიგენციისა და ხალხის სახელით სერგო ორჯონიკიძესთან – ვაჟა-ფშაველას შვილია, ნუ დახვრეტო. როგორც ყვებიან მისულან საქვეყნოდ ცნობილი ქართველი ქალებიც: ვერიკო ანჯაფარიძე, ნატო ვაჩნაძე, თამარ ჭავჭავაძე, მაგრამ „რკინის კომისარი“ ყველას ამ სიტყვებით ისტუმრებდა თურმე: „ვაჟა-ფშაველას შვილს კი არა, თვით ვაჟაც რომ ცოცხალი იყოს, იმასაც დავხვრეტავდითო!“ მეტეხის ციხიდან გაუყვანიათ სხვა ტუსალებთან ერთად. დამხვრეტთა მონაწილის გადმოცემით ლევანი სიკვდილის წინ ოდნავადაც არ შემკრთალა, არ ეპუებოდა, ლანძლავდა თურმე ჯალათებს. მათ სამშობლოს გამყიდველებს, ხალხის მტრებს უწოდებდა. ემუქრებოდა: არ შეგრჩებათ, ძაღლებო, ჩვენი დახვრეტა, ხალხი სამაგიეროს გადაგიხდითო!

ისევე, როგორც ბევრმა სხვამაც საქართველოში, მეც არ ვიცოდი რომ ლევანს ცოლ-შვილი დარჩა და ისინი გორში ცხოვრობდნენ. ამ წიგნის 1987 წლის პირველი გამოცემის შემდეგ, როცა გადამუშავებაზე და შევსებისათვის დავიწყე ზრუნვა, მაშინ გავიგე ლევანის შვილები გორში ცხოვრობენო. ჩავედი და კითხვა-კითხვით მივაგენი ოსტროვსკის ქუჩის 47 მცხოვრებ შეჭალარავებულ და ძალზე სიმპათიურ მანდილოსნებს, ქეთევან და პეპელა რაზიკაშვილებს. ქეთევანი ადრე დაქვრივებულა, კარგი შვილები ჰყავს და შვილიშვილებიც. პეპელა კი აღარ გათხოვილა და დას ამოსდგომია გვერდში შვილების აღზრდაში.

როდესაც მე ჩემ სირცხვილად ჩავთვალე აქამდე იმის უცოდინრობა, რომ ვაჟას შვილიშვილების შესახებ არაფერი ვიცოდი, თვალცრემლიანებმა ღიმილით მანუგეშეს: ეგ შენი ბრალი არ არის, ისე ააწყვეს ცხოვრება, რომ ჩვენ შესახებ არავის არ უნდა სცოდნოდაო. და აი, რა მოვისმინე იმ საღამოს:

„ვაჟა-ფშაველა მკითხავთან სადღაცა ყოფილა, ლევანიც თან ჰყოლია. გარეთ ეზოში რიგი მდგარა რო მისულან, ბევრი ხალხი ყოფილა, ვაჟასაც რიგი დაუჭერია. მკითხავს შინიდან დაუძახ-

ნია: დიდი ვილაცა მოვიდა, შემოვიდესო! შესულა ვაჟა და შეუყვანია ლევანიც. სხვა რა უთხრა მკითხავმა არ ვიცით, ერთი კი ის უთქვამს: შენი შვილი ცოლს ირთავს მალე, ლამაზი ქალია, მხოლოდ ისეთი სიმახინჯე აქვს, არ ეტყობაო.

მამას და დედას ძალიან უყვარდათ თურმე ერთურთი. ალბათ უფრო ლამაზი სხვა აღარავინ ეგონათ და მამას ერთხელაც, ოჯახში თავის სიდედრის თანდასწრებით უთქვამს:

„მკითხავმა ესე-ესე გვითხრა მე და მამაჩემს და, აბა, მაგათი რამე დაიჯერებო?

– არა, ტყუილი არ უთქვამს, აი ნახეო, დედასთვის თმები გადაუნევიო თავის დედას და მისი ყურები უჩვენებია – ერთი სხვანაირი ჰქონია, მეორე სხვანაირი.

მეტეხის ციხეში რომ ჰყოლიათ მამა, დედა ჩამოსულა ჩარგლიდან მის სანახავად. მაშინ უთქვამს მამას, მე შეიძლება გავიქცე და, აბა, შენ იცი, ბავშვებს როგორც მიხედავო. დედა შემფოთებულა: რა გიჭირს გასაქცევი ვაჟას შვილს, ეგ არ გააკეთო, არ შეცდე, გაქცევის დროს მოგკლავენ და იცოდე შვილებსაც დავხოცავ და თავსაც მოვიკლავო.

მეტეხის ციხიდან ვინმე ზანდუკელს უნდოდა თურმე გაეპარებინა ლევანი, მაგრამ მამამ არ ისურვა გაქცევა, თუ ველარ მოახერხეს არ ვიცით. დედას გაქცეული ეგონა თურმე, რადგან სამი წელი რატომღაც ეძებდნენ ჩარგალში. ალბათ რომ დახვრიტეს იმის გაგებინება არ უნდოდათ ხალხისთვის. თუმცა გაზეთში გამოუქვეყნებიათ დახვრეტილთა სიები. მამაც ყოფილა იმ სიაში.

ჩვენ ჩარგალში აღარ გვედგომებოდა. „მთიულაი“ (ასე ეძახდნენ ვაჟას მეორე ცოლს) არ გვიხდენდა. ცდილობდა თავიდან მოვეშორებინეთ. მამა ელოდა დაჭერას და თავს არიდებდა თურმე, დიდი ხნით გადიოდა სახლიდან. მაშინაც სათიბზე რომ წასულა აფხუშოს თავს, დაუბარებია, არავის უთხრათ სადა ვარო. ლევანის დასაჭერად მოსული ჩეკისტებისათვის „მთიულას“ მიუსწავლებია, აქ და აქ არისო.

მთელი საჭმელი კიდობანში ჰქონდა ჩაკეტილი, უნდოდა გვაჭმევდა, არ უნდოდა, არ გვაჭმევდა. ლევანის მოტანილ სურსათსაც იქ კეტავდა და დედასაც არაფერს ეკითხებოდა, ისიც ხმას ვერ იღებდა თურმე. დედას კი ჩარგლიდან არ სდომებია წამოსვლა – ლევანის კერას არ გავაციებო, ხშირად ტყეშიც

კი გადიოდა ლამის სათევად ხელაშვილის დასთან, სალომესთან ერთად – ისა მეგობრობდა თურმე დედასთან. ორივეს შიში ჰქონდა თურმე დაჭერისა, ერთს როგორც „მავნებლის“ მეუღლეს, მეორეს კი დევე „ყაჩაღის“ დას.

როგორც კი ლევანი დაუჭერიათ, შეშინებულ დედას მთელი ნანერები რაც კი რამე ყოფილა, ბუხარში შეუყრია. ვაჟასაც ბევრი ყოფილა, ლევანისაც, მაგრამ იქვე ყოფილა ქაქუცა ჩოლოყაშვილის და სხვა მეგობრების წერილები – იმათი გადარჩევის დრო აღარ იყოო.

მეტისმეტად აუტანელი რომ გამხდარა ჩარგალში ყოფნა, დედიძმა, იოსებ მთვარელიძე ამოსულა გორიდან და იმას წამოვუყვანივართ. დედას ცხენისთვის რაც აუკიდია, იქიდან მხოლოდ ის წამოულია, ერთ ხურჯინში აქეთ-იქეთ მე და ჩემი და, მეორეში ჩემი ძმისთვის ხურჯინის ცალად ქვა ჩაუდვია და წამოვუყვანივართ. იოსები კარგი კაცი იყო, ფედერალისტი. თედო და მიხა რაზიკაშვილებთან ერთად ამ ორგანიზაციის წევრი იყო თვითონაც. 1928 წლამდე, სანამ ის გარდაიცვლებოდა, არა



ლევანის ქალები ბეპელა და ქეთევანი.
ქეთევანის შვილ-რძალნი და
შვილიშვილები

გვიჭირდა, თავის შვილებზე მეტად გვპატრონობდა. მერე კი დაიწყო ჩვენი უბედურება. ყველამ ზურგი შეგვაქცია, თუმცა დედაც იმასა ცდილობდა, რაც შეიძლება შეუმჩნევლად ყოფილიყო, შვილები როგორმე გადაერჩინა.

არ ვიცით მითითებით იყო თუ თავისით აკეთებდნენ, აქედანაც

აყრა და გაყრა უნდოდათ ჩვენი. მამას ნაყიდ ნაკვეთზეც აღარ გვაყენებდნენ, რომელიც ვაჟასაგან მიცემული იმ 50 მანეთით იყო ნაყიდი, იუბილის დროს რომ მიეცათ. იოსების გარდაცვალების შემდეგ მისი შვილ-რძალი მტრად გადაგვეკიდნენ. გვეყრიდნენ სახლიდან, მაგრამ სად უნდა წავსულიყავით? იმ ოთახს, რომელშიც ჩვენა ვცხოვრობდით, სახურავი გადახადეს, თოვლი და წვიმა ზედ დაგვდიოდა. დედა საწოლის თავებზე გადაჭიმავდა საწვიმარს და ისე ვიყავით შეყუჟულები.

– ღმერთმა ნათელში ამყოფოს თადეოზ გოზალიშვილი, – ილოცება ქალბატონი პეპელა, – იმისი შვილი სწავლობდა ჩემთან, თამარ გოზალიშვილი, იმას ეთქვა მამისთვის – პეპელას ღამე რომ სძინავს, წვიმა ასველებს ხოლმეო, სახლი დაუნგრეისო. მოვიდა თადეოზი, წაგვიყვანა და თავისი სახლის ერთ ოთახში დაგვაყენა. ცოლს უთხრა: საჭმელს რომ გააკეთებ, პირველად ამათ შეუტანეო.

თადეოზმა ხალხს გამოუცხადა, ლევანის ქვრივ-ობლებს სახლი უნდა აფუშენოთო. სირცხვილია, ნუთუ ხალხი არა ვართ, ფული შევავროვოთ და იმის ნახევარს მე დავდებო – მას საკუთარი საკონდიტრო ჰქონდა. ფული თვითონვე აკრიფა, ქვა როგორ მოაზიდვინა, სხვა მასალა, ან მუშებთან მორიგება-გარიგება, დედას არაფერი გაუგია, არ ჩარია, რადგან დედას არც ეცალა, დილიდან დაღამებამდე ქარხანაში იყო. პირველად რომ უთხრეს სახლი უნდა აგეშენოთო, გული ამოუფჯდა და იმდენი იტირა, ძლივს დაანყნარეს. მერე უთხრა თადეოზს, მთლად ეგრე უფასოდ არ მინდა, მაქვს ოქროს და ვერცხლის ნივთები, იმას მოგცემო. მერე მამიდა თამარის ნაჩუქარი დიდი ფარდაგიც გაყიდა. ჩვენი ნივთები მესამედსაც ვერ აანაზღაურებდა, თადეოზმა თითქმის სულ თავისი ფულით აგვიშენა.

დღესაც იმ ოროთახიან, პატარა სახლში ცხოვრობენ დები პეპელა და ქეთევან რაზიკაშვილები.

30-იან წლებში დედა თავს იკლავდა შრომით რათა კომუნისტების გული მოეგო, სტახანოველიც იყო, მონინავეც, რომ არაფერი მოეშარებინათ მისი შვილებისათვის. ღამის ცვლაში როცა მუშაობდა, ოროლი შვილი თან დაგყავდით, იქ გვაძინებდა. ლუკა „ფეზეოში“ სწავლობდა. მამიდა თამარი ჩამოვიდა ერწოდან და ქეთევანი თავისთან წაიყვანა.

– ერთხელ, ფიზიკა-მათემატიკის მასწავლებელმა ვინმე ჭიჭინაძემ სულ არაფერზე მიღრიალა: თქვენი დრო წავიდა, რაზიკაშვილო, ჩოხა-ახალუხებით რომ დაიჯგიმებოდითო!

– დედაც იმასა ცდილობდა, რომ არავის გავხსენებოდით, შეუმჩნეველად ვყოფილიყავით და ამას ცდილობდა ვახტანგ რაზიკაშვილიც. ყველას უმტკიცებდა და არწმუნებდა: მამაჩემს ერთადერთი მემკვიდრე მე დავრჩიო, მისი ჰონორარია თუ რამ სხვა, მე მეკუთვნისო. ამიტომ იყო, რომ არც გულქანისა და თამარისა იცოდა რამე საზოგადოებამ. ვაჟა-ფშაველას იუბილეს რომ ამზადებდნენ 1961 წელს, მოსაწვევებისათვის ჩავედი თბილისში, მწერალთა კავშირში სერგი ჭილაიასთან მივედი და ჩემი ვინაობა ვუთხარი. ფეხზე წამოვარდა გაოცებული: რას მეუბნებითო, ლევანის ქალიშვილი ბრძანდებითო?! ლევანს შვილები დარჩაო? ვახტანგისაგან ჩვენ ვიციო, ლევანს არავინ დარჩენიაო. როგორ, იმან არ იცის თქვენ შესახებო?! ყვიროდა ბატონი სერგი, ლანძღავდა ვახტანგს.

– როგორ არ იცის. არც დიდი ხანია, რაც ჩვენთან იყო-მეთქი, – მე ვუპასუხე.

მართლაც, იმ რამდენიმე თვის წინ იყო ჩამოსული ვახტანგი ჩვენთან. აი, ამ ოთახში ღუმელის ირგვლივ ვიყავით შემომსხდრები. ჩვენდა სასიკეთოდ კი ის არ ჩამოვიდოდა, რა აინტერესებდა არ ვიცი. დედას და იმას კამათი რაღაცაზე მოუვიდათ. დედამ მოწმობა ამოუფრიალა – შენ ჭკვიანად იყავი, თორემ მე ვიცი რაც რაზიკაშვილი ხარო! ვახტანგმა ხელიდან გამოგლიჯა და ღუმელში შეაგდო. მერე გავარდა სახლიდან და გაიქცა.

ვახტანგი თურმე თავის დედას მუცლით მოჰყვა. ეს იცოდა ვაჟამ და ბავშვს გვარს არ აძლევდა. აქ, გორში ჩამოიყვანეს ისაც სასწავლებლად და მოწმობა დიდებაშვილობაზე ჰქონდა, დედის გვარზე. სანდროს წერილიც მოეწერა, მგონი მიხასთვის: რანაირი კაცია ეს ვაჟა, რატომ არ აძლევს გვარს მაგ ბაღღსო! ლევანმა და მიხამ რაღაცნაირად მოახერხეს და რაზიკაშვილობაზე დაწერესვაჟას სიკვდილის შემდეგ. დიდებაშვილობის მოწმობა ჩვენთან ყოფილა დარჩენილი და ეტყობა იმისი მოსპობა აინტერესებდა ვახტანგს და მოსპო კიდეც. გვარის გადაკეთებასთან დაკავშირებით კი 1916 წელს, ვაჟას სიკვდილის შემდეგ შეუტანიათ ცვლილებები (ამასთან დაკავშირებით იხილეთ საქ. ცენ-

ტრალური არქივი, ფშავის საეკლესიო ჩანაწერები, 1905 წელი).

ვახტანგი თავგადაკლული კომკავშირელი და პარტიის მუშაკი იყო. ბევრი ცუდი საქმე ჩაიდინა. ერთი ჩარგლელი პირქუშაშვილი თავის ხელით მოკლა, მიხა ხელაშვილის, ლევანისა და მიხა რაზიკაშვილებს დახოცვაშიც წილი ედო. მერეც გულ და გულ ცდილობდა ლევანის კვალის ნაშლას. იცით რატომ? პირველ რიგში შურით, რაკი ის ნიჭიერი და ყოველგვარი სიკეთით შემკული იყო, მას იცნობდნენ როგორც ვაჟას ღირსეულ შვილს, ხალხს უყვარდა. ვახტანგს კი პატივს არავინ სცემდა, როგორც ყოველმხრივ უფარგისა და „მამის“ შემარცხვენელს. ოთხივე შვილი ნიჭიერი და კარგი იყო ვაჟასი, ის კი გამორჩევით უნიჭო იყო. ამითაც მტკიცდება რომ ის არ იყო ვაჟას შვილი.

შეიძლება უხერხულიც იყოს ამის ლაპარაკი, მაგრამ, ბოლოსდაბოლოს, ხალხმა ხომ უნდა იცოდეს სიმართლე.

ვაჟა-ფშაველას წიგნების ჰონორარიდან ხომ შეიძლებოდა ჩვენთვისაც რაიმე მოემადლებინა ერთხელ მაინც. კაპიკი არაფრისა მიგვიღია, თვითონ კი გაფუფუნებული იყო. ჩემი იქ ყოფნის შემდეგ, ბატონ სერგის დედაჩემისათვის ერთჯერადი დახმარების სახით კარგა დიდი თანხა გამოუწერიანებია, პენსიაც დაენიშვინებინა, მისულიყო ვახტანგი და ისიც იმას აელო – ეგ თანხა დედაჩემისთვის არის გამოწერილი, თამარი დედაჩემსა ჰქვიათ. დედა 1987 წელს გარდაიცვალა 95 წლისა. აბა, თუ ვინმეს სადმე როდისმე უხსენებია?”

ამასთან დაკავშირებით აი რა მიაშობო ლევან ბოძაშვილმა. ის ფშავში ცნობილი კაცი, მამაჩემის განუყრელი მეგობარი იყო. მან, უკვე ნადროვნებულმა, ბოლოს თბილისელი ქალი შეირთო და სიცოცხლის ბოლო წლები თბილისში გაატარა. ხშირად მირეკავდა თავისი ფოლკლორულ-ეთნოგრაფიული კრებულების მომზადებაში მისახმარებლად და ხინკალ-ჟიპიტაურის თანამეინახედ. თანაც უამრავ რამეს მიყვებოდა. ერთხელაც სიტყვამ მოიტანა და ვახტანგ რაზიკაშვილზე ჩამოგვივარდა სიტყვა.

– „შენ არ ვიცი მოგიკრია ყური თუ არა, ძმისწულო, მაგ ვახტანგს მუცლით მოყოლილს ეძახდნენ ჩარგალელნი – არ იყო ვაჟას შვილიო. ამასთან დაკავშირებით ერთი ამბავი მინდა გიამბო... სანამ ცოცხალი იყო, ვერ ვამბობდი, მაშინებდა, ერთი ხათაბალა კაცი იყო (კაციცა ჰყავს მოკლული), თუმცა კი მალე

მენაც იქ მამინვეს წასვლა, იქაც ვიცი ხათაბალას რას ამიტებს, მაგრამ რაც იქნება იქნება, მინდა იცოდეს სიმართლე, – ხმამალა, მთელი ხმით იცინოდა ძია ლევანი, როგორც ჩვეულებრივ სჩვეოდა.

– ერთხელაც ეგ ვახტანგი, გაამბო თავის ძმისწულსა, ჩემთან ნავიყვანე შარახევში. იქ პური რო უნდა გვეჭამა, მეზობელს, გიორგი ტუქსიშვილს დავუძახე. გაუხარდა: ვახტანგის ნახვა მაინტერესებსო. ცოტა რომ შევქეიფიანდით, გიორგიმ ვაჟა-ფშაველას შესანდობრის თქმა დააპირა, ვითომ ვახტანგს ვასიამოვნებო.

– მამაშენ ვაჟას სულ გაანათლოს ღმერთმაო.


– ერთი ვაჟას სულ-საიქიოცა, იმის მამგონისაცაო! – იყვირა ამ ვახტანგმა, – ის კაცი თუ იყო, თქვენ ის კაცი გგონიათ?! – აყვირდა რო სულ ცოფი ყარა. არაყიანი ჭიქა ძირს დაჰკრა, გატეხა. სანყალი გიორგი, ადგა და უხმოდ წავიდა. მერე მიაშობო:

– მაგას რა მამაფიქრებდა, რო ვაჟას ეგრე გინებას დაუწყებდა, ეგ ბეჩავი ეგა. თან იმას იძახის ვაჟას შვილი ვარო, თან საფლავ-სამარეს უტრიალებს. ტყუილად არ ულექსებიან ფშაველებსა: „რაზიკაშვილო ვახტანგო, გაგთეთრებია ქოჩორი, ჟინვალის ქვემოთ კაცი ხარ, ჟინვალის ზემოთ – ჩოჩორიო“. მენ ისი მგონავ, ჩემ ნათქომ ეწყინა, რაკი შამსწვრალი ვარ მაგაზე რო თქო ვაჟამა: „განა ჩემ გაკეთებულიაო“. ვეხსომები ნიადამა, მაშინ ეგ ცხრა-ათის წლისა იქნებოდა... ქვევიდან საიდანლაც მოვდიოდით ცხენებითა. ვაჟაც ჩვენთან იყო. იმას ცხენის გავაზე ეგ ვახტანგი ჰყავდა შემოსმული. შარახეულაზე რო მოვედით, წვიმებისაგან წყალი წამოდიდებული იყო. ვაჟას ცხენმა წაიფორხილა და ვახტანგი წყალში ჩავარდა.

– არიქა, ვაჟავ, ვაჟავ! ბალლი ჩავარდა წყალშიო! – ავტეხეთ ყვირილი, გავიქეცით მისაშველებლად.

– ჩავარდეს მაგისი დედაც, განა ჩემ გაკეთებულიაო! – ალბათ ბალლის უშნობობამაც გააბრაზა ვაჟა – ტანტას რატომ მაგრა ვერ ჩაეჭიდაო, ამაჰკრა ცხენსა და წავიდა. ვახტანგი ჯანაშვილ იოსებს შემოვუსვით ცხენის გავაზე და იმან წაიყვანა. ჩემ სიტყვა იმიტომ ეცა სენცეცხლასავითა, რომ იფიქრა დამცინისო, რაკი ამან იცის, ვაჟას შვილი არა ვარო.

გიორგის ეგონა ეგრე, თორო რამდენჯერ შევ-



ქაქუცა ჩოლოყაშვილი

სწრებივარ ვაჟა ცუდად მოეხსენიებინოს, ეჯავრებოდა, ვერ უხსენებდი. მუზეუმის თანამშრომლებს კვლევის უფლებას არ აძლევდა. თბილისში სხვანაირად ეჭირა თავი – იქიდან ჰონორარებს ელოდა როგორც ვაჟას”ერთადერთი” მემკვიდრე“.

საბჭოთა წყობილების დროს (1985-6-7 წლებში), როდესაც „ვაჟა-ფშაველას ცხოვრებაზე“ ვმუშაობდი, ლევანის დახვრეტასთან დაკავშირებული საარქივო მასალების მოძიებაზე არც მიფიქრია, რადგან ვიცოდი, ამის მცდელობასაც კი, დანაშაულად თუ არა, სიგიჟედ მაინც ჩამითვლიდნენ. გვიან, 2000-იან წლებში შევარდნაძის მოფოქრაქებულ საქართველოში, როცა სახელმწიფოსა და კანონებზე აღარავინ რას ფიქრობდა, უფრო სწორედ იგივე კომუნისტურ რეჟიმის მსახურთაგან წერე და იკითხეს პოლიტიკა იყო გამეფებული, მომაფიქრდა ლევანის საქმეთა მოძიება. მაგრამ, რომ იტყვიან, იქვე გადამესხა ცივი წყალი: საქართველოს ცენტრალურ არქივში მითხრეს ეგეთი მასალები ჩვენთან არ არის, „კგბ“-ს არქივი კი ნაწილი 1991-92 წლების სამხედრო-კრიმინალური გადატრიალების დროს დაინვა, ნაწილი რუსეთშია გადატანილიო. და, აი, 2001 წლის იანვარში, სრულიად შემთხვევით გავიგე, რომ ლევანის „საქმე“ ინახება საქართველოს უშიშროების სამინისტროსთან არსებულ არქივში, იქვე მათ შენობაში, ვაჟა-ფშაველას 72-ში. აქ საექსპერტო-კრიმინალური სამმართველოს უფროსი აღმოჩნდა ჩემი ძველი მეგობარი, მაგრამ დიდი ხნის უნახავი ფშაველი კაცი გივი ღუბიანური. მან თავის კაბინეტში მოატანინა „საქმე“ და ორი დღის განმავლობაში ვშიფრავდით რუსულ-ქართულად ნაწერ საბუთებს, გაკრულ (ჩანს ზოგჯერ განგებ) ხელმოწერებს.

სანამ მკითხველი ამ მასალებს გაეცნობოდე, მინდა შევახსენო ის დრო, ის ვითარება, რამაც შეიწირა ლევან რაზიკაშვილის (და მასთან ერთად ათასობით პატრიოტის) სიცოცხლე. ამისათვის მოვიყვან იმ ტრაგიკული ამბების მონაწილისა და შემდეგში საფრანგეთში გადახვენილი მამულიშვილის სოლომონ ზალდასტანიშვილის წიგნიდან შემდეგ მონაკვეთს.

1921 წლის თებერვალში რუსეთმა მოახდინა საქართველოს ვერაგული ანექსია. ქართველი ხალხის დიდი ნაწილი ამას ვერ შეეგუა. აშკარა ომში დამარცხების შემდეგ დაიწყო ქვეყნის ხსნისათვის სამზადისი.

„ქართველი ხალხის მხედრულად დარაზმვასა და აჯანყებისათვის მომზადებას ასრულებდა სამხედრო ცენტრი, რომელიც ჩამოყალიბდა 1922 წლის მარტში შემდეგი შემადგენლობით: თავჯდომარე გენ. კ. აფხაზი (ილია ჭავჭავაძის დის შვილი – გ. ხ.); წევრები: გენერალური შტაბის გენერალი ალ. ანდრონიკაშვილი, გენ. ვარ. ნულუკიძე, პოლკ. გოგი ხიმშიაშვილი და პოლკ. როსტომ მუსხელიშვილი (ქართული მეორე დივიზიის შტაბის უფროსი). პარტიზანული რაზმის უფროსად დაინიშნა კახეთში პოლკ. ქაიხოსრო (ქაქუცა – გ.ხ.) ჩოლოყაშვილი (ეროვნულ-დემოკრატიული პარტიის წარმომადგენელი) ქართლში – მიხ. ლაშქარაშვილი.

აჯანყების გეგმა იყო შემდეგი: პირველი და მთავარი გამოსვლა უნდა მოეხდინა ქაქუცა ჩოლოყაშვილს დუშეთში. როცა თბილისიდან მის წინააღმდეგ გაგზავნილი რუსის ჯარი მასთან ბრძოლაში ჩაებმებოდა, მცხეთის მხრივ მ. ლაშქარაშვილი თავისი რაზმით ზურგში დაარტყამდა. ამით მტრის რიგებში მოახდენდა არეულობას და შეერთებული რაზმებით ქაქუცას მეთაურობით თბილისს მოადგებოდნენ. ამავე დროს აჯანყება უნდა მომხდარიყო გურიაში, სამეგრელოში, სვანეთში, ქართლში და კახეთში.

1922 წლის ზაფხულში ხალხში უკმაყოფილება გაძლიერდა. აქა-იქ პატარა გამოსვლებიც მოხდა. ზოგი პროვინციები საერთო გამოსვლის დაწყებას თხოულობდნენ. ქაქუცას, რომელიც გასული იყო თავისი რაზმით ტყეში და სამხედრო ცენტრიდან განკარგულებას ელოდა, ხევსურები ძალას ატანდნენ და თხოულობდნენ რუსებთან ომი დაეწყოს. ისინი ქაქუცას უთვლიდნენ: „რუსების სიმხეცეს ველარ ვიტანთ – წაბილწეს სოფლები, დაანგრიეს ოჯახები. გაგვიძვეს და მტერს შევუტიოთო!“ იმის შიშით, რომ ხალხი თავისთავად არ გამოსულიყო და ამით საერთო გამოსვლისთვის არ ევნო, ქაქუცა კახეთიდან მთიულეთში (ხევსურეთში – გ. ხ.) გადავიდა...

1922 წლის აგვისტოში აჯანყება მაინც მოხდა. გამოვიდა კახეთი და ხევსურეთი. მოძრაობას ქაქუცა ჩოლოყაშვილი ჩაუდგა სათავეში. მემბოხეებმა დუშეთის მიდამოებში მოიყარეს თავი. რუსებმა თბილისიდან აჯანყებულების წინააღმდეგ რამდენიმე ათასეული ჯარისკაცი გაგზავნეს და შტაბის უფროსად პოლკ.

როს. მუსხელიშვილი („დამკომის“ სამხედრო წევრი) დანიშნეს. როდესაც „დამკომის“ (დამოუკიდებლობის კომიტეტი – გ. ხ.) სამხედრო ცენტრმა ეს ამბავი გაიგო, მოითხოვა, რომ „დამკომი“ ჩასდგომოდა სათავეში ამ მოძრაობას... სოციალ-დემოკრატიულმა პარტიამ უარჰყო ნაადრევ მოძრაობაში მონაწილეობის მიღება და ეს შეხედულება თავიანთ რაზმელებს შეატყობინა. დუშეთს მიახლოებული რაზმები შ. ფალავანდიშვილსა და მ. ლაშქარაშვილისა როტმისტრ ბაგრატიონ-მუხრანელის მეთაურობით დაიშალნენ და სახლში დაბრუნდნენ. ამის გამო პოლკ. რ. მუსხელიშვილმა თავისი გეგმის შესრულება ვერ მოახერხა და იძულებული გახდა რუსების ჯარით იერიშით მისულიყო ქაქუცას წინააღმდეგ. ქაქუცა მტერს მაგრად დაუხვდა: პირველ შეტევაზე დიდი ზარალიც მიაყენა. რუსებმა მცხეთისაკენ დაიხიეს. ძალების სიმცირის გამო ქაქუცა იძულებული იყო დევნა შეეჩერებინა. ძველ პოზიციაზე დაბრუნდა და იქ გამაგრდა. რუსებმა თბილისიდან დამხმარე ძალები მიიღეს და ხელმეორედ შეტევაზე გადავიდნენ, დაამარცხეს ჩოლოყაშვილი და მის რაზმს რკალი შემოარტყეს. ქაქუცამ ბრძოლით რკალი გაარღვია და კახეთისაკენ დაიხია. რუსები ხევსურეთში შევიდნენ და სოფლები გაანადგურეს. თბილისში ამ გამოსვლის გამო დაჭერა და დახვრეტა დაიწყეს... (19, 11 – 14).

იმჟამად ფშავში მილიციის უფროსად სწორედ ლევან რაზიკაშვილი იყო. მას მოსთხოვეს ქაქუცას წინააღმდეგ გადამჭრელი ზომების მიღება, მაგრამ რაკი ისა და ლევანი სათავადაზნაურო გიმნაზიაში სწავლის პერიოდიდან მეგობრები იყვნენ, რაკი, როგორც ჩანს ლევანი თანაუგრძობდა სამშობლოს დამოუკიდებლობისათვის მებრძოლ გმირებს (სხვაგვარად არ შეეძლო ვაჟა-ფშაველას შვილს მოქცევა), შეპყრობის ნაცვლად, ხელიც კი შეუწყო ფშავ-ხევსურეთიდან ქაქუცას მშვიდობიანად გასვლას. ამას კი როგორ აპატიებდნენ, როგორ გაუგებდნენ რუსული სოციალიზმისათვის თავგადაკლული ცოფიანი ძალები, ვისი დევიზიც იყო: „დავახრჩობ დედას, მივხვრიტავ მამას, თუკი მიბრძანებს პარტია ამას“.

ჰოდა მოქმედებდა დაუნდობელი სისხლისმსმელობით ცნობილი, ხალხის შიშითმზარავი „Чека (Чрезвычайная комиссия)“ საგანგებო კომისია).

საქართველოს საგანგებო კომისიას

სსსრ თიანეთის მაზრის მუშათა და გლეხთა მილიციის სამმართველო სისხ. სამ. განყოფილება, 9 ოქტომბერი 1922 წ.

თანახმად თიანეთის მაზრის აღმასკომის თავჯდომარის განკარგულებისა 7 ოქტომბერი ა/წ. 4052 ამასთან ერთად იგზავნება თქვენს განკარგულებაში პატიმარი ყოფილი ფშავის რაიონის მილიციის უფროსი ლევან ლუკას ძე რაზიკაშვილი, რომელიც დაპატიმრებულია შინაგან საქმეთა სახალხო კომისარის მოადგილე ამხ. იოვიძის პირადი განკარგულებით სხვადასხვა ბოროტმოქმედებაზე და ირიცხება მათზე.

მაზრის პოლიციის უფროსის მაგივრად დ. (?)

სისხ. სამ. განყ. უფროსის მაგიერ ა. გონჯილაშვილი.

**საქართველოს სოციალისტურ საბჭოთა რესპუბლიკის
საგანგებო კომისიის თავჯდომარეს
თიანეთის მაზრის სოფელ ჩარგლის მცხოვრებლის
თამარ გრიგოლის ასულ რაზიკაშვილის
თხოვნა**

გირდგენტ რა ამასთან ერთად მოწმობას, უმორჩილესად გთხოვთ შეხვიდეთ ჩემს უმწეო მდგომარეობაში და ჩემი მეუღლის ლევან რაზიკაშვილის საქმე საჩქაროდ გამოიძიოთ და გაარჩიოთ, რომ ყოვლად უდანაშაულო ადამიანი ტყუილუბრალოდ არ დაისაჯოს საპყრობილეში ჯდომით. ამასთანავე მოგახსენებთ, რომ თუ ჩემი მეუღლე ლევანი დამნაშავე იყოს რაიმე საქმეში, თავისი ფეხით არ გამოცხადდებოდა თიანეთის საგანგებო კომისიაში.

**მთხოვნელი თამარ გრიგოლის ასული
რაზიკაშვილისა
1922წ. 19 ოქტომბერი ქ. თბილისი.**

მოწმობა

1922 წელსა ღვინობისთვის 11-ს დღესა ჩვენ, ქვემო რეხელის მომწერნი, თიანეთის მაზრის, ფშავის უბნის სხვა და სხვა სოფლებში მცხოვრებნი ვაძლევთ ამ მოწმობას თიანეთის მაზრის სოფ. ჩარგალში მცხოვრებ – ფშავის უბნის მილიციის უფროსს ლევან ლუკას ძე რაზიკაშვილს მასზედ, რომ ეს რაზიკაშვილი არის სვინდისნამუსიანი, პატიოსანი და ყოველმხრივ

სანდო პიროვნება. რაზიკაშვილი მენშევიკების დროიდან მოყოლებული ვიდრე დღესნამდე იყო ჩვენი – ფშავის უბნის მილიციის უფროსად და მთელი ამ ხნის განმავლობაში იყო ერთგული თავის სამსახურისა და მშრომელთა ინტერესების დამცველი, სასტიკი მდევნელი ყველა ბოროტმოქმედებისა, განსაკუთრებით ბანდიტ-ყაჩაღებისა, რომლებთანაც მას ჰქონდა არა ერთხელ და ორჯერ მცირე ძალებით სროლა და ბევრჯერ იყო მისი, რაზიკაშვილის სიცოცხლე განსაცდელში. რადგან ჩვენი ხეობის ბანდიტები, მომეტებულ შემთხვევაში ხევსურები იყვნენ, რომლებიც სოფელ ჩარგალსაც კი მთლიანად გვედავებოდნენ, რაზიკაშვილი მომხრე იყო ხევსურების დასჯისა, რასაც ის აშკარად ამბობდა სასოფლო ყრილობაზედ და მთავრობისაგან, მთავრობის სახელით მოითხოვდა ხევსურების დასჯას, რაზედაც მას აქვს მოხსენება გაგზავნილი უმაღლეს მთავრობაში და თიანეთში თავის უფროსებთან არა ერთხელ და ორჯერ მოწერილი, რასაც ჩვენ რაზიკაშვილი ყრილობაზედ გვეუბნებოდა. რაზიკაშვილი ერთგულია საბჭოთა ხელისუფლებისა და დიდი წინააღმდეგი იყო ქაქუცა ჩოლოყაშვილის თავის რაიონში შემოშვებისა, ხოლო მომხრე იყო ჯარის შემოსვლისა, რომელსაც დახვდა და ამით რაზიკაშვილის და ჩვენი მისწრაფებაც განხორციელდა.

მოწმობა ესე ეძლევა რაზიკაშვილს საქართველოს საგანგებო კომისიაში წარსადგენად.

1. ლევან გარსევანიშვილი
2. გიორგი გარსევანიშვილი
3. პავლე გარსევანიშვილი
4. პავლე ყამიაშვილი
5. ივანე გორზამაული
6. ნინო რაზიკაშვილი
7. ხთისო მარცვალაშვილი
8. მარიამ პირქუშაშვილი
9. ლევან თათარაშვილი
10. მიხა გურასპაული
11. ბენიგტურ მარტიაშვილი
12. ივანე მოლოდინაშვილი
13. ბეკურ ბაჩიაშვილი
14. ალექსი ბაიაშვილი

15. გიორგი ბაჩიაშვილი
16. გიორგი თავგაშვილი
17. ხთისო მგელიაშვილი
18. ხთისო პეტრიაშვილი
19. ნიკო ჩოხელაშვილი
20. ლევან მარტიაშვილი .
21. გიორგი წინილაშვილი
22. იოსებ თურმანაული
23. ნიკო მგელიაშვილი
24. მიხა მგელიაშვილი
25. გიორგი ლაშქარაშვილი
26. პეტრე ნადირაშვილი
27. (?) მჭედლური
28. დავით ჟამიაშვილი
29. ბესარიონ მარცვალაშვილი
30. მახარე მოლოდინაშვილი
31. გიორგი მოლოდინაშვილი
32. ალექსი მარტიაშვილი
33. ალექსი რაზიკაშვილი
34. თევდორე თეთრაული
35. გიორგი რაზიკაშვილი
36. პავლე რაზიკაშვილი
37. თევდორე ჟამიაშვილი
38. გრიგოლ რაზიკაშვილი
39. სალომე ჟამიაშვილი
40. ივანე მარტიაშვილი
41. კიკო ჟამიაშვილი
42. გიორგი მარტიაშვილი
43. ალექსი პეტრიაშვილი
44. სანდრო პეტრიაშვილი
45. იოსებ ჟამიაშვილი
46. ივანე მარტიაშვილი
47. შალვა მარტიაშვილი
48. ხთისო არჯალაშვილი
49. ღვდელა რაზიკაშვილი
50. გიორგი პირქუშაშვილი
51. პაპი ჟამიაშვილი
52. ივანე ბუკუკიშვილი
53. დავით დარძული

54. გაურკვეველი ხელმოწერა

55. „-----“ -----

ამ მოწმობის სინამდვილეს ვამონებ მაღაროსკარის თემის აღმასკომის თავჯდომარე ივანე თურმანაული
მდივანი ვანო წიკლაური

Совершенно секретно в Ч. К. Грузии

На ваше отношение от 3 XI за № 17756, сообщаю, что в бытность мою в Хевсуретии по делу организации Советской власти Предисполком Тионетского уезда тов. Сургуладзе доложил мне словно, что начальник Магароскарской районной милиции Разикашвили имел связь с бандитом К. Чолокашвили и проявил в отношении борьбы милиции бандитом указанного Чолокашвили полное бездействие, даже сочувствовал бандитам, называя себя национал-демократом. во время нашей операции против бандитов в Пшав-Хевсуретии, он самовольно ушел со службы, ввиду всего я распорядился арестовать его, Разикашвили и со всеми обвинительными материалами преправдить в Ч.К. Грузии

Начальник Полит-Секретариата милиции Республики Грузия ?

1922 9 ноября.

ხელმოწერაც ისევე, როგორც ბევრი რამ სხვაც ამ მოხსენებით ბარათში, გასაიდუმლოებულია, გაუგებარია, თუმცა სხვა ბარათებიდან ჩანს, რომ ეს უნდა იყოს იოვიძე. საყურადღებოა კიდევ ფორმულირება „წრვეპშენნრ ყეკპეინრ“, რომელიც შემდეგში ფაშისტებმა გამოიყენეს ლენინის მიერ მოგონილ „საკონცენტრაციო ბანაკთან“ ერთად.

**სრულიად საქართველოს მწერალთა კავშირის
საბჭო**

(ნოემბრის 20 1922 წ. №380 ქ.ტფილისი)

ს.ს.ს.რ. საგანგებო კომისიას

ცნობილი ქართველი პოეტის ვაჟა-ფშაველას შვილი ლევან რაზიკაშვილი ოთხი თვეა რაც ზის ქ. ტფილისის 2 გამასწორებელ სახლში. ვაჟა-ფშაველას დარჩა ოჯახი შემდგარი ხუთი სულისაგან, აგრეთვე თვით ლევან რაზიკაშვილის ოჯახიც შესდგება სამი სულისაგან და მთელ ოჯახზე მზრუნველობა აწევს

მას. სრულიად საქართველოს მწერალთა კავშირის საბჭო იმედოვნებს, რომ საქართველოს საგანგებო კომისიის კოლეგია მიიღებს მხედველობაში ყოველივე ზემო აღნიშნულს, პატივს ცემს საქართველოს სიამაყეს პოეტ ვაჟა-ფშაველას ხსოვნას და დააჩქარებს რა ლევან რაზიკაშვილის საქმის გარჩევას, გაანთავისუფლებს მას საპატიმროდან.

თავჯდომარე: კ. მაყაშვილი.
მდივანი: მიხ. ბოჭორიშვილი.

Анкета №4372 Ч.К.Г.

მოგვყავს მხოლოდ ზოგიერთი მონაცემი: 35 წლისა. დაამთავრა თბილისის ქარუთული გიმნაზია. დედა: თამარა, 63 წლისა, დიასახლისი. ცოლი: თამარა, 27 წლისა, დიასახლისი. ძმა ვახტანგი, 15 წლისა. და: მარია, 20 წლისა. ბავშვები ლუკა, ქეთევანი, ეკატერინე, 7-2-1 წლისანი. როდის დააპატიმრეს: 1922 წლის 30 სექტემბერს. სად დააპატიმრეს: სამსახურებრივი მოვალეობით ვიყავი თიანეთში, სადაც დამაპატიმრეს ამხ. იოვიძის ბრძანებით.

„Протокол“

(დაკითხვის ოქმი 1922 წლის 31 ოქტომბერი)

ჩემი ფშავში ყოფნის დროს ე. ი. 1916 წლიდან 1922 წლამდე ჩოლოყაშვილს ჩემ განგებ არავისთან ჰქონია დამოკიდებულება. როდესაც მე დამატუსაღა, მაშინ მასთან იყვნენ ჯანგირა იანვარაშვილი სოფ. ხომში მცხოვრებელი და ხარხელაური და თადეოზი (გვარი არ ვიცი) სოფ. ხორხში მცხოვრებელი (დუშეთის მაზრა). სამივენი ყაჩაღობენ. ყაჩაღი გიორგი ხუმარას ძე მგელაშვილი და ყოფილი ფშავის აღმასკომის თავჯდომარე იოსებ თურმანაული. თვით ჩოლოყაშვილი ამბობდა, რომ ხევსურებს ენდობა და ამიტომ მიემგზავრება ხევსურეთში, რადგანაც ხევსურებისთვის უჩუქებია იარაღი და პატრონა ჰქონდა მენშევიკების მთავრობის დროს მიცემული. აგრეთვე ასახელებდა ვიღაც თომას (გვარი არ ვიცი), რომელიც მუშაობდა მის სასარგებლოდ ხევსურეთში, ღვდლის შვილი, ხევსური, მგონი გვარად ბალიაური. როცა ხევსურეთის საზღვარზე მივიდა ჩოლოყაშვილი, ადგილობრივ ორწყლის მინდორზე, სადაც მეც ვიყავი, რო-

გორც ტყვე, იქ მოდიოდნენ ხევსურები მახლობელ სოფლებიდან და ყველნი თანაგრძნობით ეპყრობოდნენ. ასე იძახდნენ „ჩოლოყაშვილები ხევსურებია ჩამომავლობით“. ჩოლოყაშვილს უფრო ხევსურებთან ექნებოდა კავშირი, რადგანაც მრავალი ხევსურია ჩამოსახლებული კახეთის მიდამოებში, უფრო გომბორზე და როგორც მესაქონლე ხალხი, ზამთრობით კახეთში არიან, ზაფხულობით ხევსურეთში. და რადგანაც მინას ამუშავებენ კახეთშიც და ხევსურეთშიც, ხშირად უხდებათ მოგზაურობა. ეს კი აშკარად გავიგე, რომ ყოფილმა ხევსურეთის მილიციის უფროსმა მგელიკა არაბულმა (ლიქოკელი) იმ მინდორზე მისცა ჩოლოყაშვილს ჩვენება, რომ თიანეთის აღმასკომის თავჯდომარე ამხ. სურგულაძე სოფ. შუაფხოშია რამდენიმე კაციით მისული მის, ჩოლოყაშვილის საწინააღმდეგოთ. როგორც მერე გამოირკვა, თვით სურგულაძის სიტყვით, მას, სურგულაძეს მიეცა მისთვის ტანისამოსი და ფული და დაევალებინა გაეგო სად იმყოფებოდა ჩოლოყაშვილის ბრბო, რასაც მოჰყვა დატუსაღება ჩოლოყაშვილის ამხანაგებისაგან 9-10 კაცისა, რომლებიც მეორე დღეს გაუშვა ისევ. ამჟამად ფშავლებიდან იმყოფება ჩოლოყაშვილთან დიაკონი ხელაშვილი, რაც გადმომცა ერთმა პატიმარმა მეტეხში ქურსიკა მაჩხოშვილმა, რომელიც ფშაველია და რამდენიმე წელია გადმოსახლებული ყოფილა პანკისში. ჩოლოყაშვილის თანამოაზრენი ფშავში არიან: დიაკონი მიხეილ ხელაშვილი, იოსებ თურმანაული, გიორგი ხუმარას ძე მგელაშვილი. ხევსურეთში თითქმის ყველა და უფრო ხელიშემწყობნი მგელიკა არაბული, სოფ. არხოტში მცხოვრები თომა ბალიაური, ტურჩა ჩალხის ძე ჭინჭარაული სოფ. ბისოში მცხოვრები, შიშია ქერაული სოფ. ბარისახოში მცხოვრები იმედა გოგოჭური სოფ. მონმაოში მცხოვრები, დათვია ლიქოკელი სოფ. ქობულოს მცხოვრებელი. ზემორე აღნიშნულების თანაგრძნობა გამოიხატება მაში, რომ, როდესაც ჩოლოყაშვილთან მოდიოდნენ ხევსურები ორწყალში, მოჰქონდათ პური. აგრეთვე, როდესაც ჩოლოყაშვილმა გაგზავნა ამხ. სურგულაძის წინააღმდეგ რამდენიმე კაცი, მათ შორის ხევსურებიც წავიდნენ – შიშია ქერაული და დათვია ლიქოკელი; დანარჩანების გვარები არ ვიცი. რაც შეეხება თომას, იმის შესახებ ჩოლოყაშვილი ეკითხებოდა ხევსურებს, ორწყალში ჩამოსულებს: თომა იყო თუ არა თქვენთან? სად არის? ხევსურები

ეუბნოდნენ პირაქეთ ხევსურეთში იყო და პირიქით წავიდაო. პირად ლაპარაკის დროს ჩემთან ჩოლოყაშვილი მიჩვენებდა მას გავეყლოდი ხევსურეთში და დარიალის ხეობაში, სადაც მოვამზადებდით ხალხს. როდესაც მე შევეკითხე, რომ რა ძალებზე ამყარებს თავის მოქმედებას და მე უარი განვუცხადა – ყაჩაღობა არ შემიძლიან და ვერც შევძლებო, მან მითხრა რომ ჩემთან არის საქართველოს პოეტი სვიმონ ყიფიანი, აგრეთვე საქართველოს მთავრობა ეხლა ჰკრეფს პროდ. ნალოგს, ხალხი აღელვებულია და უსათუოდ მთავრობის წინააღმდეგ წავაო.

ზემორე აღმნიშნული ჩვენების მიმცემი: ლევან რაზიკაშვილი
1922 წ. დეკ. 20-სა.
ჩვენება ჩამოვართვი რწმუნებულის თანაშემწემ:
კ. ხოჯევანაშვილი.

ამ დაკითხვის ოქმის წაკითხვისას ვინმეს შეიძლება მოეჩვენოს, რომ ლევანმა ქაქუცა ჩოლოყაშვილის თანამებრძოლი, თავისი ფშაველ-ხევსურნი, დააბეზლა, დღევანდელი ტერმინოლოგიით, „ჩაუშვა“. არა. ლევანი თავიდან არავის ასახელებს, მაგრამ შემდეგ, ჩანს, დარწმუნდა, რომ ჩეკაში ყველაფერი დაწვრილებით იცოდნენ, დამალვას აზრი არა ჰქონდა და ამიტომ ყველასათვის ცნობილი რამდენიმე პიროვნება დაესახელებინა დაპირებული „შელავათის“ მისაღებად. მაგალითად, თომას გვარი არ ვიცო უნერია, მაგრამ იქვე „გაახსენეს“ და ჩაანერინეს, რომ ბალიაური იყო. ეს გარემოება შემჩნეული აქვს გ. ციციშვილსაც თავის სულ ბოლოდროს გამოქვეყნებულ წიგნში „რისთვის დახვრიტეს ვაჟა-ფშაველას პირმშო ლევან რაზიკაშვილი“. იგი წერს: „ლევანი ხშირად ცდილობს გვერდი აუაროს პიროვნებების დასახელებას. ჩანს, რომ იგი განსაკუთრებით ერიდება იმ უბრალო, რიგითი მებრძოლების გვარების ჩამოთვლას, რომლებიც მემამოხეებს ფშაველ და ხევსურ მებრძოლთა სახით შეუერთდნენ. არა და, დუშეთის მიდამოებში ქაქუცას 25 კაციანი ჯგუფი უკვე 65-მდე გაიზარდა. მათ შორის იყვნენ ფშავისა და ხევსურეთის წარმომადგენლები, რომლებიც მაღაროსკარის ბრძოლაში და მოწინააღმდეგის 250 მებრძოლის განიარაღებაში იღებდნენ მონაწილეობას. ლევანი მათ შესახებ

საერთოდ არაფერს ამბობს. მაგრამ კითხვებზე პასუხის პროცესში იძულებული ხდება დაასახელოს ჯანგარა იანვარაშვილი, იოსებ ხალხელაური, თადეოზი, სიმონ ყიფიანი, ვინმე ზანდუკელი (ნიკოლოზ), ქაქუცას ძმა სიკო, გიორგი მგელაშვილი, იოსებ თურმანაული, თომა ბალიაური, მგელიკა არაბული, ტუჩა ჭინჭარაული, მიშა ქერაული, იმედა გოგოჭური და დათვია ლიქოკელი. ამ ხალხის ქაქუცას მხარეზე ყოფნა მთელმა ფშაველ-ხევსურეთმა ისედაც იცოდა, და ამდენად ლევანის დასახელებას ჩეკასთვის რაიმე განსაკუთრებული ღირებულება არა ჰქონდა. ლევანის მიერ ჩამოთვლილთაგან ზოგი ჩეკაში მოხვედრილის საქმის გაცნობა მოგვიხერხდა, მაგალითად, შევძელით შეგვესწავლა სიმონ ყიფიანის, ნიკოლოზ ზანდუკელის და ფშაველ-ხევსურეთის ამბოხებასთან ჩეკას მიერ დაკავშირებული, დამოუკიდებლობის კომიტეტთან არსებული, თითქმის მთელი „სამხედრო ცენტრის“ ნევრთა სამძებრო საქმეების გაცნობა, მაგრამ მათში ლევან რაზიკაშვილის ჩვენების გამოყენება, არსად არ შეგხვედრია“. (გვ. 44, 45). ამის გამო ლევანის მიმართ რაიმე სასაყვედურო ფშაველ-ხევსურეთში არსად რაიმე გაიგონება. ჩანს მის ღირსებაში მაშინაც და შემდეგაც ეჭვი არავის შეჰპარვია. დამალვით კი არაფერი იმალებოდა.

დასკვნითი დადგენილება
(1922 წლის 15 ნოემბერი შედგენილია რუსულად.
მოგვყავს მხოლოდ წაყენებული ბრალდება. ის, რაც წინა დოკუმენტშია მოცემული და აქ მეორდება, გამოვტოვებთ)

... ძიებით დადგენილია: სახკომსაბჭოს სამეულის ბრძანებულებით 26 III ლამის 22 საათზე თიანეთის მაზრის აღმასკომის თავჯდომარე სერგო სურგულაძე გაემგზავრა სოფ. ორწყალში (სოფელი არ არის, ბუნებრივად ჩაკეტილი ადგილია – გ. ხ.) 12 ამხანაგის თანხლებით. ნაბრძანები იყო რადაც არუნდა დასჯდომოდათ, გადაეკეტათ გზა, რომლითაც ჩოლოყაშვილი იხევდა ხევსურეთისაკენ, რასთან დაკავშირებითაც არ მისულმა სოფელ არტნამდე ორი მილიციონერი გაგზავნა ფშავის რაიმილციის უფროსთან რაზიკაშვილთან, რათა თავის მილიციელებით ის

შეხვედროდა სოფ. შუაფხოში. თავის წერილში ის მიუთითებდა არ ევლო არაგვის ხეობით, საითაც იხევდა ჩოლოყაყვის ბანდა, და მათ არ გადაჰყროდა. ამასთან უჩვენებდა შემოსავლელ გზას. ამის მიუხედავად, რაზიკაშვილმა წამოიყვანა თავის მილიციონერები, რის შედეგადაც გადაეყარა ბანდის წევრებს და აუტეხა სროლა, რის შედეგადაც მოკვდა ერთი მილიციონერი და ჩაბარდა ჩოლოყაყვის ჯგუფს. დაჰყო რა რამდენიმე დღე ბანდაში, ჩოლოყაყვილის მიერ გაშვებული იქნა დავალებით მოემზადებინა ფშავლები აჯანყებისათვის და ზურგში დაერთყა წითელი არმიისთვის, როდესაც ის გაივლიდა ხევსურეთისაკენ. დატოვა რა მილიციელები ბედის ანაბარა ჩოლოყაყვილის ბანდაში, რაზიკაშვილი დაბრუნდა მისადმი რწმუნებულ რაიონში, სადაც მიიღო წერილობითი წინადადება ამხანაგების აღნიაშვილისა და დიდებულისაგან გამოცხადებულიყო და გაეცნო მათთვის ჩოლოყაყვის ბანდის მდგომარეობა, მაგრამ რაზიკაშვილმა ესეც არ შეასრულა იმ მოტივით, რომ იგი არ გაუშვა წითელი არმიისათვის მტრულად განწყობილმა მოსახლეობამ. ამასთან მან საჭიროდ არ ჩათვალა ცენტრისათვის ეცნობებინა მომხდარის შესახებ. თვითნებურად თავის არიდებაში რაზიკაშვილმა ამხ. სურგულაძისაგან მიიღო მიწერილობა აღმოეჩინა დახმარება გლეხებისათვის ბანდიტებთან შეტაკებაში დალუპული გვამის გადმოსვენებაში; წინააღმდეგ შემთხვევაში იგი გადაცემული იქნებოდა შესაბამისი პასუხისმგებლობისათვის. თითქოსდა ამ საქმესთან დაკავშირებით წავიდა სოფელ ხომში, სადაც შეხვდა ჩოლოყაშვილს მისი ბანდის სამ წევრთან ერთად. ჩოლოყაშვილმა უსაყვედურა მას თუ რატომ არ შეასრულა მისი დავალება და თან წაიყვანა, იცოდა რა რომ ბანდა გარშემორტყმული იყო. რაზიკაშვილმა ხელი შეუწყო ჩოლოყაშვილს ამხანაგებთან ერთად მისი მშობლიური ჩარგლიდან გადასულიყო სოფ. სოფლიონში, არტნის თემში და იქიდან გადააცილა პანკისის ხეობაში, სადაც ჩოლოყაყვი მიიმალა. ქაქუცამ რაკი ვაჟა-ფშაველას (სიე!) შვილი იყო ლევანი და ხალხში გავლენა ჰქონდა, დაავალა ხალხი მოემზადებინა აჯანყებისათვის...

ამიტომ მიესაჯოს სასჯელის უმაღლესი ზომა.

ოპერწმუნებულის თანაშემწე: ხოჯევანოვი.

ეს დასკვნა 3-5 დეკემბერს განუხილიათ „ჩეკას“ კოლეგიაზე და მათაც დაუდასტურებიათ, რომ განაჩენი სამართლიანია – ლევან რაზიკაშვილი უნდა დაიხვრიტოსო. შემდეგში ხელახლა გადასასინჯად დაუბრუნებიათ საქმე, სისრულეში მოყვანა განაჩენისა დროებით შეუჩერებიათ „გარკვეულ ვადამდე“. ამ დოკუმენტს ხელს აწერენ

Председатель чека: Кванталиани жп Начальник соч: Бериа.

1923 წლის 14-15 თებერვალს „ჩეკას“ კოლეგიას ხელმეორედ განუხილია საქმე და პირვანდელი თავისი განაჩენი სისრულეში მოუყვანიათ. დახვრეტის აქტიც იმ ლამესვეა შედგენილი ხელმოუწერლად.

ლევანის შესახებ ვრცელი წერილი სათაურით „ვაჟა-ფშაველას შვილი ლევანი“ გამოვაქვეყნე გაზეთ „XXI საუკუნეში“ (2000 წ. 8 მარტი) ბევრი გამომეხმაურა, მათ შორის პირველ რიგში გორიდან ლევანის შვილიშვილი (ლუკას ქალი) ნინო რაზიკაშვილი. მას, ჩვენი წერილით შეგულიანებულს უზრუნია პაპის რეაბილიტაციისათვის. მიუმართავს საქართველოს უშიშროების სამინისტროსათვის და იქიდან მიუღია შემდეგი საბუთი:

ცნობა

მოქ. ლევან ლუკას ძე რაზიკაშვილი, დაბ. 1887 წ. თიანეთის რ-ის სოფ. ჩარგალში, გასამართლებული იქნა 1922 წ. 3-5 დეკემბერს საქართველოს საგანგებო კომისიის მიერ „კონტრევოლუციური საქმიანობისათვის“ ბრალდებით და მიესაჯა სასჯელის უმაღლესი ზომა დახვრეტა. ამჟამად საქართველოს რესპუბლიკის სახელმწიფო საბჭოს 1992 წ. 25 მაისის დეკრეტის თანახმად რეაბილიტირებულია.

განაჩენი სისრულეში მოყვანილი იქნა 1923 წლის 16 თებერვალს.

განყოფილების უფროსი ი. მირონოვი

ამ ცნობით ნინოს მიუმართია გორის რაიონული სასამართლოსათვის, სადაც საქმე განუხილია მოსამართლე ბონდო ვათიაშვილს, რომელსაც გამოუტანია გადაწყვეტილება „საქართველოს სახელით“. იქ ვკითხულობთ:

„განვიხილე ნინო რაზიკაშვილის განცხადება იურიდიული მნიშვნელობის მქონე ფაქტის დადგენის შესახებ და გამოვარ-

კვიე: განმცხადებლის პაპა – ლევან ლუკას ძე რაზიკაშვილი 1922 წლის 3-5 დეკემბერს გასამართლებული იქნა საქართველოს საგანგებო კომისიის მიერ „კონტრევოლუციური საქმიანობის“ ბრალდებით და მიესაჯა სასჯელის უმაღლესი ზომა – დახვრევა. საქართველოს რესპუბლიკის 1992 წლის 25 მაისის დეკრეტის თანახმად ლევან ლუკას ძე რაზიკაშვილი რეაბილიტირებული იქნა. განმცხადებელმა მომართა სასამართლოს და ითხოვს პაპამისი – ლევან ლუკას ძე რაზიკაშვილი აღიარებული იქნეს პოლიტიკური რეპრესიის მსხვერპლად. მოვუსმინე რა განმცხადებელს ნინო ლუკას ასულ რაზიკაშვილს, გავაანალიზე საქმეზე წარმოდგენილი წერილობითი მტკიცებულებები, განმცხადებლის მოთხოვნა მიმაჩნია საფუძვლიანად და იგი უნდა დაკმაყოფილდეს.

ვიხელმძღვანელებ „საქართველოს მოქალაქეთა პოლიტიკური რეპრესიის მსხვერპლად“ აღიარებისა და რეპრესირებულთა სოციალური დაცვის შესახებ საქართველოს 1997 წლის 16 დეკემბრის 1-3-4-6-7 მუხლებით, „საქართველოს სამოქალაქო საპროცესო კოდექსის“ 243-244 მუხლებით, ვამტკიცებ:

დაკმაყოფილდეს ნინო ლუკას ასული რაზიკაშვილის მოთხოვნა. პაპამისი – ლევან ლუკას ძე რაზიკაშვილი, დაბადებული 1887 წელს, თიანეთის რაიონის სოფელ ჩარგალში,



მიხა ხელაშვილი

აღიარებული იქნეს პოლიტიკური რეპრესიის მსხვერპლად. გორის რაიონული სასამართლოს თავჯდომარე:

ბ. ვათიაშვილი.

მიხა ხელაშვილი. ქაქუცა ჩოლოყაშვილის შეფიცულთა რაზმის დამარცხებისა და დაშლის შემდეგ ბოლშევიკებმა დაიწყეს უმოწყალო ხოცვა მის გვერდში მდგომთა და თანამოაზრეთა, საუკეთესო ვაჟკაცებისა, ვინც უდიდესი პატრიოტები იყვნენ, ვინც ვერ აიტანა საქართველოს დამოუკიდებლობის ფეხქვეშ გათელვა. ვის დაინდობდნენ, როცა ვაჟა-ფშაველას შვილიც კი არ დაინდეს. მათ შორის ერთ-ერთი ყველაზე გამორჩეული იყო ფშაველი, სოფ ახადის მკვიდრი მიხა ხელაშვილი. გარდა საარაკო ვაჟკაცობისა, ის ცნობილი იყო ხალასი ნიჭით. მას ეკუთვნის ქართული ხალხური პოეზიის მარგალიტი „ლექსო, ამოგთქომ, ოხერო“ და სხვა.

უკანაფშავში, ლაშარის გორის მოპირდაპირედ, ტყიანი გორის თავზე არის ერთი ულამაზესი სოფელი ახადი. აქ დაიბადა მიხა ხელაშვილი 1900 წლის 25 იანვარს. დაწყებითი განათლება, უფრო სორედ, წერა-კითხვა უსწავლებია თამარ-ლელის საყდარში მოღვაწე მღვდელს, მოსანთლიშვილს. მას განსაკუთრებული ნიჭი შეუმჩნევია პატარა მიხასათვის და მამამისისთვის, ზურაბისთვის ურჩევია, სასწავლებლად წაეყვანა.

თბილისის ორწლიანი სადიაკვნო სასწავლებელი მიუსწავლებია. ზურაბს ხარები გაუყიდია სწავლის ფულისათვის, რასაც იმდრონდელ ფშავ-ხევსურეთში იშვიათად თუ ვინმე გააკეთებდა, რადგან ბალღის „ქალღმისად ჩახედვა“ დედაჭუაობად მიაჩნდათ.

1915 წელს, სასწავლებლის დამთავრებისთანავე, მიხა ხევსურეთში, სოფელ ბარისახოში გაუმწესებიათ დიაკვნად, სადაც დიდი სიყვარული დაუმსახურებია, როგორც წესიერ, ნიჭიერ და მამაც ახალგაზრდას.

თითქმის ხუთი წელი იმსახურა ხევსურეთში. იმთავითვე კი სურვილი ჰქონია თავის მშობლიურ კუთხეში სამსახურისა.

1920 წელს ჩარგლის ეკლესიაში მღვდლად უკურთხებიათ მიხა ხელაშვილის დის ქმარი, სოფელ აფხუშოში (ჩარგლის ფუძე სოფელში) მცხოვრები თევდორე ჟამიაშვილი და ცოლის ძმაც თავისთან გადმოუყვანია.

საქართველოს გასაბჭოების შემდეგ ათეისტური მთავრობისაგან პირდაპირი მითითება იყო ეკლესიებისა და ხატ-სალოცავების ძარცვა-ნგრევისა. დამპყრობი რუსისაგან ზურგ-გამაგრებული „პარტიელები“ და კომკავშირლები ძალად კრეჭდნენ სასულიერო პირებს, აწერიდნენ ღვთის საგმონერილებს, ხოლო ვინც შეენინა აღმდეგებოდა ან თას-განძს გადამაღავდა, თავისი ხელით ათხრევინებდნენ სამარეს. ასეთ ძალადობასა და ბოროტებას, ცხადია, ვერ შეეგუებოდა ისეთი ვაჟკაცი, როგორც მიხა ხელაშვილი იყო. მით უმეტეს, რომ მას დავალებულიც ჰქონია ფშავ-ხევსურეთის განძის მეთვალყურეობა. ამის გამო „მაუზერსაც“ ატარებდა თურმე.

ერთ დღეს ჩარგალში ასულა ფშავის, მაღაროსკარის კომისარი კოლა ჯაგნელიძე თავისი მილიციელებით. მათ ცხენები ფოცხვერ ბაჩიაშვილის ყორულში შეუყვანიათ. ფოცხვერის ქალებს ჩხუბი დაუნყიათ. მიხა გამოსარჩლება თავის სამოყვროებს. ჯაგნელიძეს „მაუზერი“ წაურთმევია მიხასათვის და დაპატიმრებაც დაუპირებია, მაგრამ მიხას ტყეში შეუსწრია. იქიდან დაიწყო მისი დევნა. აწიკებდნენ, იჭერდნენ მის მფარველებს, ხელის შემწყობებს, მაგრამ ხალხის სიყვარულისა და თავისი სიმარდის წყალობით ყოველთვის მოუხელთებელი რჩებოდა.

სწორედ იმხანად დაიქუხა კახეთის მხარეს ქაქუცა ჩოლოყაშვილის სახელმა. სამშობლოს ხსენისათვის შეფიცულთა მცირე რაზმმა ცხვრის ფარასავით დაირეკა კომუნისტების ჯარი. გამარჯვების იმედი გაულვივდა გულში ეროვნულ ძალებს. მიხა ხელაშვილი მათ ფშავში, სოფელ მაღაროსკარში გადახდილი ომის დროს შეუერთდა.

ქაქუცას მოწოდებაზე აჯანყდა მთელი ხევსურეთი. მათ მოთავეობდა ქაქუცას ძმადნაფიცვი, მენშევიკური მთავრობისა და შემდეგ თეთრი გვარდიის (ჩრდილო-კავკასიაში) ოფიცერი თომა ბალიაური. პირველ ხანებში სძლიეს მტერს, მაგრამ შემდეგ ვერ გაუმკლავდნენ ყოველი მხრიდან შესეულ რუსთა დივიზიებს. ქაქუცას რაზმი იძულებული გახდა გასცლოდა. ისინი შეუმჩნეველად გაიკრიფნენ ახმეტის მხარეს. თვით ქაქუცას გადაცილებაში ლევან რაზიკაშვილმა მიიღო მონაწილეობა. ამაზე შინაურებმა დააბეზლეს „ჩეკაში“. ლევანს დახვრეტა მიუსაჯეს და განაჩენი მალევე სისრულეში მოიყვანეს. სხვებსაც დაუნ-

დობლად უსწორდებოდა მთავრობა. ხელაშვილსაც იგივე ბედი ელოდა.

ქაქუცამაც აღარ იცოდა, რა ექნა. ქართველი ხალხი და მთელი კავკასიის ხალხები ვერ აიყოლია, არც ევროპის დახმარება ჩანდა. ბრძოლა წაგებული იყო. ამიტომ მიიღო კომუნისტების შეთავაზებული წინადადება — გზას მისცემდნენ და მშვიდობიანად გადასულიყო თავისი რაზმით თურქეთში. მიხა ხელაშვილმა, ზოგიერთ სხვასთან ერთად, უარი შებედა ბელადს, — მეც ვიცი, აქ რომ სიკვდილი მელის, მაგრამ აქ სიკვდილი მირჩევნიაო. დარჩა მიხა ტყეში გასულ „ყაჩაღად“. დარჩა სიკვდილის პირისპირ. ხვალი მგელივით უტრიალებდა ჩარგალს, სადაც ეგულებოდა თავისი სალოცავი დედუნა და უკვე ქვეყანას მოვლენილი პატარა გოგონა. ტყიდან ჩამოსცქეროდა ჭოგრიტით, უგერიებდა თავის ჯვარდაუნწერელ მეუღლეს ირგვლივ მოზორიალე თაყვანისმცემლებს. ერთ-ერთი მათგანი მექალთანეობით ცნობილი ვახტანგ რაზიკაშვილი ყოფილა. მისთვის დაუბარებია ტყიდან:

**„ეგრე უთხარით ვახტანგსა: ხელაშვილ დაგმდურებია.
ჩემგან რა გინდა, რას მეძებ, რაისთვი მიმზირდებია!
იცოდე, იქ ნუ გაივლი, სადაც ხელაის გზებია!
თავის გვარდავინწყებულო რაზიკაშვილი ხდებია!“**

იცოდა ხელაშვილმა, კომუნისტები რომ დიდხანს არ აცოცხლებდნენ. ჯერ ვაჟა-ფშაველას შვილს არ აპატიეს თავისი გიმნაზიელი მეგობრის, ქაქუცას ფშავიდან გაცილება. მას კი აშკარა თანამებრძოლობას, იარაღით ხელში ბრძოლას რას აპატიებდნენ. იარაღი არც ხელაშვილს დაუყრია და არც საქართველოდან გადახვენილა, თუმცა იცოდა, რომ დღეები დათვლილი ჰქონდა. პირიქით, ისევ მტერს უტევდა და ცდილობდა ვაჟკაცურად მომკვდარიყო, მტრის ჯავრი არ წაეყოლებინა. ჯაგნელიძეს უბარებდა: ჩემი „მაუზერი“ გამომიგზავნე და მოშორდი ფშავს, თუ თავის თავისთვის კარგი გინდაო. ჩანს, გულში ჰქონდა ჩარჩენილი იარაღის აყრით მიყენებული წყენა. ასეთი რამ მთიელისათვის ხომ სიკვდილის ტოლფასი იყო.

მაღაროსკარში, ზემოთ, ეკლესიის სიახლოვეს, დღესაც დგას იმ დროს ერთადერთი ორსართულიანი „მთავრობის სახლი“, რომელშიც განთავსებული იყო ყველა დაწესებულება — საბჭო, მილიცია, მალაზია, აფთიაქი, ფოსტა და სხვა. მილიციის უფროსსაც, კომისარსაც იქვე ჰქონდა ოთახი.

ერთ მზიან დილას ჯაგნელიძე პირის დასაბანად რომ იყო მაღაროულაზე გადასული, თავს კარაბინმომარჯვებული მიხა წამოადგა: — ახლა შენ აიყარე „მაუზერიო“. მოკლა საბჭოთა ნითელი დროშა ჩამოგლიჯა, მოახატა სამსახურში იმ დროს მისული ალექსი მისრიაშვილის, თავის ბავშვობის მეგობრის ცხენს, არაგვეში გავარდა, ცხენი იქ დატოვა, თვითონ კი ტყეში შევარდა. მისრიაშვილი ამის გამო დახვრიტეს. ამ დროს მაღაროულას გაღმა მდგარ, ოქრომჭედელ დავით ჯანაშვილის სახლში, რომელიც უკვე ჩამორთმეული იყო, ხელაშვილის შესაპყრობად მოყვანილი სამოცი მილიციელი იდგა. ხელაშვილის ნათქვამი ხალხმა ასე „გადაამუშავა“:

„მაღაროსკარში შევვარდი, როგორც მშიერა მგელია, სამოცი დამხვდა ყაზახი, სამოცივ კავალერია, სამოცსავ თოფებ ავყარე, ზურგზე ვადინე მტვერია, ავი და შაუსმინარი, მაუკალ კამისერია, შავჯექ და გამოვაქციე მისრიაშვილის ცხენია, თან მივაძახე: „ხელა ვარ — კომუნისტების მტვერია!“

ერთხელ უკვე ანიოკებული მიხას ოჯახი აფხუშოში იყო გამოხიზნული და-სიძესთან. იცოდა, ამ ამბის შემდეგ იქაც იგივე ელოდათ. მთა-მთა და ტყე-ტყე სირბილით მიაღწია, გააფრთხილა, რომ დამალულიყვნენ. მეორე დღეს ტყიდან უცქეროდნენ, როგორ არბევდა მილიცია მათ სახლ-კარს. გამოიტანეს, რისი ნაღებაც შეიძლებოდა, საქონელი გარეკეს. რამდენხანს გაძლებდნენ ტყეში? მილიციასა და ფშაველ კომკავშირლებს ჩარგლისკენ მიმავალი ყველა გზა ჰქონიათ შეკრული. ხელაშვილის დედას აუკიდებია სახედრისათვის ახლობლებისათვის მისაბარებლად შერჩეული ნივთები, ტანსაცმელი. ხოდასთან ახლოს დაუჭერიათ და წამებაში შემოჰკვდომიათ, — გვითხარი, სად

არის შენი ყაჩაღი შვილიო.

მიხამ ლექსით დაიტირა დედა:

„სადრარა ვიყავ, დედაო, როცა შენ გაგიჭირდაო, დაგკრავდნენ, დაიკვნესებდი, დაინატრებდი შვილსაო, ხელშით გგლეჯდნენ სუდარსა ჯაგებში გადაჩრილსაო. დედა მომიკლეს ფშაველებმა სამოც-ოთხოცი წლისაო... მტერიც არ შამხვდა მტრისფერი, ვარ უბედურის

დღისაო“.

ძნელი წარმოსადგენი არ არის, თუ რა სიმკაცრით ამოქმედდებოდა „ჩეკა“ ჯაგნელიძის მოკვლის შემდეგ. იჭერდნენ და მაღაროსკარშივე ხვრეტდნენ ხელაშვილის მასპინძლობაში ეჭვმიტანილ ნათესავებსა თუ მეგობრებს. იყო მუქარა და დაპირებები ხელაშვილის საღალატოდ. დაუპატიმრებიათ და უნამებიათ იაკობ მარწყვალაშვილიც (წონკოლაური), მაგრამ ვერ გაუტყხიათ, რის გამოც მთაში კარგი სახელი დაუმსახურებია. ვანო ხორნაულს ვაჟი მოუნათლავს მისთვის და თავისი სახელი დაუნათლებია. ზოგმა ვერ გაუძლო, ვერც ხელაშვილის ღალატი იკისრა და თავისი ხელით მოიკლა თავი. მაგრამ მოღალატესაც რა გამოლევს და ეს ღალატი აკისტებინეს ხელაშვილისთვის ყველაზე მისანდობელ ჩარგლელ ძმაკაცებს — ლუკა მარცვალაშვილსა და ლევან გარსევანაშვილს.

ერთხანობას ლუკაც მიხასთან ერთად ყოფილა ტყეში თავგარიდებული. მერე შერიგებია მთავრობას, კომკავშირში მიუღლიათ. ის ჩარგლის სათავე უბანში — ხოდაში ცხოვრობდა. მასთან დღისითაც კი შეუმჩნევლად შეიძლებოდა შესვლა და გასვლა.

1925 წლის 24 იანვარს ყინვისაგან შეწუხებული მიხა, ჩანს, ველარ დაელოდა დაღამებას, დღისითვე შეიპარა ძმობილის სახლში. ლუკას და მიხას ფიცვერცხლი ჰქონიათ ნაჭამი, ამიტომ ლუკას მეტისმეტად „გახარებია“ მიხას მისვლა. მაშინვე ხინკლის თადარიგს შესდგომია. ლუკამ ჩვეულებრივ წვერ-პირის გაპარსვაც შესთავაზა მიხას. ყბა ჩამოპარსა და ყელთან რომ მივიდა სამართებელი, მიხამ უთხრა თურმე:

— ლუკავ, გატყობ ჩემი მოკვლა გაქვს დავალებული, ბარემ გამომისვი ეგ სამართებელი, შენც მოისვენებ და მეცაო!

ლუკას ძალიან შეუცხადებია, დამჯდარა, ტირილი დაუნყია:
— მაგას როგორ მეუბნები, მე გამოვიჭრი ყელს, თუ ჩემი არა გჯერაო.

ხელაშვილს დაუმშვიდებია და მერე, ხინკლის ჭამის დროს, ეტყობა, მაინც რალაცას ამჩნევდა, თავისი პატრონტაშიდან ამოღებული სახეთქიანი ვაზნა მიუწოდებია, როცა ჩემ მოკვლას დააპირებ, ეს ტყვია დამკარ, უცებ გამათავებსო.

„შემთხვევით“ მოვიდა ლევან გარსევანაშვილი და იმანაც „ძალიან გაიხარა“ მიხას ნახვით. პურის არაყს აძალაბდნენ მიხას — შემცივნებული იქნებო და ისიც ალაღად ცლიდა მიწოდებულ ყანს. იქნებ განგებაც, რომ ლალატისა და სიკვდილისა ვერაფერი გაეგო.

გვიან იცის გაჭრა პურის არაყმა, მაგრამ როცა გაჭრის, დაბანგულივით დააგდებს კაცს. დამთვრალი მიხა, ვითომცდა მეტი სიფრთხილისათვის, მჭედელათ საბძელში გადაიყვანეს დასაძინებლად. შინ შებრუნებულ ლუკას და ლევანს დახვდნენ ის აქტივისტი კომკავშირლები, რომლებსაც ხელაშვილის დედის ცოდვა ედოთ და ახლა თვით ხელაშვილის დროზე მოშორებითაც იყვნენ დაინტერესებულნი, რადგან მიხა მათ დახოცვით ემოქრებოდა, ზოგი შინიდანაც კი ველარ გამოდიოდა.

ლუკა წინ გაუძღვა ლამპით, უკან ლევანი მიჰყვა ფეხზე შემდგარი თოფით. ლუკამ მიუნათა, ლევანმა თავში დაჰკრა. ზოგის თქმით, ლევანს ხელი აუკანკალდაო ბოლო მომენტში და იქვე დაზღვევაზე მყოფმა, კაცისკვლაში უკვე გამოცდილმა კომკავშირელმა დაჰკრაო. მიხას მოკვლის ამბავი იმ დღეს დამალეს. ვახტანგი გაიქცა მაღაროსკარში მილიციისათვის შესატყობინებლად. მეორე ღამეს ჩუმად მოვიდნენ, ყასიდად ატეხეს თურმე სროლა, ვითომდა, მიხა ჩვენ მოვკალითო. გამთენიისას ჩამოიტანეს მისი ცხედარი და საფიხვნოში დააგდეს ხალხის საჩვენებლად და დასაშინებლად, თან იძახოდნენ: — მოკვლა არ გვინდოდა, მაგრამ გაქცეულს შემთხვევით მოგვიხვდა ტყვია შუბლშიო. მერე ცხენგამობმულ ყალზე დააკრეს, დუშეთში ჩაიტანეს და იქ დააგდეს მილიციის ეზოში. იქ იმდენ ხანს ეგდო, ვიდრე მისმა ტანსაცმელმა ფერი არ დაკარგა და ცხედარი არ გაიხრწნა და ნახევრად შეჭმულს მილიციამ სხვაგან გადაგდება არ დაუპირა. ძმაზე მლოცველმა აფხუშოელმა დამ სალომემ,



თომა ბალიაური

გასაოცარი სიმტკიცით ცნობილმა ქალმა, საბძელში გაბნეული ტვინი და სისხლი მოკრიფა და დედის საფლავთან დაფლო. საიდუმლოდ ჩავიდა დუშეთში, მიხას ბარისახოელი მეგობრის, მილიციაში ჩამდგარი ხევსურის დახმარებით ღამე მოიპარა ძმის ცხედარი, მთიელთა ძველი წესის თანახმად დაანწევრეს, ხურჯინით აჰკიდეს ცხენს და დღე მალვითა და ღამე მგზავრობით აიტანა სალომემ ჩარგალში მიხას ცხედარი და დედის საფლავის გვერდით, თავის ტვინ-სისხლთან ერთად დამარხა. ღამე მარტომ

გაუთხარა საფლავი, რომ არავის დაენახა.

გასაოცარი დამთხვევაა! მიხა ხელაშვილი 1925 წლის 25 იანვარს მოკლეს, რა დღესაც მას 25 წელი შეუსრულდა.

თომა ბალიაური. ლევან რაზიკაშვილის დაკითხვის ოქმში ფიგურირებს აგრეთვე ქაქუცა ჩოლოყაშვილის ერთ-ერთი აქტიური თანამებრძოლი და მისი ძმადნაფიცო, ხევსურთა აჯანყების ორგანიზატორი, არხოტიონი თომა ბალიაური. ის გარეგნობითაც საფერი ყოფილა ქაქუცასი. ქართულ ჩოხაში გამოწყობილნი რუსთაველზე რომ ჩაივლიდნენ, მთელი ხალხი მათ შესცქეროდაო. მისი ბიძაშვილი და თანატოლი ნათელა ბალიაური „ხევსურულ ქრონიკებში“ წერს:

„თომა მაღალი იყო, წელწვრილი და ბეჭვანიერი. ძალიან ლამაზი თავი ჰქონდა, მაღალი შუბლი. სახე საკვირველად ზო-

მიერი, თვალები – ფუტკრისფერი, ცხვირი – სწორი, მაღალი, ოდნავ კენიანი, ყბები ხელით ჩამოქნილს მიუგავდა, რომლებიც ლამაზად ბოლოვდებოდა მრგვალი ნიკაბით. კბილები სწორად მიწყობილი და თეთრი, ბაგეები მომსხო, პირის ქრილი ზომიერი და თითები ლამაზი. ხმა ძალიან ვაჟკაცური, როცა გაბრაზებული დაიყვირებდა, შემზარავი”... (გვ. 27).

თანამედროვეთა გადმოცემით, იმ დროისათვის, მთაში, არც საქართველოს და არც საურჯულოში მასზე უკეთესი ვაჟკაცი, ასეთი განათლებული, ასეთი მამაცი არ თურმე გაიგონებოდა.

როდესაც ქაქუცას რაზმი დაიშალა კახეთში, მიხა ხელაშვილის მსგავსად, არც ის გაჰყოლია საზღვარგარეთ და თავის არხოტში გადასულა.. რაკი მოსაკლავად დასდევდა მთავრობა, მთელი ათი წელი თითქმის გამოუსვლელად უცხოვრია იქ. არხოტი იმ დროს მიუვალ სიმაგრედ ითვლებოდა. ცხრა თვის მანძილზე კი, როცა თოვლი გადასასვლელ უღელტეხილებს ჩაკეტავდა, არხოტი საერთოდ სწყდებოდა გარე სამყაროს. განათლებული კაცისათვის თუ რა ძნელი ასატანი იქნებოდა ასეთი კარჩაკეტილი ცხოვრება, ძნელი წარმოსადგენი არ არის. უთქვამს კიდევ თომას „ზამთარის არხვატი ცოცხალთ სამარეი-აო”. მიუხედავად ამისა, კომუნისტები მაინც ვერ ისვენებდნენ თურმე და მკვლევებს უგზავნიდნენ. ზოგმა იმის შიშით, რომ იქედან თავადაც ცოცხალი ვერ წამოვიდოდა, ვერ გაბედა მისი მოკვლა. ზოგს კი თომამ დაასწრო და სიცოცხლეს გამოასალმა. მაშინ ჩვეულ ხერხს მიმართეს კომუნისტებმა და ადგილობრივი ნააქეზეს მის მოსაკლავად. მკვლელმა ამლაში სტუმრად ნამყოფს, ღამე ესროლა ფანჯრიდან. მისი სისხლი ლენინგრადიდან ჩუმად ჩამოსულმა ლადო ბალიაურმა აიღო ვახტანგ ბალიაურთან ერთად.

თომა მოკლეს 1934 წლის იანვარში. „დალუპვამდე სამი წლით ადრე, როგორც ბალიაურთა ოჯახების უფროსმა თაობამ იცოდა, თომას სახლის კედელში ჩაუშენებია ბოთლი, რომელშიც რაღაც ხელნაწერი ყოფილა მოთავსებული – ჩემი გარდაცვალების შემდეგ, შესაფერი დრო რომ დადგება, მაშინ გაიხსნასო. ამ დოკუმენტის მიმართ თომას ახლობლებში საკრალური დამოკიდებულება სუფევდა და მას არავინ გაჰკარებია.

ერთი წლის წინ (1990-იან წლებში – გ.ხ.), ადგილობრივ ახალ-

გაზრდებს სამალავი გაუხსნიათ და ხელნაწერი ამოუღიათ. იგი აღმოჩნდა ძალზე ლაკონურად დაწერილი ავტობიოგრაფია”.

(თინა ოჩიაური).

აი ისიც: „დავიბადე 1896 წ. სოფ. ახიელში. ვსწავლობდი 1913 წ. ვლადიკავკავში, გიმნაზიაში, საიდანაც დამითხოვეს უხეირო ყოფაქცევის გამო, რასაკვირველია, მაშინდელი რუსოფილი მასწავლებლების შეხედულებით. თუმცა ჩემს წარსული წლების სიცვლქეს დღესაც გაცვებაში მოჰყავს ნაცნობები. მოუსვენარი ხასიათი დამყვა ბოლომდის.

გიმნაზიიდან დათხოვნილი ვცხოვრობდი ალვანში, ოჯახში. 1914 წ. გამიცნო მარჩევსკიმ, რომელმაც შეილაღ ამიყვანა და გამგზავნა გორში. იქ ვცხოვრობდი ია ეკალაძესთან. პირველის და მეორის გაცნობამ აღმიძრეს და გააღვიძეს ჩემში ეროვნული ძარღვი, რის შემდეგ გავხდი უკიდურესი პატრიოტი და ყოველი ჩემი მოქმედება იყო დაკავშირებული სამშობლოს კეთილდღეობასთან, რასაც ბოლომდე შევწირე ჩემი თავი. შესაძლოა ეს თვალსაჩინოდ ვერ განვავითარე და ფართე მოქმედებისათვის არ მექნა გასაქანი.

თფილისში რუსოფილ-პაპეჩიტელმა არ მომცა ნება გამოცდების ჩაბარებისა. დავბრუნდი თიანეთში. ვცხოვრობდი მარჩევსკისთან, საიდანაც 1914-15 წ.წ. ვიყავი მოხალისედ ოსმალეთის ფრონტზე პირველ თფილისის ქართულ დრუჟინაში (დ. ჯანდიერი მეთაურობდა). ავადმყოფობის წყალობით გავთავისუფლდი. ჩამოვედი მშობლებთან. გადავიტანე მძიმე ავადმყოფობა (პლევრიტი) ვინეჯი 6 თვე. გამორჩენის შემდეგ ვმსახურობდი ენისელში (სამომხმარებლო ამხანაგობაში), შემდეგში ყვარელში საქმის მწარმოებლად. აქედან ვაჭრობის მიზნით წავვედი რუსეთში. ვაჭრობის მიზნები ჩაიფუშა. შეველ სამსახურში, ადმინისტრაციაში დონის ოლქში, სადაც მომისწრო რუსეთის რევოლუციამ. ბოლშევიკების დაჭერის შემდეგ გადმოველ ეკატერინოსლავში, გუბერნიის კომისიაში კესელის განკარგულებაში, სადაც მყვანდა ჩეჩნებისა და თერგის ოლქის ქისტების შემადგენლობით რაზმი, მიმართული ქალაქის სიმშვიდის დასაცავად, განსაკუთრებით ბოლშევიკების წინააღმდეგ, რომელთათვისაც საშინელებად გადავიქეც.

გადატრიალების შემდეგ, მიუხედავად იმისა, რომ ჩემს სახლში დაჰკრეს ორმოცმა წითელარმიელმა ობისკი, მეძებდნენ დასახვრეტად, გაუსხლტი ხელიდან და ჩავედ ს. ჟერებეცში. აქ შევაფარე თავი მდიდარ ებრაელს ზასლავსკის. ვცხოვრობდი სხვის გვარზე. გამოსვლა ვერ მოვახერხე, რადგან რუსეთი გახვეული იყო სამოქალაქო ომში. წამოსულ ამხანაგებს მოუსწრეს და დახვრიტეს როსტოვში.

ჟერებეცში ბოლშევიკების შემოსვლის შემდეგ ღამე გამოველ და რკინისგზით გამოვსწიე საქართველოსკენ. დავტოვე მტირალი უკრაინელი ქალი ლიზა, რომელსაც ვუყვარდი და მიყვარდა გაგიჟებით. დამაპატიმრეს ქისტ აბდულრაზმან ბადხიევთან ერთად. გამძარცვეს. გამოირკვიეს ვინაობა და დასახვრეტად გამზადებულნი გამოვიქეციით. გავჩერდით ქერჩში. გვიშველა ყალბმა ბოლშევიკურმა მონაბეჭმა. ჩამოველ თბილისში. შეველ მოხალისედ ფურცელაძის რაზმში. ვიყავ ოსების წინააღმდეგ. დავინიშნე ხევსურეთში და ფშავში კომისრად. შემდეგ შეველ მოხალისედ ლეო კერესელიძის რაზმში. ვიყავ სომხების წინააღმდეგ შულავერში; ვმსახურებდი ბორჩალოს მაზრაში რაიონის კომისრად. გადმოველ თფილისში სისხლის სამმართველოს ინსტრუქტორად და ამავე დროს ვიყავი მივლინებული ოსმალურ მისიასთან. ბოლშევიზაციის შემდეგ გავიქეცი ბათუმისაკენ. გზაში გავაცვილე საქართველოს სიმდიდრე. ბათუმიდან დავბრუნდი გრემში. (იქ მისი და თინა იყო გათხოვილი – გ. ხ.). დამშვიდების შემდეგ შეველ ისევ სისხლის სამმართველოში. ვიღებდი მონაწილეობას არალეგალურ მუშაობაში. გამიგეს. დაპატიმრებამდე რვა კაცით შეიარაღებული 1921 წ. ბზობა ღამეს გამოვედით თფილისიდან ერწოს მიმართულებით. ერწოში დავყავით ერთი თვე. ამხანაგებს გული გაუტყდა და რაზმი ჩაიშალა. გადმოვედით მე და სულხანიშვილი აწყურში. გავიგეთ ჩოლოყაშვილის გასვლა, შევუერთდით ალვანის თავში. ვიღებდი მხურვალე მონაწილეობას ხევსურეთის აჯანყებაში 1924 წ. ვხელმძღვანელობდი მოხვევებს. აჯანყების ჩაქრობის შემდეგ ხევსურეთმა მოსთხოვა ჩემთვის პატიება. გზა აღარსაით იყო, ან თვითმკვლელობა, ან შერიგება... მთელმა კომისართა კრებამ აღუთქვა პატიება. ჩაველ. მოვტყუვდი მიპირებდნენ დახვრეტას. მეორე დღესვე გამოველ თფილისიდან, აღარ ჩავსულვარ.

ამავე წელს ხანჯლით მოვკალ ჩიქოვანი ასის ხეობაში, რომელიც იყო მთავრობისაგან გამოგზავნილი ხევსურეთის დასამორჩილებლად და ბოლშევიკური მოძრაობის გასაღვივებლად. ისევ გაველ. მთავრობა შეშფოთდა. შემომითვალეს არ გავსულიყავ. ჩავრჩი არხოტში. მდედნენ ყოველ მხრივ, ვერ ჩამიგდეს ხელად. ბოლოს რითი დამთავრდება, არ ვიცი. ვსწერ 1930 წლის მაისის 30-ს.

მადლობელი ვარ არხოტის, განსაკუთრებით ლელასი (ლადო ბალიაურის დედა – გ. ხ.), რომელმაც შემინახა როგორც შვილი. თუ მოვკვდი, ვერ ველირსე საქართველოს განთავისუფლებას, ამის შემხედვარმა მამიგონოს, რომ იყო ვილაც დევნილი და სამშობლოს კეთილდღეობას შესწირა თავი. ჩემი სალამი ჩოლოყაშვილს, რომლის, როგორც ბელადის სახელი არ შემირცხვენია, არ დამიყრია იარაღი და არც დავყრი იარაღს სიკვდილამდის..

იყავ ძლიერი, ქართველო ერო, მომავალი შენია. სამუდამო ხსოვნა ქართველ მებრძოლთა.

თომა ბალიაური
დაბადებიდან 33 წელი
სოფ. ახიელი.



გუას შვილი გულქანი

გულქანი

1970 წელს, ზაფხულში, დუშეთის რაიონის ტოპონიმის აღწერასთან დაკავშირებით რიგითა და მიყოლებით სოფ. ფუძნარში ავედი. გამეგონა, რომ ვაჟა-ფშაველას ერთ-ერთი ქალიშვილი გულქანი ჯერაც ცოცხალი იყო და ფუძნარში ცხოვრობდა. გადანყვეტილი მქონდა მისსულიყავი და მივედი კიდეც. კრამიტით დახურული, საჩეხიანი სახლი ტყიანი გორის პირზე იდგა. დერეფანში დად-მოდოდა წელში მოხრილი ბებერი – ვაჟას ქალიშვილი. მივესალმე, გამოვეცნაურე.

– ავაიმე, ბიჭო, ვანოს შვილი ხარ! – გამიღიმა და ტახტზე ჩამოსაჯდომად მიმიპატიჟა. მამაჩემი მეგობარი იყო მისი ძმის ვახტანგ რაზიკაშვილისა.

მე იმ საღამოს ჩემ მონადირე ნათესავთან შალიკო გიგაურთან ვაპირებდი ავლას, მაგრამ აღარ გამიშვა, დარჩი, მარტოობით გამოყრუებული ბებერი ვარ, ცოტას მაინც ამძრახებო. დავრჩი, ხათრი ველარ გავუტეხე, თანაც ვიფიქრე, ვაჟა-ფშაველაზე გაიხსენებდა რაიმე საინტერესოს.

უკვე საღამო ხანი იყო. ძროხები დანველა, რძე აადულა, სავანშმოდ შემოვუსხედით სუფრას და თავისით დაიწყო თავისი დუხჭირი ცხოვრების მოყოლა.

– აი, შვილო გიგი, სულ ობლობასა და ბეჩაობაში ვარ, რაც თავი მახსოვს. ცოტა რო რაღაცა გავიგე ამ ქვეყნისა, დავობლდი, სიბერ-სიკვდილის ჟამსაც ობოლ-ობერი ვარ...

... თითისოდენა ვიყავ, დედა რო მოგვიკვდა. მე და მარია-მი, ჩემი უმცროსი და, ავად ვიყავით, ქუნთრუშა გვჭირდა. აქეთ ტახტზე ჩვენ ვინექით სიცხიანები, იქით ტახტზე დედაჩვენი. იმას თურმე მუცელი მოსწყდა მძიმე ტვირთისაგან და კვდებოდა. დედაკაცები შად-გადიოდნენ. პირი გვიშრებოდა, მალ-მალ წყალს ვითხოვდით. მოგვიტანდნენ ხან რძეს, ხან-წყალს, ცოტა-ცოტას გვაყლაპებდნენ. მალმალ თავს წამოვყოფდით და დედას გავხედავდით. თავზე ვინც ედგა, იმ დედაკაცმა დაიწყო ჩხავილი, კეკე, კეკეო! ავაიმე, მიშველეთ, მოკვდა ბეჩავიო! მერე რა მოხდა, რამდენხანს ვიავადეთ, აღარ მახსოვს, ის კი მახსოვს რო მოვრჩი, ნიკიფორათას ავიარე ფენშიშველმა. ზამთარი იყო,

თოვლი. ქალიკმა ექვივნა, მიყვარდა ი დედაკაცი. მომეფერა: გენაცვლე მა კუკუშულას პირზედაო! ბუხართან მიმიყვანა: ფენები ნაცარში შახვიე დაგითებო. (თოვლში ფენშიშველა სიარულმა, სიტყვებმა და სიცივემ ქნა, ალბათ, ვაჟას სამივე ქალიშვილი რომ უშვილო დარჩა – გ. ხ.). დუმის ნამდნარი ჰქონდის, იმაში ჩამინყვის ხინკლები, ალბათ იმიტომ თუ მიყვარდა.

ვილაცამ დაიძახა: ქალა მანდ ხო არ არიო, ჩამაიაროს, მოვიდნენო! თოვლში ჩამოვირბინე ისევე ფენშიშველმა. მამაჩემი და მამიდა მოსულიყვენ კახეთიდანა. მამიდა მოვიდა, გულში ჩამიკრა: ვაი, შენს მამიდასა – და მიწაო! რარიგ დამზრალ ფენები გაქვისო. ლამაზი ტყავი ეცვა, იმისი ბოლო შემომახვია ფენებზე, ფენისგულეებზე ხელები მომიჭირა და ტირილი დაიწყო.

პატარები ვიყავით, მამაც მკაცრად კი გვექცეოდა, მაგრამ ყოჩალი ვიყავი საქმისათვის. ნათოსი, ნარიყი შეშა, სულ ჩემ ზურგს ამოჰქონდა წყლისპირებიდანა. ვიფიქრე, დიდ ხეებს მოდი ხარებს მოვათრეინებო. მამა ქალაქს იყო წასული. შინ მარტო მე და მარია-მი ვიყავით. პატარა ვიყავი, უღელს თავით მძლივ ვეჭარბე. ხარები შევაბი, გავრეკე. ხეები მქონდა შეთვარიელებული, ცულით დავყელე. უნდა გამომეზა უღელზე, მაგრამ ხარებს კისრებს ვერ ვახრეინებდი. გავიქეცი, ბალახი დავგლიჯე, დავუყარე და იმათ რომ იმას დაუნყეს ჭამა და კისრები დახარეს, მე მოვასწარი და მოკლედ ჩავუბი. თავსანაფს გამოვნიე და გამოვუძვეხ. ბექში ვინრო გზა გამოდიოდა ჩვენი სახლისაკენ, იქ ხარებით იშვიათად გადმოჰქონდათ შეშა, — ხარებს გადაგვიყრისო. იქ რომ მივედი, დავეყუდე, ვფიქრობდი რა ვქნაო, თან მეშინიან, ხარები არ გადმოცვივდესო, თან მინდა რომ შეშა კარებზე მივიტანო, კაი ხარები იყვენ, ჭკვივნები. ქვემოთი ხარი წინ წამოვიყვანე, ზემოთს ვუხევიდი და ისე წელწელა გამოვიყვანე, ხე გზიდან აღარ გადავარდა. მერე სხვა ხეებიც ეგრე მოვათრეინე. მამა რომ მოსულიყო, შინ არ ვიყავი, მე ზობლებს ეკითხებოდა თურმე: „ვინ იღვთიანა, ვინ მოუტანა ბალღებს შეშაო“. „არაო, ჩვენ არავის გვიშველია, თავად მოაზიდვინა ხარებს გულქანმაო“, – ეთქვათ.

ვუყვარდი მამასა, აზრიანი ხარო. ხშირად იცოდა ჩემთვის კითხვა: „ესე რომ გავაკეთოთ, შვილო, როგორ იქნებო?“ თავ-

ვად მამას საქმე არ ეხერხებოდა. სულ მე მაქებდა. ხშირად იმის თქმაც იცოდა: „ამას კიდევ რამეს უნდა დაემდუროთ, თქვე ყურუმსალებო!“

ყორალი ვიყავ, გულადი, მამასა ვგავდი... ათი წლისა ვიყავ, ძროხები მოვკარგე. დაღამდა. ვეძებ, რაღას ვიპოვი. ხმელ წიფელთან შუქები რაღაც შევნიშნე. მომეჩვენა რომ თვალებს ანათებდა რაღაცა. ვიფიქრე მგლებიაო. დავავლე ქვებს ხელი, დავაყარე, თან ვუყვიროდი: დაიკარგეთ მანდეღანო, თქვენ ვერ შემაშინებთო! რომ აღარ ნავიდნენ, შევეჭვდი, ნეტა რა არისო? მივედი და ფუტურო ყოფილა. საქონელი ვიპოვე, მოვრეკე, დავწველე და ჩემი „მგლების“ ამბავი ვუამბე მამას. მამამ იცინა და შემაქო: ყორალი მყევხარო.

... ხვნის დროს მეხრედ ყოველთვის მე ვყავდი მამას. ძალიან მარჯვე ვიყავ. თავად გუთანი ეჭირა, გუთნის დედა იყო. გუთნის გამართვაც ვერ იცოდა, მაგრამ გამართავდა როგორღაც, თავისებურად, შევაბამდით ხარებს და შესძახებდა:

–ჰო, ღილა! ჰო, ჯვარელა! აბა, თქვენი ჭირიმეთ! აბა, ჩემო ხარებო! თუ გუთანი ზერელედ წამოვიდოდა, ამოვარდებოდა, ახლა მე შემომძახებდა: დაადგი ფეხი გუთანსაო! – მეც შევხტებოდი გუთნის ყელზე და კვალს აებმებოდა გუთანი.

– გაუჯავრდი წინა ხარებსო! – შემომძახებდა, – ჰო, ნიჟარა, ჰო, ღვინია!

მეც გრძელი სახრე მეჭირა და წამოვსხეპავდი...

ადიდებულ ჭიჭახევას ბექი მოენგრია და გოგირდიანი წყალი ჟონავდა თურმე. მამა გახარებული ჩამოვიდა შინ და მითხრა; აბა, ჩემო ქალო, წერაქვი ნავილოთ და გამოვთხაროთ, იქ აუცილებლად გოგირდის წყალი გამოვაო.

შევყევით ჭიჭახევას. მივედით იმ ადგილას, სადაც ბექი მომზღვეულიყო. გოგირდის სუნი დიდოდა. დავიწყეთ მიწის თხრა. ვთხარეთ მანამდის, სანამ წყალი არ გამოჩნდა. მამას ოფლი წურწურით ჩამოსდიოდა. გამოწმინდა, გამოაგუბა. დავუცადეთ სანამ დაწმინდავდებოდა. გავსინჯეთ, უგემური, თბილი წყალი იყო, მაგრამ აბაზანებისთვის კარგი იქნებო, თქვა. მერე ქოხი გაიკეთა და აბაზანები მიიღო. ძალიან კმაყოფილი იყო. ამის შემდეგ ქარებისაგან დაავადებულნი, დახუთულნი დაია-

რებოდნენ ამ წყალზე სამკურნალოდ. იქა სდგამდნენ ფოთლის ქოხებს, მოჰქონდათ საარყე ქვაბები, კასრები და აბაზანებს იღებდნენ, კვირით–კვირობამდინა რჩებოდნენ ამ წყალზე. ბევრი ადამიანი გამოჯანსაღდა...

„ნეტავ, კიდევ როდის ამოხვალ ჩემთანო“, –დაინატრა გულქანმა. მე დავამშვიდე, ამ შემოდგომაზე შალიკოსთან ამოვალ სანადიროდ და მაშინ გინახულეო.

– ნადირობა მამასაც ძალიან უყვარდა. მეც დავყავდი სანადიროდა. სულა–კურდღელაში იფნებზე სხდებოდნენ ქედნები. იქ ჩავსაფრდებოდით ხოლმე და ის რო ესროდა და ჩამოცვიოდა აფართხალებული ქედნები, იმათ წამოსაკრეფად მე გამოვვარდებოდი.

მაღაროსკარს ან ახლომახლო სოფლებში, როცა მიდიოდა, ხანდახან მეც გამიყოლებდა – ცხენის გავაზე შემომისვამდა. შინისკენ მომავალნი თევზაობას ვინყებდით – მე ცხენი მომყავდა აღვირით, მამა ბადეს ისროდა არაგვში. თევზაობას რომ მორჩებოდა, ცხენს ბალახზე დავაბამდით, ცეცხლს დავანთებდით, თევზს მოვხარშავდით და პურსა ვჭამდით.

... კიდევ იცი რატომ ვუყვარდი მამასა? ძალიან ნიჭიერი ვიყავ. ერთხელ მწყემსობად ნამყოფი ძალიან დამასველა წვიმამ, გამყინა; მაშინა ვთქვი: „რამ შემქმნა ადამიანად, რატომ არ მოვედ წვიმად, რომ ვყოფილიყავ მუდამა ღრუბელთ გულმკერდის მძივადო“. შინ რომ მოვედი, მამას ვუთხარი, აი, ესა ვთქვიო. მამას გაუკვირდა, გაუხარდა, ჩემი ნათქვამი მაშინვე ჩაინერა და სხვაც კიდევ მიუმატა. მამა სიკვდილის წინაც თურმე იმასა დარდობდა, გულქანი დამრჩა უსწავლეელიო. ძალიან უნდოდა, რომ მე მესწავლა...

იმ ღამეს კიდევ ბევრი რამ მიაშბო გულქანმა. ბევრი რამის ჩანიშვნა და დახსომება ვერ შევძელი. წამოვედი იქიდან იმ პირობით, რომ შემოდგომაზე მოვინახულედი. აღარ მომიხერხდა ასვლა, სამაგიეროდ ვიღაცა მანანწალა ნაძირალები ასულიყვნენ ბიჭი და გოგო. კარს მისდგომოდნენ, იქნება ღამე გაგვათევინოთ, ხვალ თიანეთში გვინდა გადასვლაო. გულქანს ისინი ჩვეულებრივი სიკეთით მიელო, პურიც ეჭმია, იმ ღამეს მოესვენებინა.

გულქანს მკერდზე ტყავის პატარა ჩანთა ეკიდა თასმით. მე-

ცა ვკითხე მაშინ, რა არის ეგ რა გკიდეა-მეთქი. „პენსიის ფუ-
ლებს ვინახავ შიგა, შვილო, ჩემ სამარხსაო“, – ჩაცინებით მი-
პასუხა. იმათაც უკითხიათ და იმათთვისაც ეგრე უპასუხნია.
მეორე დილით მათთვის რძის აღულებას რომ აპირებდა თურმე
და ღუმელს ანთებდა, გაუძვრია იმ არაკაცს წელზე დაკიდებუ-
ლი დიდი დანა, თავში ჩაუცხია გულქანისათვის, ის ჩანთა აუჭ-
რია და გაქცეულან. გულქანს რაკი საქონელი აღარ გამოუშვია,
მეზობლებს მოუკითხავთ და სისხლში ამოსვრილი, იატაკზე
უგონოდ დაგდებული უნახავთ. ძლივს გადაარჩინეს. დუშეთის
საავადმყოფოდან ძმას, ვახტანგ რაზიკაშვილს პირდაპირ ჩარ-
გალში წაუყვანია და მას მერე იქ იყო. ფშავში ასული ხშირ-ხში-
რად ვნახულობდი.

– შვილო, გიგი, შენა ხარ?! – შესძახებდა ხოლმე როგორც კი
დამინახავდა. ზაფხულობითაც და ზამთარში განსაკუთრებით
მარტო იყო. სწუხდა ძალიან, უპატრონოდა ვარო. მომვლელი
ქალი კი ჰყავდა მიჩენილი, მაგრამ სოფლის ქალი, ვისაც თავის
საქმეც უამრავი აქვს, ერთხელ და ორჯერ შევლით რას უშვე-
ლიდა. ერთხელ ისეთ დროს მივედი, ცალი ხელით ჯოხზე დაბ-
ჯენილი, ცალით შეშას გადმოჰყრიდა კარისაკენ. ასე გადანაც-
ვლება–გადანაცვლებით შეჰქონდა თურმე.

– რა არის მეზობლები შეშას მაინც ვერ შემოგიტანენ-მეთ-
ქი? – ვუთხარი.

– ჰმ, რას ამბობ, შვილო, რას შამამიტანენ, ნეტავი არავინ
რა გაიტანოსო. ა ექით ცული მომპარესო.

შეშა შევეუტანე, ცეცხლი შევუნთე და დავსხედით სასაუბ-
როდ. გამომშვიდობებისას ვთხოვე, ხომ არაფერი გჭირდება, ან
გულით ხომ არაფერი გინდა რომ ამოგიტანო-მეთქი.

– ნავთი არა მაქვს, ნავთი ამომიტანეო-მითხრა და ღიმილით
დააყოლა ლიქიორსაც თუ გამომიყოლებ, კარგს იზამ, ცოტ-
ცოტას ჩავთქამ ხოლმე, ხანდახან მადა არა მაქვს და პურს შა-
მაჭმევსო.

ჩავედი თუ არა თბილისში, მთელი ქალაქი შემოვიარე და
ლიქიორი ვერსად ვიშოვე. მერე შინ სასმელებში დავძებნე და
შემთხვევით შემორჩენილი ერთი ბოთლი აღმოვაჩინე.

ბოლო წლებში მფარველ ანგელოზად მოვევლინა გულქანს

თუმი პოეტი ქალი ეთერო თათარაიძე. კვირაობით, თვეობით
ადიოდა მასთან, უვლიდა და თანაც ინერდა მის ნაამბობს, მო-
გონებებს. მაღლი და პატივი თავისთავად, უამრავი ძვირფასი
მასალა გადაარჩინა დაკარგვას. ამ საოცარი ჩანაწერებისათ-
ვის პარიზული პრემიაც დაიმსახურა ეთერომ. აი, ასე ადამია-
ნურად უნდოდა მოგონებების ჩანერა, და არა ისე, ექსკურსია-
ზე ასულების მიერ, თან რომ არაგვის ქალაზე განყოფილი სუფ-
რისაკენ ერქარებოდათ.

ზაფხულობით ექსკურსიები ბევრი მოდიოდა ვაჟას სახლ-
მუზეუმის სანახავად. ვაჟას სახლ-მუზეუმიდან გამოსულნი ახ-
ლა გულქანის სანახავად დაიძრებოდნენ, შეჯგოვდებოდნენ მის
ოთახში, იდგნენ, ათვალიერებდნენ და თან ეკითხებოდნენ – ვა-
ჟაზე რას გაიხსენებო? ეს უტაქტობა და მოურიდებლობა ძალ-
ზე აღიზიანებდა გულქანს. მას, უკვე ოთხმოცდაათ წელს მიღ-
ნეულ მოხუცს, თავისი ათასი გასაჭირი ჰქონდა, ოთახი ფშაუ-
რად მიყრილ-მოყრილი, არა სიამოვნებდა უცხო ხალხის ასეთი
ხორხორი.

ერთხელ ასეთ დროს მივედი, ცუდად იყო, ლოგინში იწვა.
ლიქიორი მივეუტანე, ქალაქური ნამცხვრები და სხვა რალაც-
რალაცები. მითხრა, მიდი კარადაში კონიაკი უნდა იყოს, მა-
მიტანეს ვილაცებმა, იმით უნდა გიმასპინძლოო. გამოვიღე და
მის სანოლთან სკამზე მოვიწყვეთ სუფრა. გარეთ ხმაური გაის-
მა, ექსკურსიამძღოლს გულქანის სანახავად მოუდიოდა ხალხი.
მითხრა, გადი უთხარი არ შემოვიდნენ, ლოგინში მაინც მომას-
ვენონ, ვაჟას მუზეუმი ნახონ, მე რა სანახავი ვარ, რას მათვა-
ლიერებენო. გავედი გავაბრუნე ის ვილაცები, როცა შემოვ-
ბრუნდი, ჩანს, მაინც ეუხერხულა, მითხრა:

— ხასიათში მამას ვგეგვარ, მძიმე იყო მამა, მძიმე ხასია-
თისა. თვალებიც რალაცნაირები ჰქონდა. როცა არა ჯავრობ-
და, დამშვიდებული იყო, ლამაზი თვალები ჰქონდა, მომწვანო
ფერისა. როცა გაბრაზდებოდა, აი, დუშმანთა, თვალელები ვერ
დაჰკვლევდი... მეც როცა კარგ გუნებაზე ვარ, ისა მგონავ, მთას
ბარად მოვიტანო, ყველასაც ავჩქამდები, რატომაც არა, მაგ-
რამ მეტისმეტად შამანუხეს. მე კარჩი გახედვა მინდა, ეგენი კი-
დევ წამამადგებიან თავზე და ვაჟაზე გვიამბეო. ზოგს კი სუ რო

ვკვდებოდე, მაშინაც არ მოვირიდე... ზესტაფონლებ იყვნენ აქა, მაღლობა ვუთხარ კიდევაცა, დიდ პატივი სცეს მამასა... მიინვიეს იქა და არ მიდიოდა — სადა მაქვ მაგის დროო. წავიდა მაინცა. ვერცხლის კალამი მიეცათ, ვერცხლის სამელნე, ვერცხლისფერი ბუნრის ქუდი, მათრახი მიეცათ ვერცხლისგველისტარიანი, ტანთაც ვერცხლისფრად ჩაეცვათ... კმაყოფილ მოვიდა ძალიანა... მიყვარან ზესტაფონლები იმიტომა.

როცა რალაცა მეხედვება, ცუდი მომელის, მამა მესიზმრება. ცული რომ მომპარეს, იმ წინა ღამესა ვნახე მამაი, ხევიდან მოდიოდა. დამიძახა: გადადი, ქალავ, ცული წამოიღე აიქითა გდიაო!

1989 წლის თებერვალში ძალიან ცუდად გამხდარიყო გულქანი. სასწრაფოთი ჩაეყვანათ დუშეთის საავადმყოფოში. „წინა ღამეს, თუმცა წინა კი არა, უკანასკნელ ღამეს სიზმარი უნახავს გულქან რაზიკაშვილს, ვაჟა-ფშაველას ქალიშვილს. დუშეთის საავადმყოფოში მწოლარეს თავს წამოსდგომია მამამისის ახოვანი ლანდი და წყრომით უთქვამს: აქ რას აკეთებ, ქალშავავ, ადექ და ფუძეზე წადიო. მამის სიტყვა ყოველთვის კანონი იყო გულქანისათვის. იმასაც ატყობდა, ექიმები ვერაფერს რომ ვერ შველოდნენ მის სიძაბუნეს. საუკუნეს მიტანებულს ეს არც უკვირდა. არც წუნუნებდა — ყველაფერი ბუნების წესზედა მჭირსო. ჰოდა ამდგარა და ჩარგალში, მამაპაპისეულ კერაზე ფარფატით აუტანია თავის გამსუბუქებულ სხეულში ძლივსძლივობით შეკავებული სული. იქ კი გამხიარულებულა, ფანდურიც აუჟღერიალებია, თავის მამის ლექსებიც უთქვამს, ნანყვეტ-ნანყვეტ, სვენებ-სვენებით. იმ დღეს ძლიერი კვამლი ამოსულა რაზიკაშვილების სახლის საკვამურიდან. მერე კი ნელ-ნელა მიწელებულა, სულაც ჩამქრალა, ჩანაცრებულა გულქანი, ამ ფუძეზე ცეცხლის გამღვივებელი და კერის ირგვლივ მორიალე ლანდების ბოლო მასპინძელი“. (4).

1905 წლის რევოლუციის იმედი და უიმედობა

ახლოვდებოდა 1905 წლის რევოლუცია. მოძრაობას იწყებდა ქვეყანა. მთაში ამ მოძრაობისათვის ბიძგის მიმცემი ვაჟა იყო. რას იზამდა ქვეყანა, ხალხი, რას იზამდა ვაჟა — ამის ინტერესით იყო მისკენ მიმართული მტრისა და მოყვრის მზერა. მის ადგილსა და როლს ამ მოძრაობაში კარგად გვაცნობს ერთი საიდუმლო დოკუმენტი, რომელიც ცოტა გვიან, 1907 წელს არის შედგენილი, მაგრამ ის უფრო 1905 წლის ვითარებას ასახავს, ვიდრე შემდგომი პერიოდისას. მეფის ნაცვლის კანცელარიის უფროსს, პოლკოვნიკ ბაბუშკინს საიდუმლო განკარგულება მიუცია კავკასიის რკინიგზის პირველი ბატალიონის კაპიტან სამონოვისათვის შეესწავლა მთიელთა განწყობილება პოლიტიკური თვალსაზრისით (ამ ხანებში ფშავ-ხევსურეთზე გამავალი რკინიგზის და-



გეგმარება მიმდინარეობდა და, ჩანს, სამხედრო ინჟინრებს ეს საიდუმლო საქმეც ჰქონდათ დაფალებული). სამონოვს რუსული გულმოდგინებით შეუსრულებია ბრძანება, შეუკრებია საჭირო ცნობები და ბაბუშკინისათვის წარუდგენია საიდუმლო მოხსენება, საიდანაც კარგად ჩანს რა ძალას წარმოადგენდა ვაჟა მთაში:

„ამ რაიონის რევოლუციურ მოძრაობას სათავეში უდგას სახალხო პოეტი „ვაჟა-ფშაველა“ (ზედნოდება), გვარად ლუკა რაზიკაშვილი, მცხოვრები სოფ. ჩარგალში. აღნიშნული რაზიკაშვილი ფშაველია, უსაზღვრო გავლენა აქვს ფშაველებზე, ითვლება სახალხო ბელადად. პირადად ვიცნობ მას. ეს არის ჭკვიანი, ქვეშევეშა, რომელიც უმთავრესად წერს თხოვნებს და აგიტაციას ეწევა ქართულად ბეჭდვით, ხოლო ამ ბოლო ხანებში სულ ტყუილ ცნობებს აწვდის თითქოსდა ხევსურეთის შიმშილობაზე და მოუსაველიანობაზე, ეწევა რა რალაცნაირ ქართულ პოლიტიკას, თავგზა აუბნის მთავრობას, მოსახლეობას რალაც პეტიციებითა და ყალბი შეტყობინებებით, პოულობს რა ამგვარი იდეის მხარდაჭერას თბილისის ქართულ საზოგადოებაში, იმ ანგარიშით, რომ, როცა მთავრობა დამშეულთათვის ფულს გამოყოფს, მთლიანად გამოართვას იარაღისა და რევოლუციისათვის. ერთი სიტყვით, უნდა სამეგრელოს ტყუილი შიმშილობის მსგავსად მოაწყოს. მისი უაღრესად საშიშროების გამო, ვაჟა-ფშაველას, როგორც მთის ჭკვიანი და მოქმედი კაცის გასაუფნებელსაყოფად საჭიროა მთელ რიგ ღონისძიებათა მოფიქრება, რადგან მის დაპატიმრებას შეიძლება სერიოზული შედეგები და მღელვარება მოჰყვეს მაღაროსკარელთა შორის (მაღაროსკარი ფშავის ცენტრია და იგულისხმება მთელი ფშავი – გ. ხ.). ვაჟა-ფშაველა 1905 წლის დამდეგიდან თიანეთის მაზრაში ბოქაულის, თავად სოსო ჯანდიერის წინააღმდეგ ეწეოდა საზიზღარ ინტრიგნობას, ცდილობდა მის მოხსნევილებას, როგორც ფიცის ერთგული და რევოლუციის მტერი პიროვნებისა. მისი წყალობით ეს საქმიანი და პატიოსანი ბოქაული, რომელსაც მე პირადად ვიცნობ, და რომელმაც 1895-1897 წლებში მომატარა მთები, განგებ დასწამა ცილი არაბუნებრივ კავშირში – მამათმავლობაში, რის გამოც გუბერნატორმა სვეჩინმა სამსახურიდან გაათავისუფლა, სხვათა შორის, ამ ბოქაულს სანიმუშო წესრიგი

ჰქონდა დამყარებული თავის უბანზე და თანაც სარგებლობდა მოსახლეობის დიდი პატივისცემით. მისი წასვლის შემდეგ დაიწყო არეულობა ფშაველ-ხევსურთა შორის. ვაჟა-ფშაველამ მიაღწია სწორედ იმ მთავარს, ურომლისოდაც რევოლუციას არ ექნებოდა იქ გასაქანი, რადგან თავადი სოსო ჯანდიერი ერთგული იყო ფიცისა და უბანში სრული წესრიგი ჰქონდა დამყარებული, მთიან ქისტეთში თავისი გავლენის წყალობით და ქისტების მეშვეობით თავისი უბნისა არაფერი გამოეპარებოდა“.

ამ დოკუმენტს თუ ღრმად ჩავუკვირდებით, მივხვდებით რა გაქნილ-გაიძვერა კაცის მიერ არის შედგენილი. სამონოვი ვაჟას ისეთ რალაცებებში სწამებს ცილს, ისეთ რამეებს მიაწერს, ერთი შეხედვით ლამის ჩვენც ცუდ კაცად წარმოვიდგინოთ, აბა, ბაბუშკინი რალას იზამდა.

ვაჟა-ფშაველა ფშავ-ხევსურეთის სიკეთისათვის აქ რკინიგზის გაყვანას ითხოვდა. და რაკი მის ოცნების ფრთები ესხმოდა, რაკი ამ ოცნებას რეალურ საქმედ მქცევლად მოველინა სამონოვი, არ შეიძლება ვაჟას ის სიხარულით არ მიეღო როგორც მთიელთათვის სიკეთის მომტანი, არ შეიძლება შინ არ მიეპატიჟა და გულწრფელად არ გაენდო ყველაფერი. სოციალ-დემოკრატიული პარტიის უკუღმართი პოლიტიკითა და ილიას მკვლელობით გულგატეხილ ვაჟას არ შეიძლება ეს გულისტკივილიც არ გაეზიარებინა სტუმრისათვის. ეს კი სამონოვს ვაჟას ქვეშევეშობად, ეშმაკობად მიუჩნევია. ვაჟა და ქვეშევეშობა? უბრალოდ ჩამქრალი იყო მასში ის შემართება და ბრძოლის ჟინი, რაც 1905 წლის რევოლუციის ხანებში ჰქონდა.

„1905 წლის აპრილში, – წერს ნითელრაზმელი ნიკო ტლაშაძე, – მე და ერთი ამხანაგი სოფელ ჭოპორტიდან (დუშეთის ყოფილი მაზრა) წავედით ფშავ-ხევსურეთისაკენ. პირველად სოფ. თვალღვი მივედით. ჩემი თანამგზავრი უკან გავაბრუნე ცხენებით. მშოოდა, დუქანს მივაშურე, რომელიც იქვე გზის პირას იყო. დუქანის ერთ კუთხეში მაგიდას შემოსხდომოდნენ სამნი და ღვინოს შეეცქეოდნენ.

მივესალმე. ერთმა მათგანმა აიღო ღვინით სავსე ჭიქა და მიმიპატიჟა. ჭიქა ჩამოვართვი, სამივეს დღეგრძელობა ვუსურვე – ჭიქის მომწოდებელმა ამხედ-დამხედა და მთხოვა მათ სუფრას შევერთებოდი. მეც შევუერთდი. ჭიქის მომწოდებელი ვა-

ჟა-ფშაველა გამოდგა, მეორე – მისი ძმა ბაჩანა, ხოლო მესამე – დუქნის პატრონი შანიძე.

ვაჟას და მის ამფსონებს არ ვიცნობდი. ვაჟას სურათი, რა თქმა უნდა, ნახული მქონდა და ნახვის უმაღლვე გავიფიქრე, ეს, ალბათ ვაჟა იქნება მეთქი. ამიტომ ძალიან გამეხარდა, როდესაც ერთმანეთს გამოვეცნაურეთ. ვაჟამ მორიდებით მკითხა, საით მივემგზავრებოდი. არ დამიმალა: ფშავ-ხევსურეთში მივალ სააგიტაციოდ-მეთქი. ვაჟამ იჭვნეულად შემომხედა.

– პაროლი?

– თავისუფალი საქართველო!..

ვაჟა და ბაჩანა გადამეხვივნენ და მაკოცეს.

– აბა, ეხლა ვიაროთ, – სთქვა ვაჟამ და ცხენებს მოვასხედით. ვაჟამ უკან შემომისვა. ბაჩანამ კიდე სასროლი ბადე აიღო და არაგვის პირას მალაროსკარისაკენ გავუყევით, სადაც ბაჩანა მასწავლებლობდა. მივდიოდით. ბაჩანა ნელ-ნელა ბადეს ისვრიდა და კალმანხით ავსებდა ფართო კალათს. მე და ვაჟა კი ქვეყნის ამბებზე ვბაასობდით.

მალაროსკარს რო მივატანეთ, ბაჩანას ბიჭი მოეგება და აცნობა, რომ მგელმა ხბო დაგიგლიჯაო, ბაჩანამ ჩაიღიმა:

– ბიჭოს კარგი საქმე უქნია იმ მგელს: კალმანხთან ერთად ამაღამ კარგი სამწვადეებიც გვექნებაო!..

სოფელში შებინდებისას მივედით. ბაჩანა სკოლაში ცხოვრობდა, როგორც მასწავლებელი. ის იყო სავანშმოდ დავსხედით, რომ მთხრობელი მოვიდა და ბაჩანა გარეთ გაიხმეს: შეიქმნა ჩოჩქოლი. ვაჟა შემობრუნდა.

– ცუდადაა საქმე!.. უნდა წავიდეთ... დავგდევენებიან!..

ვაჟა წინ გამიძღვა. გავიარეთ მდინარე მალაროულას რიყე და მივედით ერთ დუქანში, რომელიც ეკუთვნოდა ხინვა თურმანაულსა და გიორგი ანთაურს. დუქნის წინ ორი შეკაზმული ცხენი ება. ვაჟა დუქანში შევიდა და მალე გამობრუნდა ერთი ფშაველის თანხლებით. ფშაველი ერთ ცხენზე შესვა, მე – მეორეზე.

ჩემი თანამგზავრი გამოდგა გიორგი წინილაშვილი, რომელმაც იმ ღამით ჯერ თავის სახლში მიმიყვანა და მომასვენა; დილით მეზობელ გიორგი ფარხაშვილთან გადამიყვანა, მაგრამ იქაც ამბავი მოვიდა: ბოქაული ოზიაშვილი თავისი ჩაფრებით ახლა აქეთკენ წამოვიდაო!.. ეტყობოდა, რომ გამცეს. მაგრამ

მასპინძლებმა ახლა ისეთის ქაჯეთის გზით გამიყვანეს ხევსურეთისაკენ, რომ იქ ველარავინ მომაგნებდა. გადავრჩი... მაგრამ დღესაც სახსოვრად მაქვს ვაჟას ის მზრუნველობა, რომელიც მან გამოიჩინა ბოქაულის გამოდევნების დროს...”

„იმ დროს მთლად თავისუფლებისათვის ბრძოლის ჟინით ყოფილა ვაჟა ატაცებული, რასაც ყველგან და ყველაფერში ამჟღავნებდა. თიანეთში... ერთ დღეს ამხანაგის სახლის დერეფანში ვისხედით 8-9 კაცი, ერთი ხელადა ღვინო გვედგა, ვსვამდით და ვსაუბრობდით თუ რით დამთავრდებოდა ეს მოძრაობა. ამ დროს ჩვენთან მოვიდა თედო კალნიცკი, თიანეთში საქონლის ფერშლად იყო, ქართული კარგად იცოდა, რადგან თიანეთში დიდი ხნის მოსული იყო. მან ვაჟას სთხოვა:

– ვაჟა, რუსეთში ერთი ძმა მყავს, ჩემსავით უშვილო, დღეს დეპეშა მივიღე, ვაჟიშვილი შესძენია და ლექსით მილოცვა დამინერეო. ვაჟამ ხუმრობით უთხრას ამნაირი თხოვნის შესრულებას ხელადიანი მერკა უნდა, რომ შენი ძმისწული ჩვენც ვადღეგრძელოთ. თედო ღვინისთვის გაიქცა, დუქანი იქვე გვერდზე იყო და სანამ ის დაბრუნდებოდა, ვაჟამ მისალოცი დეპეშა გამოაცხო შემდეგი შინაარსისა:

**„Поздравляю с сынком,
держу стакан с винцом,
да растит его бог,
чтоб он был другом народа,
да здравствует свобода!“**

თედომ წაიკითხა ეს მილოცვა და დაუფიქრდა, სახეზე ცოტა დაღონება დაეტყო და გაუბედავად ვაჟას უთხრა: ვაჟავ, ჩემი ძმა ცოტა ხულიგანია, ის წევრია „ჭემმარიტი რუსი ხალხის კავშირისა“ („Союз истинно-русских людей“) და სიტყვა თავისუფლება იმას არ მოეწონება. შენ გენაცვალე, მოდი გადამიკეთეო.

ვაჟამ ეს იწყინა, თავისებურად თვალეები დააბრიალა, თედოს შეჰპირდა და ჰკითხა რა ჰქვიან შენს რძალსაო. ვარვარაო, – უპასუხა მან. ვაჟამ ცოტა ზურგი მოგვიბრუნა და ხელდახელ მეორე მილოცვა დასწერა:

**„Взорвалась Варвара,
Как в Порт-Артуре мина,
Радила ребенка,
Сукиного сына“**

– წადი ახლა, თედო, შენი ძმა ამის მეტის ღირსი არ არისო.

მერე ჩვენ მოგვიბრუნდა და გვითხრა – ეს ბრიყვი ყოფილა, თავისუფლების მგოსანი ვარ და ჩემთან როგორ ჰბედავს, რომ თავისუფლებას ასე იხსენიებსო”. (მ. შამანაური)

ახლოვდებოდა 1905 წლის რევოლუცია. ვაჟას, მუდამ საქართველოს განთავისუფლებაზე მეოცნებეს, გაუჩნდა იმედი ოცნების სინამდვილედ ქცევისა. გაუჩნდა იმედი „ფუტურო ბოძებზედ აშენებული ცხოვრებისა“ და იმპერიის დანგრევისა. გამოცოცხლდა ვაჟა, მთის არწივი რომ შეისწორებს ფრთებს სამსხვერპლოზე დასაცემად, ისე შეიგრუზა. აქამდე, რასაც კალმით წერდა, ამტკიცებდა, ახლა ხმლით უნდა დაეგვირგვინებინა. გორში სწავლის დროსაც ხომ იმიტომ დაუკავშირდა ხალხოსნებს, პრაქტიკულად უნდოდა რაიმე გაეკეთებინა ქვეყნის ხსნისათვის, მაგრამ იმათ ვერაფერი შეამჩნია საამისო და მალევე ჩამოშორდა. ეხლა კი ძირმომპალი იმპერია, ხიშტებზე დაყრდნობილი ძალა-უფლება ირყეოდა, დღე-დღეზე შეიძლებოდა დაცემულიყო და საქართველოსაც ეშველებოდა. მაგრამ ასეთი ხვთის მოწყალების ციდან ჩამოვარდნას გულზე ხელდაკრეფილი ვერ დაელოდებოდა. საქართველოსაც უნდა წვლილი შეეტანა დამონებულ ხალხთა საერთო ბრძოლაში. სხვებთან ერთად საქართველოს შუბიც უნდა სძგერებოდა საძაგელ გველშაპს, უნდა მოემთოთ დამონებულ ხალხებს ის „ვეება გველი, მორთული ჯაგრითა, ბევრისა ცოდვის მოქმედი, პირზე დობლების დაყრითა, ბევრი ჩაენთქა ტიალსა“... და იმედი გაუჩნდა ვაჟას, რომ სულ მალე თვალთაც კი შეიძლებოდა ეხილა „ლუხუმის შადგომა ლაშარის გორზე“. მ. შამანაური იგონებს: „1905 წელს იაპონიასთან დამარცხებასთან დაკავშირებით რუსეთში განმათავისუფლებელი მოძრაობა დაიწყო, რაც მთელ საქართველოსაც მოედო. ყველგან გაფიცვები, მიტინგები, ყველგან რევოლუციური მოძრაობა იყო. ფშავ-ხევსურეთში პირველი გამოსვლები ვაჟამ მოაწყო.

ვაჟა ამბობდა, რომ საქართველოს განთავისუფლება ჩვენ აქედან – მთიდან უნდა დავიწყოთ, ჩვენ უნდა მუჯლუგუნი ვკრათ ბარს, რომელსაც სძინავს... ჩემთან და რამდენიმე მონინავე ხევსურთან, რომელთაც უსაზღვრო გავლენა ჰქონდათ მთელ ხევსურეთზე, ასეთი საიდუმლო მოლაპარაკება ჰქონდა: თუ რუსეთში ეს მოძრაობა მეტისმეტად გაძლიერდებოდა, გართულება მოჰყვებოდა, მაშინ ჩვენ უნდა გვესარგებლნა ამ შექმნილი მდგომარეობით და საქართველოს დამოუკიდებლობა უნდა გამოგვეცხადებინა. ხევსურეთიდან წამოვიდოდით ერთი ათასი კარგად შეიარაღებული მეომარი ხახმატის ჯვრის დროშით, ორწყალში დაგვხვდებოდა ამდენივე ფშაველი თამარ დედოფლის დროშით (ეს საომარი დროშები მაშინ მთაში საიდუმლოდ იყო შენახული). აქ ჩვენ ერთმანეთს ფიცით შევეკვროდით, – ან თავისუფალი საქართველო, ან ჩვენი განყვეტა, – აქედან პირდაპირ ტფილისისაკენ გავწევდით. ჩვენი ბელადი, ცხადია, თვით ვაჟა უნდა ყოფილიყო...

მოვიწვიეთ მთელი ხევსურეთის კრება, მოწოდება ვაჟამ შეადგინა: დანიშნულ დღეს მოვიდნენ ხევსურეთის შვილები თავითფხამდე შეიარაღებული, მოგროვდნენ ბარისახოში და დასდეს ფიცი, რომ უკანასკნელ სისხლის წვეთამდე იბრძოლებდნენ თავისუფლებისათვის. ეს ფიცის ფურცელიც ვაჟამ შეადგინა”.

ვაჟა-ფშაველამ შეადგინა ფშავ-ხევსურეთის დეკლარაცია, რომელშიც აისახა სწორედ ის მოთხოვნები, რასაც ვაჟა ყოველთვის აყენებდა.

„ფშავ-ხევსურთა დეკლარაცია

1. ტყე და დედამინა წინად როგორც ჩვენ მამა-პაპათ სჭერიათ საკუთრებად, ისევე ჩვენ უნდა გვეჭიროს. ხაზინამ თუმცა ტყეებიც სხვადასხვა ხრიკებით ჩამოგვართვა და ჩვენს საკუთრებაზედ ხელი აგვალეზინა, მაგრამ დღეის შემდეგ ხაზინის მფლობელობა ტყეებზე, აგენტების – დედამინაზე, მოსპობილია. ლეშნიჩ-ყარაულ-აბეშიკებს ჩვენთან საქმე არა აქვს. არც ტყისა, არც საბალახოს და არც ბოლის ფულისა არაფერი არ უნდა მივსცეთ.

2. უნდა მოვსთხოვოთ, ვინც ჩვენი მეზობელი აბეშიკად ან ყარაულად, ან სტრაჟნიკად არის, დაეთხოვნენ სამსახურს, აი-

ყარონ ნიშნებიც. უკეთუ გამოჩნდება ამის წინააღმდეგი, უნდა გავაძიოთ ჩვენი საზოგადოებიდან, მოუსპოთ ყოველივე სახსარი ცხოვრებისა და თვით სახლ-კარიც ჩამოვეყაროთ მთელი საზოგადოების სასარგებლოდ.

3. არ გვინდა რუსის მთავრობისაგან მოცემული სამართალი, რადგან იქ უსამართლობის მეტი ვერა ვნახეთ, არც მისგან დაყენებული მოსამართლეები. ჩვენ უნდა გვექონდეს მედიატორული სამართალი. ყველა სოფელში მომჩივანი და მოპასუხე უნდა გაასამართლოს თავიანთივე მეზობელმა, მხოლოდ საქმე ყრილობამ ხმის უმრავლესობით უნდა გადაწყვიტოს და დამნაშავეს სასჯელი მიუსაჯოს. ამიტომ არავინ ჩვენგანმა არ უნდა იჩივლოს არც სუდში, არც ნაჩალნიკთან, არც ასისტანთან, არც მიროვოი პასრედნიკთან და არც სხვა რუსის მოსამართლესთან.

4. არ მივსცეთ სალდათი – არც ძველი, არც ახალი. ჩვენ ყველამ იარაღის ხმარება ვიცით და, როცა საჭირო იქნება, შეადგინონ მელიცია და გაგზავნონ მტერთან საომრად.

5. ორმოცი წელი იქნება, რაც ჩვენი ხატობების შემოსავალი მიაქვს სინოდალურ კანტორას და ზოგს მღვდლები უქადებენ. ამიერიდან არ მივსცეთ არავის ერთი ბისტი ამ შემოსავლისა, არამედ მოვახმაროდ იმ საქმეს, რომელსაც თვით ერი იტყვის და მოინდომებს, და, რაც უკანონოდ ნაღებულია, ისიც უკანვე მოვიტხოვოთ.

6. არა ვხდით სავალდებულოდ მღვდელს და დიაკონს მივსცეთ საკომლო, სანათლობლო და სამკვდრო. ვისაც სურს, მისცეს, მხოლოდ ჯვარის სანერს ვამწესებთ შემძლებელზედ ორ მანათსა, ღარიბზედ მანათსა. უნდა ისინი დასჯერდნენ თავიანთ ჯამაგირს.

7. წინააღმდეგობა უნდა გაუწიოთ ყველას, ვინც ჩვენ სოფელს თუ ქალაქებში იარაღის ტარებას დაგვიშლის, რადგან ჩვენ ამის გამო ზნეობრივად შეურაცხყოფილნი, დასჯილნი ვართ. იარაღის ჩამოყრა კაცისთვის დედაკაცობის, დედლობის ნიშანია, რასაც ჩვენი გუნება ვერ ითვისებს. იარაღის ტარება ჩვენთვის ისეთივე მოთხოვნილება არის, როგორც სასმელი და საჭმელი.

8. არავითარი სახელმწიფო გადასახადი არ გადავიხადოთ იმ დრომდე, ვიდრე არ გამოირკვევა ყველა ჩვენგანის წლიური შე-

მოსავალი და გონივრული წესები არ დამყარდება მთელ საქართველოში.

9. ჩვენ უცხადებთ ძმობა-ერთობას მთელს საქართველოს ერს, ქართლ-კახეთ-იმერეთ-გურიას, სამეგრელოს და სხვათა ერთა კავკასიისათა, ვისაც ერთმანეთის ძმობა-ერთობა სწყურიათ.

10. უნდა უსათუოდ შევიძინოთ იარაღი, რადგან შეიძლება ლეკმა და ქისტმა არ გვიძმოს, არ დაგვინდოს. რუსის მთავრობა ჩვენ ვერ გვიპატრონებს, რადგან თავი გაუხდა ჭირად. თუ ჩვენს თავს თვითონ არ უპატრონეთ, იარაღის შეძენა ჩვენთვის მაინც საჭიროა სხვა ერებთან, თუნდა ქისტ-ლეკებთან, პირის გასამტკიცებლად, რადგან ხათრი და მორიდება ექნება ყველას ჩვენი, როცა შეიარაღებულებს გვნახავენ. იარაღი ჩვენ გვინდა არა ხალხის დასაღუპავად, სათარეშოდ, არამედ თავიანთი საკუთრების, ცოლ-შვილის და ჩვენს საერთო პირის დადგენილების დასაცავად, სადაც სიტყვა და თხოვნა არ გაგვივა, თუ მეტი ღონე არ არის, იარაღი უნდა ვიხმაროთ, მხოლოდ ჩვენს მიზანს სანადელს მივაღწიოთ.

11. უკეთუ ჩვენგან ვისმეს ამ ჩვენს კანონიერის მოთხოვნილების გამო მოუნდომა პოლიციამ დატუსაღება ან დაატუსაღოს, უნდა ვისურვოთ, თავი გამოვიდოთ, არ დავაჭერინოთ, თუნდა ამისთვის იარაღის ხმარება და სისხლის ღვრაც დაგვჭირდეს. ერთის კაცის დატუსაღება მთელი ერის დატუსაღებად მივიჩნით. ეს არის, ჩვენის პირის ჩამშლელ პოლიციელთ უნდა ვსდევნიდეთ.

12. ყოველი მოღალატე-გამცემი, საერო საქმის ჩამშლელი, უნდა დავსაჯოთ სიკვდილით, ვინც უნდა იყოს იგი, თუნდა გარეშე პირი და თუნდა ჩვენგანი.

13. ყველას ოჯახი, საკუთრება და სვინდისი ხელშეუხებელი უნდა იყოს.

14. არავის ჩვენს ხეობაზედ ჩვენს ნებადაურთავად ვაჭრობის ნება არა ჰქონდეს.

15. ოც წელს ზევით ყველას ნება აქვს ყრილობაში.

16. მოსალოდნელია, რომ ამ ჩვენის გაფიცვის გამო ჩაგვიყენონ ზეკუცია. მანამ ჩვენსას არ მივიღებთ, არც უნდა შევდრკეთ, არც უნდა გავტყდეთ.

17. ბეგარა, კეთება გზებისა, ხიდებისა ყველასათვის სავალ-
დებულო უნდა იყოს – დიდისა და პატარისთვის, რადგან გზა
ყველასათვის საჭიროა – მღვდლისათვის, მოვაჭრისათვის. თუ
ეს უკანასკნელნი კაცნი არ იმუშავებენ, მაშინ ყველაში ხუთი მა-
ნეთი უნდა გადაიხადონ საზოგადოების სასარგებლოდ.

18. ყველას უნდა მიეცეს მინა დასასახლებლად, ვისაც აკ-
ლია, შირაქში ან საქართველოში.

19. რაც რუსეთში ეხლა კომისიები მუშაობენ ჩვენი საქარ-
თველოს და მთელი კავკასიის შესახებ, უნდა ჩვენი ამორჩეული
კაცები იქმნეს მონვეული.

20. ქართულ სკოლებში უნდა ქართულად იყოს სწავლება და
სოფლის სკოლებთან იყოს სამეურნეო და საკომერციო განყო-
ფილება“.

ხმალს ლესავდა ვაჟა. თავად უკვე წადროვნებული ახალ-
გაზრდებისათვის წინ გაძლოლას ფიქრობდა. თავის მაშინდელ
ამბებზე აქვს დაწერილი ლექსი „ბერიკაული“:

**„ხმალს ჰლესავს ბერიკაული, დაფიქრებული ძალზედა,
ჰლესავს დიდრონი სალესით, თან ცერს გადუსომს ფხაზედა.
დიდხანს ეკიდა კაჩხაზე, არ გატანილა კარზედა.
შემჭვარტლული აქვს ქარქაში, მტვერი სდებია ტარზედა,
ხმალი ჟანგს შეუჭამია, ვაჰ, დედას მტერთას, რაზედა?
მოსულან ახალ-უხლები, წამოსდგომიან თავზედა:“**

... ..
**„მტერზე ჩვენ მივალთ, ახლები, შენ დაწვე დაისვენია!“
– ჰმ! თუ წინ ბერი არ მოკვდა, ახლის სიკვდილი ძნელია!“**

ხმალს ლესავდა ვაჟა; მართლაც, ნაიალალარ ხარს დაემ-
სგავსა, რქით მიწის მჩხვერავს. აგულიანებდა, აფიცებდა ფშა-
ველ-ხევსურთ, ომისა და ბრძოლისაკენ მოუწოდებდა, რაზმავ-
და, მზადყოფნას ავალებდა. უნდოდა სინამდვილედ ექცია „ბახ-
ტრიონში“ ნათქვამ-ნაფიქრალი, ეწადა ბერ ლუხუმად მოვლე-
ნოდა დამონებულ ქვეყანას. თითქოს ახლოვდებოდა „საამური
წამი“.

ამ ხანებში დაწერილი მეორე ლექსის „ბაყაყების აჯანყების“
მიხედვით ჩანს, რომ როგორც ძნელია ბაყაყთაგან წეროთა და-
მარცხება, ისევე ძნელი იყო ფშავ-ხევსურთა ორიათასი კაცით

მეფის რუსეთის ჯართან შეჭიდება, მაგრამ ღვთის შეწევნის
იმედი ჰქონდათ. ღმერთი შეეწეოდა მათაც ისევე, როგორც ბა-
ყაყებს შეენია.

ამ ოცნებით ფრთაშესხმული ვაჟა ჩარგალში ველარ ჩერ-
დება. მიდი-მოდის მთელ ფშავ-ხევსურეთში. თუკი სადმე რაი-
მე თავყრილობაა მოსალოდნელი, ხატობა დღეობებია, ისიც იქ
არის, უქადაგებს ხალხს, რა უნდა ქნან და როგორ უნდა ქნან.
მოუწოდებს ყველას სამშობლოს სახსნელად, ხმლის ასაღებად;
აგულიანებს ყველას, „ვისაც გული აქვს და ვინც არ არის მხდა-
ლია“.

აფხუშობაზე მოსულ უამრავ მლოცველს, მგზნებარე სიტ-
ყვით მიმართა, სთხოვა, რომ ელოცათ სამშობლოს ხსნისათ-
ვის, საქართველოს შველისთვის შემწეობა ეთხოვათ მტერთან
ბრძოლაში... თან გულის ამარქროლებელი ლექსი მიაყოლა.

უკანაფშაველთ თავყრილობასაც დაესწრო შუაფხოში და
იახსრის ოქროს ჯვარზე დააფიცა ხალხი, რომ სამშობლოს და-
ძახილზე ყველანი სამომრად გამოსულიყვნენ.

მაღაროსკარის ეკლესიასთან სადღეობოდ თავმოყრილ
ხალხს სიტყვით მიმართა და ხმალზე დააფიცა.

მაგრამ იგვიანებდა საქმე და ველარ ითმენდა ვაჟა, მარტო
ინყებდა ბრძოლას, როგორც შეეძლო. ვაჟას მეუღლე თამარი
გვიდასტურებს: „ლუკამ და მღვდელმა სონლულაშვილმა უკა-
ნაფშავსა და მაღაროსკარის თემში ხალხი დააფიცეს ერთობის
ერთგულებაზე. ტყისმცველებს და გზირ-ნაცვალ-მამასახლი-
სებს მედლები აჰყარეს. ეს მედლები ლუკამ შინ ხურჯინით მოი-
ტანა და მაგიდაზე დაყარა“.

ვაჟას ბრძოლის გეგმა შედგენილი ჰქონია, მოფიქრებული.
არაგვის ვინოებში, კართანას, აპირებდა ქვის საგორავების
მოწყობას დამსჯელი ჯარის ამოსაწყვეტად.

რაკი ამ დიდ ეროვნულ-განმათავისუფლებელი ბრძოლის
საქმეს მოთავებდა, ლაშარის დღეობაზე უკანაფშავის თავხე-
ვისბერმა მოინდომა თავისი მოვალეობის ვაჟასათვის გადაბა-
რება, „საბჭეო სკამის“ დათმობა, რათა უფრო მეტი მხარდაჭერა
ჰქონოდა მთიელთაგან, მაგრამ ვაჟამ ხევისბრობაზე უარი თქვა;
თავისთვის საკმარისად თავხევისბრის თანადგომა ჩათვალა.

შემზადებულია მთა ქვეყნის საშველად. სამშობლოსათვის

ომს მონატრებული გული უჩქროლავთ. მას შემდეგ, რაც საქართველოს „რკინის კარი შეეხსნა“, რაც ბაგრატიონთა გვარი, ერეკლეს სახით, მცხეთას დაიმარხა, აღარ სმენიათ საბრძოლო მონოდება. რა ხდება ამ დროს ბარში, დედაქალაქში, თბილისში, სადაც თავმოყრილია საქართველოს მთელი მაღალი საზოგადოება, მონინავე ძალა ქართველი ხალხისა? რას აკეთებენ ისინი, ვისაც პირველ რიგში უნდა ეხელმძღვანელა სამშობლოს ხსნის საქმისათვის?

თბილისში სრული ქაოსია. ილია ჭავჭავაძე და მისი თანამოაზრენი, ისინი, ვინც ეროვნული დამოუკიდებლობისათვის იბრძოდნენ ამდენი ხანი და ახლაც ამასვე ქადაგებენ, ტერორიზმ-ბულნი და გალანძღულნი არიან, ვერ აქტიურობენ. აქტიურობენ ახალი მიმდინარეობის პარტიები, ვინც ეროვნულ საკითხს ნაციონალისტობად თვლიან, ხოლო ბრძოლის მიზნად სახავენ ზოგნი „აგარარულ საკითხს“, ზოგნი „მუშათა საკითხს“, ზოგნიც რასა და რას, ხოლო ყველას ერთად, თავისა ქვეყნის საუბედუროდ, ეროვნული საკითხი, ქვეყნის განთავისუფლების საკითხი, ქვეყნის დაღუპვად და უბედურებად მიუჩნევიან. მათ დაუნდობელი ომი გამოუცხადეს თერგდალეულებს ილიას მეთაურობით და მათ მიმდევრებს – ვაჟა-ფშაველას, ყაზბეგს და სხვებს. ილია ერთხანობას მათთან კამათში ჩაება, უნდოდა რაიმე გაეგებინებინა, მიეხვედრებინა, მაგრამ უკადრებელი რომ აკადრეს, თავი გაანება, მიუშვა ნებას, იქნებ თავად მიხვდნენ, გონს მოვიდნენო, მაგრამ ისინი უარესსა და უარესს კადრულობდნენ. ვაჟა და სხვა მისი მსგავსი გულშემატკივარნი ილია ჭავჭავაძისა და სამშობლოსი, ცდილობდნენ გამოქომაგებას, იმ ვილაცხეების გამოფხიზლებას, მაგრამ ამას თვით ილია უშლიდა დიდბუნებოვნად: მართლაც რას დაუმტკიცებდი ერთ სტატიაში იმათ, ვინც ვერ ხედავდა ილიას ბუმბერაზულ პიროვნებას, მის დიდ დამსახურებას ქვეყნის წინაშე. ვაჟამ უფრო ადრე თვით ილიას, აკაკის და მათთა მსგავსთა მოღვაწეთა გამხნეება სცადა:

**„რომელი ჭკვათა მყოფელი
უარჰყოფს თქვენსა შრომასა?
მიკვირს, რად უგდებთ თქვენც ყურსა
ერთს-ორს ურწმუნო თომასა“...**

უშლიდა ილია, მაგრამ ვერ ითმენდნენ ვერც ვაჟა, ვერც სხვანი, ვისაც ჰყოფნიდა სიმამაცე ხმა აემალღებინა მათი უმსგავსობის წინააღმდეგ, ვინც ილიას ქვეყნის მოღალატედ ნათლავდა იმის გამო, რომ იგი წოდებათა შორის (გლახობასა და თავად-აზნაურობას შორის) ურთიერთნდობას, ურთიერთსიყვარულსა და პატივისცემის დამკვიდრებას, მათ ერთ ეროვნულ ძალად შეკვრას და ქვეყნის საერთო მტრის წინააღმდეგ მიმართვას ქადაგებდა. ვინც წინააღმდეგი იყო უაზრო ხოცვა-ჟლეტის, ძმათა მკვლელობის და ამით მტრის ნისქვილზე წყლის დასხმისა. ეს ვერ გაეგო ვაჟა-ფშაველას და ამიტომ მათ საყურადღებოდ წერდა: „დავგმოთ ჭავჭავაძე იმისთვის, თუ მას ებრალებოდა თავად-აზნაურობა არა როგორც წოდება, არამედ როგორც ადამიანები? განა შეიძლება? დიალ, მას ებრალებოდა თავად-აზნაურობა, როგორც დასუსტებული ნაწილი სუსტი, მცირერიცხოვანი თავის ერისა. რა არის აქ დასაძრახისი, რა არის აქ არაადამიანური? მაშ, გავსწყვიტოთ ისინი? ილიაც სწორედ მაგას ამბობდა, ნუ ჰხოცავთ თავადებს და აზნაურებს, რადგან ძმები ხართ?“

1905 წელს ვაჟა იმათ გასაგონად, ვინც იძახდა – ეროვნულ საკითხზე ლაპარაკი ჩამორჩენილობაა, ჩვენ კოსმოპოლიტიზმს ვაყენებთ მაღლაო, გამოაქვეყნა ხმალივით მოქნეული სტატია:

„კოსმოპოლიტიზმი და პატრიოტიზმი“. „ზოგს ჰგონია, რომ ნამდვილი პატრიოტიზმი ეწინააღმდეგება კოსმოპოლიტიზმს, მაგრამ ეს შეცდომაა. ყოველი ნამდვილი პატრიოტი კოსმოპოლიტია ისე, როგორც ყოველი გონიერი კოსმოპოლიტი /და არა ჩვენებური/ პატრიოტია. როგორ? ასე, – რომელი ადამიანიც თავის ერს ემსახურება კეთილგონიერად და ცდილობს თავისი სამშობლო აღამაღლოს გონებრივ, ქონებრივ და ზნეობრივ, ამით ის უმზადებს მთელს კაცობრიობას საუკეთესო წევრებს, საუკეთესო მეგობარს, ხელს უწყობს მთელი კაცობრიობის განვითარებას, კეთილდღეობას: თუ მთელის ერის განვითარებისათვის საჭიროა კერძო ადამიანთა აღზრდა, აგრეთვე ცალკე ერების აღზრდა საჭირო, რათა კაცობრიობა წარმოადგენდეს განვითარებულს ჯგუფს; თუ კერძო ადამიანისათვის არის სა-

სარგებლო აღზრდა ნაციონალური, ინდივიდუალური აგრეთვე ყოველის ერისათვისაა სასარგებლო ასეთივე აღზრდა, რათა ყოველმა ერმა მომეტებული ძალა, ენერჯია, თავისებურება გამოიჩინოს და საკუთარი თანხა შეიტანოს კაცობრიობის სალაროში...

ყოველი მამულიშვილი თავის სამშობლოს უნდა ემსახუროს მთელის თავის ძალღონით, თანამოძმეთა სარგებლობაზე უნდა ფიქრობდეს და, რამდენადაც გონივრული იქნება მისი შრომა, რამდენადაც სასარგებო გამოდგება მშობელი ქვეყნისთვის მისი ღვაწლი, იმდენადვე სასარგებლო იქნება მთელი კაცობრიობისათვის. ედისონი ამერიკელია, ამერიკაშივე მუშაობს, მაგრამ მისი შრომის ნაყოფს მთელი კაცობრიობა გემულობს. შექსპირი ინგლისელია, ინგლისში მუშაობდა და ცხოვრობდა, მაგრამ მისი ნაწერებით მთელი კაცობრიობა ტკბება დღესაც. ეგრეთვე სერვანტესი, გიოტე და სხვა გენიოსები თავის სამშობლოში, თავის თანამოძმეთათვის იღწვოდნენ, მაგრამ დღეს ისინი მთელს კაცობრიობას მიაჩნია თავის შვილებად.

ყველა გენიოსი ნაციონალურმა ნიადაგმა აღზარდა, აღმოაცენა და განადიდა იქამდის, რომ სხვა ერებმაც კი მიიღეს ისინი საკუთარ შვილებად. მაშასადამე, გენიოსებმა თავის სამშობლოს გარეშეც ჰპოვეს სამშობლო – მთელი ქვეყანა, მთელი კაცობრიობა, მაგრამ, მიუხედავად ამისა, გენიოსთ ნაწარმოებნიც უფრო სარგები და შესაფერებელია ეროვნულ ნიადაგზე. „ჰამლეტით“, „მეფე ლირით“, ვერც ერთი ქვეყნის შვილი ვერ დასტკბება ისე, ნამეტნავად თარგმნით, როგორც თვით ინგლისელი, რომელიც ინგლისურს ენაზე კითხულობს ამ ნაწარმოებთ. შორს რად მივდივართ? ნუთუ სხვა ქვეყნის შვილი ისე დასტკბება „ვეფხისტყაოსნით“ და ისე გაიგებს მას, რაც უნდა კარგი თარგმანი წაიკითხოს, ან თუნდა კარგად იცოდეს ქართული ენა, როგორც თვით ქართველი? – არასდროს. გენიოსს, როგორც პიროვნებას, ინდივიდს, აქვს საკუთარი სამშობლო, საყვარელი, სათაყვანებელი, ხოლო მის ნაწარმოებს არა, ვინაიდან იგი მთელი კაცობრიობის კუთვნილებაა, როგორც მეცნიერება...

მეცნიერება და გენიოსები გვიხსნიან გზას კოსმოპოლიტიზ-

მისაკენ, მაგრამ მხოლოდ პატრიოტიზმის, ნაციონალიზმის მეოხებით. განავითარეთ ყოველი ერი იქამდის, რომ კარგად ესმოდეს თავისი ეკონომიური, პოლიტიკური მდგომარეობა, თავისი სოციალური ყოფის ავკარგი, მოსპეთ დღევანდელი ეკონომიური უკუღმართობა და, შეჭველია, მაშინ მოისპობა ერთისაგან მეორის ჩასანთქმელად მისწრაფება, ერთმანეთის რბევა, ომები, რომელიც დღეს გამეფებულია დედამიწის ზურგზე.

პატრიოტიზმი, როგორც სიცოცხლე და სიცოცხლესთან გრძნობა, თითქო დაბადებასთან ერთად ჰყვება ადამიანს და შეიცავს ისეთ ნაწილებს, რომელთაც ვერც ერთი ჭკვათამყოფელი ადამიანი ვერ უარყოფს, როგორც მაგ. არის დედაენა, ისტორიული წარსული, სახელოვანი მოღვაწენი და ეროვნული ტერიტორია, მწერლობა და სხვა. იმავე ნამიდანვე, როცა ბავშვი ქვეყანას იხილავს, მას, გარდა ჰაერისა, სადგომ-საწოლისა, ესაჭიროება აღმზრდელი, რძე – საზრდოდ, ნანა – მოსასვენებლად.

ყველა ეს ხდება ოჯახში, დედის ხელმძღვანელობით და სწორედ აქ არის დასაბამი პატრიოტიზმისა. ყმანვილი იმ თავიდანვე მჭიდრო კავშირს იმათთან ჰგრძნობს, ვინც იმას ესაუბრება, ვინც გარეშე მოხვევია, – ვისგანაც პირველ შთაბეჭდილებას ღებულობს. ამიტომ უყვარს ის ენა, რომელიც იმას სიყრმის დროს ესმოდა, და, ის ადამიანები მიაჩნია თავისიანებად, რომელნიც ამ ენაზე ლაპარაკობენ თუ მღერიან, თავის სოფელეთა სრულიად უმნიშვნელო სხვებისაგან განმასხვავებელი საუბრის კილოც კი შვენიერებად მიაჩნია, თავისი სოფელი, თუნდ უკანასკნელი ადამიანი, უცხო ადგილას, უცხო მხარეს რომ შეჰხვდეს, დიდ სიამოვნებას აგრძნობინებს. ვიდრე გაფართოვდება ბავშვის მხედველობა და გაიზრდება მისი პატრიოტიზმი, მას მხოლოდ განსაკუთრებით ის სოფელი, ან დაბა უყვარს, სადაც დაბადებულა და ბავშვობა გაუტარებია.

ვერ წარმომიდგენია ადამიანი სრულის ჭკუისა, სალის გრძნობის პატრონი, რომ ერთი რომელიმე ერი სხვებზე მეტად არ უყვარდეს, ან ერთი რომელიმე კუთხე, რატომ? იმიტომ: ერთი და იგივე ადამიანი ათას ადგილას ხომ არ იზადება, არამედ ერთს ადგილას უნდა დაიბადოს, ერთს ოჯახში, ერთი დედა უნდა ჰყავდეს! თუ ვინმე იტყვის ამას, ყველა ერი ერთნაირად მიყვარსო, – სტყუის, თვალთმაქცობს: ან ჭკუანაკლებია, ან რო-

მელიმე პარტიის პროგრამით არის ხელფეხშებოჭილი. სამონყალო სახლში აღზრდილი ბუშიც კი, რომელსაც, შეიძლება, ათასი ლალა გამოუჩნდეს და გარეშემო ათასი ენა ესმოდეს, ბოლოს ერთს რომელსამე ენას ინამებს და ერთს ქვეყანას მიიჩნევს თავის სამშობლოდ...

პატრიოტიზმი უფრო გრძნობის საქმეა, ვიდრე ჭკუა-გონებისა, თუმცა კეთილგონიერება მუდამ ყოფილა და არის მისი მათაყვანებელი და პატივისმცემელი. კოსმოპოლიტიზმი მხოლოდ ჭკუის ნაყოფია, ადამიანის კეთილგონიერებისა, მას ადამიანის გულთან საქმე არ აქვს, იგი სახსარია იმ უბედურების ასაცილებლად, რომელიც დღემდის მთელს კაცობრიობას თავს დასტრიალებს.

ამიტომ კოსმოპოლიტიზმი ასე უნდა გვესმოდეს: გიყვარდეს შენი ერი, შენი ქვეყანა, იღვანე მის საკეთილდღეოდ, ნუ გძულს სხვა ერები და ნუ გშურს იმათთვის ბედნიერება, ნუ შეუშლი იმათ მისწრაფებას ხელს და ეცადე, რომ შენი სამშობლო არავინ დაჩაგროს და გაუთანასწორდეს მოწინავე ერებს. ვინც უარყოფს თავის ეროვნებას, თავის ქვეყანას იმ ფიქრით, ვითომ და კოსმოპოლიტი ვარო, ის არის მახინჯი გრძნობის პატრონი, იგი თავისავე შეუმჩნეველად დიდი მტერია კაცობრიობისა, რომელსაც ვითომ ერთგულებას და სიყვარულს უცხადებს. ღმერთმა დაგვიფაროს ისე გავიგოთ კოსმოპოლიტიზმი, ვითომ ყველამ თავის ეროვნებაზე ხელი აიღოსო. მაშინ მთელმა კაცობრიობამ უნდა უარჰყოს თავის თავი. ყველა ერი თავისუფლებას ეძებს, რათა თავად იყოს თავის თავის პატრონი თვითონ მოუაროს თავს, თავის საკუთარი ძალღონით განვითარდეს. ცალ-ცალკე ეროვნებათა განვითარება აუცილებელი პირობაა მთელის კაცობრიობის განვითარებისა.

„ივერია“ 1905 წ.

თუ არა, მართლაც, ერის დამოუკიდებლობისათვის მებრძოლთა რიგებში შემოგზავნილ, მოსყიდულ ჯაშუშებს თუ ჭკუანალრძობ ავანტიურისტებს, სხვას ვის შეეძლო ეროვნულ-განმათავისუფლებელი მოძრაობის ნაცვლად რუსეთის „ლეგალური მარქსისტების“ მითითებითა და მიბაძვით „საყოველთაო გაპროლეტარების“ თეორია ექადაგათ. ვაჟა მათ წინააღმდეგ

წერდა: „ჩვენში დღეს პროლეტარიატის ხსენებაც არ არის, როგორც რუსეთსა და ევროპაშია, თუმცა თანამგრძობელნი კი მოიპოვებინან...“

თითოეულს ჩვენს გლახს თავისი ქოხი უდგია, თავისი ოჯახი აქვს მაშინ, როცა რუსეთში „ნახევარი მდაბიო ხალხი, ნიადაგს მოსხლეტილი, უსახლკაროდ წონილით გამოდის და თავის შესაფარად სოროებს თურმე სთხრიან“.

მენშევიკ-ლიკვიდატორები თავისი შორსგაუხედავი, ბეცი მოქმედებით რუსეთის იმპერიის განმტკიცებას უწყობდნენ ხელს და არა მის დაშლას, ხალხთა განთავისუფლებას, რასაც რევოლუცია ისახავდა მიზნად. ვაჟამ „სადღეისო წერილი მეგობართან“ სწორედ ამ საკითხს მიუძღვნა: „მხოლოდ ერთს ნაწილს ქართველებისას არა სწამს, რომ ეს ასეა და ესენი გახლავან „დასელები“, რომელნიც ქადაგებენ, სხვა გავაბედნიეროთ, გავაძლიეროთ და ამით ჩვენც ძლიერნი შევიქმნებითო. მოიგონე „დასელების“ მოძღვრება დემოკრატიული ცენტრალიზაციისა. გაძლიერებულის რუსეთისაგან ისინი მოელიან წყალობას. აბა, საიდან სადა! ნუთუ ძლიერი მეზობელი არ არის საშიში უძლურისათვის?! ნუთუ ჰგონიათ, რომ ბატონობის მისწრაფება და სურვილი დამონებულ მცირე ერებისა შეუმცირდება გაძლიერებულს რუსეთს? არა და ცხრაჯერ არა... ძლიერ ბატონს უძლური ბატონი სჯობია დამონებულისათვის... ვის არ სწამს, რომ მხოლოდ სრული თვითმართველობა გააბედნიერებს ხალხს, გაჭრდის მის ენერგიას, გამოიწვევს და ააყვავებს მასში დამალულს ახალს ძალებს? – რომ აპეკუნობა, რაც უნდა კარგი აპეკუნე იყოს იგი, აჩლუნგებს ერის ძალღონეს, თვითცნობიერებას?! (16, 116).

თუ არა ერის მოღალატეებს, სხვას ვის შეეძლო გაეჩადებინა ეროვნულ-განმათავისუფლებელი მოძრაობის ლიდერის, ერის თავკაცის, ილიას (და მის თანამოაზრეთა) წინააღმდეგ ასეთი ყოვლად თავანყვეტილი ცილისმწამებლური, შეურაცხმყოფელი კამპანია. ისინი დარაზმული იყვნენ ვაზ. „კვალის“ ირგვლივ, რომელიც ამტკიცებდა, რომ ი. ჭავჭავაძე „რეაქციულ-კონსერვატორული“ თავადაზნაურობის მედროშეა, რომელსაც სურს ისტორიის ჩარხი უკუღმა დაატრიალოს, რომელმაც გაათახსირა და დასცა ქართული მწერლობა, ხოლო ქართული საზოგა-

დოებრივი აზროვნების განვითარება შეაფერხა და ათი წლით მაინც უკან დასწიაო.

რა უკუღმა მხედნი, რა ქვემძრომნი უნდა ყოფილიყვნენ, რომ თანამედროვე ახალი ქართული სალიტერატურო ენის ფუძემდებელი და რეფორმატორი, საზოგადოებისათვის ენის გამათახსირებლად წარედგინათ; ქართულ აზროვნებაში ახალი ეპოქის შემქმნელისათვის, მამამთავრისათვის საწინააღმდეგო დაებრალებინათ, თეთრი შავად გაესაღებინათ. იქამდე გააღვივეს ილიასადმი სიძულვილი, რომ ჟურნალ „მოგზაურში“ ზედიზედ ორ-ორი სამ-სამი ცილისმწამებლური, შეთითხნილი წერილი იბეჭდებოდა: თითქოს ილია საგურამოელ გლეხებს „კაკო ყაჩაღში“ გამოყვანილი გულქვა, აჯამი თავადივით ეპყრობოდა, ბეჭდავდნენ სამარცხვინო პამფლეტებს. (3, 143).

ვაჟამ, უპირველეს ყოვლისა, ილიას ეს მდგომარეობა, საქმის ვითარება ასახა ლექსში „გოდება თანამედროვე წინასწარმეტყველისა“:

**„მე ნარი ვგლიჯე, ეკალი, სხვამ კი მოიმკო სამკალი:
სხვამ მოხნა ჩემი მამული, დაჩლუნგდა ჩემი ნამგალი...
.....
წყელასგან გულდაკოდილი რა გზას დავადგე სავალად?
წინ დაბრკოლება ბევრი მაქვს, ნარი, ეკალი მრავალად.
მამ, შევდრკე? ვწყევლო და დავგმო, რაც მომწონს, რაცა
სჯობია?
თქვენ დაჰგმეთ, მე კი არ ძალმიძს, კარგი რა დასაგმობია?!
.....
თქვენი კანონი თქვენ იცით, ჩემი კანონი ესია!..
ფასს დასდებს ბოლოს ქვეყანა, ვისაც რა დაგვითვისია!“**

გულსაკლავი ის იყო, რომ ილიას, ერისაგან ერთ დროს კინალამ გაღმერთებულ კაცს, არავინ ესარჩლებოდა, ისე იყვნენ ტერორიზებულნი და დამფრთხალნი. შიგადაშიგ ვაჟა თუ რალაცას დაიბუბუნებდა მთიდან, მაგრამ მას დიდ ანგარიშს არავინ უწევდა. გაინაპირეს ილია და იგრძნობოდა, რომ წირვასაც მალე გამოუყვანდნენ. ადრევე, ოთხმოცდაათიან წლებშივე, გრძნობდა ამას ვაჟა, როცა წერდა მოთხრობას „ამოდის, ნათდება!“ მგლების დამშეულმა ხროვამ მიიჩნია, რომ მთვარის ამოსვლა

და სინათლე, რაც მათ სოფელზე თავდასხმაში უშლიდა ხელს, ბებერი მგლის – ტოტიას ბრალი იყო. ეცნენ, გაგლიჯეს, შესანსლეს. „მგლებს ცოტა გული დაუმშვიდდათ, მაგრამ კიდევ შიოდათ. შეხედეს ერთმანეთს, შეეშინდა ერთს მეორისა, ალბათ იმიტომ – ახლა მე არ შემქამონო, შეეშინდათ და გაფრთხნენ. ერთი მეორეს გაურბოდა, ჯაგიანებში ჩხლაკა-ჩხლუკი ისმოდა და თან თოვლის ჭრიალი... მთვარე კი ამოვიდა, ამოცურდა მალლა, თითქმის შუა ცაზე, ნათლად კაშკაშებდა და იქიდან, როგორც დარაჯი, უფრთხობდა ქვეყანას მტერსა... მგლები კი გარბოდნენ უგზო-უკვლოდ ტყეში და ყველას პირზე ეკერა: „განათდა, განათდა!“

ამით ისიც იწინასწარმეტყველა ვაჟამ, რომ სულ ერთია ილიასადმი დაბრალებული სინათლე მაინც გაანათებდა ქვეყანას, უდარაჯებდა ქვეყანას, მგლების ხროვა კი გადაიკარგებოდა.

1905 წლის რევოლუცია დამარცხდა, ილია მოჰკლეს, ჩაქრა იმედის ცეცხლი, პესიმისტურმა განწყობილებამ მოიცვა საზოგადოება. შინაარსი დაჰკარგა ცხოვრებამაც და მწერლობამაც. სიმბოლიზმი გაბატონდა.

ვაჟა კი მაინც იმედს არ კარგავდა და სხვათა გასაგონად აცხადებდა ლექსში „კიდევაც ვნახავ გაზაფხულს“.

**„კიდევაც ვნახავ, უხვად, ვარდნი, იანი ჰყვავოდენ,
ნაცარ-მტვრად იყვნენ ქცეულნი, ვინაც გუშინა ზვაობდენ;
შხამის და გესლის მთესველნი მოისპნენ, არარაობდენ,
ჩვენის სიკვდილის მსურველნი, ყორნები, ვალარ ჩხაოდენ!“**

ვაჟას გულგაუტეხლობას და ოპტიმიზმს მოწმობს ცნობილი პოეტის, სანდრო შანშიაშვილის, მოგონება:

„ერთხელ ქოსების სასადილოში ჩვენთან იყვნენ მასწავლებლები, ბანკში მოსამსახურე ინტელიგენტები და კარგად ცნობილი ბელეტრისტი შიო არაგვისპირელი (დედაბრიშვილი).

ლაპარაკი ჩამოვარდა ეროვნულ საკითხზე. ჩვენ შორის იყვნენ ნიჰილისტები, რომლებიც საქართველოს ყოფნა-არყოფნას და მის მომავალს უიმედოდ შესცქეროდნენ. არ სჯეროდათ თუ ოდესმე ქართველი ხალხი ფეხზე წამოდგებოდა.

ჩვენ გაკვირვებას საზღვარი არა ჰქონდა, როცა შიო არაგ-

ვისპირელიც ამ ნიჰილისტებს მიემხრო.

ვაჟამ მაგიდას მუშტი დაჰკრა, მის წინ ლამპა ჩააქრო, რამდენიმე თეფში გატყდა. ვაჟა მაინც განაგრძობდა ათრთოლებული ხმით ლაპარაკს: ვაი, თქვენი იმედის პატრონსო, – თქვა და წამოდგა.

მე და „ნაპოლეონი“ ვაჟას გავყევით. ვაჟას ჩოხის ჯიბეებში ჩაენყო ხელები, მტკვრის ხიდზე მარტოკა წინ მიდიოდა. ისე გაბრაზებული იყო რომ ჩვენც ხმას არ გვცემდა.

ვაჟა ძალიან მენდობოდა და ხშირად ჩემთვის გულის საიდუმლოც გაუზიარებია.

ერთხელ რედაქციაში შემოვიდა, რედაქტორი ინახულა და შემდეგ მითხრა: – მარტო შენ მოდი ქოსების სარდაფშიო.

მეც მივედი ჩვენს „კაფე-სარდაფში“. ეს იყო, მგონია, 1908-1909 წლებში. ვხედავ, კუთხეში, მაგიდასთან, ვაჟა ზის მარტო. მიმიწვია. მაგიდაზე ენყო თონის პური, ხმელი თევზი, მწვანილი და თუშური ყველი.

წითელი საფერავი დამისხა და მითხრა:

– შენ თუმცა ახალგაზრდა ხარ, მაგრამ შენი იმედი მაქვს და მარტო შენ გენდობი!

მე ძალიან დამაფიქრა ასეთმა მომართვამ. ვიცოდი, რომ ვაჟა ისე მეპყრობოდა, როგორც კეთილი მამა თავის პირმშო შვილს, მაგრამ ამ დღეს იგი მელაპარაკებოდა, როგორც წლოვანებით თანასწორს. ვაჟამ დაიწყო ჩვენი წარსული ისტორიით, შეეხო სააკაძეს, ერეკლე მეფეს.

– ეხლა ჩვენ უნდა გავანთავისუფლოთ დამონებული ერი, – თქვა ვაჟამ და თვალეებში ჩამაცქერდა.

მე მას განცვიფრებული მივაჩერდი. იგი მიმიხვდა, რომ შეკითხვა მინდოდა მიმეცა და განაგრძო:

– როგორ და რანაირად? მოდი, ჩვენ ამაზე ნუ ვილაპარაკებთ, შენ მხოლოდ გავალებ, კახეთში შეიგულე ათი სანდო კაცი, რომლებიც საქართველოს თავისუფლებისათვის სიცოცხლეს გასწირავენ. შენ იქნები მათი ათისთავი. ამ მოკლე ხანში ჩვენ ასეთი თავდადებულნი გვეყოლებიან ხუთიათასი კაცი, რაც საკმარისია... ნიშანი იქნება... შენ შენი კაცებით ადგილზე მოხვალ!

ვაჟა-ფშაველა იმ დღეს მართლა მთის არწივს მოგაგონებდათ. მისი აზრი და სიტყვა ჩემს გულში ელვის ნაპერწკლებს ისროდა. მე ვუსმენდი აჯანყების გეგმას, რომელიც მას შეედგინა და რომლის მიხედვითაც ერთ დანიშნულ დღეს საქართველოს ყოველი კუთხიდან მებრძოლი რაზმები თბილისში უნდა შემოსულიყვნენ”. (37, 172).

1905 წლის რევოლუციურ აბოზოქრებასთან დაკავშირებით თუ საქართველოს დედაქალაქში „იზმებში“ და „საკითხებში“ აიხლართა ეროვნული დამოუკიდებლობისათვის ბრძოლა, პროვინციებში, საქართველოს მთასა და ბარში, დასავლეთსა და აღმოსავლეთში ესმოდათ ძალიან მარტივად – სამშობლოს უნდოდა განთავისუფლება მეფის რუსეთის მონობისაგან. დელაგადა პროვინციებში შემორჩენილი ქართული სული, მაგრამ ეს ყველაფერი დაქსაქსულად იყო და მთავრობა იოლად უმკლავდებოდა, მოთავებებს კი ჟანდარმერია აპატიმრებდა და ციმაბირისაკენ ერეკებოდა. ქართლში ერთი ასეთი მოთავე იყო ვაჟას ღირსეული ძმა თედო. მან იცოდა თავისი უფროსი ძმის საქმიანობა მთაში და ბარიდან ცდილობდა მხრის აბმას. ამის გამო თედო დააპატიმრეს და ციმაბირისაკენ გაამგზავრეს სამუდამო პატიმრობაში. ზედაც მანიფესტმა მოუსწრო და თედო გაათავისუფლეს. მაგრამ სანამ გაათავისუფლებდნენ, ვაჟამ არც აქ დაიხია უკან და ბარში დატრიალებული ამბების წინააღმდეგაც ისევ მან აიმაღლა ხმა - 1905 წელს „ივერიაში“ გამოაქვეყნა წერილი „შავზნელი ამბები“. „შავზნელი“ უწოდა მეფის მთავრობის მოქმედებას, სიმართლეს ამბობდა და არ ეშინოდა, არ ეშინოდა არც გაზეთს: „ქართლში ძალიან განშირებულია „პოლიტიკურ“ დამნაშავეთა შეპყრობა... ვიზედაც ცოტა რამე ეჭვია, ყველას მიერეკებიან, არც ძევა, არც კვლევა... მე თვითონ ვიცი ერთი ამისთანა მაგალითი: ერთი სოფლის მასწავლებელი გახდა მსხვერპლი სწორედ ამისთანა სულმდაბლობისა და უმსგავსობისა. ამ მასწავლებელმა გაკიცხა გაზეთში მემამულენი, იმათი ყოფა-ქცევა. უკანასკნელთ შეურაცხყოფილად იგრძნეს თავი და საცა ჯერ იყო, გაჭიმეს კარგი გრძელი და მსუქანი „დანოსი“, რომელსაც მათთვის სასიამოვნო შედეგი მოჰყვა“...

ამდენმა აქეთ-იქეთ წყვეტებამ თითქოს უქმად ჩაუარა ვაჟას, მაგრამ მაინც იმედიანად იყო, ყველაფერს ამას დროებით

მოვლენად თვლიდა. 1906 წელს გამოაქვეყნა წერილები „დიდ-მარხვის“ სახელწოდებით, სადაც ეროვნულ ძალთა ჩაყურება სიმბოლოურად დიდმარხვას შეადარა: „ამისთანა დიდმარხვა საქართველოს დიდი ხანია არა სწვევიაო“.

ვაჟა ამ წერილებში ღრმად, გასაოცარი სიზუსტით აანალიზებს რევოლუციის, ეროვნულ ძალთა დამარცხების მიზეზებს და იმედს გამოთქვამს, რომ შემდგომში მაინც მიხვდებიან თავის შეცდომებს ისინი, ვისი უგნური მოქმედებითაც ჩაიშალა ერის ხსნის საქმე. „ყველა ხილულმა და უხილავმა შავმა ძალამ, როგორც სითბოს სუნზე გველებმა, თავები წამოყაყვა, იცქირება ამაცად, მამაცად. როცა ჰხედავდნენ, საქვეყნო აზრი იმარჯვებ-სო, ერთობის ადამიანებად ასაღებდნენ თავიანთ თავს და დღეს კი, როცა დარწმუნდნენ, მოწინააღმდეგეთა ფიქრმა და ძალამ გაიმარჯვა, ერთობასაც სწყევლიან და ერთობის მიმდევართაც. დღეს ისინი ჭკვიანობენ, კრიტიკოსობენ, მჭერმეტყველებენ, – ეს ასე უნდა ყოფილიყო, ეს ასეო და ამასობაში თავიანთ პირად საქმეებს სჩარხავენ; როგორც დღეს არიან უსარგებლონი, ისე გუშინ იყვნენ და ამას კი აღარ ვარაუდობენ, არა სთვლიან თავიანთ სირცხვილად, რომ კეთილი საქმე იმათ წყალობით ილუპება, ფუჭდება, არ არსებობს მათთვის სინანული, არც სიბრალული და მოთმინება. რად მოითმენენ, როცა ძალა მათ ხელში არის, – ქარი უქრისთ? რას შეინანებენ, როცა, თუნდ მშობელ დედას ძუ-ძუ მოაჭრან, რაც უნდა სხვა საძაგლობა ჩაიდინონ, იმათ პირის კანს სინითლე არ მიეკარება?! დღეს ერთობას ნიშნს უგებენ, ჩუმად ხითხითებენ, ეშმაკებს აცინებენ, ხოლო ანგელოზებს ატირებენ. აი მათი კაცობა, მოქალაქეობა და მამულიშვილობა... შეინანეთ ის შეცოდებანი, რამაც ხელი შეგიშალათ და ეცადეთ მომავალში აიცდინოთ თავიდან. დაჰგმეთ ის პარტიული თავ-მოყვარეობა, წვრილფეხობა, მჩატე პატივმოყვარეობა, რომელ-მაც შეუშალა ხელი ჩვენს ერთობას ერის მისწრაფებას“... (15, 259).

ვერ უშველა ვერც ვაჟას მონოდებამ და ჩაგონებამ, ვერც სხვა რამემ. ერთხელ და ერთხელ ნაღრძობ ტვინს სასიკეთო არაფერი ეკარებოდა. შეატყო ვაჟამ მაშინვე, რომ ისინი „მშობელ დედას ძუძუს მოაჭრიდნენ“. მათ მართლაც ცოფითა და შხამით გონება არეულებმა, თავისი უსუსურობითა და გონებ-

რივი სიჩლუნგით გაბოროტებულებმა, აზრთან უაზრობას რაკილა ვერ გაამარჯვებინეს, უკიდურეს არაადამიანურ სისაძაგ-ლეს მიმართეს და თვით ამ მაღალი აზრის მფლობელი – ილია მოკლეს! ეგონათ ამით აზრსაც მოკლავდნენ, მაგრამ მოტყუვ-დნენ მოკლექკუისანი – ის აზრი უკვე მთელი ქართველი ერის აზრი გახდა და მისი მოკვლა შეუძლებელი იყო, მაშინ მთელი ერი უნდა მოეკლათ.

მოკლეს დიდი ილია ნაძირალებმა! ტყვია დაახალეს მის მაღალი აზრებით გასხივოსნებულ ნათელ შუბლს.

ამ საზარელმა ამბავმა შეძრა არა მარტო მთელი საქართველო, არამედ მთელი რუსეთის იმპერიაც კი, ვისაც თავის რჩეულ შვილთა მკვლელობა არც უჭირდა და არც უკვირდა. ეს საზარელი ამბავი განსაკუთრებით მწარედ განიცადა ვაჟა-ფშაველამ. იმ დროს ის ხატობაში იყო, ილიას მოკვლის მაცნე რომ ავიდა ჩარგალში. უცნობი კაცი ვაჟასთან იყო გამოგზავნილი და ამიტომ დაუყოვნებლივ უნდოდა მისი ნახვა. თამარმა ბალღი გაა-ყოლა ხატისაკენ გზის სასწავლებლად. მივიდნენ და მაცნემ სა-ერთო მისალმების შემდეგ ვაჟას მიმართა:

– ცუდი ამბის მაცნე ვარ, როგორ გითხრათ, არ ვიცი, ენის მოტრიალება მიჭირს, მაგრამ ჭირი თავს არ მაღავს... ილია მოგვიკლეს წინამურთან ყაჩაღებმა.

ვაჟა ჯერ გაირინდა, მერე თავში ხელი შემოიკრა და ატირ-და:

– ვინ მოკლა, ვინ მოკლა ვინ გაბედა ხელის აღმართვა ჩვენი ერის დედაბოძის წასაქცევად? ვაი ჩვენს უბედურებას, ვაი სირ-ცხვილო! – და აქვითინებული პირქვე დაემხო (40, 37).

ილიას მკვლელობის ფაქტში ვაჟა-ფშაველამ ჩვენი ერის უბედურება დაინახა, დაინახა უფრო მეტი საშინელება, ვიდრე ეს ერთი შეხედვით ჩანდა, დაინახა ის, რისი მოკვლის განზრახ-ვაც ჰქონდათ ილიას მკვლელებს და იმიტომ დაასათაურა თავის წერილი ასე – „ვერ მოჰკლეს!“ ის მაშინვე მიხვდა, ვისი ნამოქ-მედარიც იყო ეს ბოროტება, იცოდა მათი ვინაობა, ამიტომაც მისცა ზუსტი შეფასება თვით მათაც და მათ ნამოქმედარსაც. გაზეთ „ისარში“ 1907 წლის 6 სექტემბერს გამოქვეყნდა ვაჟას ცხელ გულზე დაწერილი სტატია.

„ვერ მოჰკლეს!“

„ილია რო მოჰკლეს!“ – მითხრა ერთმა ჩემმა ნაცნობმა მწუნარე და თან გაკვირვების კილოთი.

თავზარი დამცა ამ ამბის გაგონებამ და ათასი კითხვა აღმიძრა: ვინ მოჰკლავდა, ნეტავ, ილიას? განა შეიძლება ამისთანა ადამიანების მოკვლა? ნუთუ ქართველმა შეახო ხელი თავის მამას, ქართველთათვის თავდადებულს, თავის ერისათვის მოჭირნახულე ადამიანს? იქნებ უცხოელებს შეჰშურდათ ჩვენთვის ეს მართლაც ერთადერთი ბურჯი ჩვენი ქვეყნისა, ბურჯი ჭკუით, ნიჭით და გამოცდილებით? ათასი ამისთანა კითხვა დამებადა თავში და დღესაც კი, დღეს, როცა ეს სტრიქონები იწერება, არ ვიცი მიზეზი ილიას სიკვდილისა. ვიცი მე და თქვენ, მკითხველო, მხოლოდ ფაქტი, რომ მოგვიკლეს საუკეთესო, პირველი ადამიანი, ჩვენის მწერლობის სულის ჩამდგმელი, მოღვაწე დიდი მოამაგე ქართველი ერისა. რომელი ერთი ჩამოვთვალო ილიას ღვანლთაგან? ეს ყველამ კარგად უწყის. საშინელი, მეტისმეტად ბარბაროსული მკვლელობაა, რომლის მსგავსი არსად, არა ქვეყანაში არ მომხდარა და არც მოხდება! მხოლოდ სანყალს, უბადრუკს, უბადრუკის შვილების პატრონს საქართველოში შეიძლება ამისთანა მკვლელობა... რევოლუციის სახელით, საბრალო, სანყალო რევოლუციავ ჩვენს ხელში.

საზარელი ფაქტია, საზარელი მოქმედებაა, საშინელი აზრის პატრონნი უნდა იყვნენ მკვლელობის ჩამდენნი. აშკარაა და აშკარად ვიტყვი: ილიას მკვლელებს რომ შეეძლოთ, საქართველოსაც მოჰკლავენ.

აბა კარგად ჩაუკვირდით საქმეს, თუ ასე არ არის, დიალ, ასეა და ეს არის კიდევ უბედურება, დიდი უბედურება, ჩვენს თავზე მოვლენილი. უგნურთ ნუთუ არ იციან, რომ საუკეთესო ადამიანების ხოცვა, კვლა, მოკვლაა მთელი ქვეყნისა, სოფელი ვინ და ერთი კაციო. ნუთუ იქამდის დავკნინდით, დავკარგეთ ადამიანობა, ნამუსი, დავიბრმავეთ გონება, რომ ამისთანა აზრები ღორძინდება საქართველოში? ნუთუ ვისმე ფანატიკოსებს ჰგონიათ, რომ ილიების ხოცვით მოჰკლავენ თვით იდეას, რომელიც უკვდავია და რომელსაც მხოლოდ ილიასთანა ადამიანებს შეუძლიათ ემსახურონ და არა უძლურთ, უნიჭოთ,

უვიცთ საზოგადოების ნაძირალებს: ილიასთანა ადამიანებს სიცოცხლეშივე ძეგლებს უდგამენ უცხოეთში, ხოლო ჩვენ კოცონზე ვწვავთ, ვკლავთ, როგორც ავაზაკებს... საბრალო ჩვენო თავო, სანყალო საქართველოვ!

რა ვთქვათ მკვლელებზე, ამ საცოდავს მეოცე საუკუნის ჰეროსტრატებზე? რა ადამიანები უნდა იყვნენ ილიას მკვლელები? როგორ მოვიხსენიოთ ისინი? როგორ მოვექცეთ ამ უბადრუკებს? ნუთუ ისე, როგორც გვირჩევს ამ დღეებში დაბეჭდილი მონოდება ქართველთადმი – ცეცხლი და მახვილი მკვლელებსაო. ესლა გვაკლია, რომ ბარბაროსობას კიდევ სხვა ბარბაროსობა დაურთოდ ზედ. დავერივნეთ ერთმანეთს, ვხოცოთ ვჟლიტოთ ერთმა მეორენი და გავახაროთ ისედაც ჩვენი უბადრუკობით გალალებული მტერი? ღმერთმა დაგვიფაროს, ღმერთმა გვაშოროს ამისთანა საქციელი...

ნაღვლით და ბოლმით აღსავსე მე ასე ვსჯი, რომ ილიას მკვლელნი შესაბრალისნი, ყოვლად სანყალნი, ყოვლად გამოთავყვანებულნი, უვიცნი, ზნეობით გათახსირებულნი და ბრმანი უნდა იყვნენ, სატირალნი და სავალალონი ჩვენი ქართველებისაგან.

სხვა რა ვთქვათ? სხვა რა ვიფიქროთ? სისხლი სისხლისათვის? ცოდვა მივუმატოთ ცოდვას? სირცხვილს – სირცხვილი? განა იმათ ადამიანობისა ერთი ბენო ნიშანწყალი რომ ჰქონოდეთ, იზამდნენ ამას? მოჰკლავდნენ ამისთანა ადამიანს, რაც უნდა მისგან ნაწყენნიც იყვნენ? არა. არ არიან ისინი ადამიანები, უნდა შევრაცხოთ მხეცებად, პირუტყვებად, და პირუტყვებზედ როგორ ვიძიოთ შური, ისე, როგორც ადამიანზე, ეს ხომ ჩვენივე სირცხვილია, ჩვენის ადამიანობის დამცირებაა?!

მოჰკლეს ილია!... მაგრამ ვერ მოჰკლეს, ვერა! მისი ხსოვნა უკვდავია, ვიდრე საქართველო იქნება. დიალ, ვერ მოჰკლეს, რადგან თუ რამდენიმე, თითებზე დასათვლელი ადამიანი ხარობს ილიას სიკვდილით, ასი ათასი მისტირის ამ ჩვენს სასიქადულო მამულიშვილს და რამდენიც ხანი გაივლის, მით უფრო, დაკლების მაგივრად, გრძნობა სიბრალულისა და სიყვარულისა მოიმატებს ერის გულში.

„სანყალი ილია, სანყალი ილია!“ მესმის გულსაკლავად

წარმოთქმული აქეთ-იქიდან სიტყვები მამათა და დედათა მიერ. სანყალი ილია? არ არის ილია სანყალი, ვინაიდან მან აასრულა თავის მოვალეობა წინაშე თავის ქვეყნისა. იბრძოლა, იღვანა ჩვენს სასარგებლოდ და დაღლილ-დაქანცული მიება-რა ცივს სამარეს, ჩაიყოლა თან ისევ ჩვენი დარდი, დარდი თავის ქვეყნისა... გაიყოლა თან ის ტყვიები, რომლითაც ჩვენ იმას გაუმასპინძლდით, წყლულები ჩვენ მიერ დაჩნეული. ჩაიყოლა თან ყველა ეს ჩვენ მიერ მიძღვნილი სასიქადულო ძღვენი, მაგრამ ილია იმდენად ჭკვიანია, იმდენად უყვარს ქართველები და საქართველო, რომ მამა-პაპათა წინაშე დაჰმაღლავს ტყვიებსაც, წყლულებსაც, რომ ჩვენზე ცუდი არ ათქმევინოს და არ აფიქრებინოს, არ გააჯავროს ჩვენზე ისინი.

საუკუნოდ იყოს ხსენება შენი, ჩვენო იმედო, ჩვენო საყვარელო ილიავ!”

ვაჟამ ილიას ცხედართან დიდი გულისტკივილით აღსავსე სიტყვა წარმოთქვა და ფიციც დადო, რომ მის მიერ აფრიალებული დროშის ქვეშ იდგებოდა სიკვდილამდე და მის ნანდერძევ საქმეს არ უღალატებდა – არ უღალატებდა ერს და ხალხს. ყოველივე ამის გამო იმავე ნაძირალებმა ვაჟასაც მწარედ გადაუხადეს. მართალია თვითონ ვერ მოჰკლეს, თუ არ მოჰკლეს, რადგან თბილისში არ იყო და დიდ ძალასაც არ წარმოადგენდა საზოგადოებრივი ჭიდილის თვალსაზრისითაც, მაგრამ შემდეგში ძმაც (თედო) მოუკლეს და შვილიც (ლევანი) დაუხვრიტეს.

ვაჟას ფიზიკურად არ კლავდნენ, მაგრამ გულის მოკვლას ყველანაირად ცდილობდნენ. არ უშვებდნენ შემთხვევას ვაჟას გალანძღვისას, ტყუილს თუ მართალს ყველაფერს საჯაროდ გაჰკიოდნენ. „ივერია” აგრძელებდა ვაჟას ლანძღვას. ანკი ვაჟას რას დაინდობდა, როცა თვით ილია ჭავჭავაძის სალანძღავ, ცილისმწამებლურ წერილებს ბეჭდავდნენ. 1903 წელს „ივერიაში” გამოაქვეყნა ასეთი სიმართლესმოკლებული ფაქტი: „ტფილისის ოლქის სასამართლოს სესიამ თიანეთში 30 მაისს განიხილა საქმე ლუკა რაზიკაშვილისა, რომელსაც ბრალდება, რომ ტყისმცველისათვის სიტყვით და საქმით შეურაცხყოფა მიუყენებია... სასამართლომ არ შეინყნარა თხოვნა და განაჩე-

ნი გამოაცხადა, რომლის ძალით ლუკა რაზიკაშვილი დაჰპატიმრებული უნდა იქნას ორის თვით”... (51, 44).

ხედავდა ვაჟა, როგორ ექცეოდნენ საქართველოში თავის საუკეთესო შვილებს, როგორ ექცეოდნენ თვით მას, იცოდა ისტორიულ წარსულში რამდენი საუკეთესო მამულიშვილი გასწირეს და გულჩათუთულმა მორიდებულად შეჰკადრა საყვედური სამშობლოს, ამოთქვა თავის მწარე საგონებელი:

**„თუ ვერ ვიგუებთ, ვერ შევიფერებთ,
კარგი შვილები რად გვებადება?
შვილის სიკეთე მშობელს შეშურდეს
ნამდვილ მშობელსა ეს ეკადრება?
ცრემლები მახრჩობს, ველარას ვამბობ,
კარგის დაღუპვა რად გვენატრება,
ჩვენის შვილისა, ჩვენივე ძმისა?!
ველარას ვიტყვი, ვთრთი, მეხათრება,
ჩემო ქვეყანავ, ჩემო სოცოცხლევ,
არ გეკადრება, არ გეკადრება!”
(„გიორგი სააკაძის სურათზე”)**

ყაზბეგი, ეგნატე ნინოშვილი შიმშილით დახოცეს, ილია ტყვიით მოკლეს... აბა, რა მხარდაჭერის იმედი უნდა ჰქონოდა ვაჟას ასეთი საზოგადოებისაგან. ვინ შეინუხებდა თავს მისი მძიმე ცხოვრების შემსუბუქებისათვის. საზოგადოების რა თანაგრძნობის იმედი უნდა ჰქონოდა „გამეცნიერებულ გლეხს”, როცა იმერეთის ბრწყინვალე თავადს, საქართველოს უგვირგვინო მეფედ ნოდებულ აკაკი წერეთელს, ვისაც თითქოს ზღვა სიყვარული შეაფრქვია ერმა, სიცოცხლე ჰქონდა გამწარებული საზოგადოების უგულობისაგან. ის, რასაც დახმარების ხელი ჰქვია, აკაკისათვის არავის გაუწვდია არასოდეს. პირიქით, თავისი აღმოჩენილი მარგანეცის საბადოების შემოსავალსაც ყოველმხრივ ჩამოაცილეს, მის ნაამაგარს გამწარებული სიხარბით ჩააფრინდნენ ისინი, ვინც მანამდე სასაცილოდ იგდებდა. „შემადრწუნებელია იმის გაგება, რომ თანაგრძნობა მას თურმე საერთოდ სანატრელი ჰქონია”.. (50, 147).

დანუნებული ენა

გასაოცარი ის არის, რა ორგანიზებულია ხშირად ბოროტი ძალა და როგორ საცოდავად იქსაქსებიან სიკეთისათვის მებრძოლნი. ყაზბეგს ფუნთუშის საყიდელი ფულიც კი არა ჰქონდა ხანდახან და მშვიდი წერდა შინიდან გამოუსვლელად; ეგნატე ნინოშვილსაც სამადლოდ აჭმევდნენ. ამ დროს კი ათასობით უღირსნი, ქვეყნისა და ხალხის მძარცველი არარაობანი, ფუფუნებაში ცხოვრობდნენ. მოწინავე ინტელიგენცია, იმის მაგივრად, რომ ხმა ამოეღოთ ასეთ ფაქტებზე, გვერდში ამოსდგომოდნენ ერთმანეთს, ხშირად პირიქით, მტრების გულის გასახარად ერთურთსაც კი ექიშებოდნენ. ჯერ იყო და ილიამ და მისმა თანამებრძოლებმა ვერ დაიცვეს ვაჟა ვიგინდარა-ნაძირალებისაგან. ახლა აკაკი უნუნებდა ენას.

ვაჟა ხალხური საზომით წერდა, რვამარცვლიანი შაირით – ისე მღეროდა, როგორც ემღერებოდა. ამიტომ ხალხურ მეღექსედ, კუთხურ, კარჩაკეტილ, ფშაველ პოეტად თვლიდნენ. იმისი გაგება და დანახვა კი არ უნდოდათ, ვაჟას ლექსი აზროვნებით, სახეებით და თვით გარეგნული ფორმითაც რა მაღალი საფეხური იყო ხალხურთან შედარებით. შეუძლებელი იყო ლიტერატურაში ჩახედულ კაცს ერთმანეთში აერია ვაჟასი და ხალხური ლექსი. ისინი კი, გაპუდრულ-გავეროპელებული ხელისმომწერნი, „მაღალი გემოვნების“ მქონე ქართველნი, ანონიმურ წერილებს სწერდნენ რედაქციას, რომ „შეენწყვიტათ ვაჟას ლექსების ბეჭდვა და მათი გაზეთების ავტორიტეტი აენიათ“.

ვაჟას გაგებას ხელს უშლიდა ჯერ კიდევ ყურს მიუჩვევლი, საზოგადოებისათვის უცხო ფშაური დიალექტი, რომლის გარეშეც დღეს წარმოუდგენელია ვაჟას პოეზია. ეს დიალექტი აძლევს სწორედ იმ თავისებურსა და განუმეორებელ პოეტურ ელფერს მის პოემებსა და ლექსებს.

ვაჟა ფშაურ ფორმებს, ფშაურ სიტყვებს რომ იყენებდა პოეზიაში, მისი პოეზია ითხოვდა ამას, თორემ პროზა სანიმუშო სალიტერატურო ქართულით არის დანერვილი. მას დიალექტზე წერა აძლევდა იმის საშუალებასაც, რომ უამრავი ქართული სიტყვა გამოეტანა სამზეოზე. თუ სხვა მწერალთა ლექსიკა სა-

შუალოდ ხუთი ათასის ფარგლებში ტრიალებს, ვაჟასთან თხუთმეტი ათასს აღემატება. ასეთ დიდ მისიას ვაჟას შემოქმედებას მაშინ ვინ დააკისრებდა. პირიქით, იმას უკიჟინებდნენ, ენას ანაგვიანებო. ამ, თითქმის საერთო აზრის გამომხატველი იყო პ. მირიანაშვილის წერილი „საერო ენა და სათემო კილო“, რომელიც დაიბეჭდა გაზეთ „ივერიაში“ 1888 წელს. წერილი მიმოხილვითი ხასიათისა იყო, სადაც ვაჟა-ფშაველას ენასაც შეეხო: „... დღეს ჩვენ მწერლობაში რამდენიც მწერალია, იმდენი ენაა, ესე იგი რა თემისაც არიან, იმ თემის ენით სწერენ და ზოგიერთი ხომ თავის სოფლის ენასაც ხმარობს. ამგვარად ენა მეტად აჭრელდა და ქიზიყურის პროზის და ფშაურის პოეზიის მოვლინებამ ხომ მთლად არია ენის ტაძარი, ჰლამის დაჰბადოს მწვალებლობა, მეტად საზარი. აქ ერთი რამ ავიწყდებათ ჩვენს მწერლებს. ან არ სცოდნიათ სხვა ქვეყანათ ლიტერატურა და ენის განვითარების ისტორია, ანდა იმის ცოდნა ჩვენს ენის ნიადაგზე ვერ გამოუყენებიათ და თითქოს ხამნი იყვნენ, ისე იქცევიან. მთავარ მწერლობის გრამატიკები კანონმდებლობა ყოველ მწერალთათვის სავალდებულო უნდა იყოს, ყოველის მწერლის კალამი ერთნაირად უნდა აკანკლედებდეს, ან აუღვლილებდეს სიტყვას...“

უცილოა, რომ ფშაურს პოეზიას, ისე, როგორც სხვა ქართველთა პოეზიას, თავის საკუთარი ჩინებული მხარე აქვს და სამწუხაროდ კი იქაურს მწერლებს ვერ შეუგნიათ, თუ რა სახით უნდა შეიტანონ საერო მწერლობაში თავიანთის თემის პოეზიის საკუთარი მარგალიტები, სიტყვის საქცევი ფიგურებრ თქმულება, ჰიპერბოლები, შედარებანი, ანდაზები თუ აფორიზმები. აი, რა არის განმასხვავებელი. აი ამათის შემოტანით გამდიდრდება საერო მწერლობა...

რამდენად ბატონი მაჩხანელის ქიზიყურმა პროზამ ბევრი მეტ-ბარგად ჩასარიცხი სიტყვები შემოსძღვნა ქართულ საერო პროზას, იმდენად ბ-ნმა ვაჟა-ფშაველას ფშაურმა პოეზიამ დღევანდელს ქართულთან შედარებით უკან ჩამორჩენილი გრამატიკები ფორმები შემოიტანა და ამასთანავე ზოგიერთი მეტ-ხორცი სიტყვებიც.

ჩვენი მწერლობა მოვალეა, რომ სამწერლო ხელოვნება უმნიშვნელო და მეტხორცის პროვინციალიზმით არ გაახორკლიანოს გასუფთავების მაგიერ“.

საბოლოო ჯამში, არა, მაგრამ რაღაცა კუთხით მირიანაშვილი მართალი იყო. მას შემდეგ, რაც „თერგდალეულების“ და, კერძოდ, ილია ჭავჭავაძის თაოსნობით უპირატესობა მიეცა ხალხის მეტყველებას არსებულ სალიტერატურო ენასთან შედარებით, ფაქტიურად, მართლაც, აირია ენის მონასტერი. ანტონ პირველის ნაღვანი არც ისე უაზრობა იყო, როგორც მას ხელოვნურსა და ღვარჯნილს უწოდებენ ჩვენს ენათმეცნიერულ გამოკვლევებში და როგორც ამას სკოლის სახელმძღვანელობიდან გვასწავლიან. ვითომ რა ასეთი ხალხისთვის გაუგებარია ალექსანდრე ჭავჭავაძის, ნიკოლოზ ბარათაშვილის, გრიგოლ ორბელიანის შემოქმედების ენა. ისინი ხომ იმ მაღალი სტილით წერდნენ, რომელიც ანტონმა მწერლობის ენად გამოაცხადა. მან, დიდმა სწავლულმა, მიზნად დაისახა XVIII საუკუნის ნახევრისათვის სპარსულისაგან შერყვნილი ენა თავანკარა, ძველი ქართულით გამოეცოცხლებინა. ამ ენის უარყოფამ კი გზა გაუხსნა კუთხურ დიალექტებზე წერას, რადგან ხალხი სწორედ დიალექტებზე მეტყველებდა. მართალია, ილია შორსმჭვრეტელურად ხედავდა მომავალში იმ ენის ჩამოყალიბებას, რომელიც დღეს გვაქვს, მაგრამ იმ ეტაპზე, მძიმე სურათი შეიქმნა. სწორედ ამ არევ-დარეულობას გულისხმობდა გრიგოლ ორბელიანიც, როდესაც შვილებს ენის წახდენას საყვედურობდა:

**„აღჩნდნენ მწერლები,
ჟურნალისტები,
ვაი საბრალოს... ვაი ჩვენს ენას!..
მათ უსწავლელთა,
ცრუ რუსთაველთა,
სრულ წგვიბილწეს ენა მდიდარი,
ენა მაღალი, მის ძალი, მადლი,
უნყალოდ ნახდა უწმინდურთ ხელში!..
ერის ცხოვრება,
მისი დიდება
მის ისტორია დაცულ არს ენით;
რა ენა წახდეს,
ერიც დაეცეს...
წაეცხოს ჩირქი ტაძარსა წმინდას!..“**

იმევე სასკოლო სახელმძღვანელოში სწერია: გრ. ორბელიანი ცდებოდა, როცა შვილებს ენის წახდენას საყვედურობდაო. არა. ორბელიანი არ ცდებოდა. გაბრაზებულმა მიახალა ის სათქმელი, რასაც რეალური ვითარება ჰკარნახობდა. შორს გამიზნულად კი თვით გრ. ორბელიანიც კარგად გრძნობდა „შვილების“ სიმართლეს. ამიტომ იყო თავიდანვე რომ არ ჩასდგომია „მამებს“ სათავეში და მათ წინააღმდეგ „შვილებს“ ხელსაც კი უწყობდა. ილიასეული გზის სისწორეს კარგად გრძნობდა ვაჟაფშაველაც. ის სალიტერატურო ქართულის უცოდინრობით კი არა, სრულიად შეგნებულად, იმ დიდი მიზნისათვის ხელის შეწყობის სურვილით აკეთებდა იმას, რასაც საყვედურობდნენ. პ. მირიანაშვილის საპასუხოდ „ივერიაში“ გამოქვეყნებულ „მცირე შენიშვნებში“ ვაჟა წერდა: „ბა-ნს მირიანაშვილს ეპატიებოდა სხვების გაფრთხილება ქართული ენის „გარყვანა-გახორკლიანების“ გამო, რომ თვითონ მცოდნე იყოს ენისა... ნაკლულევა-ნებად იმისი მიჩნევა, რაც გამოსადეგია, ცოდვა უნდა იყოს. ვინ არის ისეთი გაუგებარი, რომ საერთო სალიტერატურო ენის საჭიროება არ ესმოდეს, მწერლობდეს კი და ენის გაუკეთესებასა და „განმენდაზედ“ არ ჰფიქრობდეს?! ახლანდელი სალიტერატურო ენა ახალია და სიახლის გამო ბევრს ფორმებს, ბევრს სიტყვებს მოკლებული არის. ყველა ეს ფორმები და სიტყვები ხალხშია დამარხული, ხალხი, ერი დედა ენისა. იგი ჰბადებს და ზრდის ენას, როგორც დედა შვილს. ყოველი ეთნოგრაფი და საერო მწერალი მოვალეა ყველა საყურადღებო ხალხური სიტყვა, ან ფორმა გააცნოს ლიტერატურულ ენას, თუ იგი სიტყვა და ფორმა შეეფერება ენის ხასიათს, იმის ბუნებას. თუ ენა იშვილებს იმ ფორმას, იმ სიტყვას, ხომ კარგი, თუ არა და, არც არაფერი იმით წახდება...“

ფშავლებს უფრო მეტი საშუალება ჰქონიათ ქართული ენა დაეცვათ წმინდად, შეუბღალავად... ფშაურის საუბრის კილო და გრამატიკული ფორმები, როგორც ნამდვილი ძველი ქართული, სრულიად გვანან ძველის მწერლების ნაწერებისას...

ხმარება იმგვარის სიტყვებისა, რომელნიც არ იხმარებიან ბარად, ან ლიტერატურაში და, ვსთქვათ, მოიპოვება ფშავში, ნუთუ „გახორკლიანება“ იქნება ენისა? „ივერიაში“, მაგალითად, ერთხელ შევხვდი რუსულ სიტყვას, ქართულად ხმარებულს,

ქართულის კარგად მცოდნესაგან. ეს სიტყვა გახლავთ „სმაროდინა“, რომელსაც ფშავლები „მოცხარს“ ანუ „ხუნს“ ეძახიან. ქართველმა ეს სიტყვა იხმარა რუსულად იმიტომ, რომ ბარად თვით საგანი არ არსებობს და შეიძლება იმის სახელიც არ არსებობდეს. რამდენი სხვა სიტყვა მოიპოვება ქართული ფშავში, რომ ბარელმა ქართველმა არ იცის”. (15, 62).

ვაჟა ამ წერილში და კიდევ სხვა წერილებშიც ენის საკითხებზე მსჯელობს ღრმად მოაზროვნე ენათმეცნიერის გაქანებითა და დაკვირვებით.

მსოფლიო მასშტაბის, ბუმბერაზი ენათმეცნიერი ნიკო მარი, ვინც ვაჟა-ფშაველას „ვეფხისტყაოსნის“ ორიგინალურობის საკითხთან დაკავშირებით (იხ. მისი „ფიქრები“ „ვეფხისტყაოსნის“ შესახებ“) კარგა გვარიანად შემოელანძღა, ვაჟას ენას და თვით ვაჟას შემოქმედებას უმაღლეს შეფასებას აძლევდა. ასე იქცევიან მოაზროვნე და დიდბუნებოვანი ადამიანები. (პროფ. იოსებ მეგრელიძის სტატიიდან „ნიკო მარი ვაჟა-ფშაველას შესახებ“, წიგნი „ვაჟა-ფშაველას დაბადებიდან ასი წლისთავისადმი მიძღვნილი კრებული, 1861-1961“): „ვაჟას ენა ცალკე კურსად უნდა იკითხებოდეს, ქართული მეტყველების კულტურის ინსტიტუტი რომ არსებობდეს. რუსთველის, საბა ორბელიანისა და ილია ჭავჭავაძის შემდეგ ვაჟას ყველა სხვა ქართველ მწერალზე უფრო მახვილი ენობრივი ალლო აქვს...

...ვაჟას პროზის ენა მისი შინაგანი დიდი ენობრივი კულტურისა და ინტუიციის მაჩვენებელია. მას გააზრებული აქვს ყოველი ნაწილაკი, სიტყვა, ფრაზა. მის ნაწერებში არც ერთი ბგერა არაა შემთხვევითი, იგი შემთხვევით არ სარგებლობს არც ერთი სიტყვით...

...იგი ენაშიც არ არის კონკრეტულად ფშაური კილოს განმეორებელი, აქაც შემოქმედი...

...ამ პოეტს თუნდაც მხოლოდ პოემა „გველის მჭამელი“ რომ დაეწერა და მეტი არაფერი, მაინც პირველხარისხოვან პოეტთა შორის მოექცეოდა მსოფლიო ლიტერატურის ისტორიაში“.

ყოველივე ამის შემდეგ, თუ ჩვენ ჩავუკვირდებით ვაჟას პოეზიას, აღმოვაჩინთ, რომ მის ლექსებსა თუ პოემებში არაფერია უცხო და მიუღებელი სალიტერატურო ქართულისათვის, ქართული ენის ღრმად მცოდნეთათვის. ჩვენმა მეცნიერებმა – აკა-

კი შანიძემ, შოთა ძიძიგურმა, ალექსანდრე ლლონტმა და სხვებმა – ვაჟას ენის შესწავლისას ნათელჰყვეს მეტად საინტერესო ფაქტი: ვაჟას ქართული ფშაური დიალექტი კი არა, ძველი ქართული სალიტერატურო ენა ყოფილა. ამიტომ შეცდომა და გაუგებრობა იყო მისთვის კუთხურობისა და პროვინციალიზმის იარლიყის მინებება. ვაჟა აქ ფშაურის ეფექტს ქმნის რამდენიმე ფორმისა თუ სიტყვის ხმარებით.

ამასვე ნათელჰყოფს ორი დიდი ქართველის ნააზრევიც; გრ. რობაქიძე წერს: „1917 წელს პავლე ინგოროყვამ თქვა ერთხელ ჩემთან გასაუბრებისას: ფშავ-ხევსურული არქაული ქართულია და არა პროვინციალიზმიო. მე დავაზუსტებდი: ერთი ნაშთი ძველისძველი ქართულისა, მთებში შერჩენილი და დღემდე ცოცხალი. პროვინციალიზმი სიცილს თუ არა ჩაცინვას იწვევს. იწვევს ამას ფშავ-ხევსურული? კითხვაც კი შეურაცხყოფა იქნებოდა აქ. იტყვის იმერელი: „ნიმასქენი, ბოშო, პეტერეი!“ გესმით - გეცინებათ. აბა ათქმევინე ესევე ხევსურს: ჰქმენ საქმე იგი, იყოს ცოტაიც!“ გესმით – შუა გულში გხვდებათ. გაუგებრობას ამ საკითხში თვით აკაკიც წამოეგო. „ენას გინუნებ ფშაველოო“. ვაჟა პასუხს აძლევს მორიდებით, შაირითვე: „და ენა მთისა სიმტკიცით მსგავსია კლდისა სალისა“. ფშავ-ხევსურული მართლაც სალი კლდის ნაკვეთია ყველა თქმაში“. (38, 177).

ვაჟას უფრო ხშირად და უფრო გაცხარებით ისინი უკიჟინებდნენ ფშაურის გამო, ვინც თავადაც თავის დიალექტზე წერდა და სალიტერატურო და ძველი ქართული მაინცა და მაინც არც თუ კარგად იცოდნენ.

აკაკი წერეთელზე ეს არ ითქმის (თუმცა მასაც საკმარისადა აქვს „იმერიზმები“. თუნდაც იმავე „ენას გინუნებ, ფშაველო“-ში). მან ძველი ქართული მწერლობაც კარგად იცოდა, ენაც, თავადაც ქართული სალიტერატურო ენის ერთ-ერთი ფუძემდებელი იყო, მაგრამ ვაჟას მაინც რატომღაც არა სწყალობდა. ჟურნალი „კვალი“, რომლის სარედაქციო კოლეგიის წევრიც აკაკი წერეთელი იყო, ვაჟას ლექსებს არ ბეჭდავდა, უწუნებდა. ეს კარგად ჩანს ამ ჟურნალის რედაქტორის ანასტასია წერეთლისადმი მიწერილი ბარათიდანაც.

1894 წ. 2 აპრ.

ქალბატონო ანასტასია!

14 მარტს მონერილი თქვენი ბარათი დღეს, ორს აპრილს მივიღე და პასუხსაც ეხლავე გწერთ. სამდღურავს მითვლით, არ ვიცი რად და რისთვის: „სხვას კაი მასალას აძლევთ და ჩვენ კი უხეიროსო. ახლად დაბრუნებულმა რედაქციის წევრმა აკაკიმ დაიწუნა თქვენი მასალაო“ და სხვ. და სხვ. მე თვითონ დიდად პატივის ვცემ აკაკის ნიჭსა და მოღვაწეობას, მაგრამ ისე კი არა, არც აკაკის, არც სხვას, რომ საკუთარი თავის პატივისცემაზე ხელი ავიღო, ან საკუთარს მსჯელობაზე, საკუთარს შეხედულებაზე ამა თუ იმ საგანზე. თქვენ კი ნურას უკაცრავად, ბატონო ჩემო, ამ სიმართლის თქმისათვის, სულ სხვაგვარად მოგსვლიათ საქმე. რაც მე მასალა წარმოგიდგინეთ, თქვენ ხომ მიიღეთ ეს მასალა და კიდევაც უნდა დაგებეჭდათ თუ საკუთარს თავს და საკუთარ აზრს რაიმე ფასს სდებთ. ერთიც ვნახოთ, ხვალ აკაკიმ ამ „რედაქციის წევრობას“ თავი დაანებოს, მერე მე და თქვენ რაღა გვეშველება? ხომ უნდა ვირბინოთ კარი-კარ და სხვა დამფასებლები ვეძიოთ ამ ლიტერატურული მასალისა. მაშ რედაქტორობა რადღა გაუჩენია ღმერთსა?.. ეს კი არა, იცით საქმე რაშია? ერთი კარგი ქართული ანდაზა მაგონდება. აი, ეს ანდაზა: „იმ მთამ დამაზრო ფეხები, რომელსაც არ მოველოდიო“.

მე მენადა კარგი განწყობილება მქონოდა თქვენს რედაქციასთან, მეშრომა ისე, როგორც ვშრომობდი „ივერია“-ში და, ვხედავ, რომ თქვენთვის უცხო ვყოფილვარ, დიად, უცხო და გამოუსადეგარი. თქვენ გიფიქრიათ, ვაჟა-ფშაველამ „ივერიას“ თავი დაანება და ეხლა ჩვენს ხელთ არის, როგორც გვინდა, ისე ვათამაშებთო. უკაცრავად! მე სათამაშო ბურთი არ გახლავართ... თუ ჩემი პატივისცემა გაქვთ, ცოტაოდენი მაინც, ეგ მასალა, სუსტიც რომ იყოს, უნდა დამიბეჭდოთ. რადაო? – რომ მკითხოთ, პასუხს არ მოგცემთ. მხოლოდ თქვენ თვითონ იფიქრეთ, რად უნდა დაიბეჭდოს, თუნდა „სუსტიც იყოს“. ნუთუ იმდენი არაფერი გამიკეთებია ქართულ მწერლობაში, რომ მსაჯულად ჩემის ნაწერებისა და მოპასუხედ მე თვითონ ვიყო?..

ამიტომ, ბატონო ჩემო, მე ეხლა ჩემს გულისპასუხსა გწერთ: მანამ მაგ „სუსტ მასალას“ არ დამიბეჭდავთ, მე თქვენ ველარაფერს მასალას მოგანვდით. ფული რაც მიმიღია, იმას ისევ მო-

გართმევთ. ხოლო გთხოვთ, ვინიცობა არ დაიბეჭდოს, თუ ჩემი ცოტაოდენი პატივისცემა მაინც გაქვსთ, მაგ „უვარგის მასალას“ ნუ დამიკარგავთ მაინც.

თქვენი უმორჩილესი ვაჟა-ფშაველა“.

ვაჟა ეთაყვანებოდა აკაკის, სამწერლო ასპარეზზე გამოსვლის პირველ ხანებში მისი გავლენითაც წერდა ლექსებს, აფასებდა როგორც საქართველოს დიდ მწერალს, უფროს თანამებრძოლს, სიყვარულითა და სითბოთი სავსე ლექსებიც მიუძღვნა. აკაკი კი ვაჟას დიდად არ აფასებდა. იმდროინდელი საზოგადოების მოწინავე წარმომადგენლებსაც ძალიან აწუხებდა ეს ამბავი, არამც თუ მარტო ვაჟა-ფშაველას.

აკაკიმ ვაჟას ასე ლანძღვა არ აკმარა და თავისი მისადმი დამოკიდებულება პრესის ფურცლებზეც გამოიტანა სწორედ ისეთ დროს, როცა ვაჟასთვის იუბილის გამართვაზე საზოგადოებრივი აზრი მომნიჭებული იყო. აკაკიმ 1913 წელს გაზეთ „თემში“ გამოაქვეყნა ლექსი:

„ვაჟა-ფშაველას!“

ენას გინუნებ, ფშაველო, მგოსანო მალალ მთისაო,
თუმც კი გვითესავ მარგალიტს!.. მკითხველიც იმას მკისაო!
ჯერ არ ვყოფილვარ ფშავეთში, მაგრამ კი ვიცნობ ცნობითა.
შენ დამიხატე ის მხარე ფშაურის ჭკუა-გრძნობითა.
და რაც არ გადმოგიცია მის მშვენიებაზე ენითა,
მე თვითონ მივხვდი ყოლიფერს, შენთანვე აღმაფრენითა.
ვიცი, რომ ფშავლის სოფელი წმინდაა, მალალ მთისაო,
ენა – მეტყველი სიმართლის, გულ-მკერდი – ფოლადისაო.
წინათ რომ ხმალი უჭრიდათ, სადღეისოდ სჭრის კალამი.
გადაეც ბარის მგოსნისგან მთიულებს ძმური სალამი“.

ვაჟას მტკივნეულად განუცდია „ენის დანუნება“. ეწყინა აკაკის ასეთი გამოლაშქრება განსაკუთრებით მისი იუბილისათვის მზადების პერიოდში. მართლაც, ჩაიშალა სამზადისი. ვაჟას დავით კლდიაშვილისათვის შეუჩრვილია: „ახირებული ადამიანია ეს

ჩვენი აკაკი! „ენას გინუნებ ფშაველო“. კაცო, მე ამ ჩემი ენით მომწონს თავი, თორემ სხვა რა არის ჩემს ლექსებში და პოემებში! თუ ენაც დასაწუნია, მაშ ალარაფერი ყოფილა და ბარემაც ასე სთქვი პირდაპირ და ის იქნება! უცნაური კბენა იცის ხოლმე!” თავის მეგობრებთან კი ამბობდა თურმე: „იმერელი მითხარი და ფშაველს ქართულს უწუნებდესო“

ჩანს, ვაჟა საერთოდაც ყოყმანობდა პასუხის გაცემაზე: ეკრძალებოდა საქართველოს უგვირგვინო მეფისთვის სიტყვის შებრუნება, შიშობდა მკრეხელობაში არ ჩამოერთვათ, უაზრო კინკლაობაში, რაც მოყვარეს გულს მოუკლავდა, მტერსა და დუშმანს კი გააღაღებდა, არადა უპასუხოდ დატოვება არ შეეძლო, დაუმსახურებელ ლანძღვას ვერ იტანდა. ბოლოს მაინც უპასუხა:

დაგვიანებული პასუხი აკაკის

„ენას გინუნებ, ფშაველო,
მგოსანო მაღალ მთისაო,
თუმც კი გვითესავ მარგალიტს,
მკითხველიც იმას მკისაო“.

ბევრი ვიფიქრე ძალიან, თუ რა პასუხი გამეცა შენთვის, მსცოვანო პოეტო; დღეცა ვფიქრობდი, ღამეცა. როს დავაპირე სიტყვის თქმა, უცებ თავზარი დამეცა: სიტყვა მოსული სათქმელად, ენიდან მომწყდა, გამექცა. დავლონებულვარ ძალიან, თითქოს სახლ-კარი დამექცა. რადა? რა ღმერთი გამინყრა მარგალიტების მფლობელსა, რომ თავის უშნო ენითა ვერას ვაგონებ მშობელსა?! ბუღბუღლისათვის გალობა დაუნუნია რომელსა? მარგალიტების მფლობელი ენასა ხმარობს ღონედა, და როცა მარგალიტს სთესავს, ან თუ ააგებს ყორედა, მაინც ის არი, რაც არი, ჭორები მოაშორეთა! იქნებ, მე, ჩემმა ენამა, სამშობლო დავალონეთა? ფრთები შევკვეცეთ ოცნებას, დავამხეთ, დავამონეთა? უვარგისობის მიზეზი ფშავლობა არის სწორედა. მოძღვნილი არი მთის მიერ, ჩამოტანილი ქარისა, რატომ არ ჰგუობს არ ვიცი ამ ჰანგს ბუნება ბარისა? აქაც ხომ ქართველები ვართ, ყვავილი აქაც ჰყვავისა,

ხატად ჰყავ, სალოცავ ხატად, მთიელთ სამშობლო თავისა. და ენა მთისა სიმტკიცით მსგავსია კლდისა სალისა, იქნებ, აკლია, არ ვიცი ამ ლომს სინაზე ქალისა? ამისთვის დასაგმობია და წასაღები წყალისა?! კაცი მეტყველი, მგრძობელი, ცხოვლად ამხელი თვალისა, ამგვარის ამბის მოწამე, შევდრკე, დავმუნჯდე ლამისა. მაინც წინ მივალ, მაინცა, არ მეშინიან შარისა, გულს მისვენია ხატადა ენა მთისა და ბარისა. მე არცერთ კილოს არ ვწუნობ, თუა ქართულის გვარისა. მოთაყვანე ვარ ყოვლისა იმათ ტკბილის და მწარისა. სხვა რამ მაშინებს, ისა ვსთქვათ, დამსშობი მზის და მთვარისა, სამშობლოს დამამსობელი და გამომჯრელი კარისა... სჯობს, რომ იმაზე ვიტიროთ, მუდამ მთქმელი ვარ ამისა. ნუ შეგაშინებთ არ გავნებთ მთიდან ყვირილი ხარისა“.

მთიდან მოწყვეტილ ზვავსა ჰგავს ეს ლექსი, არც ძალა აკლია და არც აზრი, მგრამ ჩანს, ვაჟამ მაინც ბოლომდე ვერა თქვა ყველაფერი, ბევრ რამეზე თავი შეიკავა, ბევრი სიტყვა ენიდან გაექცა ეს ენიდან მოწყვეტილი სიტყვები ნაწილობრივ მაინც თქვა შემდგომში უმისამართოდ დაწერილ ლექსში. მართალია, აქ იმდენად ზოგადად არის ყველაფერი ნათქვამი, რომ კაცმა შეიძლება ეს ლექსი ეროვნულ მოტივზე დაწერილად მიიჩნიოს, მაგრამ ძნელი ამოსაცნობი არ არის ვაჟასა და აკაკის შორის დამოკიდებულება. ამ ლექსიდან ჩანს, როგორ აწვალედა ვაჟას ეს გულსატკენი ურთიერთობა:

„მე შენი ტრფობით ვერ გავძედ, შენ – ჩემი სიძულვილითა. ვერ გიღალატებ მაინცა, თუნდ ხორცს ვიგლეჯდე კბილითა, გულ-დაკოდილი შენგანა მითც ღმერთს გახვეწებ სიტყვითა... თანაც დაგბრუნავ თავზედა ჩემის ჯვარცმულის ფიქრითა. შენ ამას არაფრად აგდებ, მოხვალ, ზედ მდგები წიხლითა... წვრილმანს, ჩანჩალა აზრებსა ვილაღავ აქეთ-იქითა: არ დამიშალონ მიმოსვლა ღმერთთან ამ გრძობის ხიდითა შენი ვარ დიდი ერთგული, ვერვინ შემხედავს იჭვითა. შენი ვარ, შენთვის მოვკვდები, თუნდ შხამს მასმევედე ჯიხვითა!“

ვაჟა მაშინვე მიხვდა—ენის დაწუნება საბაბი იყო თვით ვაჟას დაწუნებისა, თორემ აკაკი არა ხმარობდა იმერიზმებს? რამდენიც გნებავთ, მაგრამ აკაკისთვის არავის უკადრებია „ენას გინუნებთო“. ამავე საბაბით იფეთქა ვაჟას მიმართ გულში დიდი ხნის ნატარებმა ბოლშევიკმა 1951 წელს. ეს ფართომასშტაბიანი ბრძოლა წამოიწყო საქართველოს ცენტრალური კომიტეტის პირველმა მდივანმა კანდიდ ჩარკვიანმა თავისი საანგარიშო მოხსენებით 1951 წლის 10 იანვარს (გამოქვეყნდა გაზეთ „ლიტერატურა და ხელოვნების“ 14 იანვრის ნომერში). მოვიყვან მოკლე ამონარიდებს ამ საშინლად გრძელი საანგარიშო მოხსენებიდან, როგორებიც კომუნისტებს სჩვეოდათ. მათზე იყო ზედგამოჭრილი ხალხური ბრძნული ნათქვამი — „სიტყვა ბარაქეიანიო — საქმე ტალახიანიო.“ მაშ ასე:

„გასულ წელს ჩვენი პარტიის ცხოვრებაში, უმნიშვნელოვანესი მოვლენა იყო ენათმეცნიერების საკითხებზე ამხანაგ სტალინის ნაშრომის გამოქვეყნება“...

„ამხანაგ სტალინის შრომებმა ცხადყო ბევრი ნაკლი ჩვენი მუშაობისა მეცნიერების, ლიტერატურის, ხელოვნების საქმისადმი ხელმძღვანელობაში. ეს პირველ რიგში ეხება ქართული ლიტერატურული ენის განვითარებისა და სრულყოფის საკითხებს“...

„ახალი ქართული ენის დამკვიდრების დიდ ეროვნულ საქმეში გადამწყვეტი როლი შეასრულეს ჩვენი ლიტერატურის უდიდესმა მოღვაწეებმა და ქართველი ხალხის ეროვნულ-განმათავისუფლებელი მოძრაობის სულის ჩამდგმელებმა ილია ჭავჭავაძემ და აკაკი წერეთელმა“...

„სავსებით სწორად მოიქცა გაზეთი „კომუნისტი“, რომ გამოვიდა ქართული ლიტერატურული ენის დამახინჯებისა და არქაიზმებით დანაგვიანების წინააღმდეგ მწერალ კ. გამსახურდიას მიერ, რომელიც თავგამოდებით ცდილობს აიძულოს საბჭოთა ადამიანები ილაპარაკონ შუასაუკუნეობრიობის, თანაც დასავლეთევროპული ბარბარიზმებით შეზავებული ენით“...

„გ. ლეონიძე უმღერის ჩვენს ბედნიერ ყოფას, ამხანაგ სტალინს და მით უფო სამწუხაროა, რომ ამხ. ლეონიძე ზოგჯერ დაუდევრად ეპყრობა ქართული ენის სინმინდეს... ამხ. ლეონიძის ზოგიერთ ნაწარმოებში ხშირად შევხვდებით ავტორის

მიერ გამოგონილ ზედმეტ კომპოზიტებსა და ახალ სიტყვებს. მაგალითად, მას პოეზიაში შემოაქვს ახალი სიტყვა „ცხენმხედარი“ (სიცილი)“... (ეს კომპოზიტი „ცხენ-მხედარი“ ხევესურულიდან აქვს აღებული ლეონიძეს და არა მოგონილი — გ.ხ.).

„სავსებით კარგი მდგომარეობა ვერა გვაქვს წარსულის ზოგიერთი დიდი მწერლის შემოქმედებითი მემკვიდრეობის კრიტიკული ათვისების საქმეშიც...“

„ვაჟა-ფშაველას შემოქმედებისადმი მიძღვნილი მთელი ვრცელი ლიტერატურა თავიდან ბოლომდე გამსჭვალულია პოეტის ლიტერატურული მემკვიდრეობის ყველა მხარისათვის ხოტბის შესხმით. ამავე დროს ვაჟა-ფშაველას შემოქმედებისადმი ასეთი არაკრიტიკული მიდგომის საფუძველი არ არის“...

„ვაჟა-ფშაველა განცალკევებით დგას მის უფროს თანამედროვეთა, პროგრესულ მწერალთა და საზოგადო მოღვაწეთა — ილია ჭავჭავაძის, აკაკი წერეთლის და სხვათა პლეადაში. იგი დაჯილდოებული იყო დიდი პოეტური ნიჭით და საკმაო განათლებაც ჰქონდა, მაგრამ მაინც ვერ შესძლო ამადლებულიყო თავისი დროის ამოცანების გაგებად. ვაჟა-ფშაველა ფშავის ვინრო ხეობაში ჩაიკეტა და შეგნებულად შეზღუდა თავისი თემატიკა მთიელ ქართველთა და მეზობელ მთიელ ტომთა სისხლისმღვრელი ომებითა და მითოლოგიური სიუჟეტებით. იგი სიყვარულით აგვიწერს მთიელებში გვაროვნული წყობის ნაშთებს“...

„ვაჟა-ფშაველას არასწორი პოზიცია ეკავა ლიტერატურული ენის საკითხში. იგი ცდილობდა პოეტურ მეტყველებად დაემკვიდრებინა ქართული ენის ფშაური კილო, რომელსაც ლიტერატურული განვითარება არ შეხებია და რომელიც თანამედროვეობას მრავალი საუკუნით ჩამორჩა. ეს ეწინააღმდეგებოდა საერთო ქართული ლიტერატურული ენის დამკვიდრებას, და ქართული კულტურის მონინავე მოღვაწეებს არაერთხელ გამოუთქვამთ პოეტის წინაშე თავიანთი უარყოფითი დამოკიდებულება მის ნაწარმოებთა ენისადმი“...

„ვაჟა-ფშაველა ყოველ პროვინციულ კილოს ანიჭებდა ლიტერატურული ენის უფლებას, ე. ი. არსებითად გამოდის იმის წინააღმდეგ, რომ შეიქმნას, ერთიანი ქართული ენა, ურომლისოდაც ვერ განვითარდება ხალხის ეკონომიკა და კულტურა...“

„სამაგიეროდ საბჭოთა ლიტერატურათმცოდნენი, თუმცა ეს მეტად უცნაურია, მის მხარეზე დგანან და ბრალი დასდეს აკაკი წერეთელს უსამართლო დამოკიდებულებაში ვაჟა-ფშაველას ენისადმი. ასე იქცევიან, მაგალითად, კომუნისტი კრიტიკოსები ამხ. რადიანი და ამხ. ჭეიშვილი“...

„ერთი უნდა ვკითხოთ ამხ. ჭეიშვილს: თუ ვაჟა-ფშაველას ენა ყველასათვის ასე კარგად გასაგებია, რატომღაა რომ საჭირო ხდება მის თხზულებათა ყველა ტომს დაერთოს ამ თხზულებებში ხმარებული ფშავური და ხევსურული სიტყვებისა და გამოთქმების ასახსნელი ვრცელი ლექსიკონი!“

პარტიის ხელმძღვანელის საპროგრამო გამოსვლას ყოველთვის მოჰყვებოდა ხოლმე საზოგადოების აღფრთოვანებული გამომხატურება“. ამ შემთხვევაში კი განსაკუთრებით მწერლები და ენათმეცნიერები უნდა აღფრთოვანებულიყვნენ „პარტიის ბრძნული პოლიტიკით“ და, რა თქმა უნდა, მათაც არ დააყოვნეს. საკუთარი ტყავის გადარჩენის ფასად დაინყეს ჩარკვიანის ქება და ვაჟა-ფშაველას ლანძღვა. აქედან ძალზე საძაგლად მოჩანს ეს ყოველივე, მაგრამ ძნელია გაამტყუნო მაუზრიანი ბოლშევიკის წინაშე შიშისაგან აცახცახებული „ინტელიგენტები“.

სიმონ ჩიქოვანი: „რა თქმა უნდა, ვაჟა-ფშაველას ამ მცდარ ენობრივ პოზიციას პირდაპირი კავშირი აქვს მისი საერთო მსოფლმხედველობის მთელ რიგ შეზღუდულობასა და ჩამორჩენილობასთან; როგორც ამხანაგმა კ. ჩარკვიანმა აღნიშნა, ვაჟა-ფშაველა ვერ ამალღდა იმ დიდი სოციალური მოვლენების აზრის გაგებად, რომლებიც მის დროს ბობოქრობდნენ საქართველოში“...

შალვა რადიანი: „ვაჟა-ფშაველამ გადაუხვია ი. ჭავჭავაძის სწორ გზას, გვერდი აუარა ენის სახალხო-ეროვნულ საფუძველს, უარყო განსხვავება საერთო ენასა და დიალექტს შორის. ჩვენი მკვლევრები, კერძოდ მე, ერთგვარ შემწყნარებლობას ვიჩენდი ვაჟა-ფშაველას ამ შემცდარი პოზიციისადმი. სავსებით მართებულია ამხანაგ. გ. ჩარკვიანის მითითება“...

ალ. ჭეიშვილი: „...ჩვენი კრიტიკოსებისა და ლიტერატურათმცოდნეების, კერძოდ ჩემი შეცდომაა ის, რომ ვერ შევამჩნიეთ ვაჟა-ფშაველას შემოქმედების სუსტი მხარე, რომელიც გამომდინარეობს იქიდან, რომ იგი აცდა რუსული პროგრესული

მხატვრული აზროვნების ზეგავლენას და თავისი შემოქმედება პატრიარქალური თემის ნიადაგზე წარმოშობილი კონცეფციით შემოიფარგლა. ვაჟა-ფშაველას სოციალური ბაზისი ბევრად უფრო ვიწროა, ვიდრე მისი დროის ქართველი ხალხის საზოგადოებრივი ცხოვრება იყო. ცხადია ამით აიხსნება ვაჟა-ფშაველას ენობრივი პარტიკულარიზმი და ჩამორჩენილობა“...

პროკლე კეკელიძე: „აკაკი წერეთელმა ადრევე აუღო ალლო ლიტერატურული ენისადმი რაზიკაშვილებისა და, კერძოდ, ვაჟა-ფშაველას მიერ დაკავებულ არასწორ პოზიციას და სასტიკად გაილაშქრა მათ წინააღმდეგ. 1898 წელს სათავადაზნაურო სკოლებისა, სასულიერო და საოსტატო სასწავლებლებისა, სემინარიებისა და საეპარქიო საქალაქო სკოლებისათვის გამოიცა სახელმძღვანელო წიგნი „სიტყვიერების თეორია“ ლიტერატურული ნიმუშების დართვით, შედგენილი კირიონისა და გრ. ყიფშიძის მიერ. ამ სახელმძღვანელოს მეორე ნაწილში 520 გვერდის მოცულობით წარმოდგენილი იყო ლიტერატურული ნიმუშები და მათ შორის ვაჟა-ფშაველას, ბაჩანას და თედო რაზიკაშვილის თხზულებები. აკაკი წერეთელმა აღნიშნული სახელმძღვანელოს შესახებ თავის ჟურნალში მოათავსა „ბიბლიოგრაფიული შენიშვნები“. ამ რეცენზიაში პოეტმა ძირითადად დადებითი შეფასება მისცა სახელმძღვანელოს, მაგრამ დაიწუნა შიგ ჩართული ზოგიერთი ლიტერატურული ნიმუში და ყურადღება განსაკუთრებით გაამახვილა რაზიკაშვილების შემოქმედებიდან აღებულ მასალაზე. აკაკი ამის გამო წერდა: „...დიდი შეცდომაა განურჩევლად რაზიკაშვილების ნაწერების სანიმუშოდ შემოტანა სახელმძღვანელოში... სანყენი ის არის, რომ განგებ ამახინჯებენ თვითვე მათ ნაწარმოებს ქართულის გადაჯარჯვ-გადმოჯარჯვით და შიგ და შიგ ისეთ რამეებს ახორციელებენ, რომ მშვენიერებას საუნმინდუროდ ჰდაღავენ!“

შოთა ძიძიგური: „...ამხ. კ. ჩარკვიანმა თავის მოხსენებაში სამართლიანად გააკრიტიკა ქართული კლასიკური მწერლობის დიდი წარმომადგენელი ვაჟა-ფშაველა, რომელიც არ გაჰყვა სალიტერატურო ქართულის მაგისტრალურ ხაზს და რომელსაც არასწორი პოზიცია ეჭირა ლიტერატურული ენის საკითხში.

ფშაური კილო, რომელიც საფუძველია ვაჟას პოეტური ენისა, ერთ-ერთი წევრია ე.წ. „მთის კილოებისა“ — ხევსურულთან,

მოხეურთან, თუშურთან და მთიულურთან ერთად. ამ ჯგუფს ქართული კილოებისას დიდი მნიშვნელობა ენიჭება ენათმეცნიერების თვალსაზრისით... მაგრამ ერთია ინტერესი კილოსადმი დიალექტოლოგიის თვალსაზრისით და მეორე ამ კილოს ღირებულება სალიტერატურო ენაში მისი გამოყენების თვალსაზრისით.

ქართული პოეტური ენის საფუძვლად არ შეიძლება გამოყენებული იქნას ფშაური დიალექტი, რადგანაც, როგორც მართებულად აღნიშნა ამხ. კ. ჩარკვიანი, მას ლიტერატურული განვითარება არ შეეხება და მრავალი საუკუნით ჩამორჩა თანამედროვეობას...

უნდა ითქვას, რომ ვაჟა-ფშაველას ენობრივი პარტიკულარიზმი შინაგან კავშირშია მისსავე მსოფლმხედველობრივ პარტიკულარიზმთან. მწერლის პოეტური სამყაროს, ლიტერატურული თემატიკის მასშტაბი თავის შესატყვისს პოულობს კუთხური მეტყველების სამოსელში. ეს დაკავშირება ლოგიკური და ბუნებრივია ვაჟასათვის, ხოლო მიუღებელი და საზიანოა, საერთო ეროვნული ენის ინტერესების თვალსაზრისით“...

ვინც საბჭოთა სისტემას კარგად იცნობს, მან იცის, რომ ცეკას პირველი მდივანი თავისით ვერაფრის თქმას ვერ გაბედავდა. ერთი თავი იყო კრემლში და ეს იყო ყოველგვარ აზრთამწყრობელი, აზრთა ჩამომრიგებელი. და სულ მალე, როცა აღარც კანდიდ ჩარკვიანი სადმე იყო და აღარც კრემლის მბრძანებელი, ვაჟა-ფშაველა კვლავ აღსდგა თავის უფლებებში, განსაკუთრებით 1957 წელს გრიგოლ კიკნაძის შესანიშნავი წიგნის „ვაჟა-ფშაველას შემოქმედების“ გამოსვლისა და 1961 წელს ვაჟას იუბილის მსოფლიო მასშტაბით აღნიშვნის შემდეგ.

1980-90-იან წლებში ეროვნული ბრძოლის აღმავლობის ხანაში გახდა შესაძლებელი გამოაშკარავებულიყო კომუნისტების მიერ ჩადენილ ბოროტებათა ნაწილი მაინც.

1989 წლის 3 თებერვალს „ლიტერატურულ საქართველოში“ გამოქვეყნდა კანდიდ ჩარკვიანის „საჭირო განმარტება“ კიმი ალიაშვილის წერილის („ვიცი რა მოხდა გუშინ, ვიცი რა გვინდა ხვალ?!“) პასუხად.

კიმი წერდა: „მერე იყო და საქართველოს ცენტრალური კომიტეტის მდივანმა ძირიანად მოთხარა ილია ჭავჭავაძე და

ვაჟა-ფშაველა, სასკოლო პროგრამებიდანაც ამოიღეს როგორც უღირსი მწერლები, ჩვენ კი მას პროფესორობა მივანიჭეთ“.

კანდიდის პასუხიდან: „მაინც რატომ და რის საფუძველზე გავაკრიტიკე დიდი პოეტის შემოქმედება ამ 38 წლის წინ? დასმულ კითხვაზე პასუხის გასაცემად მკითხველს ვთავაზობ ნაწყვეტს ჩემი მოგონების მეორე წიგნიდან, რომელიც გამოსაცემად მზადდება“...

„1950 წლის ოქტომბერში სტალინთან, ცივწყაროზე, ლაპარაკი ჩამოვარდა ქართული ლიტერატურის შესახებ: შევეხეთ ვაჟა-ფშაველასაც, რომლის პოეზიაც მე ძალიან მაღლად შევაფასე. სტალინს თავისი აზრი ვაჟაზე მაშინ არ გამოუთქვამს. მან მხოლოდ ის მთხოვა, რომ მისთვის ვაჟა-ფშაველას თხზულებანი გამეგზავნა. (რატომ არ ჰქონდა ვაჟა-ფშაველას წიგნები, როცა სხვა ყველა ჰქონდა? ხომ არ იყო ეს გულში ჩარჩენილი ბოლშის ბრალი? — გ.ხ.). სამი დღის შემდეგ ვაჟას ოთხი თუ ხუთი ტომი სტალინის მაგიდაზე იდო. გავიდა თითქმის თვენახევარი და 1950 წლის 30 ნოემბერს, გვიან ღამით ი. სტალინმა გაგრიდან დამირეკა. შედგა საკმაოდ გრძელი საუბარი ვაჟას პოეზიისა და მსოფლმხედველობის შესახებ. დილით საუბრის შინაარსი ჩავინერე მთელი შესაძლებელი სიზუსტით. აუთენტიკურობისათვის მიმყავს მისი ტექსტი ორიგინალის ენაზე. (რუსულად, მე ქართულად ვთარგმნე — გ.ხ.):

ი.ბ. სტალინი: მივიღე ვაჟა-ფშაველას წიგნები, წავიკითხე და ამ დღეებში დაგიბრუნებთ. გული უნდა დაგწყვიტოთ. თქვენ ამბობდით, რომ ვაჟა-ფშაველა გენიოსია. ის მართლაც დიდი ტალანტია, მაგრამ მსოფლმხედველობრივად ძალზე ჩამორჩენილი. ერთ დიდ პრობლემასაც კი ვერ აყენებს. ფშავისა და ხევსურეთის ჩამორჩენილ რაიონებში ჩაიკეტა და ხევსურებს, ფშავლებსა და ქისტებს შორის შუღლისა და კინკლაობის მეტს ვერაფერს ხედავს და აღწერს. ვერ ამჩნევს საქართველოს კულტურულ-ეკონომიურ განვითარებას. ეს საკითხები ვერ იმსახურებენ მის ყურადღებას.

ვაჟა-ფშაველას ენა პროვინციულია, ძველი, გაუგებარი. ნიშანდობლივია, რომ მის თითოეულ ტომს ერთვის ვრცელი ლექსიკონი. სხვაგვარად მკითხველი ვერ გაიგებს მის ნაწარ-

მოებებს. აკაკი წერეთელი, რა თქმა უნდა, მართალი იყო, როცა ჩამორჩენილი ენის გამო გააკიცხა:

**„ენას გინუნებ, ფშაველო,
მგოსანო მალალ მთისაო,
თუმც კი გვითესავ მარგალიტს,
მკითხველიც იმას მკისაო!“**

აკაკი წერეთელმა და ილია ჭავჭავაძემ შექმნეს ერთიანი სალიტერატურო ენა, ხოლო ვაჟა-ფშაველა ყოველგვარ პროვინციალიზმს სალიტერატურო ენის უფლებას ანიჭებს. მისთვის სულერთია როგორ ენაზე იწერება პოეტური თხზულება. ამაშია ვაჟა-ფშაველას ჩამორჩენილობის უბედურება.

მე მაოცებს გერონტი ქიქოძის შესავალი. მარქსისტია ეგ თუ არ არის მარქსისტი? სწორ შეფასებას არ აძლევს ვაჟა-ფშაველას იდეოლოგიას. აკაკი წერეთელსა და ვაჟა-ფშაველას შორის ენის საკითხთან დაკავშირებულ კამათშიც კი, ვაჟა-ფშაველას მხარეს დგება, როცა აკაკი წერეთელია მართალი. ვაჟა-ფშაველას ენასა და იდეოლოგიასთან ასეთმა დამოკიდებულებამ შეიძლება ცუდი გავლენა იქონიოს ახალგაზრდობაზე.

აქ ვაჟა-ფშაველასთან ხდება დაახლოებით იგივე, რაც გამსახურდიასთან, მხოლოდ იმ განსხვავებით, რომ გამსახურდია ცდილობს შექმნას არქაული, მაგრამ ერთიანი ენა საქართველოსთვის, მაშინ როცა ვაჟა-ფშაველა მხარს უჭერს ჩამორჩენილ, პროვინციულ კილოკავთა თანასწორუფლებიანობას.

ჩარკვიანი: ამხანაგო სტალინ, ვაჟა-ფშაველას პროზაულ თხზულებათა ენა ხომ სუფთა სალიტერატუროა.

ე.ბ. სტალინი: პროზაშიც აქვს ბევრი არქაული სიტყვა და გამოთქმა, ამასთან ვაჟა-ფშაველა პროზაიკოსი კი არა, უპირველეს ყოვლისა პოეტია. თუმცა მისი ლექსები და პოემები არ შეიძლება დავაყენოთ „განდეგილის“, „აჩრდილის“, „ბაში-აჩუკისა“ და აკაკისა და ილიას სხვა ნაწარმოებების გვერდით. ილია ჭავჭავაძე და აკაკი წერეთელი ვაჟა-ფშაველაზე მალლა დგანან. ისინი თავის შემოქმედებაში აყენებდნენ თავისი დროის დიდ პრბლემებს, მაშინ როცა ვაჟა-ფშაველა მათ საერთოდ არ შეხებია“.

ჩანანერი იმავე დღეს ბიუროს სხდომაზე გავიტანე. მათზე ამ ამბავმა თავისი მოულოდნელობით საკმაოდ მძიმედ იმოქმედა. სხვათაშორის, გამოითქვა არც თუ უსაფუძვლო აზრი იმის შესახებ, რომ ვაჟას ენის კუთხურობისათვის ხაზგასმაში ბრალი მიუძღვით ლიტერატურათმცოდნეებსა და რედაქტორებს. ისინი ვაჟა-ფშაველას თხზულებათა ყოველ ტომს მართლაც ურთავენ ვრცელ ლექსიკონს, თუმცა იქ შეტანილი სიტყვების დიდი უმრავლესობა ქართველი კაცისათვის, არავითარ განმარტებას არ მოითხოვს.

ი. სტალინი სიტყვას ბანზე არასოდეს არ აგდებდა, პირდაპირ დავალებასაც ყოველთვის არ იძლეოდა — ასეთი იყო მისი ხასიათის ერთ-ერთი ნიშანი. შემდგარი მსჯელობიდან დასკვნა თვითონ უნდა გამოგეტანა და საჭირო ღონისძიება გაგეტარებინა. ხანგრძლივი გამოცდილებით ვიცოდი, რომ, თუ ამას არ გააკეთებდი, უხერხულ მდგომარეობაში ჩავარდებოდი. ადრე თუ გვიან სტალინი გკითხავდა — ამა და ამ საკითხზე რომ ვილაპარაკეთ, რა ზომები მიიღეთ?

ვაჟა-ფშაველას შემოქმედებითი მემკვიდრეობის შეფასება აუცილებელი გახდა და რადგანაც ის სტალინისაგან მომდინარეობდა, საბჭოთა საზოგადოების სამსჯავროზე ცენტრალური კომიტეტის მეშვეობით უნდა ყოფილიყო გამოტანილი. ამგვარი კრიტიკოსის როლში გამოსვლა ჩემთვის სასიამოვნო არ იყო, მაგრამ მოვალეობას თავს ვერ ავარიდებდი.

გაგრიდან განმეორებითმა ზარმა დამარწმუნა, რომ ჩემი მოსაზრება სწორი იყო. ამჯერად სტალინს საქართველოს ოლქებად დაყოფისათვის მზადების მიმდინარეობა აინტერესებდა. როცა ამ საკითხს მოვრჩით, მან მკითხა:

— რა ქენით, ვაჟა-ფშაველას შეფასებას შეურიგდით?

— საერთოდ კი, ამხანაგო სტალინ, მაგრამ მისი ზოგიერთი მომენტი მაინც ძალიან მკაცრად მეჩვენება.

— ხომ გახსოვთ სიტყვები, რომლითაც მარქსი „გოთას პროგრამის კრიტიკას“ ამთავრებს? — „მე ვთქვი და ვიცხონე სული“, თქვენ კი როგორც გინდათ, ისე მოიქეცით, — ხმაში შესამჩნევი წყენით დაამთავრა სტალინი ჩემთან საუბარი ვაჟა-ფშაველას გამო. ამრიგად მე მეძლეოდა პირდაპირი დავალება

ვაჟა-ფშაველას შემოქმედების ზოგიერთი მხარის კრიტიკით გამოვსულიყავი.

1951 წლის იანვარში თბილისის XX საქალაქო პარტიული კონფერენცია უნდა შემდგარიყო. გადავწყვიტე საანგარიშო მოხსენებაში გამომეყო თავი „სამეცნიერო და შემოქმედებითი ორგანიზაციების მუშაობის ზოგიერთი საკითხი“ და იქვე ვაჟა-ფშაველას ლიტერატურული მემკვიდრეობის ზოგიერთი საკითხიც გამეშუქებინა. მოხსენებაში სტალინზე მითითება არ შემეძლო, რადგან ამის რწმუნება არა მქონდა. იყო მეორე მოსაზრებაც, რომელიც ასეთ მითითებას გამორიცხავდა. ქართულ საზოგადოებრიობაში ადრიდანვე დამკვიდრებულია უმართებული აზრი, რომლის მიხედვითაც დიდი მწერლის, დიდი მეცნიერის შემოქმედების ამა თუ იმ მხრის ოდნავი კრიტიკაც კი ლამის მთელი ერის შეურაცხყოფად განიხილება. და თუ ეს ასეა, როგორიღა უნდა ყოფილიყო მკითხველის რეაქცია ვაჟას შემოქმედების ამ მართლაცდა უსამართლო შეფასებაზე. მე არ შემეძლო ასეთი „შეურაცხყოფის“ როლში სტალინი გამომეყვანა, თუმცა კარგად ვიცოდი: ამის გამო მის მიმართ საყვედურის ხმამალა გამოთქმას ვერავინ გაბედავდა.

აი, რატომ ავიღე ჩემ თავზე ვაჟა-ფშაველას შემოქმედების მაშინდელი კრიტიკის ერთპიროვნული ავტორობა“.

ვაჟა-ფშაველას მიმართ დაუნდობელი ბოლშა არ ამოდიოდა ბოლშევიკები, იგივე სოციალ-დემოკრატების გულიდან, რაკილა ის თავის დროზე ეწინააღმდეგებოდა მათ კოსმოპოლიტიზმს, რაკილა ილია ჭავჭავაძის ეროვნულ პოზიციაზე იდგა სიკვდილამდე. როგორც მისი ძმები და სხვა ახლობელნი მაშინ უცილობლად ამტკიცებდნენ ამიტომ მოაკვლევინეს გამოსანერად გამზადებული ვაჟა ექიმებს. მერე შვილი დაუხვრიტეს, ძმა მოუკლეს.

ამას გარდა სტალინს ვაჟას მიმართ პირადი წყენაც ჰქონდა გულში. ეს ამბავი ჩანერილი, დაბეჭდილი მე პირადად არსად შემხვედრია, ზეპირად კი ხშირად მომისმენია, თვით ზვიად გამსახურდიასაგან, რომელმაც პირველ გამოცემასთან დაკავშირებით გამოთქმულ შენიშვნასთან ერთად, ამაზეც მითხრა, მეორე გამოცემაში აუცილებლად შეიტანეო. მეორე გამოცემა-

ში უკვე ჩემდაუნებურად გამომრჩა. ახლა, საოცრად განათლებულმა მკურნალმა, ხუტა პაჭკორიამ დამაძალა — აუცილებლად შეიტანეო. ეს ეპიზოდი კი ასეთია:

საყოველთაოდ ცნობილია, რომ „ივერიაში“ იოსებ(სოსო) ჯულაშვილს გამოუქვეყნა პირველი ლექსები სოსელოს ფსევდონიმით. ამ ლექსებმა, რომელთა შორის იყო „ვარდს გაეფურჩქნა კოკორი“, საერთო მონონება დაიმსახურა. ეტყოდა ილია, რა თქმა უნდა, ასეთი ლექსები კიდევაც მოგვიტანეო. სოსომ კი კომუნისტური იდეოლოგიით გადაძალაშებული ლექსები მიუტანა. ილიამ უარი უთხრა მათ დაბეჭდვაზე. სოსო დაემუქრა „ჩამორჩენილ ნაციონალისტს“ — ხვალ მოვალ და თუ დასაბეჭდად არ გექნება გაშვებული, შენი გაზეთიანად აგაფეთქებო. არ გაუჭირდებოდა, რადგან მოწინააღმდეგეებს, მითუმეტეს თავადებს, როგორც კლასობრივ მტრებს, დაუნდობლად უსწორდებოდნენ პროლეტარიატის დიქტატურისათვის მებრძოლნი.

მეორე დღეს, სანამ ეს მგზნებარე რევოლუციონერი გამოჩნდებოდა „ივერიის“ რედაქციაში, ვაჟა-ფშაველა მივიდა. ილიამ ცოტახნის საუბრის შემდეგ შესჩივლა:

— ეს რა ახალგაზრდობა მოდის, ვინ არიან, ეს კაშნე-გადაგებული რევოლუციონერი მოკვლით დამემუქრაო.

ვაჟამ დაამშვიდა: მე არ წავალ, მოვიდეს ერთი აქ და მე ვასწავლი ჭკუასო.

მოვიდა ისიც. როგორც კი ილიას უკმეხად მიმართა, ვაჟამ ჯერ ერთი-ორი შემოჰკრა, მერე დაითრია, ჰკრა წიხლი და კიბეზე დააგორა.

ისეთი გულბოროტი კაცი, როგორიც სტალინი იყო, იოლად ვერ მოინელებდა ასეთ შეურაცხყოფას. მოკლეს, ერთხანობას დაასამარეს კიდევ მისი შემოქმედება, მისი სახელი. საბჭოთა წყობილების დამყარების შემდეგ, მაგრამ არ აკმარეს. დროდადრო კვლავ ცოფი უვლიდათ.

ვაჟას „შეცდომების“ გასწორება

ვაჟა-ფშაველას ნაწერების გაგებაში სირთულეს ქმნიდა გამომცემელთაგან დაშვებული შეცდომებიც, კორექტურა. ისინი ხშირად თვითნებურად ცვლიდნენ ვაჟას ტექსტში ამა თუ იმ სიტყვას, ისე როგორც მათ მიაჩნდათ რომ უნდა ყოფილიყო. ეს, რა თქმა უნდა, ქართულის უცოდინრობით მოსდიოდათ. ვაჟა ამის გამო ხშირად ედავებოდა რედაქციებს, ზოგის გასწორებას კიდევ ახერხებდა, მაგრამ ბევრი კორექტურა დღემდე არ არის გასწორებული და გამოცემიდან გამოცემებში მეორდება.

სამწუხაროდ, ზოგმა ფშაველმა და ზოგმა ხდევსურმა თავისი „კომპეტენტურობით“ უარესად აურ-დაურია.

1915 წლის გაზაფხულზე გაზეთ „სახალხო ფურცელში“ ვაჟამ გამოაქვეყნა წერილი 1898 წელს გამოცემულ თავის თხზულებებში გაპარულ კორექტურის შესახებ:

ჩემი ნაწერები და კორექტურა
(წერილი რედაქციასთან)

რამდენჯერმე დავაპირე აღმენიშნა ჩემს ნაწერებში შეპარული კორექტურული შეცდომანი და ფეხი უკან დავდგი, ჯერ ერთი იმ მოსაზრების გამო, რომ მეტისმეტად ბევრი შეცდომაა, ამ მხრივ უფრო თვალსაჩინოა ჩემი „თხზულებანი“ და ერთი გაზეთი მთელი წლის განმავლობაში ამ შეცდომების ბეჭდვას ვერ აუვიდოდა და მეორეც, იმედი მქონდა, და მაქვს, მეორე ახალი გამოცემისა. მეორე გამოცემის კორექტურა უსათუოდ მე უნდა ვიკისრო, რათა ავიცდინო თავიდან და ჩემს ნაწერებსაც ავაცდინო ის გულის ასამღვრევი შეცდომანი, რისი მსგავსიც „სახალხო ფურცლის“ 285, ბ. ილ. ფერადის მიერ მოყვანილ ციტატაშია („ალუდა ქეთელაური“). ეს კორექტურული შეცდომები გარდა ამისა, თვით სურათს აფუჭებენ, აზრსაც კი ამახინჯებენ – მაგალითად, დაბეჭდილია:

მოკვდი, სიკვდილი გირჩევნავ,
რა ხარ სიცრუის მთქმელადა,
აიხსენ გველისპირული

დიაცთ გადუგდე ცრემლადა,
ფარი – ქსლის ჩასაბეჭავად
ხირიმ გაუდვან გორადა.
უნდა იყოს:

...
...

აიხსენ გველისპირული
დიაცთ გადუგდე ცხემლადა,
ფარი – ქსლის ჩასაბეჭავად
ხირიმ გაუდვან გარადა.

ამ საქმის გამფუჭებელი ორი სიტყვაა: ცრემლადა და გორადა. რა აზრია ამ სიტყვებში, რომ არ მესმის? არავითარი აზრი და არც პოეტური გამოხატულება ამ სიტყვებში არ მოიპოვება. სულ სხვაა ცხემლა (ცხემლადა) და გარა (გარადა)). ეს ორი ნივთი ქსლის იარაღია, მაშასადამე დიაცთ მიერ სახმარი ხის იარაღი შაღებისა და ფარდაგების ქსოვის დროს. ჩვენდა საუბედუროდ, როცა „ქსლის ბეჭვა“ (შოთას ნათქვამს „დიაცსა ქსლისა მბეჭველსა“ – ნუ დაივიწყებთ) მოვსპეთ, დავივიწყეთ, ნამეტნავად ბარად, თვით ქსლის საქსოვი იარაღების სახელებიც დაგვავიწყდა. კორექტორი ჩემი „თხზულებისა“ უსათუოდ ბარელი იქნებოდა, თორემ ასეთი შეცდომა არ მოუვიდოდა, რადგან ცხემლისა და გარის სახელი მთაში 5 წლის ბალღმაც კი იცის: ცხემლა ხმალს ძალიან ჰგავს, ბრტყელია, სამი თითის სიბრტყე, არშინზე ცოტა გრძელი, თავი და ბოლო ამოჭრილი აქვს ისე, რომ ენა აქვს ხისავე თანა, რათა ზედ ძაფი დაეხვიოს და ამ ცხემლის წყალობით ქსელში ძაფი გავიდეს ჩასაბეჭავად. გარაც რგვალი ხეა, სისქით ვერშოკი, ვერშოკნახევარი და სიგრძით ორი არშინი, რაზედაც ქსელისავე ძაფი ეხვევა რგვლად ქსელის მთელ სიგანეზე. მინდია (შეცდომა მოსდის ვაჟას. მინდია კი არა ახალ-უხლები ეუბნებიან – გ.ხ.) ამ სადიაცო ქსლის იარაღებს რომ აგონებს ალუდას, ამით დიდად შეურაცხყოფს: შენ დიაცი უნდა იყოო და არა ვაჟკაცი, ღირსი ხმლისა და თოფის ტარებისაო“.

ვაჟას მართლაც დაუნყია თავისი „თხზულების“ კორექტურული ჩასწორება, მაგრამ ველარ მოუსწრია, ავადმყოფობამა და სიკვდილმა აღარ აცალა. ეს ვაჟასეული ნასწორები „თხზულების“ ეგზემპლარი ყაზბეგის მხარეთმცოდნეობის მუზეუმში

ინახება, რომლისთვისაც ვაჟას ძმას ალ. რაზიკაშვილს შეუწინა-
რავს.

ვაჟას კრიტიკოსები

ვაჟა-ფშაველას შემოქმედების გაგებას ენობრივი ბარიერის გარდა კიდევ სხვა რალაცა უშლიდა ხელს, რაც შესანიშნავად ახსნა ქართული ლიტერატურის უნიჭიერესმა მკვლევარმა კიტა აბაშიძემ: „ვაჟა ნამდვილი მხატვარია, რომლის ნახატების შეყვარებას მიჩვევა უნდა და მეცადინეობით მოპყრობა. თვით ამ სტრიქონების დამწერი შედარებით გვიან შეეჩვია ვაჟას პოეზიას და შედარებით დაიგვიანა მისი შეყვარება და მე მგონია ჩემი ამხანაგები, უმეტესობა ამავე პირობებში იყო, რადგან ილია და აკაკი წარმოშობით იყვნენ არისტოკრატები და ნაწერებით დემოკრატები, ვაჟა წარმოშობით გლეხი იყო და ნაწერებით კი არისტოკრატი. ვაჟას პოეზიის შინაარსი და ფორმა წმინდა არისტოკრატულია იმ მხრით, რომ არა ყოველი მომაკვდავისათვის არის ადვილად გასაგები და შესაფასებელი“.

ვაჟას და ვაჟას გმირების ამ მაღალ არისტოკრატიზმს დღესაც ბევრი ვერ ხედავს; სამწუხაროდ, ვერ ხედავენ მხატვრებიც. ეს ჩანს ვაჟას ზედაპირული, გარეგნული ხედვიდან. მხატვარნი ვაჟას ხატვისას განსაკუთრებით ხაზს უსვამენ მის ფაფახს, ჩოხა-ახალუხს, ქალამან-პაჭიჭს, ნაბადს, მაგრამ შეუმჩნეველი რჩება სწორედ ის უმთავრესი – შინაგანი არისტოკრატიზმი.

ვაჟას შემოქმედება დღეს ათტომად არის გამოცემული. თვითონ ვაჟამ კი თავის სიცოცხლეში რედაქციებისა და მკითხველისაგან გულმოკლულმა ოთხი ტომისათვის ძლივს შეარჩია მასალა, მაგრამ იმისი გამომცემელიც ვერ მონახა, ახლოს არავინ გაიკარა. ერთად თავმოყრილი არ იყო მისი ნაწარმოებები და ამიტომ სრული შთაბეჭდილების შემუშავება მის შემოქმედებაზე ჭირდა. ესეც აძნელებდა ვაჟას სიდიდის აღქმას. ამიტომ იყო, რომ ვაჟას სიცოცხლეში მისი შემოქმედების შესახებ ბევრი არაფერი დაწერილა. 1896 წლამდე, როცა უკვე გამოქვეყნებული ჰქონდა თავისი საუკეთესო ნაწარმოებები („ალუდა ქეთელაური“, სტუმარ-მასპინძელი“, „ბახტრიონი“ და სხვანი), გარკვეუ-

ლი აზრი არაფერი გამოთქმულა, სპეციალური სტატია არავის მიუძღვნია. კანტიკუნტად თუ რაიმე ვინმეს უთქვამს ზოგად მიმოხილვებში, სხვებთან ერთად, თითო აბზაცში და იქაც ხშირად უარყოფითი ჭარბობდა. 1896 წელს ჟურნალ „კვალში“ ილია ნაკაშიძემ გაგრძელებებით დაბეჭდა „ვაჟა-ფშაველას პოეზია (კრიტიკული ცდა)“. აქ განხილულია ვაჟას ლექსებიც და პოემებიც. თითქოს ხოტბას ასხამს, ცაში აჰყავს, მაგრამ ბოლოს მაინც ხარკს უხდის დაკანონებულ საერთო აზრს, ერთეულების გარდა ყველა რომ გაიძახოდა: „ამიტომ მიგვაჩნია ჩვენ ვაჟა-ფშაველა მხოლოდ ხალხურ პოეტად და ვერ ვეთანხმებით ბ. გ. ყიფშიძის აზრს, რომელიც ვაჟას ნაწერებს სალიტერატურო შედეგებს უწოდებს. სალიტერატურო შედეგრი მაღალი სიტყვაა, ევროპული ცხოვრების ნაყოფი და ვაჟას პოეზიის დასასურათებლად არ გამოდგება. ვაჟას შემოქმედებას რომ მეტის სამართლიანობით მოვექცეთ, შეიძლება კიდევაც შედეგრი დავარქვათ, მაგრამ შედეგრი არა ევროპული, არამედ მხოლოდ ძველებური – ჩვენებური, ფშავ-ხევსურული“.

ამის შემდეგ ვაჟას სიცოცხლეში კიდევ დაინერა რამდენიმე წერილი, ზოგი ძალზე საყურადღებოც, მაგრამ ისეთი ვრცელი და სრულად მომცველი ვაჟას შემოქმედებისა, როგორც იპ. ვართაგავასი იყო, სხვა არა ყოფილა. ეს გამოკვლევა 1913-14 წლებში გაგრძელებებით იბეჭდებოდა.

ამ წერილის დაწერამდე რამდენიმე წლით ადრე ვაჟა-ფშაველასა და მაშინ მთლად ახალგაზრდა იპ. ვართაგავას გოგონა მოუნათლავთ „ივერიის“ თანამშრომელი ილო აგლაძისათვის. ეს ილო ვართაგავას სემინარიელი ამხანაგი ყოფილა. მას მთავრობის საწინააღმდეგო რალაც გაფიცვაში მიუღია მონაწილეობა, ამის გამო სემინარიიდან გაურიცხავთ და ილია ჭავჭავაძეს „ივერიაში“ მიუღია სამუშაოდ. იპოლიტე ილოს შეურჩევია ნათლიად, ხოლო ვაჟა – ილოს მეუღლეს, ოლღა ბეჟუაშვილს, ვაჟას პოეზიაზე შეყვარებულ კარგ ლიტერატორ ქალს.

ამ ნათლობის შემდეგ ხუთი წლის მანძილზე ვაჟა და იპოლიტე აღარ შეხვედრიან ერთმანეთს. ვაჟაზე დაწერილი ბევრი ტყუილ-მართალი, თვით ვაჟას ნაწერები, საფიქრალს უჩინდა იპოლიტეს და ბოლოს და ბოლოს გადაწყვიტა, ვაჟასთვის პატივი მიეგო, სამართლიანობა აღედგინა. იპ. ვართაგავამ, მარ-

თლაც, შესანიშნავად, საფუძვლიანად მიმოიხილა ვაჟას მთელი შემოქმედება. პირველად მან შეამჩნია ბევრი რამ ისეთი, რაც დღეს აღიარებული ჭეშმარიტებაა, მგრამ ბოლოს მანაც ვერ დაიზღვია თავი შენიშვნისაგან – ხალხურისაგან არ განსხვავდებაო. თავის მხრივ ისიც დაამატა, რომ „გველის-მჭამელი“ უაზრო პოემააო; და ისიც, რომ ქვეყნის მომავალზე არაფერს წერსო, მომავალი არა ჩანს მის შემოქმედებაშიო: „ვაჟა შედარებით ნაკლებს „მღერის“ ამ მომავალზე, ვინაიდან თვითონ ამ მომავლის შესახებ გარკვეული შეხედულება ვერ შეუდგენია“. მთავარი ბრალდება მაინც ხალხურისაგან სარგებლობის საკითხში იყო. ვაჟა იმდენად უცვლელად იყენებს ხალხურ ზეპირსიტყვიერებას, რომ ვერ გაიგებ მის ნაწერებში რა ხალხურია და რა ავტორისეულიო: ‘როდესაც კითხულობთ ვაჟას პოემებს, თქვენ გგონიათ რომ ვიღაცას უცვლელად ჩაუნერია ხალხში დარჩენილი ლამაზი თქმულება და თქვენდა დასატკობად დაუბეჭდიაო; იგივე ხალხური ენა, იგივე რითმა, იგივე ხალხური შედარებები, ეპითეტები, ტროპები, იგივე ხალხური შეხედულების რწმენის მოხაზულობა და ხასიათი, იგივე ხალხური საგმირო ჰანგები, იგივე ხალხური იდეალები!’

წერილის ბოლოს იპ. ვართაგავამაც დაგმო ფშაური დიალექტის გამოვლინება ვაჟას პოეზიაში.

ვაჟა პასუხს სცემდა იმათ, ვინც საამისოდ ღირდა თავის სიტყვითა თუ თავისი ბრალდებით. იპ. ვართაგავას წერილი ნამდვილად სერიოზული სიტყვაც იყო ვაჟას მიმართ ნათქვამი და ბრალდებებიც სერიოზული იყო. იმათი უპასუხოდ დატოვება არ შეიძლებოდა. მადლობა ღმერთს, რომ იპოლიტე ვართაგავამ დაწერა წერილი ვაჟაზე და ვაჟამაც უპასუხა, თორემ დღეს არ გვექნებოდა ერთ-ერთი უბრწყინვალესი წერილი, სადაც ვაჟამ გულწრფელად და დაუფარავად გახსნა თავისი შემოქმედების საიდუმლოებანი და ამით მისი შემოქმედების მკვლევართ ბევრი თავსატეხი ააცდინა.

პასუხი ვაჟამ იმავე 1914 წლის „სახალხო ფურცელში“ გავრძელებით დაბეჭდა: „კრიტიკა ბ-ნ იპ. ვართაგავასი“. ვაჟა წერს: „ბ-ნ ვართაგავას ძალიან გულით უნდა გაიგოს, ამ პოემებში რა ეკუთვნის ხალხს და რა მე, როგორც ავტორს. სურვილი საფუძ-

ვლიანია და ღირსი დაკმაყოფილებისა. ამ სურვილს კრიტიკოსისას მე დავაკმაყოფილებ, თუმცა ეს მეტ შრომად მიმაჩნია და თანაც მწყინს: ვართაგავამ, თუ მას კარგი კრიტიკული ალლო აქვს, უნდა ჩემ დაუხმარებლად გაიგოს, რაა ამ ნაწარმოებებში ხალხური და რა ინდივიდუალური. უნდა ყველამ კარგად იცოდეს – ხალხური თქმულება, რაც უნდა იგი მდიდარი შინაარსისა იყოს, აზრიანი და ხელოვნური, თუ პოეტმა იგი არ გარდაქმნა, საკუთარ სულიერ ქურაში არ გადაადნო, არ გადაადულა, მასალიდან ახალი რამ არ შექმნა და დაწერა ისე, როგორც ხალხი ამბობს, არაფერი გამოვა, ერის გულში ამისთანა ნაწარმოები ბინას ვერ იპოვნის, იქ ვერ დაისადგურებს და ვერც ხელოვნურ ნაწარმოებად ჩაითვლება.

ამის მაგალითები მსოფლიო ლიტერატურის ისტორიაში ბევრია. ყოველი დიდებული საკაცობრიო ნაწარმოები შექსპირისა, გიოტესი ხალხურ თქმულებებზეა აშენებული, სწორედ ისე, როგორც ზევით მოგახსენეთ, როგორც ამას ჩვეულან რჩეულნი ამა ქვეყნისანი, დიდი ნიჭის პატრონი მწერლები, ავტორები „ფაუსტს“ გიოტეს გარდა ასობით ჰყავდა, მაგრამ გიოტეს მეტმა ნამდვილი „ფაუსტის“ დაწერა ვერავინ შესძლო, რადგან საკუთარმა სულიერმა ქურამ სხვა მწერალთა ვერ შესძლო გადადულება ხალხისაგან მოცემულის მასალისა და მის საკუთრებად გარდაქმნა. ესევე დაემართა შექსპირის „ჰამლეტს“, „მეფე ლირს“, „რომეო და ჯულიეტას“ და სხვა. ესევე ითქმის დიდებულ შოთაზე და მის „ვეფხისტყაოსანზე“.

მე, თქვენი უმორჩილესი მონა, რა სახსენებელი ვარ ამ გოლიათებთან, მაგრამ ერთი გარემოება მაძლევს უფლებას ჩემი თავიც იმათთან ერთად ვახსენო – ეს გახლავთ მსგავსება ქმნისა, შემოქმედებისა. დიად, კატა თუმცა ვეფხვი არაა, მაგრამ სხვა ცხოველებზე მეტად ვეფხვს უფრო ისა ჰგავს.

ამასთან ისიც უნდა ვსთქვა, ბევრი ამბავი და ზღაპარი მე შევქმენ და იოტისოდენი იმათში ხალხის თქმულებისა არაფერი ურევია, თუმცა ფრჩხილებში ვსვამდი „ძველის-ძველი ამბავი“, „ზღაპარი“, „თქმულებაო“, იმ მოსაზრებით – დაბეჭდვის დროს დაბრკოლება არა ჰქონიყო. ეს, რა თქმა უნდა, დანაშაულად უნდა ჩაითვალოს იმდენადვე, რამდენადაც ხალხური თქმულების მითვისება. როგორც ამის უფლება არ აქვს

არავის, ისე – თავის ფანტაზიის ნაცოდვილარის ხალხისათვის მისაკუთრება, ხალხურ ამბად გასაღება. ამ ნაკლს გავასწორებ მხოლოდ მაშინ, როცა დაიწყება ჩემის ნანერების ცალკე წიგნად გამოცემა, – მაშინ ავლნიშნავ, რომელია მართლა ძველი ამბავი და რომელი მთლად ჩემგან დაძველებული, ძველ ამბად მონათლული...

ჩემი პოემები, თითქმის ყველა, სულ ხალხურ თქმულებებზე ძველ ამბებზე არიან დაფუძნებული, თითოეული მათგანი სხვადასხვანაირად”.

ვაჟას განმარტებით, „სტუმარ-მასპინძელს“ საფუძვლად დასდებია ამბავი, რომლის თანახმადაც ხევსური ზვიადაური როგორღაც ხელში ჩავარდნია ქისტებს და თავისი ახალი მკვდრის საფლავზე დაუკლავთ. ზვიადაური არ შემდრკალა და მათ მკვდარს არ შესწირვია. „გველისმჭამელში“ კი ხალხური მხოლოდ ის არის, რომ ქაჯებს ჩაუვარდათ ტყვედ ხევსური მინდია. თავის მოკვლის მიზნით მას გველის ხორცი შეუჭამია, რომლითაც ქაჯები იკვებებოდნენ. გველის ხორცმა მას შესძინა მცენარეთა ენის ცოდნა, მათი წამლად გამოყენების უტყუარობა. „ხალხური თქმულება ამას იქით არ გადის, – განაგრძობს ვაჟა, – მაშასადამე, მინდიას დაცოლშვილება, ცოლთან ბაასი, ხორცის უჭმელობა თუ შეიძლება ასე ვთქვათ, მხედრული ნიჭი გველისმჭამლისა, ჩიტების ენის ცოდნა, ხალხურ თქმულებას არ ეკუთვნის. ამბავი მინდიას სულის არავითარ დრამატიულს განცდას არ წარმოგვიდგენს ხალხის თქმით. ბ. ვართაგავას ვერ გაუგია, ვერ მიმხვდარა „სტუმარ-მასპინძელში“ და „გველის-მჭამელში“ რაა ხალხური და რაა ავტორისაგან შექმნილი და ამის გამო ამ ორმა ნაწარმოებმა მოიტანა ქვეშ კრიტიკოსი და დღეს-ნამდე ვერ ამდგარა ფეხზე. იქნებ ამ ჩემმა განმარტებამ შეაძლებინოს ფეხზე დადგომა და ღირსეულად მათი დაფასება...”

„ალუდა ქეთელაური“, რომელიც აგრე ძალიან მოსწონს ბატონ ვართაგავას, არის აშენებული სრულიად უბრალო მარტივს ამბავზე, უბრალო შემთხვევაზე. ალუდა ქეთელაურს ქისტებმა ცხენი მოჰპარეს, ქურდებს მდევრად გამოუდგება, ერთს მათგანს თოფით მოჰკლავს, ხოლო მოკლულის ამხანაგი ვაჟკაცურად დაუხვდება, თუმცა ესეც მსხვერპლი ხდება ალუდასი, მაგრამ მოჰხიბლავს მას თავის ვაჟკაცობით და როცა ჩამოვარდება

საუბარი მუცალის მოკვლაზე, ხანდახან შესანდობარს დაჰლევს ალუდა ქისტისას – ლუდს ან არაყს. მარჯვენის მოჭრა-მოუჭრელობაზე ზეპირგადმოცემა არაფერს გვეუბნება, ხალხური თქმულების მთელი თავი და ბოლო ეს არი...

რაც შეეხება იმას თუ მე რამდენად შევძელ საქართველოს მომავალი ბედის თუ უბედობის განჭვრეტა, ამაზე ბ. იპ. ვართაგავას უნდა მოვახსენო შემდეგი: ამგვარი კითხვის პასუხი არ შეიძლება ერთმა ლექსმა, ან მოთხრობამ გამოხატოს, არამედ მთელმა პოეტის ცხოვრებამ, მის მოღვაწეობამ, მთელმა იმისმა ნაწერებმა. როგორ გგონიათ? არა მქვს მე წარმოდგენილი მომავალი ჩვენი ქვეყნისა ბრწყინვალედ? ნუთუ ეს არა ჩანს ჩემი ნაწერებიდან? რომ ეს არ მწამდეს, თქვენ გგონიათ მე კალამს ავიღებდი ხელში?!..

ერთმა უსწავლელმა ფშაველმა მითხრა, რომელსაც „ბახტრიონი“ წაეკითხა, მოსწონებოდა ძალიან და ყელგადაგდებით, თითქოს შეკაზმულს ცხენსა მთხოვდა საჩუქრად, მეხვეწებოდა, მეკითხებოდა: „ვაჟა, თუ ღმერთი გწამ, ნუ დამიმალავ, სწორედ და თქვი, საქართველოს თავისუფლებას არ ჰგულისხმობ „ბახტრიონში“, რომ ამბობ „ელირსებაო ლუხუმსა ლაშარის გორზე შადგომაო?“

– იქნებ ვგულისხმობდე, – ვუპასუხე.

– სწორედ საქართველოს თავისუფლებაზეა ნათქვამიო, – დაიჟინა ფშაველმა და ხუთმეტი ათასი მჭევრმეტყველი პროფესორი რომ მოგეყვანათ, იმას რწმენას, აზრს ვერ გამოუცვლიდნენ.

თუ ჩემ მკითხველებს ამისთანა რამეს აგრძნობინებს ჩემი ნაწარმოები, საკმარისია. მაშასადამე, საკმარისად წარმოდგენილი მქონია საქართველოს მომავალი სვე-ბედი”...

საკვირველი ის არის, რატომ ვერ ამჩნევდნენ ტიტულოვანი ლიტერატორნი ვაჟას შემოქმედებაში იმას, რასაც ამჩნევდა უბრალო ფშაველი მკითხველი? რატომ და, ვაჟას შემოქმედების მიმართ შემუშავებული მცდარი აზრები უშლიდა ხელს ბოლომდე ყველაფრის დანახვას, ჩანვდომას. მაინც ვერ იყვნენ დარწმუნებულნი ბოლომდე ვაჟას სიდიდეში, ვერ ენდობოდნენ თავის თავს მკვლევარნი, შიშობდნენ, ერთურთს უფრთხოდნენ. ნაწილობრივ მაინც წინასწარ შემუშავებული აზრით მსჯელობ-

დნენ და არა თვით ვაჟას ნაწარმოებების ღრმა შესწავლის საფუძველზე. მიუხედავად ასეთი ხარვეზებისა, იპ. ვართაგავას გამოკვლევა მაინც ყველაზე სერიოზული და საფუძვლიანი პირველი გამოკვლევაა ვაჟას შემოქმედებისა.

შემდეგში ბ-ნი იპ. ვართაგავა სიამოვნებით იგონებდა იმ დიდ შთაბეჭდილებას, რაც ვაჟას პასუხმა მასზე მოახდინა: „მე ვიგრძენი, რომ ეს წერილი დიდი ისტორიული მნიშვნელობისა იყო, რომ ისეთი იშვიათი ისტორიული დოკუმენტი იყო, რომლის მსგავსი და ბადალი არამც თუ ქართული ლიტერატურის ისტორიაში, მე-19 ს. მდიდარ რუსულ ლიტერატურაშიც არ მოიპოვებოდა. ეს ვაჟას წერილი შეიცავდა გულდია, მართალ, შეუღამაზებელ აღსარებას მისი შესანიშნავი პოემების შექმნის რთული პროცესის გარშემო...“

ჩემდა საბედნიეროდ, ისტორიამ ჩემი ყოველთვის (წარსულში, აწმყოში და მომავალშიც) პატარა სახელი მჭიდროდ დააკავშირა გენიოს შემოქმედ ვაჟას სახელთან სწორედ იმ წერილში („კრიტიკა ბ. იპ. ვართაგავასი“). სანამ საქართველო იარსებებს, სანამ ქართველი ხალხის გენიის გამომსახველი ქართული ლიტერატურა იკაშკაშებს (ამ მარადისობაში ჩვენ ეჭვი არ შეგვაქვს) ვაჟას ნაწერებიც და მათ შორის „კრიტიკა ბ. იპ. ვართაგავასი“ უდაოდ და უეჭველად დიდი ტირაჟით გამოიცემა. ასეთ ბედს მორიგი კალმოსნები და მათი გვარები იშვიათად, ძლიერ იშვიათად ეწევიან“.

ბატონმა იპ. ვართაგავამ, მართლაც, ფასდაუდებელი სამსახური გაუწია ქართულ ლიტერატურას არა მხოლოდ იმით, რომ პირველმა მისცა სწორი შეფასება ვაჟა-ფშაველას შემოქმედებას (და არა მხოლოდ მის შემოქმედებას), არამედ იმითაც, რომ ვაჟა-ფშაველას დაწერილი „აღსარება“-წერილი, ურომლისოდაც გართულდებოდა ვაჟას ისედაც რთული შემოქმედების კვლევა-ძიება.

უქალღობა

ვაჟამ წერილში „კრიტიკა ბ. იპ. ვართაგავასი“ კიდევ ერთ რაღაცაზე გასცა პასუხი მოკამათეს: „მას ძალიან გულით უნდა



გაიგოს როგორი წესი მაქვს წერისა – ერთბაშად ვწერ თუ რამდენჯერმე გადავწერ ერთხელ დაწერილს, რაც ხშირად შესწორებას მოსდევს. უნდა მოგახსენოთ, ძალიან დიდ ნაკლადაც რომ ჩამეთვალოს, არც ერთი ჩემი ნაწარმოები ერთხელ მეტად არ გადამინერია შავად დაწერილიდან“.

ერთხელ დასაწერად ძლივს პოულობდა დროს, სამჯერ და ოთხჯერ გადასაწერად საიდან მოიცლიდა. მაგრამ გადაუწერლობის ერთი მიზეზი, ვფიქრობ ისიც იყო, რომ ქალღობი არა ჰქონდა. ნავთ-მარლის ფული არა ჰქონდა და ქალღობის ფული საიდანღა ექნებოდა. ყიდულობდა კი, შოულობდა, მაგრამ ჩანს მალე შემოეღეოდა და მერე იმაზე წერდა, რაც ხელში მოხვდებოდა. „უთუოდ ცხოვრების პირობებმა გა-

ნაპირობა ვაჟა-ფშაველას შემოქმედებითი ფსიქიკა, როცა იგი ხელში მოხვედრილ ყოველწიარ ქალღობზე წერდა ლექსს თუ სხვა ჟანრის ნაწარმოებს. პოეტის არქივი გვიჩვენებს, რომ ვაჟას წერა უმთავრესად ორად გაკეცილ თაბახის ქალღობზე უყვარდა. მაგრამ, ჩანს, ამის საშუალება ყოველთვის არა ჰქონდა, ამიტომ მისი ავტოგრაფები მრავალგვარ ქალღობზეა აღბეჭდილი, მაგ.: „აკაკის საიუბილეოდ“ დაწერილია უჯრებიანი ბლოკნოტის შუიდან ამოღებულ ორ ფურცელზე. „უფროც დაბნეული, ღამეო“ დაწერილია ბლანკზე, რომლის მეორე მხარეზე რუსუ-

ლად ალექსანდრე თევდორეს ძესთან (ალ. ყიფშიძესთან) მიწერილი პირადი წერილია. ლექსი „კლდე და მდინარე“ დაწერილია დიდი ფორმატის ქაღალდზე. პირველად დაუწერია რვა მარცვლიანი სტრიქონებით, ჩანს, დიდი ლექსის დროს ქაღალდის ეკონომიას ეწეოდა, რადგან იქვე არის აგრეთვე თექვსმეტმარცვლიანი სტრიქონებით დაწერილი „ბახტრიონის“ შესავალი და ლექსი „რამ შემქმნა ადამიანად“. ლექსი „სიმღერა“ („კიდევ რომ დავლპე საფლავში“) დაწერილია პატარა ფურცელზე, რომლის მეორე მხარეზე ბავშვებს ანბანის წერაზე უვარჯიშობათ. „მკვდარია უგრძნობი კაცი“ დაწერილია ფურცელზე, რომლის მეორე მხარეზე ვილაციის განცხადების ტექსტია. ლექსი „ბედის მომლოდე უბრალო დავრჩი“ პოეტს დაუწერია რვეულის ფურცელზე, რომლის მეორე მხარეზე რუსულად წერია სასამართლოს დადგენილება პირქუშაშვილის საქმეზე და სხვა. ვაჟა რომ ყოველგვარ ქაღალდზე წერდა და ისიც საძებარი ჰქონდა, მოგონებებშიც არის დადასტურებული“. (53, 133).

ვაჟა მეგობრობდა თიანეთის მამასახლისთან აბრამ აკობაშვილთან. რადგან ხალხისათვის მზრუნველი კაცი იყო, ხშირად მიდიოდა ხოლმე მასთან. მისი შვილი ვეფხო აკობაშვილი იგონებს: „მეორე დილით ვაჟა ადრე ამდგარიყო, რაღაცას წერდა, ორი ფურცელი უკვე დაწერილი ჰქონდა, ქაღალდი შემოკლებოდა.

– აბრამ, ერთი ფურცელი ქაღალდი კიდევ მომეცი დამაკლდაო. – სთხოვა ვაჟამ, მაგრამ მამაჩემმა არ მისცა, უთხრა:

– ნეტა ე ქაღალდს არ აოხრებდე ტყუილადაო.

შემდეგ ვაჟა მე მომიბრუნდა და მითხრა:

– მოიტა, შენ მაინც ერთი ფურცელი ამომიხიე შენი რვეულიდანაო.

რამდენიმე ფურცელი ამოუხიე და მივეცი.

წერა განაგრძო... (24, 23).

ასეთ ნახევრ-ნაგლეჯებზე დაწერილს ხომ ვერ მიიტანდა რა-დაქციაში. თბილისში ჩამოსული ქაღალდს იშოვიდა და აქ იწყებდა გადათეთრებას. მისი უახლოესი მეგობარი, საბავშვო პოეტი, შიო მღვიმელი, ვისთანაც ხშირად ბინაზეც ჩერდებოდა ხოლმე, იგონებს: „მთაში დაწერილ პოემებს, იქ რომ ვერ მოას-

წრებდა, აქ, თბილისში, ათეთრებდა ხოლმე. ვერ წარმოიდგენთ რამდენნაირ გაჭვარტლიანებულ ქაღალდზე ჰქონდა ხოლმე დაწერილი უშველებელი პოემა“ (24, 177).

თბილისელი მეგობრები აძლევდნენ ხოლმე ქაღალდს, უგროვებდნენ, ატანდნენ, მაგრამ იმათაც ყველას უჭირდა, ვის რა ჰქონდა იმდენი, ვაჟასთვის საკმარისი მიეცა. იოსებ იმედაშვილი იგონებს: „ვაჟა წერაშიაც თავისებური იყო. ჩემს ბინაზე დაძინების დროს მეტყოდა:

– სანთელი და სანერ-კალამი დამიდგო! – ასე იყო პირველ ხანებში, შემდეგ, რაკი მისი ხასითი ვიცოდი, სანთელ-სანერ კალამთან ერთად, ქაღალდსაც მოვუმზადებდი ხოლმე, მგრამ ვაჟა ხშირად ყაბალახიდან იღებდა ქაღალდს, როგორც ქაღალდიც უნდა შეხვედროდა, დასწერდა. უმეტესად კი ვაჟას ლექსები, პოემები, და სხვა მასალები უკვე მთაში დაწერილი ჩამოჰქონდა ხოლმე“. (24, 121).

გულქანის გადმოცემით, ვაჟა-ფშაველა ხანდახან სიპებზე წერდა. ამას იმ შემთხვევაში აკეთებდა, როცა ქაღალდი არა ჰქონდა თან, ან საერთოდ აღარა ჰქონდა. მერე ქაღალდს მოიტანდა და იმაზე გადმოწერდაო.

არც ბარში და არც მთაში

სიცოცხლეში არც ბარში და არც მთაში დიდი გამორჩეული დაფასება არა ჰქონია ვაჟას. ზემოთაც ვთქვით, რომ მთაში „განუზომელი“ ავტორიტეტით არა სარგებლობდა, როგორც ეს მცდარად მიაჩნდათ. მას მოლექსე-მოკაფიავენი თავსაც კი აჭარბებდნენ, რაკი ვაჟა ზეპირ კაფიაობაში ვერ უმკლავდებოდა, რას წერდა, ის კი ცოტამ იცოდა. ამას თვითონაც აღიარებდა. ერთ-ერთმა მოლექსე-მოკაფიავე ფრუშკა წვეროშვილმა ასეთი დამოკიდებულება ვაჟასადმი ლექსით ამოთქვა:

**„არა მაქვს სანერ-კალამი, წერით არ ვილლი მაჯასა,
მაგრამ რით დავუვარდები, რა ზიკაშვილსა ვაჟასა“.**

თუმცა, მადლობა ღმერთს, იყვნენ ისეთებიც, ვინც იცოდა ვაჟას ფასი. ერთ-ერთ ასეთ პანკისელ მოლექსეს თუ ყრუვგიორგის ფრუშკასათვის საკადრისი პასუხი გაუცია:

**„ტყუილად მოჰკვეხ, ფრუშკაო, იხრინნიანებ ხმასაო,
იჩემებ მელექსეობას, ლამაზი სიტყვის თქმასაო;
მოელი დიაცთ ქებასა, სახელის გავარდნასაო.
მოლექსე ისეთი უნდა, ვაჟა რო ჰყავდა ფშავსაო,
ჩარგალში სიტყვას იტყოდა ქალაქს აწვდენდა ხმასაო.
ვაჟას მნახველნი ფშაველნი აღარ ვინდომებთ სხვასაო.
მოდი, გაჩუმდი, ფრუშკაო, მოდი, ნუ იგდებ თავსაო“.**

სჯობნიდნენ კაფიაობაში და სოფლის საქმიანობაში ხომ სჯობნიდნენ და სჯობნიდნენ. აფხუშოში მცხოვრებმა ჟამიაშვილების ბებერმა გაიხსენა: ჩვენ მთაში სთიბდა ხოლმე და თივები სულ ულპებოდა, „თივის“ აგება არ იცოდაო.

ინტელიგენციიდან კი ერთ-ერთი შემცნობი ვაჟას სიდიდისა, ყოფილა იმ დროს სრულიად ახალგაზრდა ქაიხოსრო (მიხეილ)



თეთრ ჩოხაში მიხეილ (ქაიხოსრო)
ზანდუკელი, ჯოხით ხელში ვაჟა

ზანდუკელი. ვაჟას თითქმის ყველა ფოტო (სამი-ოთხის გამოკლებით) მისი გადაღებულია.

„სოფ. არანისელ თავადთა ერთერთ შვილს მოსკოვის სამედიცინო ინსტიტუტი დაუმთავრებია და იქვე დაუტოვებიათ სამუშაოდ. 1918 წელს ჩამოსულა საქართველოში და კურორტოლოგიის საქმეს ჩასდგომია სათავეში. გაუხსნია ბორჯომის, აბასთუმნის, მოგვიანებით (1937 წელს) თბილისის ბალნეოლოგიური საავადმყოფო. მაშინ ბერიას ამოუღია დასახვრეტთა სიიდან — მოამთავროს ეგ საქმეც და მერე დავხვრეტოთ, სად წაგვივაო. 1950 წლამდე უცოცხლია, იყო ცნობილი ფიზიოთერაპევტი.“

გასაბჭოების დროს არანისში, თავის სახლში გაუხსნია საქველმოქმედო სკოლა, სადაც გიმნაზიადამთავრებული ქალები ასწავლიდნენ. იყო თურმე ხალხისთვის საყვარელი პიროვნება.

ეს გვიან. ვაჟას დროს კი მოსკოვიდან მივიღინებთ ჩამოდიოდა საქართველოს მთიანეთში, კავკასიაში ხალხური სამედიცინო მასალების შესაგროვებლად, გადასაღებად. ამისათვის მიცემული ჰქონდა ხისყუთივით დიდი ფოტოაპარატიც. მაშინ გაიცნო თურმე ვაჟა-ფშაველა ჩარგალში, გადაულო რამდენიმე ფოტო, რაზეც თვით ვაჟაც ჩანს, დათანხმდა, ტანსაცმელიც გამოიცვალა, იარაღიც აისხა. ქაიხოსრო კი არ ეშვებოდა, ცდილობდა ბუნებრივ ყოფაშიც აესახა ვაჟა — ეუბნებოდა: შენ თავად არ იცი, რამხელა პიროვბეა ხარ, შთამომავლობისთვის, მომავალი საქართველოსთვის ძვირფასი იქნება შენთვის გადაღებული ჩემი ფოტოებიო. ვაჟა კი ბუზღუნებდა თურმე — ცოცხალი არავის ვახსოვარ, მკვდარი ვილას გაფახსენდები, ვის რაში დააინტერესებს ან ჩემი ნაწერები და ან ფოტოებიო. მომეშვი, შენ გამარჯვებას, ჩემ ბეჩაობას რაღა სურათებზე გადაღება უნდა, განა უმაგისოდ კი არ იციან. სირცხვილია, მომეშვი, თავი გამანებეო. ქაიხოსრო კი არ ანებებდა თავს და ამით, მართლაც, რომ ფასდაუდებელი საქმე გაუკეთა ერს. ორ ფოტოზე თავისი თავიც (თეთრ ჩოხაში) დაუფიქსირებია.

აქედან დაწყებული მეგობრობა ვაჟასა და ქაიხოსროს შორის, ბარშიც გრძელდებოდა. თბილისისკენ მიმავალ-მომავალი ვაჟა ღამის გასათევად ცხენს არანისისკენ შეაბრუნებდა, ეზოში

კაკლის ძირას ჩამოჯდებოდა და დამხდურთ ეტყოდა: ქაიხოსროს თუ სცალიან, გამოიხედოსო. ქაიხროსროც მაშინვე გამოვარდებოდა — რას ჰქვია მცალიან, ვაჟა-ფშაველას სტუმრობა ჩემთვის დიდი პატივიაო“. (ცნობა მოგვანოდა ქაიხოსროს ჩამომავალმა მიკი (მიხეილ) ზანდუკელმა).

1961 წელს, ვაჟას იუბილე რომ აღინიშნა მშვიდობის მსოფლიო საბჭოს გადანყვეტილებით და ჩარგალში დიდი ზეიმი ჩატარდა, ფშაველები გაოცებულნი იყვნენ: რა მოხდა, რა ძალიან დააფასეს ვაჟაო. განსაკუთრებით უკვირდათ ვაჟას თანამედროვეთ. აი, რას ამბობდა ერთ-ერთი მათგანი, ხეხერა ზურაბაშვილი: „მე და ვაჟა მეგობრები ვიყავით, ერთად გავიზარდეთ. ერთმანეთი გვიყვარდა. მხოლოდ ის კი არ ვიცოდი, თუ მას რაიმე დაფასება მოელოდა ხალხისაგან. ჩვენ მას სულ უბრალო ფშაველად ვთვლიდით. ჩვენ ვაჟა ისეთივე მოლექსე გვეგონა, როგორც სხვა ფშაველები იყვნენ.

ერთხელ შალვა ბაჩიაშვილისას ლუკამ თქვა: ხალხო, თქვენ რომ არაფრად მაგდებთ, მალე გაიგებთ, მე ვინცა ვარო. მე მაშინ დამაფასებენ, როდესაც მეფე და მისი მოხელეები აღარ იქნებიანო. ჩვენ, ზოგიერთებმა სიცილიც კი დავინწყეთ. აბა, რა ვიცოდით, მართლაც, როგორც თქვა, სწორედ ისე მოხდა. გვიანლა გავიგეთ, რომ მისი სიტყვა და ნიჭი ძვირფასი და პატივსაცემი ყოფილა“. (37, 112).

ეს ჩვეულებრივ, ვაჟასავით ღარიბი მთიელები არად აგდებდნენ ვაჟას. დროებისაგან წამოყელყელავებული მდიდრები, ბევრი ცხვრის პატრონნი ხომ საერთოდ არ უყადრიდნენ თავს. როგორც ყოველთვის, კაცობა ქონებით იზომებოდა მაშინაც. ქონებას და გონებას კი ერთად ვერასდროს გაუხარია, არ იყოს ომარ ხაიამისა.

ერწოელი გეჯა ბენუკლიშვილი მდიდარ მეცხვარეებში მოიხსენიებოდა, შირაქში და ტარიმანაში ჰქუხდა მისი სახელი — ოციათასამდე სული ცხვარი ჰყავდა. მთაშიც ყველამ იცოდა მისი სახელი და ბევრი მინატროდა. ვაჟას მის გვერდით ვინ ახსენებდა. დღეს კი, მართლაც, აღარავინ იცის მისი სახელი. აქაც გამართლდა ვაჟას ნათქვამი...

გეჯამ თავისი შვილისათვის საცოლედ ვაჟა-ფშაველას ქალიშვილი თამარი ითხოვა. ქორწილის შესათანხმებლად ვაჟიანთ

მისვლა იყო წესი, მაგრამ გეჯამ არად ჩააგდო ვაჟა სიღარიბის გამო, თვითონ არ იკადრა მისვლა და ცოლი გაგზავნა. ვაჟას ძალიან სწყენია და გეჯას ცოლისთვის უთქვამს: რატომ გეჯია არ წამოვიდა? კაცთან კაცი უნდა მივიდეს, დედაკაცს რასა გგზავნიდა, აბა, თქვენ რა უნდა გითხრათო? თქვენ რომ გინდათ, იმ დროისთვის მე არ მცალიანო და ქორწილის დრო ერთი კვირით გადაუნევიან. როცა შეხვედრილან, იმ ქორწილში იქნებოდა თუ სხვაგან, სხვა დროს, გეჯას ვაჟასთვის უთქვამს: „მენანები ღარიბი ხარ უსახელო მაჰკვდებიო“. ვაჟას ამაზე უპასუხებია: „მეც მენანები, მგლის ლუკმა არაფერ სახელია; შენ რომ მოჰკვდები, სულ მოჰკვდები, მე კი მკვდარიც ვიცოცხლებო“ (ლევან ბოძაშვილი).

თიანეთის მამასახლის აბრამ აკობაშვილთან ერთი სტუმრობისა და ვახშობის დროსაც ბევრი ისაუბრეს და „შემდეგ მამაჩემმა ჩემზე ჩამოუგდო სიტყვა:

– ეს ბიჭი ლექსების წერით არის გატაცებული და აღარ ვიცი რა მოუხერხო, არაფერზე გული აღარ უდგებაო.

– რა გინდა, რა უნდა მოუხერხო, წეროს, რას ერჩი, – უთხრა ვაჟამ.

– რა უნდა წეროს, რა დროს მაგის წერაა.

– სახბორეს სასკორავშივე შეეტყობაო, ნათქვამია. ჩემი მეგობრის ბიჭი გოგლა ლეონიძეც პატარაა, მაგრამ ისეთ ლექსებს წერს, რომ ... – უთხრა ვაჟამ. – დე, ამანაც წეროს, რა გინდა?!

– ლლაპის დანერილი რა უნდა იყოს.

– ეგ თუ ლლაპია, შენ ხომ ლლაპი აღარა ხარ, რატომ არა წერ?

– შენ რა სიკეთეს მოენიე შენი წერით, რომ ახლა მე დავინყო წერა. რა ყრია მაგ წერაში, სიღარიბიდან ვერ ამოსულხარ...“ (24, 26).

ვაჟას თუ პატივს სცემდნენ და უყვარდათ, ისევე კარგი ვაჟკაცობის გამო: შეუპოვარი იყო და იარაღის კარგი მომხმარე, კარგი მსროლელი. კიდევ იმიტომაც, რომ ნასწავლი იყო. მაგრამ ყოველივე ამის გამო ჯიბრშიც ედგნენ, ექიშპებოდნენ. თითქოს უნდოდათ ეგრძნობინებინათ, შენ ჩვენზე მეტი არა ხარო. ვაჟას მიმართაც გაცხადდა ხალხურ ლექსში ასახული მწარე რეალობა:

**„კარგ ყმასა შურობს სოფელი,
იტყვიან: კარგი რად არი“...**

მართალია, პატივისაც სცემდნენ, მაგრამ იმაზე მეტად არა, როგორც სხვა ყველა გამორჩევით კარგ კაცს, კარგ ვაჟკაცს, ხოლო ბევრს რომ ვაჟაზე მეტად „ხმა-სახელიან“ კაცად თვლიდნენ, „მხარ-კვერიან“ არწივებად, ეს იქიდანაც ჩანს, რომ მათდამი ბრწყინვალე ლექსები აქვთ მიძღვნილი, ვაჟასადმი კი ლექსი არ მიუძღვნიათ – ხალხურ სიტყვიერებაში მაშინდელი არსად რაიმე გაიგონება.

მთიელნი თითქოს ჯიბრით ხშირად ისეთ რამესაც კი აკადრებდნენ, რასაც სხვას ვერ გაუბედავდნენ.

გარდა ზემოთ მოხსენებული ფაქტებისა მუავეწყალთან და მეტყვევებთან დაკავშირებით...

... ერთ-ერთ დღეობაში, 1905 წლის გამოსვლებთან დაკავშირებით ხალხში აგიტაციას რომ ეწეოდა, ვილაცამ მის გასაგონად ჩაილაპარაკა: ტყვია ამას უნდა შუბლში, ხალხს სათავისოდ აბრიყვებს, ხელმწიფობას თვითონ მოინდომებსო.

... არჯალაანთ ქალთამზემ ვაჟას ხბორები თავის გომურში შეამწყვდია – ყანაში რატომ შეუშვიო, ვაჟა კი შუბით დაიფრინა. ახლა ქალთამზეს ქმარი ბეკური გამოუხტა ხელხანჯლიანი.

... მეზობლის დედაკაცმა დუთამ ვაჟას მიერ აგროვებული ნარიყი წამოიკიდა და წამოიღო, ვაჟას კი დაემუქრა, სუ, თორემ ვიტყვი მოლოდინაანთ სალომეს ლოყაზე რო მოუცაცუნეო.

... ფიდუაანთ ბაია ქორწილში წამოეპარა და ყბა-ყურში ლენა – თურმე ბრაზი რატომღაც მოუვიდა.

... ბონახში ბიძაშვილმა კეტი დასცხო თავში ზურგზე ძნააკიდებულს და თავის ტვირთიანად დააგორა – ბიძას მე ვინახავდი და მისი დანატოვარი ყველაფერი ჩემიაო.

და კიდევ ვინ მოსთვლის, რამდენი ამისთანა და ამაზე უარესი უკადრებიათ ვაჟასთვის თავისსავე თანასოფლელთ, თანამოდმეთ, კაცისთვის, ვისაც ვაჟკაცობაში ტოლი არავისთვის დაუდვია, ბენვისოდენაც არავისთვის შეურჩენია, თავზე ბუზიც კი არ დაუსვამს. იმ ვაჟასათვის, ვინც ახალგაზრდობაში მუშტიკრივსა და ჭიდაობაში ტოლების ფალავანი იყო.

... იმ ვაჟასთვის, ვინც პეტერბურგში ყოფნისას თავის ძმა

გიორგისთან ერთად რესტორანში ატეხილი ჩხუბის დროს ოცდახუთ კაცს გაუმკლავდა, ხოლო მათ შორის ერთ-ერთ მათგანს, ევროპის ჩემპიონს კრივში. მას ისეთი მუშტი შემოჰკრა ვაჟამ ფერდში, რომ მოცელილი ბალახივით დაეცა და სამი დღე კომპრესებს იღებდა.

...იმ ვაჟას, ვინც შირაქის საქმეებთან დაკავშირებით შემდგარ სასამართლო პროცესზე უსამართლობის დამცველი თუში ადვოკატი ცისკარიშვილი ბარაქიანი სილით გაშხლართა იატაკზე.

... იმ ვაჟასთვის, ვინც... გასული საუკუნის ბოლოს რუსეთში გამოჩნდა „ახალი ერმაკი“, კაზაკთა ატამანი აშინოვი. მსგავსად ერმაკისა, რომელმაც ციმბირი მიუძღვნა რუსეთის მეფეს, აშინოვი პირობას დებდა, მე ჩვენს რუსეთის იმპერატორს ინდოეთსა და ეგვიპტეს მივართმევ ხანჯლის წვერითო. რუსეთის პრესა ხოტბას ასხამდა მას, გმირად ნათლავდა და შეხვედრებსაც ზარ-ზეიმით უწყობდნენ. ასეთი შეხვედრებისა და ოვაციების იმედით ჩამოვიდა თბილისშიც. „ივერიამ“ კი სასაცილოდ აიგდო ეს „გმირი“ – იუმორისტული ფელეტონი გამოაქვეყნა. აშინოვი მეორე დრესვე მივარდა რედაქციაში, ხანჯლის ტარი ჩაბლუჯა და რედაქტორს თვალები დაუბრიალა: ახლავე საბოდიშო წერილი დანერეთო. „რედაქტორი გაფითრდა, მე კი შევმინდი, – იგონებს აკაკი წერეთელი, – მაგრამ ახალგაზრდა მთიელი ვაჟა-ფშაველა უცებ წამოხტა, სტაცა აშინოვს კისერში ხელი, მალლა აიტაცა და უყვირა: ვის აშინებ შენ ხანჯლითა?! ჰკრა პანლური და კიბზე დააგორა. ეს ცრუ „გმირი“ იმავე დღეს სადღაც გაქრა თბილისიდან“.

ფშავეში კი თავის შეუგნებელ თანამოდმეებს ხელს არ უქცევს, უთმობს, ჭკვას არ აყოლებს.

... შუბით გამოვარდნილ ქალთამზეს სიცილით გამოექცა – ქალს ხომ ვერ შევებრძოლებოდიო.

... ფიდუაანთ ბაია შეაქო გამბედაობისათვის, გაულიმა – არ მეგონა თუ მაგხელა გული გქონდაო და ფეხზე წამოჭრილი, გულნატკენი დაჯდა.

... ხალხს ვაჟას მოკვლისკენ რომ მოუწოდა ხატში, იმ ფშაველს სინანულით ესლა უთხრა: „მე თქვენთვის ვიბრძვი თქვე თხისტყავიანებო!“

იცოდა ვაჟკაცობის ფასი ვაჟამ. თუ ისეთი კაცი გამოამყლავნებდა სიმამაცეს, ვისგანაც არ ელოდა, დანაშაულს აპატიებდა, აღარ გააბურთავებდა.

ვაჟა თბილისში ჩამოსულა ცხენით თავისი უმცროსი ძმის სანდროს წასაყვანად. შემოუსვია ცხენის გავაზე და გაუნევიათ მთისაკენ. სადღაც სოფლის ორღობეში ერთ ვენახიდან მომავალ გლენს თავისდაუნებურად ცხენი დაუფრთხია ვაჟასათვის. ძლივს დაუოკებია თავისი ნიკორი და დამნაშავისთვის მათრახის გადაჭერა მოუნდომებია. გლენს ბარი შეუმართია: დამკრავ და ისე დაგკრავ, რომ მეტიც არ მოგინდესო! ვაჟას მათრახი დაუშვია და გასცინებია. მერე უთქვამს სანდროსთვის, ვაჟკაცი ყოფილა, ვაჟკაცს მათრახს როგორ დაგკრავდიო, მაგრა დამიხვდაო.

ავადმყოფობით გატანჯულ ვაჟას რა ტანჯვის ფასად უხდებოდა მოსავლის მოყვანა, გაიხედავდა და მის ჯეჯილში ხბორები შეუშვიათ, ყანას მომკიდნენ და ძნაზე საქონელს ვილაცა მიუშვებდა, აჭმევდა, უნადგურებდა. სახლის მალლა, შარის თავზე თავისი სასიმიინდე ეზო შემოღობა, ზოგიერთები კი შარაზე ვერ ეტეოდნენ და მაინცა და მაინც იმის მამულზე წადინობდნენ მარხილის ჩამოტარებას, ღობეს უშლიდნენ. თოფით გამოუვარდებოდა ვაჟა და გარბოდნენ, თუ გაასწრებდნენ. ბოროტებსა და ცუდ კაცებს ვერ იტანდა ვაჟა, ამიტომ თუ ვისმე წაერხებოდა, ბოლოს კი ბოროტება და ცუდ კაცობაც ვაჟას თვითონ დასწამეს – ჩემი შენ გითხარო, გული მოგიკალიო. გულის მოკვლა კი ის იყო, ჩარგლელთა ერთმა ნანილმა ვაჟას თემ-სოფლობიდან მოკვეთა განიზრახა. ამ უმსგავსობას 70 წლის შემდეგაც აღშფოთებით იხსენებდა გულქანი: „მაშინისა მენ თვრამეტის წლისა ვიყავ... ჩვენს სასიმიინდეზე გზა დადეს. გაუნყრა მამაი, ბეჩავი... იმაზე იკვეთეს. აგერაი, აი, გაღმა ფოცხვერანთ კაკლებს ეძახდიან, იმის გრილოში ისხდიან, ოქმებს რასამა სწერდიან. ბონახით მაინვიეს ტილუნაი, მამაშჩემს ეჯობებოდის, დიდკაცი ვარო მითამაო, მენ უფრო კარ ცხენ მყავისო, ვაჟას ცხენს ჩემ ცხენ სჯობავისო... იქით ეძახდენ მამასა. მამაი კიდენ დერეფანში იდგა, პაპიროზსა სწევდა. რაზიკაშვილ გრიგოლ მოვიდა, აი, მალალი. მამაშჩემმა ჰკითხა: რასა ყრანტალეებენო?

– რასა და შენ გიკვეთენო; გახე, ან შენა, ან ეგ ხალხიო!

– აი, საცოდავებო, – გაიცინა მამამ, გაუბერნა პაპიროზსა, – აი, ეგ კატებიო. ეგენ დაინახვენ ხალხი მლოცავივით მოდიოდეს ჩემ კარზედა, თავად კატებივით სად შაძვრებიან, საით დაინყებენ გამოხედვასო... ოოო... ცუდ ხალხია. მარტო აეს მოლოდინანი, ბესუანი, ჩოლანი, ბაჩანას შვილები – სხვები სუ საითამ მოყრილებია”.

ვერ გაეგო, რა ჭია უღრღნიდა გულს ამ ხალხსა, რა უნდოდათ მისგან, რას ერჩოდნენ, რატომ ედგნენ ჯიბრში. წყენას და ბოლმას, მთიდან თუ ბარიდან ზღვათაოდნად მომსკდარს, გულში იბრუნებდა და რა გული უძლებდა. ამაყი იყო ვაჟა, ქედუხრელი და მიტომ უფრო უჭირდა, ამიტომ უფრო ძნელი იყო მისთვის ამოდენა სირეგვის, უმადურობის ატანა. უჭირდა იმიტომ, რომ მეტისმეტად მგრძნობიარე იყო. ბუნებას უგებდა, ხეს, ქვას, ადამიანებს კი ვერაფერი გაუგო.

იმაზე დიდი ტრაგედია რა უნდა იყოს შემოქმედისათვის, როცა მისი ნაღვანი, მისი ერთგულება და თავშენირვა არავის ესმის, „ვერას აგონებს მშობელსა”.

ვაჟა თავის დღიურებში წერდა: „სხვას რა დავემდურო, როცა ჩემი ცოლიც კი მე დამცინის, ისიც ბეჩავს, საცოდავ კაცს მეძახის. რა მითხრა იმ დღეს? ნეტავ ერთი ნაჯახი მამცა, შენთვის თავში დამერტყა, რომ ეგები მაშინ მაინც გადმოგცვივნოდა თავიდან ეგ რაღაც უბედური აზრები გილაგიაო. დედაკაცი არ არის? ამას აზრები კარტოფილი და ჭარხალი ჰგონია! ვითომ იმას ის აწუხებს, ის ალონებს, მე რადა ვარ აზრებისაგან დალონებული, რად ვიტანჯები?”

ოჯახი დღენიადაგ მძიმე ფიზიკურ შრომას ითხოვდა, გათენებიდან დაღამებამდე ოფლის ღვრას, ვაჟას კი ათასი ფიქრი და აზრი საწერისაკენ ეწეოდა, იტანჯებოდა, იხრჩობოდა. თავის მეგობრის მიქაბერიძისათვის ესეც შეუჩივლია: „ქართული ლიტერატურა, აბა, როგორ უნდა განვითარდეს, როცა მწერლებს ლუკმა-პურის ძებნაში სული ამოსდით! ჩემი დღენია ვწერ და, რამდენადაც ვიცი, ქართულ საზოგადოებას მოსწონს ეს ჩემი ნაწერები, მაგრამ რა გამოვიდა! სული კბილით მიჭირავს. ჩემ ნივთიერ გაჭირვებასა და შევიწროებას ბოლო არ უჩანს”.

ძალიან უჭირდა ვაჟას, მაგრამ ყოველივეს იტანდა გენიოსის

უზრუნველობით, გმირის მოთმინებით, რადგან იცოდა თავისი და თავისი შემოქმედების ფასი. იცოდა, რომ დადგებოდა დრო, როცა ხალხი დაინახავდა, გაიგებდა ვაჟას ნაღვანს. სიდუხჭირის ატანა იმათ უჭირთ ხოლმე, ვისაც სხვა არაფერი აქვთ იმედად, არაფერი რჩებათ. ჩვეულებრივ მოკვდავთ ასეთი თავგანწირვა არ შეუძლიათ. მათ მხოლოდ სხვისგან განცდილი მძიმე ცხოვრება თუ თავგანწირვა მიაჩნიათ რომანტიკად, სხვისა ჭირის შორიდან ცქერა. „შორიდან კი მაშინაც და ახლაც რომანტიკულად მოჩანს ვაჟას მთაში ყოფნა და ჩარგლიდან თბილისში „ხურჯინით ჩამოტანილი“ ლექსები, მაგრამ ნამდვილად კი პოეტური იყო ფშავის ხევში ჩაკეტვა და შემდგომ არსებობის შენარჩუნებისათვის მიწასთან გამუდმებული ჭიდილი? ამჟამად ორი საათის სავალია ჩარგლამდე, მაგრამ ვაჟას სულ მცირე ორი დღე მაინც სჭირდებოდა თბილისში ჩამოსასვლელად. მით უფრო ჭირდა მიმოსვლა ზამთარში. პოეტი იძულებული იყო თვეობით მოქცეულიყო ფშავის მთებს შორის და მხოლოდ ეოცნება თბილისის ლიტერატურულ გარემოში მოხვედრაზე, რომელიც მისი არსებობის შინაარსიც იყო და პირობაც. თვითონ ვაჟას რომ დაგუთმოთ სიტყვა, ვნახავთ, პოეტს სოფელი და პროვინცია შემოქმედებითი ცხოვრების ბორკილად ესახებოდა და არა შთაგონების წყაროდ, როგორც ხშირად აცხადებენ ხოლმე. „პროვინცია, სოფელი ჩვენში მხოლოდ სმა-ჭამისთვის არის გაჩენილი, თუმცა გერმანიაში როგორც ამბობენ, დიდს ქალაქებს იმდენი ღვანლი არ მიუძღვის მეცნიერების წინაშე, რამდენიც პროვინციას. ჩვენებური პროვინცია კი ისეა მოწყობილი, რომ, თუ რასმე გონებრივს თანხას მოიყოლებ იქ, ისიც იქ შემოგეხარჯება და დარჩები ისეთივე გამოყრუებული, როგორც სხვანი მრავალნი... უბედურება ის არის, რომ სმა-ჭამაში იპოვნით ამხანაგს და საგონებრიო საქმეში კი ამფსონი არავინ გრჩება შენი თავის მეტი. მარტოკა კაცს არა მარტო საქმე, თავის თავიც კი მოსძულდება. ასე ოხრად, აზრის უაღებ-მიცემოდ დარჩენილი კაცი ან სულ დაიჩაგრება, იმედს ჰკარგავს, უარჰყოფს თავის ძალ-ღონეს და ან ბრძნად, მეტისმეტად ჭკვიან კაცად წარმოიდგენს თავს“ (13, 49).

მართლაც, გასაოცარია, რატომ თვლიდნენ ან მაშინ, ან ახლა, რომ ვაჟას მაინცადამაინც მთაში უნდა ეცხოვრა ღუხჭირი

რი ცხოვრებით, რათა დაენერა, ის რაც დაწერა? რომ ჰქონოდა შესაძლებლობა და ზამთარი მაინც თბილისში გაეტარებინა და ზაფხული მთაში, როგორც თვითონ ფიქრობდა, რატომ არ იქნებოდა უმჯობესი? ყაზბეგმა თბილისში არ დაწერა, რაც დაწერა?

უჭირდა ვაჟას და ღუხჭირი ცხოვრებისაგან ხსნას მაინც თავის განათლებაში, მწერლობაში ეძებდა. თვალი ბარისაკენ ეჭირა, იმედს რაიმე სამსახურის შოვნაზე ამყარებდა, მაგრამ ამაოდ. ყურსაც არავინ იბარტყუნებდა. სავაჟაოდ არავინ რაიმე გაიმეტა, არაფერი გამოიძებნა.

ჯერ კიდევ მაშინ, როცა ციმბირის წყლულმა შეურყია კლდე-სავით ჯანი, თხოვნა შეუდგენია თბილისის სათავადაზნაურო გიმნაზიის რექტორის სახელზე, რომელშიც ითხოვდა გიმნაზიის „ეკონომის“ ადგილს, ილია ჭავჭავაძისათვისაც აპირებდა შუამდგომლობის თხოვნას, რათა დაენიშნათ ამ ადგილზე, მაგრამ შემდეგში გადაუფიქრებია.

თიანეთში მომრიგებელი მოსამართლის ადგილზე რომ ტყუილად ააბირეს, ეს ზემოთ ვნახეთ.

1909 წელს ჟურნალ „ნაკადულის“ რედაქტორს მარიამ დემურიას სწერდა: „ძვირფასო დაო, მარიამ! ერთ მოთხრობას გიგზავნი, თუ მოგეწონებათ, დაბეჭდავთ, ამაზე ლაპარაკი ზედმეტია. სალაპარაკო და სათხოვარი ჩემი თქვენთან სულ სხვაა: მე სოფლად ცხოვრება აღარ შემიძლიან, უნდა ამიერიდან ქალაქში ვიცხოვრო. ფიზიკურმა შრომამ გამტეხა წელში, თანაც ვბერდები, ერთი დღე რომ ვიმუშაო ერთი კვირა უნდა ვინვე, ეხლაც ავადა ვარ, უსათუოდ ექიმი და წამლობაა ჩემთვის საჭირო. უნდა, თუ შევძელი, ამ მოკლე ხანში ჩამოვიდე თბილისში და თავის თავს მოვუარო. ჩემმა სოფლად ცხოვრებამ ბევრი არც არაფერი სოფელს არგო და მე ხომ დამაუძღურა ყოველმხრივ: ნივთიერად, გონებრივად, ფიზიკურად და თითქმის ზნეობრივადაც კი. ამიტომ გადავწყვიტე ვიშოვო ისეთი რაიმე სამუშაო (დიდს ჯამგირს არ დავეძებ), რომ იოლად გამოვიდე და ზაფხულობითაც ერთი-ორი თვე თავისუფალი დრო მქონდეს. ვინაც სიყრმიდან აქაურ პირობებში აღზრდილა, შეჩვეულა აქაურ საქმეს, ჯერ ისინი ველარა სძლებენ აქ, მიემურებიან ბარად, შირაქში თუ სხვაგან და მე რის პატრონს, როგორ შემიძლია აქ ცხოვრება?

გარდა ამისა, შვილებიც უსწავლელი მრჩება. მეყოფა ამდენი ძალღ-უმადური ცხოვრება. საზოგადოებას თუ რადმე ეფასება ჩემი თავი, უნდა მიპატრონოს”.

ამ წერილის გაგზავნაც გადაუფიქრებია ვაჟას. ჩანს, ველარც ბარში, ქალაქში, ცხოვრება წარმოედგინა თავისი. ოჯახს რას უზამდა, რით აცხოვრებდა იქ. სოფლურ ყოფას მიჩვეულნი როგორ შეეგუებოდნენ თბილისს. შეიძლება მეუღლე თამარიც იყო წინააღმდეგი.

ვაჟა რომ საზოგადოებისაგან ყურადღებას ითხოვდა, ამას ისე ნუ გავიგებთ, თითქოს დიდი წარმოდგენა ჰქონდა თავის თავზე და რალაც განსაკუთრებულ დაფასებას მოითხოვდა, რალაცა პრეტენზიებს აცხადებდა. არა. როგორც თანამედროვენი გადმოგვცემენ, ვაჟა ძალზე მორიდებული ყოფილა, თავმდაბალი, უბრალო. ერთხელ, თბილისში ყოფნისას აჩქარებით შესულა სანდროსთან და პაპიროზისათვის მოუკიდებია: ძალიან მომინდა, მაგრამ ქუჩაში ხომ არ გავაბოლებდიო.

ვაჟა ძალზე ცოტას ითხოვდა, მინიმუმს, იმის მეთავედს, რაც ეკუთვნოდა და რასაც არ აძლევდნენ, მაშინ, როდესაც მის თვალწინ სხვა დაუმსახურებლად ათმაგს იღებდა. თუნდაც ის რა იყო, რომ რედაქციის თანამშრომელი და ზოგიერთი „წარმატებულნი“ მწერალნი სამჯერ მეტ ჰონორარს იღებდნენ, ვიდრე ვაჟა.

საზოგადო მოღვაწე გიორგი ლასხიშვილი იგონებს:

„როცა „ივერიაში“ ვმუშაობდი, აკაკიმ რამდენჯერმე ლექსები მოგვიტანა დასაბეჭდად, ჰონორარს კარგს ვაძლევდით. არ მახსოვს რამდენს, მაგრამ ჩვეულებრივზე ბევრად მეტს. მაგალითად 3-4 ჯერ მეტს, ვიდრე ვაჟა-ფშაველას“... ილიას განკარგულება მოეხდინა — აკაკის მიეცით, რაც მოითხოვოსო. მიუხედავად ამისა, აკაკი მაინც უკმაყოფილო იყო. მე თვითონ გამიგონია მისგან: „ივერიაში არაფერს მაძლევენო“ („მემუარები“, ტფილისი, 1934 წ. გვ. 260.).

თბილისის საზოგადოებისაგან რამდენი უგულვებელყოფა და არად ჩაგდება ჩანს ვაჟასი თუნდაც იმ ფაქტიდან, ალექსიმესხიშვილის საიუბილეოდ სპეციალურად მთიდან ჩამოსული ქუჩაში რომ აყურყუტეს.

ვაჟა იმ იუბილისათვის, რომელიც 1913 წელს ჩატარდა, სპე-

ციალურად მომზადებულია. მის ლექსზე ნიკო სულხანიშვილს მუსიკა დაუნერია და გუნდი მოუმზადებია, რომელსაც დიდი ალტაცება გამოუწვევია. ვაჟას განზრახული ჰქონია იუბილეზე ლექსის წაკითხვა, მაგრამ მისთვის არა თუ მონაწილეობა მიუღებინებიათ, არამედ სალამოზე დასასწრები ბილეთიც კი არ დაუხვედრებიათ. ვაჟას ქუჩაში უცდია სალამოს დამთავრებამდე. როგორც კი დამთავრებულა სალამო და ნ. სულხანიშვილი და დ. პავლიაშვილი გამოსულან, ვაჟას ეტლში ჩაუსხია ისინი და ვერის ერთ სარდაფში ჩაუპატიჟებია.

„— ნიკო, — უთქვამს ვაჟას, — მე ღირსი არ შევიქმენ მესხიშვილის სალამოზე მიპატიჟებისა, ამიტომ კარში დავრჩი და მხოლოდ ველოდი შენს გამარჯვებას. მართლაც, ბრწყინვალედ გაიმარჯვე და მიხარია, მხოლოდ ერთს გთხოვ: „ტაშს არ აჰყვე, ტაშს დაგიკრავენ და მშიერს მოგკლავენ“.

ფშაურად ჩაცმულ, გლეხური გარეგნობის ვაჟას თავის საზოგადოებაში გარევა იმათ, ვინც უმეტესობას წარმოადგენდა ასეთ სალამოებზე, არა სიამოვნებდათ, თაკილობდნენ. „ბრწყინვალე“ საზოგადოებით სავსე თეატრის შენობაში კი არა, ცხენის ტრამვაიში, „კონკაშიც“, კი არ ეხდინებოდათ იმათ, ვინც არ იცნობდა. უცნობთ ვაჟა ვილაცა სოფლელი გლეხი თუ მწყემსი ეგონათ ხოლმე. ამას, ალბათ, მის გლეხურ, ჩაშავებულ, დაკორძებულ ხელებზეც „ხვდებოდნენ“.

... ფშავიდან ჩამოსული ვაჟა სადგურიდან „კონკას“ გამოჰყვა ვერისაკენ, ხურჯინი აიტანა და დაჯდა: სანდროსთან მიდიოდა. ერთ-ერთ გაჩერებაზე ვინმე კნეინამ დააპირა ამოსვლა, მაგრამ თავისუფალი ადგილი რომ არ იყო, უკანვე ჩავიდა. მედროგემ ვაჟას უყვირა: ჩაიტანე ეგ შენი ხურჯინი და ჩადი — ადგილი დაუთმე კნეინასო!

— რადა, ძმაო, მეც კაცი ვარო, — ბრაზი შეიკავა ვაჟამ. მედროგემ ვაჟას დაბალი ტონი ქალაქში მოხვედრილ სოფლელთა სიმფრთხალედ მიიღო და უფრო გაბლენძილმა უყვირა ვაჟას, ჩაეთრევი თუ არაო და მისი ხურჯინი ძირს გადაუძახა. ვაჟამ არც აცია, არც აცხელა, ბარაქიანი სილა მოუნიავა და ხურჯინს მიაყოლა თავდაყირა. გონს მოსულმა მედროგემ პოლიციელს მოუხმო და „მეუფნებელი სოფლელის“ დასჯას ითხოვდა. პოლიციელი მედროგესავით ბრიყვი არ აღმოჩნდა. როცა გაიგო, რომ

სოფლელი ვაჟა-ფშაველა იყო, მედროგე დატუქსა.

„საზოგადოებას თუ რადმე ეფასება ჩემი თავიო“, – წერდა ვაჟა და ამ სიტყვებიდან ჩანს, რომ მისთვის ნათელი იყო – საზოგადოებას არაფრად ეფასებოდა მისი თავი. მიხეილ ლობჯანიძისადმი საპასუხო პირად წერილში ვაჟა წერდა: „აკაკის დაკრძალვა დიდებული იყო – მწერ. დარწმუნებული ვარ, ფიცი არაა საჭირო. ჩვენის მოღვაწეების დამარხვაში ქართველები დიდს ნიჭსა და უნარს ვიჩენთ, ხოლო სიცოცხლის დროს იმათ დაფასების უნარისა რა მოგახსენო; ჩემთვის, მგალითად, დასაკრძალავი ალაგი ოცი წელია მას შემდეგ, რაც აიჩინა, დაინიშნა და შემოიფარგლა, ხოლო ამ ოცი წლის განმავლობაში სად, როგორ ვცხოვრობ, არავინ არ იცის. ასეა, რა გაენყოფა, ყველაფერს დრო და გამოცდილება უშველის და გაასწორებს მრუდად ნაჩორკნს საქმეს“...

საზოგადოებას როცა ვახსენებთ, მხედველობაში გვყავს თბილისის ე. წ. მაღალი საზოგადოების ის ნაწილი, ვისაც შეეძლო ვაჟას სიტყვებითვე რომ ვთქვათ, „მორალური და ნივთიერი მხარდაჭერა“, თორემ საზოგადოების გარკვეულმა ნაწილმა იმთავითვე გაუგო ვაჟას. ბევრს ესმოდა ვაჟასი, გულიც შესტიკიოდა, მაგრამ სამწუხაროდ მათ არაფერი შეეძლოთ. პეტრე უმიკაშვილიც ზოგიერთი სხვა ამგვართა მსგავსად, წუხდა, განიცდიდა ვაჟას მდგომარეობას. მას მთაში მიუწერია წერილი ამბის გასაგებად, შესახშიანებლად. პასუხად ვაჟა სწერდა: „მადლობა ღმერთს, თუ ერთ ადამიანს მაინც ვახსოვარ. დიდად გმადლობ, რომ გადარდებთ ჩემი ყოფნა-მდგომარეობა. ნეტავი ისე სხვას ადარდებდეს. მკითხავთ როგორა ვარ, რას ვფიქრობ, რას ვწერ. უნდა გატეხილი გითხრა, ვერა ვარ კარგად ვერც ერთის მხრით, უფრო კი ზნეობის მხრით. ხანდახან ჩემს თავს ვგმობ, რატომ მეც, როგორც სხვებმა არ ვიფიქრე ცხოვრებაზე, არ ვუგორდი ლეკვივით დიდთა ამა ქვეყნისათა, არ ვულოკე ფეხები, არ ვულაქუცე, მაგრამ თავს ამით ვმართლულობ, არ შემეძლო მე ასეთი თავის დამდაბლება და არც ესლა შემეძლიან“...

საზოგადოებისაგან ასე გულდათუთქულ ვაჟას მომავალზე ჰქონდა იმედი დამყარებული, ეჭვიც არ ეპარებოდა, რომ მისი დროც დადგებოდა:

„მაგრამ გაიგებთ ერთხელაც, ვინ ახლო ვდგევართ ღმერთთანა“.

ვაჟას მიმართ ასეთ უსულგულო, ასეთ აბუჩ დამოკიდებულებას, განსაკუთრებით ზოგიერთი მთიელისას, როცა ვისმენდი ან სადმე ამოვიკითხავდი, ბევრი რამ ჩემთვის (და, რალა თქმა უნდა, სხვისთვისაც) მაინც გაუგებარი რჩებოდა. გასაგებია ის, რომ მეფის რუსეთის მთავრობა ათვალწუნებით უცქეროდა, მაგრამ ვაჟას შეურაცხმყოფელ ბევრ ქართველს, ბევრ მთიელს ხომ მთავრობასთან არაფერი აკავშირებდა? ისინი რალას ერჩოდნენ ვაჟას?

და, აი, 1991-1992 წლების მიჯნაზე, ჩვენი ეროვნული მთავრობის დამხობის შემდეგ ეროვნული ძალების დევნამ, ბევრი უმსგავსობის საკუთარ თავზე გამოცდამ, ყველაფერი ნათელი გახდა: ვაჟას ერჩოდნენ, როგორც ილია ჭავჭავაძის მიმდევარს – „ილიელს“. ეს ხომ მაშინ იგივე იყო, რაც ჩვენ დროში ზვიად გამსახურდიას კურსის (იგივე ილია ჭავჭავაძის კურსის) ერთგულება ანუ „ზვიადისტობა“. ყოველივე ხომ, საოცარი სიზუსტით განმეორდა.

მეფის რუსეთის ჩუმი თვალთვალი, ჩუმი ბრძოლა ვაჟასა და სხვა ეროვნული დამოუკიდებულობისათვის თავშენიერულთა მიმართ რა სახსენებელია თვით ქართველ „ახლებურად მოაზროვნეებთან“, ვინც მთელი სისასტიკით, აშკარად სპობდნენ „ძველებურად მოაზროვნეებს“, „ნაციონალისტებს“, „კლასობრივ მტრებს“ და ა.შ. ჩანს ის, ვინც ცდილობდა „უფროსებისათვის“ ესიამოვნებინა, მათი წყალობა დაემსახურებინა, ანდაც თავი ახალი დროის კაცად წარმოეჩინა, ამასთან ერთად თავისი ღრძო გულიც მოეფხანა, თავს ვალდებულად თვლიდა ვაჟასთვის ემტრო, აბუჩად აეგდო. თავისი უფროსი ძმაც კი, აქაოდა ვაჟას ძმობით არაფერი შარი მომიდონ, ეს „ქერის ორმო“ არ დამაკარგვინონო, ქვეყნის დასანახად შემთხვევას არ უშვებდა, რომ ვაჟა დაემციებინა. ჩანს, დახმარებასაც იმიტომ არ უწევდა. ვილაცხა სოფლის მახინჯი ვაჟაკობას მოინადინებდა, ვაჟას ცემით ყოყონობას და სულ არაფრის გამო სილას გაულანწუნებდა. იცოდნენ უკვე ჯანგატეხილი ვაჟა საკადრის პასუხს ვერ გასცემდა, ამისთვის მათ არც პასუხს ვინმე მოსთხოვდა და... „დაჭრილ არ-

წივსა” თუ „ბებერ ტოტიას” ეხლა თვითონ დაემსგავსა. იყვნენ ისეთებიც, ვინც ვაჟას დაცვას ცდილობდნენ, მაგრამ ისე ცოტა-ნი იყვნენ, რომ საამისო ამინდს ვერ ქმნიდნენ.

მიუხედავად ასეთი უსულგულო, გულგრილი და ზოგჯერ დანაშაულამდე მისული დამოკიდებულებისა, ვაჟას გული მაინც ვერ გაუავეს. ზურგი არ უქცევია მას არც საზოგადოებისა და არც ქვეყნისათვის. მისი დიდბუნებოვანი, ვაჟკაცური სული არ დანვრილმანებულა, ვერ დათრგუნა ამქვეყნიურმა ამაოებამ. ყოველივე ამის საპასუხოდ ვაჟა მაინც ცას შესცქეროდა და ისე ამბობდა:

**„დამსეტყვე, ცაო, დამსეტყვე, აქა ვარ ჩემი თავითა,
გულითა გაუტეხელი, მოულალავი მკლავითა.
რაც უნდა ჭირი მომკერძო, ბილნთ არ შევეკვრი ზავითა,
მცნებას ვერ შემაცვლევინებ მოზღვავებულის ავითა!”**

ვაჟას ასეთი ცხოვრებიდან, ვაჟას საზოგადოებასთან ასეთი დაპირისპირებიდან გამომდინარეობს ის ზოგადსაკაცობრიო პრობლემა, რასაც პიროვნებისა და საზოგადოების ურთიერთობა ჰქვია და რაც ასე მძაფრად აისახა მის შემოქმედებაში. უდიდეს ჰუმანიზმთან ერთად ვაჟას მთელი შემოქმედება აღბეჭდილია პიროვნების ღირსების დაფასების პათოსით.

ქართული ლიტერატურისათვის უბრალო თვალის გადავლენაც კი საკმარისია, რომ დაკვირვებულმა მკითხველმა ერთი რამ შეამჩნიოს: ბევრი მწერალი (ან მწერლის ზოგიერთი ნაწარმოები) ისე ვერ არის, ან ისე არ არის გაგებული, როგორც ამას ჭამმარტივება მოითხოვს.

მიუხედავად იმისა, რომ ვაჟა-ფშაველას შესახებ ბევრი გამოკვლევაა დაწერილი, გამოკვლეული ჯერ კიდევ მაინც ცოტაა. ამ ზღვა ნაკვლევ-ნაძიებში გამორჩევით ფასეულია გრიგოლ კიკნაძის ფუნდამენტური მონოგრაფია „ვაჟა-ფშაველას შემოქმედება”, რომელიც 1957 წელს დაიბეჭდა. (ავტორს ამ ნაშრომით სადოქტორო დისერტაციის დაცვა ცეკას მითითებით ჩაუგდეს 1945 წელს). ამ ნაშრომის გამოქვეყნების შემდეგ იწყება ვაჟას სწრაფი აღმასვლა, ბოლოს და ბოლოს, ვაჟას ნააზრევის

ძირითადად სწორი გაგება. თუ მანამდე ვაჟასადმი წაყენებული იყო ბრალდებები კუთხური მელექსეობისა, ანიმისტობისა, თემური ყოფის აპოლოგეტობისა, ქართული ენისა და მწერლობის ხუთი საუკუნით უკან დაწევისა და სხვა ამგვარები, გრ. კიკნაძის ხსენებული ნაშრომით ითქვა, რომ ვაჟა ყოფილა უდიდესი მოაზროვნე, უდიდესი ჰუმანისტი, მსოფლიო მნიშვნელობის მწერალი და ილიასა და აკაკისთან ერთად ფუძემდებელი ახალი ქართული სალიტერატურო ენისა. ახსნილია ვაჟას ორიგინალურობა და განუმეორებლობა, როგორც ბუნების მხატვრისა, „უსულო საგნებისადმი სულის ჩამდგმელისა”. მაგრამ ამ მონოგრაფიაში მთავარი მაინც ის არის, რომ ვაჟა თავის საუკეთესო პოემებში – „ალუდა ქეთელაური”, „სტუმარ-მასპინძელი”, „გველის-მჭამელი” – თურმე თემურ ყოფას, მთის ადათ-წესებს კი არ აიდიანებდა, ან მავენე ტრადიციების წინააღმდეგ კი არ იბრძოდა, როგორც ეს მანამდე მიაჩნდათ, არამედ სვამდა საერთო-საკაცობრიო პრობლემას საზოგადოებისა და პიროვნების ურთიერთობისას. ეს პრობლემა კი, როგორც ცნობილია, ძალზე მტკივნეული პრობლემაა ყველა დროისა და ყველა საზოგადოებისა. (25, 58).

საყოველთაოდ აღიარებულია, რომ მოწინავე პიროვნება თავისი პროგრესული შეხედულებებით ხშირად უპირისპირდება თავის თანამედროვე საზოგადოებას, კონსერვატულს, ერთხელდაერთხელ მიღებული კანონების მტკიცედ დამცველს. პიროვნება დროს უსწრებს, სურს თავი დააღწიოს შეზღუდულობას, საზოგადოებასაც აქეთკენ მოუწოდებს, მაგრამ ხშირად მისი არავის ესმის და მასაც აიძულებს „თავის ქერქში დაეტიოს”. პიროვნებას არ ძალუძს უკან დახევა, თავისი რწმენის ღალატი, ის თავის იდეალს ეწირება, იღუპება უთანასწორო ბრძოლაში, მაგრამ ადრე თუ გვიან, საზოგადოება მაინც იზიარებს თავის მიერ განწირული პიროვნების ნააზრევს, მის მიერ ნაჩვენებ გზას ადგება, სიბნელიდან სინათლისაკენ გასასვლელ გზას. მერე ინანიებს საზოგადოება: თურმე ის კაცი მართალი ყოფილა, ვერ გავუგეთ, ტყუილად გავწირეთ, გულისხმიერება ვერ გამოვიჩინეთ, პატივის ნაცვლად ტანჯვა მივაგეთო.

ასეთ პიროვნებათა რიგში დგას თვით ვაჟა-ფშაველაც. ამიტომ ეჭვგარეშეა, რომ ზემოთ ხსენებულ პოემათა მთავარ პერ-

სონაჟებში – ალუდა ქეთელაურში, ჯოყოლასა და მინდიაში – ვაჟა თავისთავს გულისხმობდა, თემში კი – თავის თანამედროვე საზოგადოებას. შეუძლებელიც კია ვაჟას ისევე, როგორც საერთოდ მწერლობის წესია, მთავარ დადებით გმირებში თავის თავი არ ეგულისხმა, თავისი მრწამსი არ გადმოეცა. პოემა „გოგოთურ და აფშინას“ მთავარ პერსონაჟ გოგოთურში რომ თავის თავს გულისხმობდა, ეს ორჯერა აქვს ნათქვამი: ჯერ სტატიაში „Pro domo sua“ და შემდეგ იპოლიტე ვართაგავასათვის გაცემულ პასუხში.

„გველის-მჭამელში“ ძალზე იოლად ამოსაცნობი იყო და ამოიცნეს კიდევ მაშინვე – ბუნების მესაიდუმლე მინდია, ვაჟა არისო! ისიც ბუნების ენის მცოდნეა და ესეცო!

მიაჩნიათ, რომ „ალუდა ქეთელაურსა“ და „სტუმარ-მასპინძელში“ საზოგადოებისა და პიროვნების საკითხია დასმული. იგივე საკითხია „გველის მჭამელშიც“ ძირითადად. მთავარი ადგილი იმას ეთმობა, თუ როგორ არ ესმის საზოგადოებას ბუნების მესაიდუმლის – მინდიასი, როგორ აიძულებენ მას ირგვლივ მყოფნი მათსავით „ნორმალურად“ იცხოვროს, რის შედეგადაც აკარგვინებენ ქვეყნისათვის უფრო სასარგებლო საქმის უნარს. იქ კი ქაჯებს (იმდროინდელ მაღალ საზოგადოებას) სწყინთ მინდიას (ვაჟას) გამეცნიერება, მათ მარაქაში გარევა.

შეუძლებელიც კია თავის ამ უმთავრეს პოემებშიც („ალუდა ქეთელაურსა“ და „სტუმარ-მასპინძელში“), სადაც პიროვნებისა და საზოგადოების ურთიერთობის საკითხია კონკრეტულად დაყენებული, მწერალს თავისი თავი არ ეგულისხმა. სწორედ იმიტომ, რომ ვაჟა თვითონ იყო საზოგადოებისაგან ერთგვარად გარიყულ-განაპირებული, თვითონ იყო ალუდასა და ჯოყოლას დღეში, როგორც ეს ზემოთ აღწერილი მისი ცხოვრებიდან ვნახეთ. ვაჟას თავის თავზე შეეძლო ეთქვა ჯოყოლას სიტყვები:

**„მარტოკამ უნდა ვიომო, მთელმა ჯარეგამ ნახოსა,
ვინ ერთგულია, ვინ არა, ქვეყანამ დაინახოსა“.**

ვაჟასაც მთაში განმარტოებულს, მარტოდ მდგომს ცხოვრების სიდუხჭირისა და უკულმართობების პირისპირ ისევე უხდებოდა სამკვდრო-სასიცოცხლო ბრძოლა, როგორც ჯოყოლას.

ვაჟა ამ პოემებში აყენებდა საკითხს პიროვნების, ადამიანის ღირსების დაცვისას. ვაჟასთვის ყველა ადამიანი ერთნაირად დაფასების და ყურადღების ღირსია. ადამიანის აბუჩად აგდება არ შეიძლება, არ შეიძლება დაცინვა. მართლაც, ვაჟას შემოქმედებაში არსად გამჟღავნებულია დაცინვა, სატირა. თუ სადმეა რაიმე იუმორი, ისიც მსუბუქია და უწყინარი.

ვაჟა-ფშაველამ თავის ამ უმთავრეს პოემებში, შოთა რუსთაველის მსგავსად, დააყენა ადამიანების, სხვადასხვა ეროვნებისა თუ რელიგიის მქონე ხალხთა ურთიერთნდობის, გაგების, დამეგობრების საკითხი, რაც ასე აქტუალური პრობლემაა დღესაც მთელ მსოფლიოში, რის წყურვილსაც ასე განიცდის კაცობრიობა, და ის, რომ შუასაუკუნეობრივ, ფანატიკურ, შოვინისტურ შეხედულებებზე წინ უნდა წამოვწიოთ „ერთურობის ცნობა და დანდობა“, რომ არავინ არ უნდა გაიძახოდეს:

**„... კაცნი ჩვენა ვართ, მარტო ჩვენ გვზრდიან დედანი,
ჩვენა ვსცხონდებით, ურჯულოთ კუპრში მიელის ქშენანი“.**

ვაჟას ქომაგნი

ერისა და ერის შვილთა ქომაგად ბევრჯერ გამოსულა ქართველი ქალი. ვაჟასაც ისევე და ისევე მაღალი წრიდან გამოსული ქალი, მწერალი დომინიკა ერისთავი („განდეგილი“), გამოესარჩლა. მან 1913 წელს „სახალხო გაზეთში“ გამოაქვეყნა წერილი, სადაც დააყენა ვაჟასადმი ყურადღების გამოჩენისა და მისი სამწერლო ასპარეზზე გამოსვლის 35 წლის იუბილის გამართვის საკითხი: „რომელმა ქართველმა არ იცის, ვინ არის ვაჟა-ფშაველა! სადაც იხსენიება სახელები ჩვენი მწერლობის დედაბოძთა – ილიასი და აკაკისა, იქ შეუძლებელია ვაჟას სახელიც არ იქნეს მოხსენებული. ვაჟა-ფშაველათი ვამაყობთ ჩვენ, მისი ქვეყნის შვილები. მოწინებით ვიხსენიებთ მის სახელს, აღტაცებით ვკითხულობთ მის ნაწარმოებებს და ამას ვერ გავცილებივართ. დრო კი არის, რომ ეს ჩვენი, მართლაც, წრფელი სიყვარული საქმით ვუჩვენოთ მგოსანს, დავუმტკიცოთ, რომ ჩვენ შევიგენით ეს დიდებული პიროვნება. საჭიროა ვაჟა-ფშაველა

ნივთიერად უზრუნველყოფილი იქნეს.

შესაძლოა თქვან – ნახევარი საუკუნეა მწერლის სამადლობ-
ლად ვადად დადებულიო. ვაჟამაც მოგვიცადოს კიდევ თხუთ-
მეტ წელიწადს და მერე ვიზიემოთ იმის იუბილეო.

ეს ასე არ უნდა იყოს. თუ ვინმესათვის საჭიროა 25-30 წლის
იუბილე, ეს უნინარეს ყოვლისა, მწერლისათვის უნდა იყოს
დადგენილი, რადგან ამ ასპარეზზე მოღვაწენი იშვიათს შემ-
თხვევაში მიაღწევენ ხოლმე ამ ხანს...

დღეს მხოლოდ ჩვენში შეიძლება მოხდეს ეს, რომ ისეთი დი-
დი მგოსანი, როგორც ვაჟა-ფშაველაა, არათუ უზრუნველყო-
ფილი არ არის, დიდს ნივთიერს ნაკლოვანებას განიცდის და
ხმას არავინ იღებს.

ვაჟას შეეძლო უზრუნველყო თავისი თავი, ცოლ-შვილი,
ამისათვის ჯანოც შესწევდა და სწავლაც, მან კი ქვეყნის სამსა-
ხურს ანაცვალა საკუთარი ბედნიერება.

მე მივმართავ მგოსნის სატრფო-სამშობლოს, მივმართავ
ვაჟას პატივისმცემელთ, მივმართავ წერა-კითხვის საზოგა-
დობას და განსაკუთრებით ახალგაზრდა საქართველოს, და-
უყოვნებლივ შეუდგენენ იმის მოგვარებას, თუ როგორ უზრუნ-
ველყო ჩვენი საყვარელი მგოსანი. ჩვენ ვერ ავუვლით გვერდს
ვაჟას საარსებო საკითხს, რადგან უზრუნველყოფა ვაჟასი უზ-
რუნველყოფა იქნება ჩვენი პოეზიისა”.

ვაჟამ არა მარტო წყენის გადახდა იცოდა „სიტყვით თუ
საქმით”, სიკეთეს, თბილ სიტყვასაც არავისას დატოვებდა
უყურადღებოდ. დამზრალ გულს პატარა სიტბოც დიდ სიამეს
ჰგვრიდა და იმავ წუთს მადლობას უხდოდა. „განდეგილსა” და
შიო მღვიმელს, თავის კეთილისმყოფლებს, სულიერ მეგობ-
რებს მაშინვე გამოეხმაურა ლექსით:

**„კარგებო, თქვენი ძახილი ბარით შამესმა მთაშია,
ფენის ფრჩხილებში გაჟონა ჟრჟოლამ, დაკრულმა თავშია”.**

ბრწყინვალე ქართველი ქალის ამ გულმხურვალე მონოდე-
ბის ზოგიერთი რედაქცია გამოეხმაურა. ალაპარაკდა საზოგა-
დობა ვაჟასათვის საიუბილეო საღამოს ან დილის გამართვის
თაობაზე. მაგალითად, გაზ. „თემმა” გადაბეჭდა „განდეგილის”

წერილი იმ დაპირებით, რომ თავის მხრიდანაც მიუძღვნიდნენ
ამ საკითხს სტატიას, მაგრამ ყველაფერი ჩაიშალა.

თბილისში მიწყნარდნენ და სწორედ ამ დროს ქუთაისმა, შე-
საძლოა ერთგვარად აკაკის მიერ მიყენებული წყენის გასაქარ-
ვებლად, ვაჟა მიიწვია ილიას ხსოვნის საღამოზე. ეს უკვე მეო-
რე მიწვევა იყო. პირველად 1910 თუ 1911 წელს მიიწვიეს. მაშინ
უფერულად ჩაიარა საღამომ. მეორე მიწვევა უფრო შთამბეჭდა-
ვი გამოდგა.


ამ დროს, მე-20 საუკუნის დასაწყისში, ქუთაისში ცხოვრობ-
და საქართველოს უძლიერესი, შემოქმედებითი, მონინავე ინ-
ტელიგენცია. ჩვენი კულტურისა თუ მეცნიერების რა დარგს არ
ჩაუდგნენ სათავეში აქედან გამოსულნი. განსაკუთრებით კაშ-
კაშა იყო მწერალთა თანავარსკვლავედი: გალაკტიონ ტაბიძე,
კონსტანტინე გამსახურდია, ტიცვიან ტაბიძე, ვალერიან გაფ-
რინდაშვილი, დავით კლდიაშვილი და სხვანი.

ქუთაისში ვაჟას მიწვევასთან დაკავშირებით უკვე საზ-
ღვარგარეთ მყოფმა გრიგოლ რობაქიძემ ასეთი რამ დაწერა:

„... 1909 წლის დამდეგს ლექცია ვაჟაზე დამზადებული
მქონდა უკვე. გაიმართა იგი ქართულ თეატრში თებერვლის
მინურულში. თეატრში ტევა არ იყო. ლექცია ავაგე უმთავრე-
სად „გველის-მჭამელის” გარჩევაზე... ლექციაში გადმოვშალე
დედაგული ვაჟას შემოქმედებისა. დიდი შთაბეჭდილება მო-
ახდინა ამ გადმოშლამ. ვაჟას კულტი, უნდა ითქვას, დღითგან
ჩემი ლექციისა იწყება... ამას არავინ ახსენებს. „იქ” არ იხსენე-
ბენ, რადგან ჩემ სახელს „ვერ” ახსენებენ...

... თუ რა დიდი აღფრთოვანებით შეეგება ვაჟას 1911 წელს
(ს. ყუბანეიშვილი 1910 წელს ასახელებს – გ.ხ.) ქუთაისი დავით
კლდიაშვილის მეთაურობით ილიას ხსოვნის აღსანიშნავად
გამართულ ლიტერატურულ საღამოზე, რომლის მონაწილედ
მთების მომღერალი იყო მოწვეული. ქუთაისი ვერ შეხვდებოდა
ვაჟას ასეთი დიდი შეფრქვევით თუგინდ დავით კლდიაშვილის
მეთაურობითაც, რომ იგი ორი წლის წინ ჩემ მიერ არ ყოფილი-
ყო მომზადებული. ეს სერგომაც (დავითის შვილმა – გ.ხ.) კარ-
გად იცის, მაგრამ არ ახსენებს, რადგან ვერ ახსენებს”. (38; 161,
162). ვაჟა თბილისში ხშირად ჩამოუსვლელობის მიზეზად შესა-

ფერისი ჩასაცმელის უქონლობას ასახელებდა ხოლმე ახლობლებთან. მით უმეტეს იმერეთში, ქუთაისში, ეთაკილებოდა ვაჟას ფშაური ახალუხით ჩასვლა. მხედველობიდან არც ეს გამოჰპარვიათ ტაქტიან მასპინძლებს და ტაქტიანად მონოდეს ვაჟას ტანისამოსისა და მგზავრობის ფული. ამას სხვაგვარი მიზანიც ჰქონდა: დასავლეთ საქართველოს მცხოვრებთათვის უნდოდათ ახლოს გაეცნოთ და შეეყვარებინათ ვაჟა, რადგან იქ განსაკუთრებით ძნელად ეგუებოდნენ ფშაურ დიალექტს.



უკანასკნელი ფოტო გადაღებული ჩარგალში 1915 წელს.

„დანიშნულ დღეს ვაჟა ეწვია ქუთაისს და გამოწყობილი მივიდა პეტრე ყიფიანთან:

– ძალიან გამოჩინებულხარ, ვაჟას ჭირიმე! ეხლა კი ვაჩვენებ შენ თავს ქუთაისს! – მისებური ხარხარით შეხვდა პეტრე ყიფიანი ვაჟას. ვაჟა კი ოდნავ იღიმებოდა!” – იგონებს დავით კლდიაშვილი.

თეატრის შენობაში გამართულ საღამოზე „შეიკრიბა ხალხი, თუმცა არა იმდენი, რამდენსაც მოველოდით... აიხადა ფარდა და პირველად გამოჩნდნენ სცენაზე ქუთათური მწერლები, რომლებმაც წაიკითხეს თავიანთი ნაწარმოებები, იმღერა მომღერალმა აკოფაშვილმაც. ყველა გაფაციცებით შესჩერებოდა სცენას და ელოდა მთის მგოსნის გამოსვლას. გამოჩნდა თუ არა ვაჟა-ფშაველა, ჩვეულებრივ ჩოხა-ახალუხით, ატყდა დაუსრულებელი ტაშისცემა. როდესაც დაწყნარდა საზოგადოება, მგოსანმა წაიკითხა რამდენიმე თავისი ნაწარმოები.

ლექსები ისეთი მოხდენილი დეკლამაციითა და გრძნობით იყო წაკითხული, რომ დიდი აღტაცება გამოიწვია საზოგადოებაში. მგოსანი ტაშისცემით ოთხჯერ-ხუთჯერ გამოიწვიეს და ათქმევინეს სხვა ლექსები. ქანდარიდან მოსწავლე ახალგაზრდობამ მოაძახა: „დაჭრილი არწივი!“, რომელიც მგოსანმა წაიკითხა მოხდენილად და მეტად მგრძნობიარედ. ახალგაზრდა მგოსანმა ს. ფაშალიშვილმაც ასიამოვნა დამსწრე საზოგადოებას თავისი ლექსებით. დაბოლოს, მგოსანი ვაჟა-ფშაველა კიდევ გამოჩნდა სცენაზე და წაიკითხა იქვე დაწერილი ლექსი „იმერეთს“. საღამო დამთავრდა 12 საათის ნახევარზე. საღამოს დამთავრების შემდეგ საზოგადოება ტაშისცემას დიდხანს განაგრძობდა და არ დაიშალა, სანამ ვაჟა-ფშაველა ნაბდით და ყაბალახით არ გამოჩნდა კიდევ ერთხელ სცენაზე”. (ლ. ბზვანელი).

მართლაც, ძალზე თბილად მიიღო ქუთაისის საზოგადოებამ ვაჟა, განსაკუთრებით ახალგაზრდობამ. ჩანს, არც ვაჟა ელოდა ამდენ სიტბოს. მას, გრძნობამორეულს, იქვე, სცენის კულისებში, შეუთხზავს და მერე სცენიდან წაუკითხავს ლექსი „იმერეთს“:

**„ერთხანად ჩემო მძრახაო, ლიხს აქეთურო დედაო!
გხედავ რომ შემრიგებინარ, მით შენთან სალამს ვბედაო.
შაერთებულად შენშია ქართლსა და კახეთს ვხედაო.
ფარ-ხმალო საქართველოსავ, სხვაცა გბაძავდეს, ნეტაო!
ის მომწონს, თავის ქვეყნისა კარებს რო მაგრა ჰკეტაო...
ვნება ნუ ასცდეს, სავნებლად, ვინაც შენ გაგიმეტაო!”**

საღამოს შემდეგ ვაჟას სუფრა გაუშალეს რესტორანში. თამადამ თეოფილე ხუსკივაძემ, ვაჟასადმი მიმართული ლამაზი

სადღეგრძელო დაამთავრა სიტყვებით: „მადლობელი ვართ, ვაჟა, იმ დიდი ღვანლისათვის, რომლითაც შენ ქართული ლიტერატურა გაამდიდრე და დაამშვენეო!”

ვაჟამ მოისმინა, თითქოს არ ეამა მისდამი სამართლიანად მიძღვნილი სიტყვა და უპასუხა: „მაპატიეთ, იმერლებმა ცოტა გადაჭარბება იცით. კაცს, სწყუროდეს, წყურვილი მოიკლას, ამისათვის რა მადლობის ღირსიაო? მეც, არც მეტი, არც ნაკლები, მწყურია და წყურვილს ვიკლავ, მადლობა რად მეკუთვნის? მემღერება და ვიმღერეო!”.

ქუთაისში ვაჟა თებერვალში იყო. შემდგომ თვეებში, იმავე 1913 წელს, ლიტერატურულ საღამოებზე მიიწვიეს ჭიათურაში, ფოთში, გორში, ხაშურში და ყველგან აღტაცებით ხვდებოდნენ. ისევ პროვინციებში შემორჩენილმა ეროვნულმა სულმა მოუღიხინა ვაჟას, ისევ იქ შემორჩენილი სუფთა სიტყვა და გული ექნა მალამოდ ვაჟას დაჭრილ გულს. ეს იყო და ეს, მას შემდეგ ვაჟას იუბილეს გადახდაზე ჩამიჩუმიც აღარა ყოფილა.

ილიას ხსოვნისადმი მიძღვნილი ასეთი საქველმოქმედო, სახალხო საღამოები, ჩანს, ნიშნის მოგებად ერგებოდა მის მკვლევებს, გულზე ეკლად ეხეოდა. ამიტომ ქუთაისში გამართული საღამოს მიმართაც შხამი და გესლი გადმოანთხიეს. ვაჟამ ეს აღიქვა როგორც არაადამიანური მკრეხელობა და მათ საპასუხოდ გაზ. „სახალხო ფურცელში” გამოაქვეყნა „მცირე შენიშვნა”:

„გაზ. „საქმეში” 84, დაბეჭდილია წერილი (ბ. ლალღასი), რომელიც შეეხება ქუთაისში გამართულ ილიას საღამოს და იქ ჩემ და სხვ. მიერ წარმოთქმულ ლექსებს. აზრი ამ წერილისა გამოინახება იმაში, რომ ჩვენ, ნაციონალისტებმა, ილიას ხსოვნა, სახელი, გავხადეთ ექსპლოატაციის საგნად, დავედგით მის მოაზრედ და ამით ხალხს ვაბრიყვებთ; დიალ, ხალხს და არ ვიცით ჩვენ „უტიფართა”, რომ ერთ დროს ეს ხალხი ჩვენ გამოგვრეკავს „ტაძრიდან”, ქვა და გუნდას მოგვაყრის. ნეტავი „საქმეს” და მის მესვეურთ მაშინ!.. ყოველი კაცი იმედით სცოცხლობს და ჩვენც, როგორც მომაკვდავთ, ის იმედი გვასულდგმულებს, რომ „ხალხი” „ნაციონალისტებისაკენ” გადმოვა და იმათ კი, ვინც გზა-კვალს ურევს, საბოლოოდ და დღესდღეურად, გამოსადეგს არაფერს ასწავებს, ზურგს შეაქცევს. ამის ნიშნებს, ჩვენდა სა-

სიხარულოდ, ვხედავთ დღეს; ისტორიული წარსული, ბუნება ქართველობისა გვაიმედებს, რომ - ეს „ნაციონალიზმი” მუდამ იქნება ჯანსაღი და არასდროს იგი შოვინიზმად, ფანატიზმად არ გადაიქცევა. ჩვენდა სამწუხაროდ, „საქმეს” ბანაკში სრულიად წინააღმდეგ ვხედავთ, ვხედავთ კოსმოპოლიტიზმს, მაგრამ მახინჯს, უჯიშოს, ფანატიზმით გამსჭვალულს, თავის თავის, თავისი ერის უარმყოფელს. ხოლო სხვა ერების ვითომდა მფარველს და მოსიყვარულს. ვაი ამისთანა სიყვარულს! სიყვარული ერთგვარი უნარია ცხოველთა ბუნებისა და მით უმეტეს ადამიანისა, დიდი მადლი ბუნებისაგან მინიჭებული ადამიანისათვის, ხოლო ვისაც თავისი მშობელი დედა არ უყვარს, იგი სხვას როგორ შეიყვარებს, სხვას როგორ მოეპყრობა, როგორაც ნამდვილ დედას?.. არა მჯერა, არა მნამს და რა ექნა! ამისთანა კოსმოპოლიტიზმი უფრო თავმომწონეობა, ყოყლოჩინობაა, მიმბაძველობით გამონვეული, ერთხელ და ერთხელ დაჩემებულის ჭკუის ლიტინისა, ვიდრე ნამდვილი მიმართულება გულ-ღვიძილიდან ამომდინარე და მასში ფესვებგადგმული, - ეს მიმართულება ქარისაგან მონაბერია და ისევ უნდა ქარმა გაფანტოს, განაბნიოს. ან კი რას ვამბობ? განა ამაზე წერა და საუბარი შეიძლება ჭკუათამყოფელთა წინაშე? არა, დიალ, არა, ვინაიდან იმათთვის ის გაცვეთილი ჭეშმარიტებაა. მაგრამ რას იზამ, როდესაც კიდევ გვხვდებიან ჩვენში ისეთი ადამიანები, რომელთაც უნდა უმტკიცო, ეფიცო ღმერთი და ჯვარი, რომ ორჯერ ორი ოთხია და არა ოცი და ორმოცი.

ამ საგანს თავი დავანებოთ და ეს ვიკითხოთ: თუ ჩვენ, ნაციონალისტებს, არა გვაქვს უფლება ვიტიროთ და ვიგლოვოთ ილია ჭავჭავაძე, მაშ ვისა აქვს ამის უფლება? ყვავს ბახალა მოუკვდა და ბუს მიუგდო: დიდი თავი გაქვს, შენ იტირეო! არა, ბატონო საქმისტებო, მართალია, დიდი თავი გაქვთ, მაგრამ ჩვენს მკვდარს თქვენს სატირლად არ გავხდით; ჩვენ მოვალენი ვართ თავისი მკვდარი ჩვენ თავად ვიტიროთ, მით უმეტეს, რომ ქართული ანდაზაც ამას გვიკარნახებს: „ყოველ მკვდარს შინ უნდა ჰყავდეს მოტირალიო!”

ილია ჩვენ საკუთარ მიცვალებულად, დანაკლისად მიგვაჩნია და ვტირით კიდევაც, როგორც გვეხერხება, როგორც ვგრძნობთ, და თუ გშურთ ჩვენთვის მოზარეობის მონოპოლია,

ხვალ და ხვალზევით ამ მონოპოლიას თქვენ დაგიტომობთ, გაგვიხარდება, ხელ-ფეხს დაგიკოცნით.

თქვენ, ჩემო კარგებო, ის კი არა გწყინსთ რომ მოზარეობა ილიასი მხოლოდ ჩვენ დავისაკუთრეთ და სხვას არავის ვაძლევთ იმის გლოვის ნებას, არა. რადგან, ჯერ ერთი, რომ ეს ასე არა არის... თქვენ უფრო ის გიკლავთ გულს, ჩვენ ტრადიციად რად გადავაქციეთ ამ ადამიანის ხსენება. ეს გიკლავსთ გულს, ამას ვერ ინელებთ. რად? რისთვის? არ ვიცი, თქვენც ქართველები ხართ, ჩვენც. ჩვენი დანაკლისი თქვენ დაგაკლდებით და თქვენი – ჩვენ. მაგრამ არა, რასაც ჩვენ დანაკლისადა ვგრძნობთ, თქვენ ის შემატებად მიგაჩნიათ, და, აი, ეს არი მიზეზი ლალლასი და კომპ. გამოლაშქრებისა ჩვენს წინააღმდეგ. დაფნის გვირგვინი მილტიადისა არ გაძლევთ თქვენ მოსვენებასა... ეს, რაც მოგახსენეთ, ცილის წამებაა? არა!

ჩვენ და თქვენ მკითხველი გაგვარჩევს, ცალ-ცალკე, – გვხედავს კიდევაც, და როგორც გუშინ და გუშინდინ ტყუევდებოდა „საქმისაურის“ ხრიკებით, დღეს იგი აღარ სტყუევდება. თქვენ ძმურად ერთს გირჩევთ, თუ მიიღებთ, გაიგონებთ და ირწმუნებთ. როცა ილია ჭავჭავაძეზე ან ინერება რამ, ან ითქმება, ან მისი ხსოვნის პატივსაცემლად რაიმე დღესასწაული გაიმართება, რაც მეტს მდუმარებას გამოიჩინთ, ის გირჩევნიათ, უფრო მოგებულნი იქნებით. მოთმინებითა შენითა მოიპოვე სული შენო, ხომ გაგიგონიათ?.. მოითმინეთ, თორემ ხანდახან ისეთ რამეებს გამოურევთ თქვენ ნანერ-ნალაპარაკევში, კაცი ეჭვში შეგყავთ, თავადვე არწმუნებთ იმაში, რასაც კიდევ ეჭვის თვალით უცქერის – არ არის ჯერ ნამდვილად დარწმუნებული და ძალა-უნებურად ათქმევინებთ: „ქურდს რომ ყური უგდოთ, დღეში ცხრაჯერ გამოტყდება“...

თქვენ არ უნდა გწყინდესთ კი, თუ ილიას სახელის დამცველნი ხართ, და ღირსეულად აფასებთ მას, არამედ ამისთანა დღესასწაულებში მხურვალე მონაწილეობა უნდა მიიღოთ, რადგან თუ ექსპლუატაციაა ეს, როგორც თქვენა გგონიათ, მხოლოდ იმ აზრით, რომ შემოსული ფული მოჭხმარდება ილიას საყვარელ საქმეს, მის აზრის განხორციელებას. მაგრამ, რა ვქნა, რომ არა ვსთქვა, თქვენ არც ილიას აზრების გამარჯვება გენატრებათ და არც მისი სახელის განდიდება. თქვენ გინდათ, როგორც

ხორციელად ავაზაკივით მოკვდა იგი შარავზაზედ, იდეურადაც მომკვდარიყო. არ მოხდა ასე, რა გნებავთ? რა ღობე-ყორეს ედებით, როგორ გინდათ მოსპოთ ის, რასაც თვით ცხოვრება, ბუნება არა სპობს: საცა თოვლი მოვა, ზამთარი დადგება, იმას გაზაფხული მოჰყვება; დღეს ღამე მოსდევს, ღამეს – დღე, თავის წესზე, თქვენს ნებაზე ვერც დაალამებთ, ვერც გაათენებთ... რად გეჯავრებათ ჩვენი ერის განთიადი?

დიალ, ჩვენ განთიადად მიგვაჩნია, როცა ერი თავის ღირსეულ შვილებს აფასებს ღირსეულად. ვგონებ თქვენს ბანაკშიაც მოიპოვებინ იდეურ ნიადაგზე წამებულნი. თქვენც დაანესეთ მათ პატივსაცემლად დღესასწაული. ვინ გიშლისთ? თუ ჩვენ ილიას სახელით ვესწრაფით განვამტკიცოთ თქვენგან ათვალწუნებული „ნაციონალიზმი“, თქვენც ეცადეთ თქვენის წამებულების სახელის საშუალებით განამტკიცოთ თქვენი საყვარელი სატრფიალო „ინტერნაციონალიზმი“. იქნება ერმა თქვენდამი უფრო მეტი თანაგრძნობა გამოიჩინოს? არა გაქვთ იმედი? რატომ? ალბათ იმიტომ, რომ ერი უარგყოფსთ, როგორც თქვენ უარჰყავთ იგი და ჩვენც გვემუქრებით, „ხალხი გამოგრეკავთ ერთხელაც იქნება, როგორც იესომ ვაჭრები გამოდევნა ტაძრიდანო“. თანახმა ვართ, ხოლო ვიდრე ამას მოვესწრებით, ჩვენ მაინც ჩვენს სამსახურს არ მოვაკლებთ ამ ერს. თქვენც იმედი გქონდეთ, იხარებდით და იშვებდით, რომ წინასწარმეტყველება თქვენი ასრულდება და ჩვენ, ექსორიექმნილნი, ვიგონებთ ჩვენს დამარცხებას, და თქვენი მუქარა მართლა მუქარად გამოდგება და არა ყვავილებისა და ჩიტების საფრთხობელად”.

ავადმყოფობა, იუბილე და აღსასრული

ვაჟა უფრო ნაკლებად ახერხებდა თბილისში ჩამოსვლას, მწერალთა შორის ტრიალს. უფრო მეტი დრო ფიზიკურ შრომასა და ავადმყოფობაში მიუდიოდა. ზემოთ რომ მოვიხსენიეთ მარიამ დემურისადმი მიწერილი წერილი სამსახურის თაობაზე, ის 1909 წელს იყო დაწერილი და ვნახეთ, უკვე მაშინ რა დღე-

ში იყო ვაჟა; მას შემდეგ წლები გავიდა, ვაჟას ჯანმრთელობაც თანდათან უარესდებოდა, თავის მისახედად კი არც დრო ჰქონდა და არც ფული.

შინაურულ მკურნალობას იყო მინდობილი; დუდგულის ყვა-ვილის, თავშავას, კრაზანას, პიტნის, ჟოლის ფენის, შალშვის და ვინ მოსთვლის კიდევ რა ბალახბულახის ნახარშს არ ასმევდნენ. წინწანაქარში გახსნილ დათვის ნაუღელას ოფლის მოსადენად სვამდა. მუჟავენყლის აბაზანებს იღებდა იქვე ჭიჭახევაზე თავისი ხელით გამოთხრილი მინერალური წყლისას. მაგრამ ერთხელ და ერთხელ გატეხილ ჯანს აღარაფერი ამრთელებდა, ანკი როგორ უშველიდა, როცა აბაზანამიღებული, იქვე საქმეს უნდა შებმოდა, უარესად ცივდებოდა, უარესი ემართებოდა. დარია ხელი ავადობამ და ველარ წამოუდგა.

1915 წელს იანვარში, როცა აკაკი გარდაიცვალა და მთელი საქართველო გლოვობდა, ვაჟამ ვერ შეძლო თბილისში ჩამოსვლა. უკვე შინიდან გარეთ ძლივსლა გამოდიოდა და თოვლ-ყინვაში ცხენით რას იმგზავრებდა, სად წამსვლელი იყო. თბილისში კი საზოგადოების იმ უკუღმად მხედავმა ნაწილმა, ვისაც სულაც არ ადარდებდა არც აკაკის სიკვდილი და არც ვაჟას მდგომარეობა, ხმა დაყარა: აკაკიზე განაწყენებულია და იმიტომ არ ჩამოვიდაო. გულშემატკივრებმა კი იცოდნენ, ვაჟას თუ რამე არ უჭირდა, აუცილებლად ჩამოვიდოდა. ამიტომაც აცნობა წერილით მიხეილ ლობჯანიძემ: „აკაკის დაკრძალვა დიდებული იყო“.

თავს ვერ უწყობდა ხელს ვაჟა. ვერ ითმენდა მეუღლისათვის ხელის წაუხმარებლობას და აკაკის გარდაცვალებიდან ერთი კვირის შემდეგ უარესად გაციებული ლოგინად ჩავარდა: ჭვალი დაადგა, სიცხეს აძლევდა. სამი თვე ბორგავდა დურატყავნახურებული – იმ დროს ფშავ-ხევსურეთში საბნები და ლოგინები არ იცოდნენ.

ცოტა რომ მომჯობინდა, თბილისს ჩამოსვლა გადაწყვიტა სამკურნალოდ, რადგან ხედავდა, იქ მისი საშველი აღარ იყო, მაგრამ თბილისში წამოსვლაზეც ფეხს ითრევდა: გრძნობდა ვერც ცოცხალი და ვერც მკვდარი ჩარგალს ველარ დაბრუნდებოდა.

ფშაური ხინკლის უჭმელად არ უნდოდა წასვლა. მეზობლის

ბიჭისთვის – ლევან თათარაშვილისათვის დააძახებინა: გადმოვიდეს, ხინკლის გული დაგვიკაფოსო. ვაჟას უყვარდა ხინკლის გულის გამზადება, სხვას ახლოს არ მიაკარებდა ხოლმე, ეხლა კი აღარაფრის თავი ჰქონდა. იქვე შორი-ახლოს მიუჯდა ნანერებით სავსე სკივრს. ჩიკაზე ჩამომჯდარს დუმით ნაპოხი ცხვრის ქურქი ჰქონდა გამხდარ მხრებზე წამოსხმული. საქალაქოდ ამზადებდა ნანერებს, არჩევდა, ალაგებდა, აწერდა... შიგადაშიგ ამოიგმინებდა, წამოდგებოდა, ლევანთან მივიდოდა, დასცქეროდა უხმოდ.

– ახ, დედასა! – ამოგმინა კიდევ ვაჟამ, – დაკაფე, ძმისწულო, დაკაფე, ერთი კაი ხინკალი აჭამე ბიძას და მერე, რაც იქნება-იქნება... იცი, სად მიდის ბიძა?

– ქალაქსა, სამკურნალოდა, – უბასუხა ლევანმა.

– არა! ტყუილია! ვინა თქვა?! სამკურნალოდ კი არა, ნიკოლოზთან მივდივარ, რუსთა ხელმწიფესთან, საშაროდ – ერეკლეს გვირგვინი უნდა ჩამოვიტანო! ჯერ არ მომკვდარა შენი ბიძა და ნახავ, თუ ვერ გააკეთებს?! რა დროს ავადობა და ლოგინში წოლაა, ქვეყანას შეველა უნდა! ეყოფა ნიკოლოზას, რაც ჭამა საქართველო! მივალ და აემ მჭვარტლივით გავაშავებ! – შემჭვარტლულ ჭერს მიაჩერდა.

წუთით აენთო ვაჟა, ხმას აუწია. მერე შებრუნდა და კვლავ თავის სკივრთან ჩამოჯდა.

ხინკალს ახვევდნენ თამარი და მისი ქალები. ლევანს ხმელი შეშა დაეჭრა და ბუხარში შემოკიდებულ საჯალაფო ქვაბს უკეთებდა. გულქანი გააქცია ვაჟამ მეზობლების მოსაპატიჟებლად, თავისი ჩარგლულაში ჭყუმბალაობის დროინდელი კაცების დასაძახებლად. მოვიდნენ: ხეხერა, მჭედელა, ფოცხვერა, ჭრელა, მწარია, ივანე... ისინიც დასწეულელებულნი, ტყავებწამოსხმულნი, ხვნეშით, კვნესით ჩამოსხდნენ ორთქლავარდნილ ხინკლიან ტაბლასთან. ჩამოჯდა ვაჟაც. თამარმა პანტის არაყიანი ხელადა და შავი მოზვრის ყანნი მოუტანა. დაასხა ვაჟამ, ჩამოატარა. რიგრიგობით დალოცეს სტუმრებმა, გამოჯანმრთელება და მალე შინ მშვიდობით დაბრუნება უსურვეს.

– ეჰ, რა გაიგება! – მადლობა გადაუხადა ვაჟამ, – ისა მგონია, ველარც ცოცხალი და ველარც მკვდარი ჩარგალს ველარ ვნახავ!

„ღმერთმა ჯვარი დაგწეროს, ცა-ქვეყნიერობის გამჩენმაო“, – კი უთხრეს ფშავლებმა, მაგრამ მაინც ეჭვის თვალით შეხედეს ვაჟას. ვერ გაეგოთ რას ამბობდა ეს კაცი. ადრეც გაეგოთ მისგან — ჩარგალს არ დავიმარხებო. აბა, სად უნდა დამარხულიყო ჩარგლელი კაცი? სხვა არავინ დაეტოვებინათ ქალაქსა და სხვაგან მომკვდარი, ვაჟას ვინ სად გადააგდებდა.

1915 წლის აპრილის პირველ რიცხვებში ჩამოვიდა თბილისში ვაჟა. თბილისის სადგურიდან მომავალს ვერის აღმართთან თავის ძმა სანდრო შემოხვდა. ვაჟა ნაბადმოხვეული მოდიოდა, მხარზე ხურჯინი ეკიდა. დიდი ხნის უნახავმა ძმებმა გადაკოცნეს ერთმანეთი. სანდრომ და სხვა ძმებმაც იცოდნენ, ვაჟას ავადობის ამბავი და ახლა რომ დაინახა, გაუხარდა. „გამოვართვი ხურჯინი, ნაბადი კი არ მომცა, რადგან ისევე ავად ვარო, მითხრა, ვაი თუ გავცივდეთ. ნამოვედით სახლში. ერთმანეთი რომ მოვიკითხეთ, სხვათაშორის ვკითხე მისი ჩამოუსვლელობის მიზეზი იმ ზამთარს აკაკის დასაფლავებაზე. აქ ათასი ჭორი გაავრცელეს-მეთქი, – ვუთხარი ვაჟას, – თითქოს შენა და აკაკის ერთმანეთი გძულდათ და ვითომც იმისთვის არ ჩამოხვედი იმის დასაფლავებაზე“. ამის გაგონება ვაჟას ძალიან ეწყინა და გაჯავრებულმა წამოიძახა: „ვერ უყურებ მაგ უსვინდისობებს, რა მოუგონიათ? რა მქონდა აკაკისთან გასაყოფი, ან კიდევ საჯავრებელი? მე ვაჟა-ფშაველა ვარ, ის კი აკაკი. ძმაო, დამიჯერე, აი, ხომ ხედავ, როგორ ვარ? იმ დროს, როდესაც ტფილისიდან დეპეშა მოვიდა, ლოგინში ვინეც, ფილტვების ანთება მქონდა. აი, ეს გვერდი ეხლაც მტკივა. ან კი როგორ გადავრჩი ცოცხალი. აბა, შენვე მითხარ, თუ ძმა ხარ, ეს ავადმყოფი კაცი სად უნდა წამოვსულიყავი“. (ალ. რაზიკაშვილი).

თბილისში ხმა გავრცელდა, ვაჟა-ფშაველა მძიმედ დაავადებული ჩამოვიდა, შეიძლება ვეღარც გადარჩესო. გაზეთმა „სახალხო ფურცელმა“ გამოაქვეყნა ცნობა: „პოეტი ვაჟა-ფშაველა თბილისში ჩამოვიდა, ავადმყოფობისაგან დასუსტებულია, გამხდარა და მარცხენა ფერდს იტკივებს. მას აზრად აქვს თბილისში რიგიანად ინამლოს“. ამის გამო განგაში ატეხა ვაჟას პატივისმცემელთა ერთმა ჯგუფმა, რომელთა შორის პოეტი სანდრო შანშიაშვილიც იყო. ის ამ ამბავთან დაკავშირებით იგონებს: „1915 წელს ავადმყოფი ვაჟა თბილისში ჩამოვიდა. მე და

ჩემმა ამხანაგებმა კატეგორიულად დავაყენეთ საკითხი, რათა ვაჟასთვის გადაგვეხადა იუბილე. როგორც იყო, დიდი ჩხუბისა და დავიდარების შემდეგ გადაწყდა კიდევ იუბილის საკითხი“. (37, 177).

გაზეთმა „საქართველომ“, რომელსაც მაშინ სანდრო შანშიაშვილი რედაქტორობდა, გამოაქვეყნა სამ განყოფილებიანი



ლონისძიების პროგრამა და ვაჟა-ფშაველას მეგობრული შარჟი. სურათზე გამოხატულია ჩამოკონკილრობიანი გოლიათი. გამხდარი, მოტეხილი, ნელში მოხრილი მშვიდად დასცქერის მის წინ მოჯგროვილ ფრაკიან კაცუნებს, რომლებიც, ჩანს, ვაშას ძახილით ცაში ისვრიან ცილინდრებს, მაგრამ ვაჟას მუხლებამდეც ვერ უწევენ. ქვეშ წარწერა ჰქონდა: „ვაჟა-ფშაველა (მორცხვად): შემნიშნეს“...

რა თქმა უნდა, შეუძლებელი იყო ასეთი გოლიათის შეუმჩნეველობა, მაგრამ მოახერხეს. თურმე, რაც უფრო პატარაა არ-

სება, მით უფრო ვერ ახერხებს დიდი საგნების აღქმას. მაგალითად, ჭიანჭველას არ შეუძლია თურმე ადამიანის დანახვა, ერთიანად აღქმა.

ს. შანშიაშვილისა და მისი ჯგუფის ბრძოლის შედეგად დაითქვა, რომ ვაჟა-ფშაველასათვის 26 აპრილს უნდა გაემართათ შემოქმედებითი დილა. მერე 30 აპრილისათვის გადაიდო. საგანგებოდ გამართულ თათბირზე კი გადაწყდა, რომ საიუბილეო სალამო ჩაეტარებინათ და მისი უკეთესად მომზადებისა და ჩატარების მიზნით დრო კიდევ გადასწიეს და დანიშნეს 23 მაისი, შედგა ვრცელი პროგრამა.

სალიტერატურო-სამხატვრო სალამო მიჰყავდა ქართველ მწერალთა საზოგადოების თავჯდომარეს გრ. რცხილაძეს. მისი შესავალი სიტყვის შემდეგ ვაჟას შემოქმედებაზე ვრცელი სიტყვით გამოვიდა გრ. რობაქიძე. საზოგადოებამ, პრესამ მისი სიტყვა იმ ლამაზი და ამალეღვებელი სალამოს გვირგვინად მიიჩნია. ეს იყო ღრმად მოაზროვნე ახალგაზრდა შემოქმედის მიერ ისეთი წვდომა ვაჟას შემოქმედებისა, ისეთი თვალთ დანახვა და სხვებისათვისაც დანახვება, რაც დღეს საყოველთაოდ აღიარებულია, მანამდე კი არავინ უწყოდა. მაგრამ ეს ყველაფერი რობაქიძისეულად ორიგინალურად და ლამაზად იყო ნათქვამი: „ყოველ მგოსანს, ერთი იდუმალი ჟამი აქვს, როცა მას მუზა ეწვევა. ყოველ ხელოვანს ერთი ფარული ადგილი აქვს, სადაც იგი მუზას ნახულობს. ეს ის ჟამია, როცა იგი მეორედ იშვის. ეს ის ადგილია, სადაც იგი გარდაიქმნის. ამ ჟამს ელის იგი სიკვდილსა და ამ ადგილს ნატრობს იგი საფლავსა. ვაჟა-ფშაველას აქვს ასეთი ჟამი და ასეთი ადგილი. მისი პოეტური ჟამი მაშინ წარმოიშვა, როცა ბუნებამ პირველად აიხსნა თვალი. მისი მგოსნური ადგილი კლდის მკერდის ძირას გამოიჭრა, სადაც ბუნებამ პირველად იხილა თავი. თვალის მომჭრელ ქალწულს წყალი მოსწყურდა და მთის წყაროს დაეყრდნო მხურვალე. ქალწულმა წყაროს სარკეში პირველად იხილა თავისი ლამაზი სახე და მის ტურფა ბაგეს ცისკროვანი ღიმილი დააკვდა. ეს ქალწული ვაჟას ზღაპრული მუზაა. ეს ღიმილი მისი მგოსნური სიტყვაა და მთვარიან ღამეს, როცა გრძნეული შუქთა ზენარი სიზმრად ეფინება მიძინებულ ქვეყანას, ელის შეყვარებული მგოსნის მუზის ხილვას და უკანასკნელიც მოვლინდება: იგი გამოდის შავის მღვი-

მით, მიაშურებს კლდის წყაროს, თავს უშვერს მის ნაჟურს და მღერის სამყარო და როცა ოდნავ დაინყებს ნათებას, თითქოს მთვარეულს დღის ცხადის შუქით ენიშნაო, ისევ შავს მღვიმეს შეეფარება. ათრთოლებული მგოსანი, ჯადოსნური სიმღერით ფრთაასხმული ფანდურს იღებს ხელში და ტკბილად ახმაურებს მოზღვავებულის გულის თქმას”.

გრ. რობაქიძემ გამოთქვა აზრი, რომ ვაჟა-ფშაველას შემოქმედებითი ფენომენი მითოლოგიურია, მისი აღმაფრთოვანებული ქალწულიც ხომ მითოსის წარმტაცი ხატებაა! მგოსანი უსმენს ყოველ მოვლენას და ნახულობს მასში რალაც ახლოს და ნათესაურს, მხოლოდ რალაცგვარად მისგან მოწყვეტილს და დაკარგულს. იგი ყურს უგდებს მთით მოხეტქილ ჩანჩქერს და ეს ხმაური ინვეეს მასში სულიერ განცდათა მოძახილსო. „ყოველ მოვლენას საკუთარი სახე აქვს და როცა მგოსანი მასში თავის სახესა ჰქმნის, ეს მხოლოდ იმას ნიშნავს, რომ ბუნების მოვლენამ და მგოსანმა საიდუმლო შეხვედრის წამს ერთი-მეორე იცნეს. აქ არის სათავე პანთეიზმისა და ვაჟა-ფშაველაც, უცილობლად, პანთეისტია. მაგრამ როგორი? – კითხვას იძლევა ლექტორი და უპასუხებს კიდევ: ბუნებამ, ამ ტურფა ქალწულმა, სარკეში ჩაიხედა და იგრძნო უსრულობა თავისი ლამაზი სახისა: აქ გაჩნდა პირველად ნალველი შემოქმედებისა. ბუნებამ სევდით მიიძინა და სიზმრად ნახა თავისი სრული სახე – აქ პირველად იშვა პოეტური ინტუიცია, ბუნებამ გულის ფეთქვით გაიღვიძა და ამხილა, მხიარულმა ლამაზი სიზმარი – აქ წარმოიშვა პირველად მხატვრული სახე, რომელიც გაიშალა მითოსად, ზღაპრად, ლეგენდად, ადამიანის გენია გასცილდა ზერელე სინამდვილეს და თავბრუდამხვევი ოცნებით ნამდვილ სინამდვილეს ფრთა ჩამოჭრა. აი, შემოქმედი ძალა, ნამდვილი მსოფლიო გენიისა! ვაჟა-ფშაველას ნიჭი სწორედ ამ გენიის ალით არის ანთებული. იგი არ არის პანთეისტი ფიგურალურად. არა, იგი თავის პანთეისტობაში ნამდვილი მისტიკოსია... ბუნება მისთვის ცოცხალი არსია, რომელიც ჰლამობს თავის სრულობას... ლოგოსი – აი, სათავე ვაჟას პოეტური გენიისა! ლოგოსის გარეშე მისი პოეტური სიტყვა მხოლოდ „ჭრელი სიტყვა“ იქნებოდა”...

თავისი აზრის დასასაბუთებლად გრიგოლ რობაქიძე, ვრცლად შეეხო ვაჟას პოემას „გველის-მჭამელს“, დიდი ხელოვ-

ნებით გააცნო დამსწრეთ პოემის შინაარსი და გზადაგზა გაარჩია. იგი ამ შესანიშნავ პოემაზე შეჩერდა არა მარტო ვაჟა-ფშაველას ნიჭის დასახასიათებლად, არამედ უფრო ქართველთა გენიის გასაცნობად. გრ. რობაქიძის აზრით, „გველის-მჭამელი“ ნამდვილი სხეულებაა ქართველთა სულიერი ენერჯისა, მისი საუკეთესო ნაყოფისა”.

პოემის შინაარსის გადმოცემისა და გარჩევის შემდეგ მან თქვა: „უბრალო ჩონჩხიც პოემის კომპოზიციისა ნამდვილი გენიის ალის ნაყოფია. ძნელია გამორჩევა, სად თავდება ხალხის გენია და სად იწყება მგოსნის პირადი ნიჭი. მით უკეთესი ორივესათვის: მგოსანი ხომ მხოლოდ ინდივიდუალური სახეა ერისა”

გრ. რობაქიძემ პოემაში თავისი თვალთ დახატული ნაკლიც აღნიშნა, მაგრამ აღნიშნა ამ ნაკლის ღირსებაც, აღნიშნა ის, „რომ სხეული კომპოზიციისა, მეტს სიმშვენიერეს მოითხოვს: მგოსანი გასცილდა ხალხის უბრალო თქმულებას და შემოქმედი ენერჯით გარდაქმნა იგი სრულქმნილ მთელად, ფორმის ტექნიკური მხრით იგი ისევ ხალხური პოეზიის მორჩილად დარჩა. „გველის-მჭამელის“ ფაბულა აუცილებლად მოითხოვს ინდივიდუალურს სხეულ-ფორმას. მაგრამ ამ ნაკლს მომხიბლავი მხარეც აქვს. ვაჟა-ფშაველას პოეზია, იმ ქალწულის შთაგონებაა, რომელიც ღამ-ღამობით კლდის ნაჟურს უშვერს თავს გვირაბიდან გამოსული. ვაჟას პოეტური სიტყვა სწორედ ეს კლდის ნაჟურია, იგი წყალი არ არის ჩასხმული ძვირფას ჭურჭელში: მისი ჭურჭელია მთის უხვი და ქალწული მკერდი. ეს წყარო ხანდახან ხავსმოკიდებულია, ეს წყალი ხანდახან ირმის ჩლიქით ამღვრეულიცაა, მაგრამ იგი მაინც პირველყოფილი ცინცხალობის ხალასი ნაკადულებია. რომელი რომელს წყალს აირჩევს – მითითონხეთქილს – თუ ჭურჭელში გადმოსხმულს, ეს გემოვნების საქმეა. დიდებულმა ლეონარდო და ვინჩიმ კი თქვა: „ვისაც შეუძლიან წყაროს დაეყრდნოს, იგი მოისურვებს სურით დაღვევასო”. ერთი გარემოებაც: ეს „ხავსმოკიდებული წყარო”, რომელიც ირმის ჩლიქით ხანდახან ამღვრეულია, ბოლოს და ბოლოს იმ ზღაპრულობასა ჰქმნის, რომელიც მაგარის სურნელებით ესხურება ყოველ სიტყვას ვაჟას მიერ წარმოთქმულს. მისი კოლორიტი ამ მხრით სწორედ რაუტენდელაანის („დაძირული ზარა”

ჰაუპდმანისა) ედარება: რაუტენდელაანი ხომ ნახევრად მითური ქალია და იგი სიღეზიის დიალექტით მეტყველებს. ვაჟას ფშაური დიალექტიც ასეთის სურნელოვანის კოლორიტით არის გაჟღერებული”.

გაზეთ „სახალხო ფურცელის“ ცნობით, მხატვრულ განყოფილებაში თვით გრ. რობაქიძესვე შესანიშნავი ხელოვნებით წაუკითხავს ვაჟას „მთის ქალი”. ნ. ერისთავს წაუკითხავს ვაჟას ლექსები „ფშაველი ჯარისკაცის წერილი” და „არწივი”; ივ. სარაჯიშვილსა და კ-ნ შავერზაშვილს რომანსები შეუსრულებიათ, მ. კავსაძის ქოროს – ქართული ხალხური სიმღერები; „თავუნას” წაუკითხავს თავისი იუმორისტული ფელეტონი – „როგორ გავითქვათ სახელი ვაჟა-ფშაველას საღამოზე”.


პროგრამის ბოლოს ი. გედევანიშვილმა, ვ. გუნია და ს. აბაშელმა თვით იუბილარი, ვაჟა შემოიყვანეს სცენაზე. მან რამდენიმე თავის ლექსი წაიკითხა. „პოეტის დეკლამაციამ ყოველს მოლოდინს გადააჭარბა და ხალხი უფრო მეტ აღფრთოვანებაში მოიყვანა”.

ქართველ მწერალთა სახელით ვაჟა-ფშაველას დაფნის გვირგვინი წარწერით „ქართული პოეზიის არწივს” გრ. რცხილაძემვე მიართვა, დასკვნითი სიტყვაც წარმოთქვა: „ძვირფასო მგოსანო! ხალხის სულის მესაიდუმლე! ქართული პოეზიის არწივო! 30 წლის მანძილზე შენი გრძნეული კალამი უწყვეტლივ კრებს ქართველი ერის გულში ჩაბნეულ მარგალიტებს, ჰკინძავს მათ და ამკობს ქართული პოეზიის ტაძარს.

პოეზია, ეს უმაღლესი ფორმა სულის კულტურისა, ერის ცხოვრების სარკეა და მისივე ნაპერწკალი, ამ სარკეში ვხედავთ ჩვენ უბრალო მოკვდავნი, ერის იდეალურ სახეს და, ხელოვნების სათილისმო ძალით მოხიბლულნი, განვიცდით მის გავლენას.

პოეზია ეროვნული სულის აღმზრდელია. პოეზიის ქურუმი ერის მოძღვარია და მასწავლებელი. აქედან წარმოსდგება ის გულწრფელი სიყვარული, რომელსაც ასე უხვად მოგიძღვნის შენ ქართველი ერი.

როგორც პოეზიის ჭეშმარიტი ქურუმი, ჩვენ გვატყვევებს შენი ქმნილებები, გვაგვიწყობინებ გარდამავალ სადღეისო ჭირ-



ვარამს და აღგვაფრენ იმ სამარადისო სფეროსაკენ, რომელსაც ქმნის ნიჭი და ერის უღრმესი სიყვარული. ამიტომ შეიქმენი შენ სათაყვანებელი არა ერთი რომელსამე წრისა ან ჯგუფისათვის, არამედ მთელი ერისათვის, ძვირფასო მგოსანო!

ქართული სიტყვაკაზმული მწერლობის საზოგადოება, ნიშნად თავის ღრმა პატივისცემისა, მოგართმევს პოეზიის არწივს ამ დაფნის გვირგვინს და გისურვებს ნაყოფიერი მოქმედების გაგრძელებას მრავალჟამიერ!”

სალამოს დამთავრების შემდეგ ორთაჭალის ბაღში კარგი ვახშამი მოაწყვეს. თეატრიდან გამოსული ვაჟა პირდაპირ ჩოხის ამარა წაიყვანეს სუფრაზე, ნაავადარი რომ იყო, ეს არავის გახსენებია. მაისის ბოლოს კი, ისიც წყლის პირას, საცმაოდ სიგრილვა. ვაჟამაც, ჩანს, დაირცხვინა ნაბადი მოეტანინებინა და ისე დამჯდარიყო ლამაზად გამონკეპილთა შორის. ითაკილა სუსტ, საცოდავ კაცად გამოჩენილიყო.

რაკი დააფასა საზოგადოებამ, თვითონაც არ დაზოგა თავი – ღვინოც სვა, სუფრიდან არ აჩქარდა და მთელი ღამე ასე გაატარა. გამთენიის ხანს იგრძნო, რომ უარესად გაცივდა. შინ მისულმა სანდროს შესჩივლა: „წამათრიეს, კაცო, მაგ ოჯახქორებმა ეს ავადმყოფი კაცი და უარესად გამაციესო”. ჩანვა და ერთი თვე ასე გაატარა სანდროს ბინაში.

ვაჟა თბილისურ აუტანელ სიცხეში იმითღა იქცევდა სულს, რომ მთელი დღე მთანმინდას გასცქეროდა ღია სარკმლიდან, თავის საყვარელ მთებს მონატრებული.

„ცხელი ზაფხული იდგა, – იგონებს ნინო ციციშვილი, – ივნისის პირველი რიცხვები. უფროსმა ექიმმა ვ. მახვილაძემ (შემდგომში განთქმულმა პროფესორმა) გამომიძახა და დამავალა, აქვე, მლეთის ქუჩაზე, მძიმე ავადმყოფი ვაჟა-ფშაველა წევს და ის უნდა გადმოიყვანოთ ლაზარეთშიო...”

წავიყვანე ორი სანიტარი, დავიჭირეთ ეტლი და მივედით მლეთის ქუჩაზე, სადაც იწვა ავადმყოფი ვაჟა. ავედით მეორე სართულზე, მაგრამ აქ მწოლიარე ავადმყოფი არავინ ჩანდა. მხოლოდ ვაჟას ძმა სანდრო დაგვხვდა. ამ ოთახიდან სამსაფეხურიანი კიბე ადიოდა მეორე პატარა, ბნელ ოთახში, სადაც მძიმე კვნესა მოგვესმა. შევედით. ტახტზე ულოგინოდ, ნაბადნამოსხმული იწვა გაუხდელი, წვერგაუპარსავი ვაჟა, თავი ჰქონდა გაკრული ხილაბანდით.

ნაბადი გადავხადე და ვნახე, რომ ძალიან ოფლიანი იყო, თეთრეული მთლად ოფლით დასველებოდა, მაღალი სიცხე აწუხებდა, ძლიერ ქოშინებდა. ისე დასუსტებული იყო, ლაპარაკის ღონე აღარა ჰქონდა”. (37, 184).

ვაჟას ლაზარეთში დიდი, მზიანი პალატა გამოუყვეს, გამოუცვალეს ოფლისაგან სველი საცვლები, გაპარსეს და დაანაყრეს. ყველანი თავს დასტრიალებდნენ. მკურნალად მიუჩინეს ცნობილი ექიმი ივ. გომართელი. მისი გამოკვლევის შედეგად აღმოჩნდა, რომ პოეტს ფილტვების დაავადება ჰქონდა გადატანილი და ახლა ორივე გვერდში წყალი ედგა, სველი პლევრიტი ჰქონდა, საჭირო იყო სასწრაფო ოპერაცია. მოიწვიეს ქირურგი გ. მუხაძე, რომელმაც 5 ივნისს დიდძალი წყალი გამოუშვა გვერდიდან. ავადმყოფი ამის შემდეგ ერთხანობას კარგად გახდა, გამოკეთდა, მაგრამ შემდგომ და შემდგომ სიცხემ უმატა, თავს

ცუდად გრძნობდა. მაგრამ რაკი ლაზარეთში დაანვინეს და თავზე საუკეთესო ექიმები დააყენეს, ვაჟას იმედი მიეცა გამოჯანმრთელებისა. მანამდე კი უიმედოდ იყო. არც უნდოდა ექიმს გაჰყოლოდა, ჩათვალა, რომ ტყუილი წვალეზა იქნებოდა მკურნალობა. ეხლა კი კვლავ იმედი გაუჩნდა ოჯახში დაბრუნებისა, მთების ხილვისა. მისი ფიქრი და სანუხარი ამდენი ხნით მიტოვებულ ოჯახს დასტრიალებდა. ეხლა, ზაფხულში, უამრავი საქმე იყო მთაში: სათიბი, სამკალი, თივა, ძნა... თუ ეხლა არ მომარაგდებოდა საზამთროდ „კაც-საქონთ“ სარჩო, შიმშილით ამოიხოცებოდნენ. როცა ვაჟა იქ იყო და წელებზე ფეხს იდგამდა თამართან ერთად, მაშინ ძლივს აუდიოდა საქმეს, ეხლა რას გასწვდებოდა ცალად დარჩენილი მეუღლე. ლოგინში წოლა სულს უხუთავდა, ერქარებოდა საქმისაკენ. მაგრამ სანამ თავად ავიდოდა ჩარგალს, წერილით შეეხმინა ოჯახს, რათა ფხიზლად ყოფილიყვნენ, ყურადღება არ მოედუნებინათ, არაფერი წაეხდინათ. თიბათვის თერთმეტში მისწერა ეს წერილი:

„ჩემო ჯალაფნო! ამას წინათ წერილი გამოგიგზავნეთ და არ ვიცო მთავრით თუ არა. მე დიდი ავადობა და მწუხარება გამოვიარე, ხოლო დღესდღეობით კარგადა ვარ, მაგრამ ექიმები წამოსვლის ნებას არ მაძლევენ. ამ წერილს ნიკოს ვატან და ყველაფერს დაწვრილებით გიამბობთ. პეტრეს საქმე გავაკეთე აქ, ქალაქში და იმედია დუშეთშიც გაკეთდებოდა. ასე რომ ამ ბიჭს ისევ დუშეთში დასტოვებენ.

მე ამ ცხრა-ათ დღეზე გავჩნდები მანდ. თქვენ იცით, მანდაურობას როგორც შეინახავთ და გაუფრთხილდებით. თამრო (ქალიშვილს მიმართავს, ცოლისთვის მიმართვა აქ სათაურშია – ჯალაფნო – გ.ხ.), სათიბებს მოუფრთხილდით, თვალი უნდა დაავლოთ ჩქარა-ჩქარა, თორთ ხო იცით ეხლანდელი ხალხის ამბავი.

ნისქვილი მაშინებდა, იქნება წყალმა წაილოო და ნიკომ მითხრა ბეკურმა გაამაგრაო.* აბა, შანაყარი და მოურავი მაგისტანა უნდა! რო მოვალ, ერთი დიდი მენდალი უდა მოუტანო „წადიმოდისა“.

მარადის თქვენი ერთგული ვაჟა.

თოთხმეტ ივნისს ვაჟა გადაიყვანეს წმ. ნინოს სახელობის

ლაზარეთში, რომელიც დროებით მოთავსებული იყო ახლანდელი თბილისის სახელმწიფო უნივერსიტეტის შენობაში: პირველი მსოფლიო ომი მიმდინარეობდა და თურქეთის ფრონტიდან ჩამოყვანილ დაჭრილებს ვერ აუდიოდა საავადმყოფოები.

ვაჟა ოფიცერთა განყოფილების ერთ-ერთ დიდ ოთახში დაანვინეს.

17 ივნისს, საღამოს შედგა ექიმთა კონსილიუმი, რომელშიც მონაწილეობდნენ იმ დროის საუკეთესო ექიმები სპ. ვირსალაძე, ივ. გომართელი, გრ. მუხაძე, შ. მიქელაძე, ვლ. მახვილაძე. გამოიჩინა, რომ ავადმყოფს კვლავ ჩასდგომია წყალი მარჯვენა გვერდში. მდგომარეობა სერიოზული იყო. დაეწყო სხვადასხვაგვარი გართულება. სისუსტის გამო კვლავ ოპერაციის გაკეთება არ შეიძლებოდა. ისე წამლებს ასმევდნენ. 21 ივნისს სიცხემ დაუკლო და თავსაც უკეთ გრძნობდა.

პრესაში სისტემატურად ქვეყნდებოდა ცნობები ვაჟას ავადმყოფობის შესახებ. ყველა კუთხიდან მოდიოდა წერილები; ზოგი ხალხურ სამკურნალო საშუალებებსაც კი სთავზობდა ვაჟას. ნახვის მსურველიც ბევრი იყო, მაგრამ პოეტთან მხოლოდ ახლო ნათესავებს, მწერლებსა და საზოგადო მოღვაწეებს უშვებდნენ.

*1986 წელს ვაჟა-ფშაველას საიუბილეო თარიღთან (125-ე) დაკავშირებით დაიწყო მი კარ-მიდამოში იმ სამეურნეო ნაგებობათა აღდგენა, რომლებიც იქოდესლაც იდგა. იმჟამინდელმა ვაჟას მუზეუმის დირექტორმა ირაკლი გოგოლაურმა ამ საქმეს მშვენივრად გააღტვა თავი. მან ამისათვის ბევრი რამ მოიძია ფშავში თუ სხვაგან. მაგალიტად სოფ. შარახევში ტუქსიშვილებთან არმოაჩინა ზუსტად ისეთი დოლაბები, როგორის ნამსხვრევებიც ეყარა ვაჟას ნანისქვილართან და აღადგინა ნისქვილი. ასევე აღადგინა გომური, საბძელ-კალო, საფუტკრე, საოჯახო წყარო ქიჭახევაზე. ზოგიერთმა მემკვიდრემ უჩივლა ბატონ ირაკლის: ვაჟას ნისქვილი არა ჰქონია და რას აკეთებსო. სამწუხაროდ დგეს უკეთურთა ხელში თითქმის ყველაფერი გაპარტახებულია.

ვაჟა ყველას თავის საშინლად გამხდარ მკვლავებს უჩვენებდა და შესწიოდა: აი, თბილისის სიცხემ რა მიყო, როგორმე მთაში წამიყვანეთ და ნახავთ, თუ იქ არ მოვრჩებიო.

ვაჟა მხოლოდ ადრე გაზაფხულზე და გვიან შემოდგომაზე ჩამოდოდა ხოლმე თბილისში, ზაფხულის სიცხეს ვერ იტანდა. მაინცა და მაინც იმ ზაფხულს აუტანელი სიცხე ყოფილა. ქალაქიდან გაყვანა, მთა მოაცოცხლებდა ვაჟას, ექიმები კი რატომღაც არ უშვებდნენ. „ჩვენ ოჯახში როცა კი ლაპარაკი ჩამოვარდებოდა, მიხამ, თედომ, სხვებმა თქმა იცოდნენ, ვაჟა კომუნისტებმა მოკლესო, იმათ არ გააშვებინეს ქალაქიდანაო, – იგონებს პეპელა რაზიკაშვილი, – ექიმებს ეტყობა ემუქრებოდნენ კომუნისტი ტერორისტები და აიძულებდნენ სურამში გაეშვათ, სადაც იოლად მოუღებდნენ ბოლოს. რაკი ვაჟამ აჩრემა და თავის მთაში ითხოვდა გაშვებას, უცებ რალაცით მოკლესო.

ქართველი მოღვაწენი, ვისაც კი გული შესტკიოდა, შეფუცხუნდნენ, როცა უკანასკნელ დღეში დაინახეს ვაჟა. ს. შანშიაშვილმა მხატვარი ვ. სიდამონ-ერისთავი მოიყვანა და ვაჟას დახატვა სთხოვა. მანვე დახატა მერე „ვაჟა კუბოში“.

იოსებ იმედაშვილმა მოიყვანა ცნობილი ფოტოგრაფი ჟვანია და სურათები გადააღებინა.

„მამა გადასაღებად სახლში არავისთან მიდიოდა, თვითონ მოდიოდნენ ჩვენთან, – იგონებს შვილი გივი ჟვანია, – მამა იყო ევტიხი ჟვანია, რომელმაც 1913 წელს ოცდასამი წლისამ დაიწყო დამოუკიდებელი მუშაობა ფოტოგრაფიაში... გინახავთ, ალბათ, ვაჟა-ფშაველა სასიკვდილო სარეცელზე, მონყალების დები შემოხვევიან გარს – სიკვდილამდე სულ ცოტა ხნით ადრე გადაღებული. მგონი ამ ერთხელ დაარღვია ევტიხი ჟვანიამ ტრადიცია, თვითონ წავიდა ლაზარეთში ვაჟას გადასაღებად“ („თბილისი“, 1987, 18 ნოემბერი).

მაგრამ, ნამდვილი გულშემატკივრება არც აქ ჩანდა, ყველაფერი მაინც მხოლოდ ვალის მოხდა იყო. ამას ვაჟაც ამჩნევდა და სხვაც. ვაჟას ერთ-ერთი ძველი გულშემატკივარი სამსონ ფირცხალავა იგონებს: „უკანასკნელი ჩვენი შეხვედრა მოხდა 1915 წელს ივლისში, ვაჟა-ფშაველა ავადმყოფი იწვა ლაზარეთში, რომელიც მოთავსებული იყო ახლანდელი უნივერსიტეტის შენობაში. არ მომეწონა ოთახის მორთულობა, რალაც ყაზარმული სამხედრო სახე ჰქონდა, ვერსად ვხედავდი მზრუნველ ხელს და ყურადღებას. ვაჟა მარტო იყო, რალაცა მიტოვებულად, ესეც არ მეამა. ავადმყოფი ძალიან გაახარა ჩემმა მისვლამ, თით-

ქოს ძვირფასი რამ საჩუქარი მიმეტანოს. გამოცოცხლდა, მის სახეს ღიმილი დაეტყო. ვისაუბრეთ ნელ-ნელა. გულნატკენი იყო – ნაცნობები და მეგობრები არ მოდიან, არ მკითხულობენო, მითხრა. ქართველებმა მკვდრის დამარხვა კარგად ვიცით, ცოცხალს კი ყურადღებას არ ვაქცევთო... რომ გამოვეთხოვე, მთხოვა და მეც დავთანხმდი, მალე გინახულებ-მეთქი.. ეს მე ვერ შევასრულე“ (17, 238).

მარტოობით შენუხებულ ვაჟას სასთუმალთან ხშირად ეჯდა ხოლმე მონყალების და ნინო ციციშვილი (შემდეგში დამსახურებული ექიმი), ის დასტრიალებდა თავს ავადმყოფ არწივს. სხვა მონყალების დებმა ქართული ყველამ კარგად არ იცოდა და ვაჟასი რცხვენოდათ. ნინო კი თავისი შვილივით შეიჩვია, ესაუბრებოდა. ერთხელ ქალაქიდან მოატანინა: ლექსი უნდა დაგინეროო, მაგრამ ველარ შეძლო.

გვერდში წყალი ნელ-ნელა უშრებოდა ვაჟას და 13 ივლისისათვის სულ დაუშრა, მაგრამ დროგამოშვებით სიცხეს აძლევდა და ის ასუსტებდა. ყოველ ღონეს ხმარობდნენ, როგორმე იმდენად მოელონიერებინათ, რომ ავადმყოფს შეძლებოდა რომელიმე აგარაკზე წასვლა, რადგან საშინელი სიცხე სულს უხუთავდა. ექიმებმა გადანყვიტეს, სურამში გაეგზავნათ, კიდევ მიავლინეს ვილაც ბინის დასაქირავებლად. ვაჟასაც უთხრეს, შენი ჰაერზე გაყვანაა საჭიროო. ვაჟა ერთთავად ამას ნატრობდა და ითხოვდა: სურამში კი არა, თუ წამლები აღარ არის ჩემთვის საჭირო, ფშავში წამიყვანეთ, იქაური ჰაერი და წყალი უცებ მომაბრუნებსო.

ვაჟა გამოცოცხლდა, გახალისდა, იმედი მიეცა თავისი ჩარგლის ნახვისა. ოცი მანეთი ფული გაატანა მაღაროსკარში თავის სიძესთან, დავით ჯანაშვილთან, და თან წერილიც მისწერა „მყოველწალთან ჩარდახი გამიკეთე, იქ უნდა დავრჩე სამკურნალოდ“.

ემზადებოდა სამკურნალოდ და ახალი ნაწარმოებების შესაქმნელად. სანახავად მისულ ვასილ ბარნოვისათვის უთქვამს, რომ იცოდე, კიდევ რამდენი რამა მაქვს დასაწერიო. დურგლისათვის ფართო ფანჯარა შეუკვეთია და ჩარგალში გაუფხავანია, ჩემი სახლის სარკმელი უნდა გავაფართოვო, ბევრი სინათლე

შემოვიდესო. ჩანს ეს თვალთა სინათლის დაკლებამა და თბილისის უნივერსიტეტის ფართო ფანჯრების ნათელმა აფიქრებინა.

შესაძლოა, ვაჟას აღარც მთაში სიცოცხლის იმედი ჰქონდა, მაგრამ „იმათ კალთაზე“ ერჩივნა სიკვდილი. ყველანაირად იბრძოდა, იმდენად მომაგრებულიყო, მთამდე აელწია. სანდროსა და შიო მღვიმელისათვის უთხოვია, მამადავითის ეკლესიასთან, კლდეში რომ წყარო გამოდის, ის უნდა როგორმე ჩამომიტანოთ, ჩვენ მთის წყაროებს ის უფრო ჰგავს და ცოტა იქნება მომასულიეროსო.

მეორე დღეს დოქით ჩამოუტანეს, დოქითვე მოიყუდა – ასე უყვარდა წყლის სმა, ბუერით თავდაცობილი სველი დოქიდან თუ თუნგიდან. ასე იყო ბავშვობიდანვე მთაში მიჩვეული და ახლაც მთის წყალი მთის წესზე დალია. ეამა ვაჟას – ძლივს ჩემი გემოს წყალი დავლიეო.

გუნება გადაეწმინდა. მთის წყალმა რწმენა მისცა, თითქოს უკვდავების წყალი დაელიოს. მთის წყარომ მთის ფერდობზე აბიბინებული თავისი სათიბები გაახსენა – ავადმყოფობა რომ არა, ეხლა იქ, აფხუმოს თავს, უნდა მჯდარიყო სამთიბლო წყალთან, თეთრად აყვავებულ, ტკბილსურნელოვან კენკეშიანში, ათასნაირი ყვავილით აფერადებულ წელამდე სათიბში, საამო ნიავი რომ აბიბინებს. იქ იქნებოდნენ ეხლა სათიბად გასული ჩარგალელნი, გასჭრიდნენ თავთავის სათიბებს, მისი სათიბილა იქნება გაუჭრელი. ალბათ გასძახ-გამოსძახიან მთიბავები ერთურთს, მარტო ვაჟას ვერ ეხმიანებიან, აკლია ვაჟა მთას. იქ უნდა ყოფილიყო ვაჟა, საჩდილობლადა და ღამის სათევად დიდი ხნიდანვე შერჩეული ქორაფის ძირას უნდა მჯდარიყო, გაიკეთებდა ხაჭო-წყალას... ოხ, როგორ ამოისუნთქავდა, როგორ გაცოცხლდებოდა...

ვაჟამ ველარ მოითმინა და ახლა მთის, მინდვრის ყვავილი – ბალახი ინდომა – ინდომა იმიტომ, რომ მთაში მათი ხილვის იმედი აღარა ჰქონდა. წყალიც იმიტომ ითხოვა და ფოთოლ-ბალახიც.

მონყალების დას ანიკო კობიაშვილს სთხოვა: თუ ღმერთი გნამს, ლოგინი იატაკზე გამიშალე და გარეშემო ეს მინდვრის

ყვავილები დამიყარეო. თხოვნა მაშინვე შეუსრულეს ვაჟას: იატაკზე დაუგეს ლოგინი და ირგვლივ მინდვრის ყვავილები და ბალახი მიმოუბნიეს.

ამ ყვავილიანმა სანოლმა, თავის საყვარელ „არსებათა“ შორის ნოლამ კიდევ მოაცოცხლა ვაჟა, თავი კარგად იგრძნო, ხალისიანად საუბრობდა ჩარგალზე, თავის ყოფაზე, თავის საქმიანობაზე, შიგადაშიგ ოხუნჯობდა კიდევც.

ცოტა ნათვლიმა. შუადღის შემდეგ მონყალების დას ჰკითხა, რომელი საათიაო? სამიო რომ უთხრეს – მიკვირს სამ საათამდე როგორ ვიცოცხლეო, ჩაილაპარაკა, ეს ჩემი უკანასკნელი საათიაო.

მერე რალაცის ჩურჩული დაინყო თვალდახუჭულმა, მილუშულმა. დამლაგებელმა, ვინმე მაისურაძის ქალმა ყური ახლოს მიუტანა და გაარჩია ძლივს გასარჩევი სიტყვები. ვაჟა უკანასკნელ ამოსუთქვასაც ლექსს აყოლებდა:

**„მუხთალო, ნუთისოფელო,
ტანჯული შვილი გშორდები,
თუ ვინმეს ვალი მიმყვება,
იქიდან გავუსწორდები“.**

უტყუარი ალლოსა და გრძნობის მგოსანი სულ ოდნავ მოტყუვდა, ესეც ავადმყოფობის ბრალი იყო, ალბათ: ექვს საათზე დაჰკარგა გრძნობა. ერთი საათი გასტანა სულთმობრძაობამ, ერთ საათს ეყრებოდა მის ტანჯულ სხეულს ძლიერი სული, სალამოს 7 საათზე ვაჟა-ფშაველა გარდაიცვალა.

ეს მოხდა 1915 წლის 27 ივლისს.

ასე იყო ცნობილი. მეც ასე ვყვები. ქალბატონ პეპელას კი აქაც კორექტივი შეაქვს:

„ეს ყველაფერი შემდეგ არის შეთითხნილი. ვაჟას ბოლო დღეებში სასიკვდილო აღარაფერი ემჩნეოდა თურმე. გამხიარულებული ემზადებოდა მთისაკენ. სანდროსთვის დაუვალებია ხვალ ტანსაცმელი მომიტანეო. სანდროსაც მოუტანია და ვაჟა მკვდარი დახვედრია“.

მართალია თუ არა, მე ვერაფერს ვიტყვი. ერთი კია, ბოლშევიკებს, ილიას შემდეგ, პირველი „ილიელების“ მოსპობა ჰქონ-

დათ განზრახული. აკი სხვიტორში გარიდებული ღრმად მოხუცი აკაკი წერეთელიც შემთხვევით გადაურჩა მათგან მიგზავნილი მკვლელების ხელს: სერგეი მესხის ძმები ბალიშით გუდავდნენ მძინარეს და შემთხვევით მომვლელმა ქალმა შეუსწრო.

ვაჟასი კი უფრო დიდი ბოღმა ჰქონდათ. მისი მოკვლითა თუ სიკვდილით ვერ დამშვიდდნენ. ძმა თედოც მოუკლეს, შვილი ლევანიც. 1950 წლებშიც კი კვლავ ვაჟას მოთხრა განიზრახეს.

* * *

დასაფლავება, მართლაც, დიდებული მოუნყვეს, რაშიც არც თვით ვაჟას ეპარებოდა ეჭვი.

ერთი საათის შემდეგ უკვე მთელმა ქალაქმა იცოდა ვაჟას გარდაცვალების ამბავი. სალამოს ათ საათზე შეკრებისა და მცირე თათბირის შემდეგ, კულტურულ-საგანმანათლებლო დაწესებულებათა წარმომადგენელნი მოვიდნენ წმ. ნინოს ლაზარეთში განსვენებულის თაყვანის საცემად. ამას გარდა მათ ჩაიბარეს ვაჟას ნივთები: ბუდიანი სათვალე, გიშრის კრიალოსანი, ძეწკვიანი საათი, საფულე, რომელშიც აღმოჩნდა ორი მანეთი, ორი აბაზი და ორი კაპიკი, ხელის დანა...

მეორე დღეს, დილის რვა საათზე, წყნეთის ქუჩისა და გოლოვინის პროსპექტის გავლით ვაჟას ცხედარი ქაშვეთის წმ. გიორგის ეკლესიაში გადაასვენეს. სალამოს შვიდ საათზე შედგა პირველი პანაშვიდი, რომელსაც დიდძალი ხალხი დაესწრო. რვა საათზე კი „ქ. შ. ნ.-კ. გამავრცელებელმა საზოგადოებამ“ მოიწვია კულტურულ-საგანმანათლებლო დაწესებულებათა წარმომადგენლების კრება. იმსჯელეს იმის შესახებ, თუ სად, როდის და როგორ დაესაფლავებინათ ვაჟას ცხედარი. მოისმინეს „ნ. კ. გამავრცელებელი საზოგადოების“ იმდროინდელი თავმჯდომარის გ. ყაზბეგის წინადადება, განსვენებული დაეკრძალათ დიდუბის პანთეონში. კრებამ დაადგინა: გაეგზავნათ კაცი ჩარგალში პოეტის ცოლ-შვილის ჩამოსაყვანად. ეს საქმე დაევალა თვით ვაჟას შვილს ლევანს, მაგრამ მერე უარყვეს, რადგან აღარ ესწრებოდა ასვლა-ჩამოსვლა. ამ საქმის მოგვარება დეპეშით აცნობეს თიანეთის მაზრის უფროსს. ქაშვეთის ეკლესიაში დასვენებულ ვაჟას საპატიო ყარაულში ედგნენ ეროვნულად განწყობილი, ნიჭიერი ახალგაზრდები. მათ შორის იყვნენ ძმები

ვახტანგ და ლადო კოტეტიშვილები. მათ ღამეც გაუთიეს და ამ ღამის თევისას ლადომ, შემდგომში ქართული მედიცინის ისტორიის კვლევის ფუძემდებელმა, მწერალმა, ვაჟა-ფშაველას სახის ნილაბი აიღო, რომლის მიხედვითაც შემდგომში ბიუსტიც გამოძერწა. ამჟამად ეს ნამუშევარი გ. ლეონიძის სახელობის ქართული ლიტერატურის მუზეუმში ინახება. ოფიციალურად კი, სახის ნილაბი მოქანდაკე იაკობ ნიკოლაძეს აუღია.

დასაფლავების ხარჯები (დაახლოებით 1500 მან.) უნდა ეკისრა ყველა ქართულ კულტურულ-საგანმანათლებლო საზოგადოებას, რომელთა შორის უამრავი „საზოგადოება“ იყო დასახელებული. ამას გარდა, მეორე დღეს, ოცდაცხრა ივლისს, დამკრძალავმა კომიტეტმა ოცდაათობმეტი დაწესებულებას გაუგზავნა დეპეშა, როგორც თბილისში, ისე პროვინციებში. დეპეშის მესამე პუნქტში ეწერა: „გატყობინებთ რა კრების დადგენილებას, უმორჩილესად გთხოვთ, ორი დღის განმავლობაში შეატყობინოთ კომიტეტს რამდენი წვლილის გადადება შეუძლია თქვენს საზოგადოებას“.

დამკრძალავმა კომიტეტმა დაადგინა: იმ დაწესებულებებმა და კერძო პირებმა, ვისაც კუბოს შემკობა სურს გვირგვინით, ამის ნაცვლად ფული გაიღონ „ვაჟა-ფშაველას ფონდში“ შესატანად.

როგორ ზუსტად აუხდა ნათქვამი! სიცოცხლეში ყველას შესჩიოდა, წამლების ფული მაინც გამოიმინახეთო და არავის ესმოდა მისი მუდარა. ეხლა კი შეიცხადეს. მთელი საქართველო ფეხზე დადგა, თითქოს ვაჟასთვის სულსაც არ იშურებდნენ. მის სიცოცხლეში ამისი მეთაფი ყურადღება რომ გამოეჩინათ, იმისი მეთაფი რომ შეეგროვებინათ ვაჟას სიცოცხლის გადასარჩენად, მისი ჯანმრთელობისათვის მოეხმარებინათ, რამდენი წლით გაუხანგრძლივებოდა სიცოცხლე, რამდენი ლექსი და პოემა არ დარჩებოდა დაუმთავრებელი, დაუნერელი. რა დიდი სიკეთე იქნებოდა ჩვენი მწერლობისათვის, ვაჟასათვის, ქვეყნისათვის.

როგორც შემდეგში გაირკვა, კომიტეტმა, მართლაც, მრავალი საზოგადოებისაგან მიიღო დაკრძალვის ხარჯების გასასტუმრებელი ფული. ბევრი ვაჟას სიცოცხლისათვისაც გაიღებდა შეწირულობას, თავის დროზე მოთავე რომ გამოჩენილიყო,

საზოგადოებას ასეთი ერთსულოვნება რომ გამოეჩინა. თითქოს ყველა გულგრილად ელოდა ვაჟას სიკვდილს, ვაჟას დასაფლავებას. მაშინ ძალიან მოკრძალებით თუ ვინმე გაბედავდა ვაჟას დასაცავად სიტყვას და არავინ ისმენდა, ეხლა რიხით იძლევიან ბრძანებებს და ყველა უხმოდ ასრულებს: „გზადაგზა, სადაც ცხედარს გაატარებენ, დააბნინონ ყვაავილები... ქართველ ქალთა საზოგადოებას მიენდოს მწვანითა და ყვაავილებით გზების მორთვის საქმე... დაკრძალვამ ღირსეული ზეიმით ჩაიაროს“...

ამ მწარე სიმართლეს ყველა გრძნობდა და ხმამაღლაც ითქვა იმ დღეებში. ეს იყო ქართველი ინტელიგენციის ერთგვარი მოსანანიებელი სიტყვა:

„ჩვენ, ქართველები, ოინის ხალხი ვართ, ან ჩვენ ვხუჭავთ თვალებს, ან სხვები გვგონია თვალხუჭულა. ნუთუ არ უნდა გვრცხვენოდეს ჩვენი თავისა? მთელი ოცდახუთი, ოცდაათი წლის განმავლობაში მარტოკა ეხლა აღირსეს ტკბილი სიტყვა და თბილი ლუკმა, თითქოს იგრძნეს (თუ ვიგრძენით), რომ ჩქარა უნდა მომკვდარიყო და მშობლიური მზრუნველობა აღმოუჩინეს, საავადმყოფოში მოათავსეს... ეს ხომ ყველამ იცოდა და ჩვენც ვიცოდით. რატომ ის სიტყვები, რომელიც გაცივებული გვამის წინ მარგალიტით ცვიოდა და იფანტებოდა, 10-15 წლის წინათ გაზეთის ფურცლებზე არ იფანტებოდა? რატომ, მანამ დრო იყო, საზოგადოებას არ ამცნეს ჩვენი დიდი ბუმბერაზი კაცის უღონობა. განა არ შეეძლოთ დახმარება აღმოეჩინათ?“

ღიანაც, შეეძლოთ, მაგრამ... „მაგრამ“ ის არის, რომ ზოგს ვაჟას ჩონა არ მოსწონდა, ზოგს სახელი, ზოგს სახლი, ზოგს იმისი საცხოვრებელი სოფელი, ზოგს იმისი ნანერები, ზოგს რა, ზოგს რა და ამიტომ უყურადღებოდ იყო მიტოვებული. და ეხლა თუ თბილ-თბილი სიტყვები ვაღირსეთ და დიდათ ავამაღლეთ იმიტომ, რომ სხვა ეროვნებაში ჩვენი ორატორობა არ დაიჩრდილოს და იცოდეს ისტორიამ: მოკვდა კაცი შიმშილ-გაჭირვებაში და უკანასკნელ დღეს საფლავის კარამდინ აცილებენ და პატივს სცემენ. ცივი ხლხი ვართ და თბილი სიტყვები კი ვიცით“. (ვანო მესხიშვილი).

დაკრძალვის დღეს, ორ აგვისტოს, მიცვალებულის წირვა დაიწყო დილის რვა საათზე. მწერალმა ქალმა ეკ. გაბაშვილმა კუბო ერთადერთი დაფნის გვირგვინით შეამკო, რომელზეც

მოჩანდა გატეხილი კალამი და წარწერა: „ვაჟა-ფშაველას ქართველი ერისაგან“.

ეკლესიაში, გალავნის შიგნით და გარეთ, ქუჩებში ზღვა ხალხი იყო. პოლიცია წესრიგს ამყარებდა, ეკლესიისაკენ მოზვირთებული ხალხის ტალღებს ძლივს აკავებდა. ამ დროს ლელა ბაჩღელივით გამოჩნდა ვაჟას უფროსი ქალი თამარი. მას გვიან გაეგო ერწოში მამის სიკვდილი, გვიან ჩამოვიდა. თვალცრემლიანი უხმოდ მიიკვლევდა გზას მამის ცხედრისაკენ. გზას არავინ უთმობდა და თვითონაც არავის რას ეუბნებოდა, რაკი ხედავდა ისინიც მისი მამის საგლოვად და პატივსაცემად იყვნენ მოსულნი. ეკლესიის სიახლოვეს გზა გადაკეტილი ჰქონდა პოლიციას, აღარავის უშვებდნენ და დადგა თამარიც. შემდეგში იგონებდა: „მე ერწოში, სოფელ მაგრანეთს, ქმრის ოჯახში ვიყავი. მამის ჯანმრთელობისა აღარაფერი ვიცოდი.“

ერთ ღამეს სიზმარი ვნახე. ჩვენი სახლისკენ მომავალ გზაზე გამოჩნდა მამაჩემი. ის თავის ცხენზე, „ნიკორზე“, იჯდა და პირდაპირ ჩვენსკენ მოდიოდა.

მე გამეხარდა მამის დანახვა და წინ შევეგებე. მოახლოებულმა ხმა არ გამცა და გზის გაგრძელება დააპირა. მე „ნიკორს“ ყელზე შემოვვხვიე, მამამ თავი გაიბრუნა და მითხრა: „ეჰ, რალა დროსიაო!“

გამომეღვიძა დაღონებულს და შეშინებულს. როგორც კი ინათლა, გავიქეცი ჩვენს მახლობელ სოფელში ბერაანთას. იმათ მისვლა-მოსვლა ჰქონდათ თბილისში და გაზეთებსაც ლეზულობდნენ. ბერაანი მოწყენილი დამხვდნენ და ბოლოს გამომიტყდნენ კიდევაც: მამა მოგვეკვდომია, შე საწყალო, და რატომ არ მიდიხარ, რას აკეთებო.

დავბრუნდი. ტირილით გამოვიარე მთელი გზა. მივედი შინ, მაშინვე შევკაზმე ცხენი, შევჯექ და იმავე დღეს ნაძალადევისში ჩამოვიდი. იქ მითხრეს, მამაშენი ქაშუეთის ეკლესიაში არის დასვენებული. ქაშუეთის ტაძარში რომ მივედი, დიდძალი ხალხი ირეოდა, გზა არ იყო ხალხის გამო და შესვლა არ შეიძლებოდა. ამ დროს გამოვიდა ერთი ნაცნობი, ქუდი დამიქნია და ხალხს მიმართა: ხალხნო, ვაჟას ქალიშვილი მოდის და დაუთმეთ გზაო! ძლივს მივალნიე კუბომდის“.

როგორი თავშეკავებაა! ვაჟას გაზრდილი ქალია! ცდილობს, არავინ შეაწუხოს თავის მოთქმითა და ტირილით. რაკი ვაჟას ყველა გლოვობს, არა ცდილობს მათგან გამორჩევას, ისიც მათში გაერია. და, ალბათ, ასე შეუმჩნეველად იდგებოდა ბოლომდე, შემთხვევით ეკლესიიდან გამოსულს, რომ არ ეცნო ვილაცას. შევიდა. მიიყვანეს მამის ცხედართან, თავის და-ძმებთან, დედინაცვალთან და იქაც უხმოდ, ჩუმად აქვითინდა. ამდენ ხალხში და ასეთ ზიმზიმში ვერ ბედავდნენ ფშაურად ხმით ტირილს. იდგნენ უხმოდ და თამარს, ვაჟას მეუღლეს, ძალაუნებურად დააყენებინეს ძველი ქართული, ხევსურეთში შემორჩენილი წესი, ცოლს ქმრის ტირილი რომ ეკრძალება დღესაც. დღესაც ხევსურეთში ცოლი ქმარს ვერ იტირებს, სირცხვილად ითვლება; ფშავში კი შეიძლება, გუდამაყარშიც, მაგრამ აქ ხევსურული წესით მოიქცა თამარი. „მრცხვენოდა, ტირილი მინდოდა და ვერა ვტიროდიო“, – გაიხსენა შემდეგში. ეკლესიაში სიტყვები წარმოთქვეს ლეონიდემ, კ.კეკელიძემ, მღვდელმა კავკასიძემ. გალავანში გამოსვენებულთან – „ნ. - კ. გ. საზოგადოების“ წარმომადგენელმა ლ. ბოცვაძემ, თუმ-ფშავ-ხევსურთა მხრით თუშმა დ. ქადაგიძემ, ნიჭიერმა ახალგაზრდა პოეტმა, რომელიც შემდეგში დახვრიტეს კომუნისტებმა.

სამგლოვიარო პროცესია შუადღის 12 საათზე გაემართა გოლოვინის პროსპექტის (დღევანდელი რუსთაველის გამზირი), ვერის ხიდისა და მიხეილის ქუჩის გავლით დიდუბისაკენ. დაკრძალვას დაესწრნენ ქალაქთა, საზოგადოებათა, წოდებათა წარმომადგენელი. ხალხიც საკმაოდ ბევრი იყო, მიუხედავად იმისა, რომ ამ დროს ბევრი უკვე სააგარაკოდ იყო გასული თბილისიდან.

ქართველი ერის სახელით მიძღვნილი ერთადერთი გვირგვინი „ვაჟა-ფშაველას – ქართველი ერისაგან“ მიჰქონდათ სანდრო შანშიაშვილსა და კოტე მაყაშვილს. ვაჟას ნეშტდასვენებული ეტლის ირგვლივ კი რიგრიგობით გალობდა ოთხი გუნდი: მ. კავსაძის, დიდუბის ეკლესიის, ჩარკვიანისა და ფილარმონიული საზოგადოებისა. ილ. აგლაძის პატარა გოგონა, ვაჟას ნათლული, ყვავილებით შემკული ვაზის ჯვრით წინ მიუძღვოდა მიცვალებულს.


პროცესიამ დიდუბის ტაძარს ორ საათზე მიაღწია. გაიმართა მიტინგი. ქართველი საზოგადოების სახელით სიტყვები წარმოთქვეს: დიდუბის ეკლესიის წინამძღვარმა მირიანაშვილმა, მღვდელმა კელენჯერიძემ, ქუთაისის დრამატული საზოგადოების წარმომადგენელმა გრ. ლალიძემ, მუსულმანთა საქველმოქმედო საზოგადოების წარმომადგენელმა სულთანოვმა, ქართველ სტუდენტთა წარმომადგენელმა ვახტანგ კოტეტიშვილმა, ტფილისის მშრომელი ხალხის წარმომადგენელმა ივ. ბალიაშვილმა, მუსულმან სტუდენტთა წარმომადგენელმა ახმედ-ბეგ პეპინოვმა, ქ. შ. ნ. - კ. გ. საზოგადოების ზესტაფონის განყოფილების წარმომადგენელმა კელენჯერიძემ, ჭიათურის მუშათა სახელით ა. იოსელიანმა და ხიზანიშვილმა, ვაჟას ძმამ, ბაჩანამ, დაბოლოს, ვაჟას შვილმა ლევანმა.

**(ვახტანგ კოტეტიშვილის მიერ წარმოთქმული სიტყვა ვაჟას ცხედართან.
ქვეყნდება პირველად. არქივში მოიძია ნანა კოტეტიშვილმა)**

„ბატონებო!

საშინელი და საიდუმლოებით აღსავსე რამ არის სიკვდილი! ჯერ განუჭვრეტელ ღამის მანტიით დაიარება მარად უცნობი, გაუგებარი. კუბოს საშინელება, სამარეთა მოჩვენებანი, ზებუნებრივი რამ ამოცანანი, – აი რა სწერია ცხოვრების შავ წიგნში. ნათელი გამჭვირვალეობა სიცოცხლისა ცრუვდება სიკვდილის აჩრდილის წინაშე და გარდაიქცევა მხოლოდ მოჩვენებად. სიკვდილს გული არა აქვს. იგი გრძნობაგაყინულია, ბრმა, დაუნდობელი. იგი სტიქიურია, განურჩეველი, თავხედი, ადამიანები მის წინაშე მხოლოდ ცრემლს-ლა ღვრიან შიშით გარემოცულნი.” ვა?, სოფელმან სოფელს მყოფი, ყოვლი დასვა ცრემლთა დენად“-ო, ასე იტყოდა დიდი შოთა და აკი ასეც ხდება საწუთროში. თითქოს საშინელია ადამიანის ბედი, მაგრამ თვით ამ საშინელებაში არის მთელი სილამაზე სიცოცხლისა. აქ ცნაურდება ადამიანის ძალა, უნარი. სიკვდილი ძლიერია და გამოუცნობი. მაგრამ იმავე დროს იგი უძლურიცაა და საცნობიც. ჩვენ გვეშინია კიდევ მისი და თანაც წარბმეუხრელად ვხვდებით უკმესს. იგი აკვდინებს სხეულს, მაგრამ სულს კი ვეღარ ეხება უძლები, ხარბი. თვით

სიკვდილი შეთრთოლდება მარადისობისათვის განმზადებული სულის წინაშე და ქედს მოიხრის დამარცხებული. არ გსურთ ირწმუნოთ? აჰა სამარე, აჰა ცხედარი! დღეს გლოვის ზარს რეკენ გულდანყვეტილნი. ორმაგი არის იგი გლოვა. ჯერ თვით სიკვდილი დასტირის თავის უძლურებას, რომ ვერ შესძლო ამაყ სულის მოკვდინება, შემდეგ ხალხი გლოვობს, რომ არ ძალუძს სხეული, ფორმა უკვდავი სულისა შემოსოს მარადისობით, მაგრამ მაინც საზარელია უხეში თითი ბრმა სიკვდილისა. მაინც საშიშია ცივი სუნთქვა სიკვდილის აჩრდილისა.



ვისზე ჩამოჰკრეს გლოვის ზარი? ვინ გარდაიცვალა? ვისზე გაეხვია მძიმე თაღხებში მთლად საქართველო? აბა, გაჰხედეთ ფშავეთის მთებს რა ნისლის ძაძა მოუხვევიათ! აბა შეხედეთ რა პირქუშად გამოიყურებიან გულამღვრეულნი. ვაჟას სტირიან, ფშაველ ვაჟას, ერის დარაჯს, მათათა ფიქრის გამომხატველს, თვით ფიქრს; სტირიან ერის მომღერალს, მგოსანს, გრძნეულს. მთა ხომ ჩვენი ერის სადარაჯოა, ერის ფიქრ-ზრახვის საფარი უხიფათო. ვაჟამ გაიგო, რომ "ოცნება ტანჯულ ქვეყნისა, ქვითინებს მთისა წვერზედაო" და იქით გაეშურა. მთას მაღალს, გულზვიადს, ამაყს, სთხოვა ბინა, ნავთსაყუდელი. "ჩვენი თავი ჩვენადვე გვეყუდნოსო" – ეს ჩვენი ეროვნული იდეა მთაში იყო შენახული უმნიკვლოდ, იქიდან ჩამოიტანა იგი დიდმა ილიამ. ვაჟასაც ეს უგალობეს მშობ-

ლიურ მთებმა. და ვაჟამაც ეს აღიბეჭდა ცეცხლის ასოებით რკინა გულზე. მან გაიგო მთის ფიქრი, გაიზიარა მთის ზრახვა, და მთა ამაყი, ბარს დაუახლოვა. ბარელ მეგობრებს ვაჟამ მთებიდან გადმოჰყვივლა გმირულად და ჩვენს არსებაში გააღვივა ცეცხლი ეროვნული.

**“სამშობლოს არვის ნავართმევთ,
ჩვენს ნურვინ შეგვეცილება,
თორემ ისეთ დღეს დავაყრით,
მკვდარსაც კი გაეცინებაო”.**

ამ გმირულ ყივილით შეათრთოლა ჩვენში მძლედ მეტყველი აზიური ფლეგმა, განგვიმტკიცა ეროვნული ნება, აგვინთო გრძნობა ცეცხლეულ სიტყვით და გვასწავლა სამშობლოს სიყვარული.

ჩვენც ვუსმენდით მთის მომღერალს, ვუსმენდით კლდეთა ამაყ შვილს და მის ნამღერ საღ საგნებს ფიანდაზად ვუშლიდით ჩვენს გრძნობათა ქსოვილს. ჩვენ უძლებად ვენაფებოდით იმ ანკარა წყაროს, რომელიც პოეტურ კვერთხის დარტყმით გადმოადენდა ფშავეთის კლდეთა საღი გულიდან. ჩვენ თრთოლვით ვუსმენდით ვაჟას ძახილს და მის მთიურ სიმღერებში ვეზიარებოდით მთების ზრახვას. ვაჟა მღეროდა და ამ მღერაში ცხადდებოდა მთების ოცნება; ვაჟა მეტყველებდა და მის მეტყველებაში ცნაურდებოდა მთების ფიქრი; ვაჟა ჰგოდებდა, კვნესოდა, და მით გვამცნობდა მათათა წუხილს, ბარი უსმენდა და იმ სიმღერით ცოცხლობდა, იმ მეტყველებით ფიქრობდა, და იმ კვნესა-გოდებასაც იზიარებდა მხურვალედ. და ოდეს "მთანი თავჩაჩქნიანები ფიქრს მისცემიან მწარესა", მაშინ ბარად ჩამოდენილი "არაგვიც ჩუმად მოსჩქეფდა, თვით ცრემლსა ცრემლი სდიოდა", და ასე გულ-მკერდს უსველებდა შებორკილ ბარს. და გაიბა მთა და ბარს შორის ცოცხალი კავშირი. ვაჟა იყო ამის მომქმედი. იგი დადგა მათ შორის "ქედმოუდრეკელ სვეტად", და ასე გადმოგვცემდა მათათა გულის ტკივილს: "გული სტკივათ, ძალიან სტკივათ, მაგრამ არ იხოცებიან. ელიანო". ასე გვეტყოდა მთების მგოსანი. ჩვენც ხომ ველოდით და ველით დღესაც. რას? – ბაზალეთის ტბის ძირას მოქცეულ ყრმის ამოყვანას,

ერის ფიქრის განხორციელებას, საქართველოს ლალ-განახლებულ ცხოვრებას. ჩვენ ველით ჩვენი ერის ახალი აზრით გაცისკროვნებას, ახალ გრძნობით მონათვლას, მომავალს უკეთესს. მთების ფიქრი და ბარის ოცნება მხოლოდ ეს იყო. ამ აზრსავე ამკობდა მხატვრული ფერებით მთების გრძნეული ვაჟა, ამ აზრსავე ეთაყვანებოდა მგოსნის ოცნება, მისი ნება. "ვაი რომ რჩება აკვანი, ბაზალეთის ტბის ძირასა, და დიდხანს კითხვადა რჩება: ვინ ამოიყვანს იმასა?" - იკითხე შენ ქართველი ერის დარაჯო და ამაყ-იმედთან შუბლზე გაივლე სევდის ზოლი. ნუ წარიკვეთ სასოებას, ჩვენო არწივო! ნუ გაგვაგონებ" ვაის" ხმას! ნუ გაგვინელებ იმ ცეცხლს, რომელიც აღგვიგზნე ჭაბუკ გულში. როგორ გგონია, როს იტყოდ: "ვერ მივსცემ მტერსა მამულსა, საჯიჯგნად, დასაზიანადო", განა ეს სიტყვები სისხლის ასოებით არ ამოიჭრა ჩვენი გულის ფიცარზე? ნუთუ გგონია, რომ შენმა ნათქვამმა ვერ იპოვა კარგი გამგონე? არა მგოსანო! ახლა საქართველოს ეროვნულ დროშაზე ასომთავრულით ეგ ამოვქარგეთ! ახალი საქართველო აგისრულებს გულის სანადელს. ნუ გეშინია, არც ჩვენ არ მივცემთ მტერს ჩვენს სამშობლოს საჯიჯგნად, დასაზიანად. ჩვენც

**“სამშობლოს არვის წავართმევთ,
ჩვენს ნურვინ შეგვეცილება,
თორემ ისეთ დღეს დავაყრით,
მკვდარსაც კი გაეცინება!”**

დიდო მგოსანო! ჩვენ, ახალი საქართველო, არ გიტირებთ, ჩვენ ცრემლს არ დავაფრქვევთ შენს ცხედარს ძვირფასს. ჩვენც იმ ვაჟკაცურ სიმტკიცეს გამოვიჩინებთ, რომლითაც შენ იტანდი ტიალ ბედის სიმძაფრეს.

**“ჩვენ არ გვიყვარს ოხვრა, კვნესა,
ჩვენ არ გვიყვარს მოთქმა, ცრემლი,
იმედებით ჰფეთქავს გული,
იმედებსვე სჭედავს გრდემლი” (ქუჩიშვილი)**

და შენც, ქართველო ერო, ქართველო დედავ, "თვალებს ნუ ითხრით ცრემლითა, გულს ნუ იხოკავთ დარდითა". ნუ გვინ-

და ცრემლი, თორემ ცრემლში გაქარვდება დღეის სიმძაფრე. ცრემლი გრძნობის სიტყვაა, და თქმით კი ჭმუნვა მცირდება. ჩვენ თქმა არ გვინდა, მხოლოდ ჭმუნვა გულს ჩაიკეცოთ, რომ მწველი ცეცხლი გვტანჯავდეს მარად. ჩვენ ეს ტანჯვა გვეჭირვება, რომ სული ჩვენი განმტკიცდეს; ჩვენ ტანჯვა გვინდა, რომ ცხოვრებას აღარ მოვუხუჭოთ თვალი, აღარ ავეთრევინოთ. ტანჯვაა ჩვენთვის საჭირო, რომ ვიფხიზლოთ დიდი ხნის მძინარეთ. ხოლო ეს სიფხიზლე აღთქმის შესასრულებლად გვეჭირდება. იგი აღთქმა დიდია და სანუკვარი. ფიცს ვსდებთ, რომ აღთქმის დროშას თავცოცხალი არავის დავანებებთ.

**“არ მივსცემთ მტერსა სამშობლოს,
გულში დავიცემთ დანასა,
არ მივსცემთ უცხო ტომისას
თავის მამულის ლალასა”.**

ეს დამავალეს ქართველ სტუდენტებმა, მამავ ძვირფასო! გპირდებით, რომ თავისუფლების მოტრფიალე მგოსანს თავისუფალ სამშობლოში გექნება ბინა სამარადისო.“

არც კი გინდა დაიჯერო! ვაჟას გამოსამშვიდობებელი სიტყვა ქართველ მწერალთა, თბილისის ინტელიგენციის სახელით არავის უთქვამს. ისევ ქუთაისის წარმომადგენელი, ისევ ზესტაფონი, ისევ ჭიათურა – ისევ პერიფერია და მისი უტყუარი სული.

ნაშუადღევის სამ საათზე (მცირე პანაშვიდის შემდეგ) ვაჟას ცხედარი მიწას მიაბარეს.

ვაჟას ანდერძი ჰქონდა დატოვებული: როცა მოგვედები, ჩარგალში, სარაყდრის გორზე დამმარხეთო. ეს სწორი, ვაკე გორია ჩარგლის ჩრდილო-დასავლეთით, სოფლის თავზე. გორის წვერთან, არაგვზე გადასახედთან, ძველ დროს საყდარი მდგარა, სასაფლაოც იქა ყოფილა. ამ გორიდან კარგად ჩანს გაღმავამოღმა სოფლები: მიგრიაულთა, გუდარახი, კანალხევი, აფშო, ხომი, ინო, ბონახი; მთები (საორბე, კილდოვანი, ახუნი, დონია...), ჭალები... ამ მშვენიერ მოსახედ ადგილას ვაჟას ძალიან ჰყვარებია ჯდომა, თვალის ვლება...

ვაჟას ეს ბოლო თხოვნაც ყურადღებელი დარჩა. მისი სურვილისათვის ანგარიშის განწევას არ იყო ჩვეული საზოგადოება. ფშავლები მერელა მიხვდნენ ვაჟას ნათქვამს – არა მგონია ჩარგალს დავიმარხო.

ვაჟას ანდერძი ჩარგალს იყო დატოვებული, ისიც – სხვათა შორის. თბილისში კი არაფერი ანდერძი დაუტოვებია.

მონინავე, პატრიოტიკმა სტუდენტებმა ვახტანგ კოტეტიშვილის მოთავეობით დამკრძალავ ბიუროს სთხოვეს ვაჟა ფშაური, მთის წესით დაემარხათ, ხმით მოტირლებს დაეტირათ. არც ეს ჩათვალეს საჭიროდ.

ვაჟა დამარხეს თბილისში ფშაური წესისა და დატირების გარეშე, ფშავში კი წესი დაუყენეს და დაიტირეს დამარხვის გარეშე. ასე იყოფოდა მის ირგვლივ ყოველთვის ყველაფერი: ცოცხალი როცა იყო – დაფასება არა ჰქონდა, დაფასება დაუნყეს და ცოცხალი აღარ იყო.

ფშავში ვაჟას წესისა და რიგისა არაფერი დააკლეს. მეზობლებმა და ნათესაობამ იქ მოიყარა თავი. საკლავებიც დაიხოცა და სანთელ-საკმეველიც ეკმია, სასმელიც დაიხარჯა და ცრემლიც.

ვაჟას ნაბადი გაჰფინეს ეზოში და ზედ მისი ტანსაცმელი გაშალეს, გამოიტანეს და ზედ დაანყვეს მისი ხმალ-ხანჯალი, თოფი, ფარი. ირგვლივ შემომსხდარი – შავოსანი დიაცებიდან რიგრიგობით იღებდნენ ვაჟას ხმალს დატირების მსურველნი და ხმამაღლა მოთქვამდნენ ვაჟას ოჯახის ბეჩაობას და ვაჟას სახელიანობას. ჩარგლურას წყნარ შხუილს ერთვოდა სიმღერას მიმსგავსებული ფშაური ტირილ-მოძახილი.

თუ ფშაველი კაცები სიმღერით ნათქვამ კაფიაში ეჯიბრებოდნენ ერთმანეთს, ფშაველი ქალების შეჯიბრი ხმით ტირილშია. ეს პოეტობაა, ჩუმი შეჯიბრია, უხმაურო და გამკვივანი. კარგი ნატირალი კარგი ლექსივით „გაქვეყნდება ხალხში“. ჯერ ერთმა ფშაველმა დედაკაცმა დაიტირა:

**„ვერ გაიგეთა ფშაველნოო,
შეგეხსნათ რკინის კარიოოო,
ქალაქში დარჩა ლუკაიოოო,
რაზიკაანთა გვარიოოო“.**

ვაჟას ხმალი ახლა ბეროთ ნათელამ აიღო, ფშავში განთქმულმა მოტირალმა, ვის ტირილსაც ვაჟა პოეტურ შემოქმედებას ეძახდა. ვაჟასავით ამაყად დაებჯინა ვაჟას ხმალს და ცისკენ თვალაპყრობილმა დაინყო მოთქმა:

**„ეეს თუ არი ჩვენი ლუუუკაიიი,
ბადალი მთელიის ხმელეეთისაა“...**

მთიელები სულ უბრალო კაცის დატირებისასაც კი ეპითეტებს არ იშურებენ. არნივებსა და კლდის ვეფხვებს აღარებენ, ოჯახის ურგებზეც კი ოჯახის იმედს იტყვიან. ამ გაზვიადებასაც – „ბადალი მთელი ხმელეთისაო“ – უდაოდ გადაჭარბებდად ჩაუთვლიდნენ მაშინ ნათელას მთაშიც და ბარშიც. მაგრამ ნათელას ეს ლამაზი სიტყვებისათვის არ უთქვამს – ათქმევინა რალაცა შინაგანმა პოეტურმა გრძნობამ, დიდმა განცდამ ვაჟას პოეზიისა. ნაგრძნობი ისე, როგორც კლდის თავზე წამოზრდილი პირიმზე გრძნობს მზის სითბოს, ნაგრძნობი ისეთივე ქალისა, როგორც იყო ხვარამზე, მთქმელი ლექსისა „ვერცხლის თასადამც მაქციაო“.

ბეროთ ნათელა კანალხეველი ქალი ყოფილა, ხორნაული, ასხავარათ გამახარეს და, ჩარგალში გათხოვილი. ძალზე პოეტურ ქალს, გარეგნულადაც მოხდენილს მოსწონდა თურმე ვაჟა და არც ისა ყოფილა გულგრილი – ვაჟას წაწალი ყოფილა. საფერნი ყოფილან ერთურთისა. ნათელას ტირილიც ძალიან მოსწონდა ვაჟას. ერთხელაც ნათელასაგან ვილაცის დატირებას უსმენდა თურმე და თვალცრემლიანს დაუნატრებია: „ნეტაინ, რო მოვკვდები, ნათელა მეც ეგრე დამიტირებდესო“.

და რამდენად სიმბოლურია, რომ ვაჟას სიდიდეს, მის ბუმბერაზ მწერლობას ხედავდა საქართველოს ერთერთი უპირველესი და უდიდესი მოაზროვნე, გონების თვალთ მხედველი, უმაღლესი ერის კაცი ილია ჭავჭავაძე („რუსთველის შემდეგ ჩვენ ასეთი პოეტი არა გვყოლიაო“) და და საქართველოს იმდროინდელი საზოგადოების ყველაზე დაბალი ფენის წარმომადგენელი, უბირი დედაკაცი („ბადალი მთელი ხმელეთისაო“). ეს უბირი ქალი იყო „ქართველის დედა“ გულით, გრძნობით მხედველი. ორივე ერთსა და იმავეს ხედავდა და უტყუარად. აქ იყო შეერთება და ნათესა-

ობა უმაღლესი აზრისა და უმაღლესი გრძნობისა. იმ დროს ვინც მიახლოებული იყო ამ უმაღლეს აზრთან, ან უმაღლეს პოეტურ გრძნობასთან, მხოლოდ მათთვის იყო ვაჟა გასაგები. საშუალო-თათვის, შუაზე მდგომთათვის ვაჟა გაუგებარი იყო... ნახევარ საუკუნეზე მეტი დასჭირდა ჩვენს საზოგადოებას ილია ჭავჭავაძის ნააზრევისა და ბეროთ ნათელას ნაგრძნობის გაგებამდე მისასვლელად.

ნიშანდობლივია ისიც, რომ ჩვენი საზოგადოებიდან პირველად „ცისფერყანწელებმა“, ამ უმაღლესი პოეტური სულისა და გრძნობის ადამიანებმა ატყეს განგაში ვაჟას გენიალობაზე და მოითხოვეს მისი ნეშტის დიდუბიდან მთანმინდაზე გადასვენება.

ის, რაც ვაჟას დასაფლავების დროს ითქვა თუ დაინერა, ბევრი რამ ისევ და ისევ ვალის მოხდით იყო ნაკარნახევი. დასაფლავების მეორე დღიდანვე კვლავ განელდა ვაჟას მიმართ გამოჩენილი ენთუზიაზმი. საფლავი იმდენად მიივიწყეს და მი-ატოვეს, ბოლოს ისე აბალახდა, რომ აღარც კი გაიგებოდა, სად ემარხა პოეტი.

ასე გაგრძელდა ოც წელიწადს. გარდაცვალებიდან ოცი წლის თავზე კი ვაჟას ნეშტი დიდუბიდან მთანმინდის ქართველ მწერალთა და მოღვაწეთა პანთეონში გადაასვენეს. ეს ისევ და ისევ ყოფილმა „ცისფერყანწელებმა“ და მათ შორის გიორგი ლეონიძემ გააკეთეს. მაშინ დიდუბეში გამართულ მიტინგზე ვაჟას ნათლულმა, დიდმა ქართველმა პოეტმა გიორგი ლეონიძემ, ლექსში „ვაჟა-ფშაველას საფლავზე დიდუბეში“ თქვა:

„ის აქ ვინ დაასვენა,
რომელ დამნაშავემა?
მთა უნდა მთასთან იყოს,
ზევით ვაჟა-ფშაველა!“

* * *

საუკუნეთა სიღრმიდან მოედინებოდა რაზიკაშვილთა ჯიშ-ჯილაგის არაგვივით მჩქეფარე სისხლი და თითქოს მოედინებო-

და იმიტომ, რომ ვაჟა-ფშაველამდე გამოეტანა ყოველივე კარგი და საუკეთესო ჩვენი წინაპრებისა. თითქოს ყველანი მხოლოდ იმიტომ ავარჯიშებდნენ ჭკუა-გონებას, რომ საბრძენკაცოდ შემზადებული ჩაებარებინათ ვაჟასათვის; თითქოს იმიტომ მო-აჩქეფებდნენ ცხელ სისხლს, რომ ვაჟას სხეულში ყველას სახე-ლით ეყვილა და „გალურჯებულყო“; თითქოს იმიტომ ისალ-კლდევებდნენ ორგანიზმს, რომ ვაჟაობას ვერ იზამდა სუსტი და მომცდარი, თითქოს იმიტომ გადმოეცემოდა თაობიდან თაობას ლაჭაურას მუზარადისხელა უტეხი გული, რომ ბევრი იარის ატა-ნა შეძლებოდა და მოჰქონდათ შეუბღალავი სახელი და სინდის-ნამუსი, რათა ვაჟას საქართველოზე გადაეწვდინა. პირნათლად შეასრულეს თავისი ვალი სულკურთხეულმა „პიროფლიანებმა“. ამიტომაც იყო ვაჟა მოწინებულის მათი ხსოვნის წინაშე, ამიტო-მაც ამბობდა „გმირთა საფლავებს, როგორც ხატს, სამთხვევ-ლად დაველირებო“. მათ უმადლოდა სულგრძელი ვაჟა თავის სიკეთეს. ხედავდა, რომ მისი სიკეთე შემზადებული იყო მისი წი-ნაპრებისაგან, ფშაველებისაგან, ფშავე-ხვესურთაგან და მთლი-ანი საქართველოსაგან. მთლიან საქართველოს ჯვარი სწერია, თავის წინაპართა ენერგია კი ყოველგვარი და ყოველმხრივი მძლავრად შენოვა ვაჟამ, ის მჩქეფარე მდინარეა ბუმბერაზუ-ლი დაწაფებით მოხვრიპა და დააშრო. მემკვიდრეობით მიღებუ-ლი ჯანიც და სისხლიც, გონიც და გულიც ბოლომდე გახარჯა, გაცვითა, გამოიყენა და გადასაცემად აღარაფერი დარჩა. კიდევ კარგი, რომ გამოიყენა და ქვეყნის სამსახურში დახარჯა.

აზრისა და გონების, გულისა და გრძნობის ძალას იმ მცირე ასპარეზიდან, რასაც რაზიკაანთ საგვარეულო ეწოდება, ფარ-თო ასპარეზი მისცა. მაღალ რანგში, დიდ ღვთიურ ძალამდე აყ-ვანილი ყველა ქართველის სამემკვიდრეოდ აქცია, და არა მხო-ლოდ ქართველთა – საერთო საკაცობრიოდ.

თმიანი დაბადებულა ვაჟა, გრძელი თმა თვალებზე ჰქონია ჩამოფარებული. უთქვამთ: „ნაწილიანიო“, „ლმერთთან წილ-ნაყარიო“. ასე იყო ალბათ „დანერილი“ – ხორცილთა უნდა გვე-მულიყო. ბოლოს კი, ამქვეყნიური მისიის შესრულების შემდეგ, თავისივე პირით უნდა ეთქვა ცოდვილი ქვეყნისათვის: „მე ავი-ნიე ზეცადაო“ და... ამაღლდა.

დამონმებული ლიტერატურის სია:

1. აკობაშვილი ვეფხო, „მოგონებანი ვაჟაზე“, თბ., 1965.
2. ბაქრაძე აკაკი, „კრიტიკული გულანი“, თბ., 1977.
3. ბაქრაძე აკაკი, „ილია ჭავჭავაძე“, თბ., 1984.
4. ბაშარული გულნარა, „გულქან რაზიკაშვილის ბოლო სურვილი“, „სამშობლო“, 1989 წ. მარტი.
5. ბენაშვილი დიმიტრი, „ვაჟა-ფშაველა“ თბ., 1989.
6. ბორელი თომაზ (პლატონ კეშელავა -გ. ხ.), „პოეტთა შეჯიბრი – აკაკი და ვაჟა“, ტფ., 1930.
7. ბოძაშვილი ლევან, „ფშავი და ფშაველები“, „საბჭოთა საქართველო“, თბ., 1988.
8. ბოცვაძე იოსებ, „ვაჟა-ფშაველა ქართულ ლიტერატურულ კრიტიკაში“, თბ., 1955.
9. გრიშაშვილი იოსებ, „ძველი თბილისის ლიტერატურული ბოჰემა“, თბ., 1927.
10. გოგოჭური დავით, „ხევსურული საგმირო პოეზია და გმირები“, თბ., 1977.
11. გოგოხია ლილი, „რაზიკაანთ ერთი ძმა“, „ნაკადული“, 1967.
12. გულისაშვილი ლალი, „რას მღეროდა ვაჟა-ფშაველა“. „ლიტ. საქართველო“, 1987 12 ივნისი.
13. ევგენიძე იუზა, „ვაჟა-ფშაველა“, თბ., 1982.
14. ერემეიშვილი იროდიონ, „ვაჟას ერთი საღამოს შესახებ“, ჟურნალი „კრიტიკა“, 1989, 4.
15. ვაჟა-ფშაველა, „თხზულებათა სრული კრებული ათ ტომად“, IX თბ., 1964.
16. ვაჟა-ფშაველა, „თხზულებათა სრული კრებული ათ ტომად“, X თბ., 1964.
17. „ვაჟა-ფშაველას“ (კრებული), თბ., 1966.
18. ვართაგავა იპოლიტე, „წერილები და მოგონებები“, თბ., 1975.
19. ზალდასტანიშვილი სოლომონ, „საქართველოს 1924 წლის ამ ბოხება“, პარიზი-თბილისი, 1989.
20. თოფჩიშვილი როლანდ, „აღმოსავლეთ საქართველოს მთიელთა მიგრაცია XVII-XX ს.ს.“, თბ., 1984.
21. ითონიშვილი ვალერიან, „ხვეის ტოპონიმიკა“, თბ., 1971.
22. „ილია ჭავჭავაძის სიკვდილი და დასაფლავება“ (კრებული), თბ., 1989.
23. იმედაშვილი გაიოზ, „იოსებ იმედაშვილის ცხოვრების გზა“, „საბჭოთა საქართველო“, 1984.

24. იონანე ბატონიშვილი, „კალმასობა“, „ქართული პროზა“, VI, თბ., 1984.
25. „კაი ყმა“ (მოგონებები ვაჟა-ფშაველაზე. შემდგენლები: მარინე ბეჟიტაძე, სარგის ცაიშვილი), თბ., 1986.
26. კიკნაძე გრიგოლ, „ვაჟა-ფშაველას შემოქმედება“, თბ., 1957.
27. კლდიაშვილი დავით, „მემუარები“, თბ., 1932.
28. Лессинг Г. Э. „Лаокоон, или о границах живописи и поэзии“, М. 1957.
29. ლომაშვილი ჯიბო, სტ. „წიგნი ერწო-თიანეთის ტოპონიმიკაზე“, გაზ. „ახალი თიანეთი“, 1981, 105, 5 სექტ.
30. ლომაშვილი ჯიბო, „ვაჟა-ფშაველას საზოგადოებრივ-პოლიტიკური შეხედულებები“, თბ., 1982.
31. მანსვეტაშვილი იაკობ, „მოგონებანი“, ტფ., 1936.
32. Мачабели М. В., „Экономический быт государственных крестьян Тианетского уезда, Тифлисской Губерний“: „Материалы для изучения экономического быта государственных крестьян закавказского края“. , т. V, Тифлис, 1887.
33. მესხიშვილი ვანო, „ვაჟას დაფასება“, ჟურნ. „თეატრი და ცხოვრება“, თბ., 1916.
34. ნათაძე ნოდარ, „ვაჟა-ფშაველას წარსული და მომავალი“, „ცისკარი“, 1961 7.
35. ოჩიაური თინათინ, „მითოლოგიური გადმოცემები აღმოსავლეთ საქართველოს მთიანეთში“, თბ., 1967.
36. რაზიკაშვილი ეთერ, „ცოტა რამ მამაჩემ-ბიძაჩემზე“, „ნაკადული“, 1976.
37. რაზიკაშვილი ვახტანგ, „მამაჩემი ვაჟა-ფშაველა“, თბ., 1961.
38. რობაქიძე გრიგოლ, „ვაჟას ენგადი“: „ჩემთვის სიმართლე ყველაფერია“ (კრებული), თბ., 1996.
39. რობაქიძე გრიგოლ, „ვაჟა-ფშაველა“: „შერისხულნი“, II, თბ., 1994.
40. როსტომაშვილი შოთა, „ასი ოცნების მხარეში“, თბ., 1986.
41. „ფშავის საეკლესიო წიგნები“ „მეტრიჩესკის წიგნი მოცემული საქართველო-იმერეთის უწმინდესის მმართველის სინოდის კანტორითგან თუშთ ფშავთ ხევსურეთის ოკრულის სოფლის გომენრის წმინდის გიორგის ეკლესიასა შინა ჩასაწერად დაბადებულთა ქორწინებით შეუღვლილთა და გარდაცვალებულთა ჩღმგ (1843) წლისათვის“, არქივი 509, ფონდი 489, აღწერილობა – 6.
42. ქართველიშვილი ივანე, „ვაჟას ნაკვალევზე“, თბ., 1977.

43. „ქართლის ცხოვრება“, II, თბ., 1959.
44. „ქართული ლიტერატურის ისტორია“, ექვს ტომად, IV, თბ., 1974.
45. „ქართული მწერლობა“, VIII, 1990.
46. ყუბანეიშვილი სოლომონ, „ვაჟა-ფშაველა (დოკუმენტები და მასალები)“, ტფ., 1937.
47. შადური ვანო, „მასალები ალექსანდრე ყაზბეგის ბიოგრაფიისათვის“, თბ., 1985.
48. შანიძე აკაკი, „ქართული ხალხური პოეზია“ (ხევისურული), I, ტფ., 1931.
49. ჩიხლაძე ნინო, „ვაჟა მოგონებებში“, თბ., 1957.
50. ჭილაძე თამაზ, „წერილები“, თბ., 1978.
51. ჭინჭარაული ალექსი, „მთას ვიყავ“, თბ., 1980.
52. ჭრელაშვილი ლევან, „ვაჟა-ფშაველას თხზულებათა ატრიბუცია და შემოქმედებითი ისტორია“, თბ., 1985.
53. ჭრელაშვილი კოტე, „ვაჟა-ფშაველას მიმრქმელი“, „ლიტ. საქართველო“, 1988, 19 აგვისტო.
54. ხორნაული გიგი, „ფშაური კაფია“, თბ., 1969.

ლექსიკონი

ანდრეზი (ხევს.) – გადმოცემა, ლეგენდა; ძველი ამბები; ტრადიციია.

ასხია – ჩვეულებრივისაგან განსხვავებით, იგულისხმება ტყე (მუხა და წიფელი), მისი ნაყოფი (რკო და წინიბურა), რაც ნადირ-ფრინველს ასუქებს შემოდგომაზე და კარგ (ან ცუდ) სანადიროებს ჰპირდება მთიელ მონადირეებს.

აფხუშო – ნასოფლარია ჩარგლის ხეობის კუდში, კლდეებით შემოზღუდულ ხეობაში, ჩარგლელთა თავდაპირველი სამოსახლოა.

აჩაჩა – ხის გუთანნი.

აძრახება, აძრახდომა – დალაპარაკება, ხმის ამოღება, ხმის გა-ცემა.

ახალყოილნი – ახალჯვარდანერლინი, ნეფე-პატარძალი.

ახუნგორი – ახუნის (ჩარგლის სამხრეთით აღმართული სათიბი) მთის გორი, ვაჟას სახლის პირდაპირ ჩამოყუდებული, რომელზე-დაც ადის თიანეთისაკენ გადასასვლელი ბილიკი.

ბაჩალი – ფშავლების სოფელია ივრის ხეობის კუდში (თიანეთის რაიონში).

ბაჩანა – პატარა, მორჩილი ტანის კაცი.

ბეგენგორი – გორია ხევსურეთში, სოფ. გუდანის დასავლეთ მხარეზე, სადაც ზურაბის ლაშქართან მარტოდ შებრძოლებულ გუროელ ქალუნდაურს გმირობა გამოუჩინია.

ბედენა – განსხვავება, განსხვავებული.

ბედნიერი – ციმბირის წყლული (ავადმყოფობა).

ბერმუხა – ქართველთა საკულტე ხე, კულტი. გადმოცემის თა-ნახმად, ერთი ასეთი ბერმუხა ფშავში, ლაშარის გორზე მდგარა, რომელიც ზურაბ ერისთავს აფციაურის გამცემლური ღალატით მოუჭრია.

ბისტი – (სპარ) ძვ. სპილენძის ფული, წვრილი შავი ფული (უდ-რიდა 2 კაპიკს).

ბონახი – სოფელია ფშავში, ჩარგლის ხეობის კუდში, აღმოსავ-ლეთით, მარჯვენა ფერდობზე.

ბუზურა – ველური, დიდი ზომის „ფუტკარი“. ფიჭას მინაში ჩალ-რმავებულ ადგილებში, სათიბებში იკეთებს. მეტად ტკბილი, თხე-ლი თაფლი აქვს.

ბლლარძუნი – უმნო ჭიდაობა სუსტისა ძლიერთან, ბავშვისა

დიდთან; ხუმრობით ჭიდაობა; ხელების ფათური.

გადასეეს (მოსეეს, მისეეს) – გადასვლისას; გადავლის დროს (მთაზე); (აქეთობისას, იქითობისას).

გადასხლეცა (ცხვრის) – ფარისათვის გარკვეული ნაწილის ჩამოცილება, გარეკვა, მოპარვა, წართმევა.

გატრიზავება – სიტყვის ბანზე აგდება; კაცის აგდება, არაფრად ჩაგდება; დაცინვა.

გაძაგრვა – გაჭიმვა, გაშოტვა; გაბანრვა, გათოკვა.

გაცე – გადი (წყალს გაღმა). გამოცე, აცე, შაცე – გამდი, ადი).

გველისპირული – კარგი ხმლის ეპითეტი. იგულისხმება, რომ მისგან დაჭრილი კაცი არ მორჩება, შხამიანია.

გიძე – გიძევს, გვაქვს.

გუდარახი – სოფელია ფშავში, ჩარგლის პირდაპირ, არაგვის მარჯვენა მხარეს, მალლა გორაზე.

გურო – ნასოფლარია ხევსურეთში, შატილის თემში.

დაგვაჯერებს – აქ: გვაკმარებს.

დავლათიანი – ღვათებრივი ძალის მქონე, ღვთის რჩეული, მტრისაგან უვნებელი, იღბლიანი, გონიერი.

დავლიეთ – აქ: გავათავეთ, გავწყვიტეთ; გავაფუჭეთ, წავახდინეთ.

დაკნელება – ერთიანად ამოჟუჟვა, განყვეტა.

დანელება – დაღუპვა, დაქცევა, დახოცვა (ფუტკრის); ფშაური წყევლა: „შე დანელებულო, შენა!“

დარდაკი – უგნური, უტვინო, სულელი.

დასტური – ხატის მსახური; მორიგეობით დაყენებული ხატისა და ხალხის მომსახურე ერთი წლით, ხატის ლუდის მდუღებელი, ხევისბრის დამხმარე, ხელქვეითი. დასტური ჩვეულებრივ ორია, ორი ოჯახი.

დაუმასრავეს (დამასრავება) – მასრით, გასროლილი ვაზნით დაუსტვინეს, მოუხმეს (ნადირობის დროს). ძახილი და სტვენა ნადირს აფრთხობს, მასრის ხმას კი არ უფრთხის.

დაფარული – აქ: დაფარცხული.

დაყელვა – ნამიან ბალახზე ფეხშიშველად სიარულის დროს ფეხის თითების ქვეშე გაჩენილი იარები.

დაცული – ზვავის, მენყრის საშიშროების გამო დაცული ტყე, სადაც ჯოხის გამოჭრის უფლებაც კი არაგვისა აქვს; სოფლისაგან სათიბებად, საძროვებად დაცული ადგილები; წმინდა ადგილები.

დურატყავი – ტყაპუჭი, ცხვრის დამუშავებული, დუმით გაპობილი ტყავებისაგან შეკერილი დიდი ზომის ქურქი ან საბანი.

ელქეშად – მოულოდნელად, მოურიდებლად; კვალში ჩადგომით მიყოლა.

ერთგულის ნახვენი – იგულისხმება ხინკლიანი ხონჩა. ნახვენი – გამოხვენილი (გამოთლილი) ხის ჯამ-ჭურჭელი, რომელიც სახვეწელით იხვეწებოდა, მექანიკურად დასაბრუნებელი ხელსაწყოთი. „ერთგულის ნახვენი“ იგულისხმება ის, რომ ეს ხონჩა ხინკლით არის ხშირად სავსე, იღბლიანია.

ვანხევი – ხეობა, ნასოფლარი ფშავის ხეობაზე, ხომის ზემოთ, არაგვის მარცხენა შენაკადია.

ვეძა – მინერალური წყალი, მჟავენწყალი; მლაშე, მლაშე წყალი. აქ: ეხლანდელი ვაჟას წყარო.

თექალთო – უნაგირის, კეხის ქვეშ დასაფენი ნაბადი, ქერა, ცხენს რომ ზურგი არ დაეყუჩოს, არ მოეღლიტოს.

თვალვი – სოფელია ფშავის ხეობაზე, ქვემო ნაწილში, არაგვის მარცხენა ნაპირზე, ჟინვალიდან მე-13 კილომეტრზე.

თივა – აქ: ცენტნერი, ცენტნერ-ნახევარი თივის ბულულა, კვერცხის ფორმით, ტკეპნით აგებული მთის ფერდობებზე, რომლებიც კავ-საბლებით შეკონილი თრევით ჩამოაქვთ ჭალამდე, უმთავრესად ზამთარში, თოვლზე.

თოფოსნობა – თოფის სროლა.

იხდენს (მოხდენა) – იგუებს (შეგუება), იტანს (ატანა).

კართანა – ვინრო, შეზღუდული ადგილია ფშავის ხეობაზე, მაღაროს კარს ზემოთ 2 კმ-ზე. ადრე მართლაც კარივით ყოფილა, 7-8 მეტრის სიგანის, ამჟამად კლდე აფეთქებულია და გაფართოებული.

კაპარი – ერთგვარი სასმელ-საჭმელი. მზადდებოდა შემდეგნაირად: ქერის ფქვილს ათქვეფავდნენ წყალში, ჭიჭს (ლუდის საფუარს) მისცემდნენ და აფუვლებდნენ. მიიღებოდა მომჟავო სასმელი, ბურახივით, მარხვაში კი (უმთავრესად) პურჩაყრილს ჭამდნენ, სამარხვო საჭმელი იყო.

კერპის ნაგლეჯი – კერპის ნაშობი, მოურჯულებელი, ჯიუტი.

კვათე – ადგილის სახელია ხევსურეთში, ლიქოკის ხეობაში, სოფ. აჭესთან.

კიბე – კლდიანი გზაა, კიბისებური ბილიკია ლიქოკის ხეობაში, ხევსურეთში.

კუკუშულა – ახლად ამონჭურული ჭყინტი ყველი.

კულა – 1. ოთხკუთხედად აშენებული ქვის სვეტი ფანჯრებს შუა ან თავის დასადებად. 2. ეპითეტია ძლიერი კაცისა.

ლესულა – (იხ. საცერული).

ლიქოკი – ხეობა ხევსურეთში, ბარისახოს მოპირდაპირე მხარეს, არაგვის მარცხენა შენაკადია.

მედიატორე – შუამავალი, მომრიგებელი.

მესისხლეობა – შურის ძიება, სისხლის აღება.

მეხედვება – რაღაცა ხიფათი მელის, შემემთხვევა. „როცა რა მეხედვება, მამაი მესიზმრება“ (გულქანი).

მზირი – მზვერავი, მოთვალთვალე.

მინა – ბოთლი.

მკვრივი – ხატის ადგილი, ტყე, სახნავ-სათიბი, სადაც არ შეიძლება შეჭრა – მოხენა, მოთიბვა, ხის მოჭრა.

მონდავნი – ხენაში ხარებით შეამხანაგებული ორი კაცი, ორი ოჯახი.

მოფშავლება – შექეიფიანება.

მოყივლება – შერცხვენა, საქვეყნოდ თავის მოჭრა, სახელის გატეხვა.

მუში – ცაცხვის შიმღების ლაფანი, რომლისაგანაც ლაფში გამოყვანის შემდეგ, თოკებს გრენდენ.

მწკეპრი – წმინდა, წკრიალა, ფოლადისებური ხმა.

მედვა – მეკეთა, მქონდა. „ხელზე ზალტის საცერული მედვა“.

ნამგალა – ნადირობაში ან მწყემსობაში შეამხანაგებული.

ნამხრევი – თიბვის დროს ერთ გაყოლაზე გათიბული ფართობი; ცელისაგან ზოლებად დაწყობილი ბალახი, თივა.

ნაჩორგნი – ნაჩორკნი, გაჩორკნილი – ცულით უბრალოდ გათლილი, უშნოდ ნათალი.

ნანვეთა – წყალჩამომდინარე კლდე, სადაც წყალი წვეთავს, წურწურით ჩამოდის. აქ: ადგილი ფშავის არაგვის ხეობაზე, ორ-წყალს ქვემოთ, ვინრო კლდიანი ჭალა.

ოჩხარი – ღარიბი ან დაზარალებული კაცის მიერ ნათესავ-ახლობლებში ჩამოვლა ზამთრის სარჩოს შესაგროვებლად.

ოჩხის მოჩხრეკა – თევზის ჭერის ხერხი ზამთარში – მდინარის მდორე ყურეში ორმოს ამოიღებენ, შიგ ქვეებს ჩაყრიან, რომლებშიც საზამთროდ თევზი ჩაიბუდებს. გვიან შემოდგომაზე, ზამთარში ორმოს ბადით გადალობავენ მდინარის მხარეს, ყინულს მოჭრიან

და თევზს ამოკრეფავენ ორმოდან. მსუქანი და გემრიელი თევზია.

ჟინვალი – ძველი ნაქალაქარი, ჩვენ დროს სოფელი იყო ფშავისა და მთიულეთის არაგვის შესართავში, წყალსაცავის ქვეშ მოწყვა.

რას – აქ: რამეს. „კიდევ რას გამოგრჩება“.

რიალი – ზრიალი, დგარა-დგური, აურ-ზაური.

საბადური – ტყიანი მთაა გადასასვლელი თბილისსა და თიანეთს შუა, ერწოს თავზე.

სადიაცე – ქალაჩუნა, დიაცის, დედაკაცის მსგავსი, დედაკაცებში ჩასათვლელი.

სადიაცო – 1. კერის ნაწილი კარის მხარეს ან მარცხენა მხარეს, სადაც ქალები და შვიდ წელზე ქვევით ბავშვები სხედან (საპირისპიროდ სამამაცოსი – კერის თავისა და მარჯვენა მხარის, სადაც მამაკაცები სხდებიან). 2. გათხოვილი ქალის დიაცისთვის განკუთვნილი. 3. ხევსური დიაცის (გათხოვილი ქალის) კაბა, შინაური შალისაგან (ტოლისაგან) შეკერილი, ზედა-ქვედა გადაბმული, მოქარგული და ბოლო-მონაოჭებული, ძალზე მძიმე და უხეში, ფარავითა და ქოქომოთი.

საზედაშე, ზედაშე – ხატში ზედაშედ მისატანი საუკეთესო სასმელი, მაგარი არაყი, წინწანაქარი (პირველად გამოსული არაყი); დასტურ ხევისბრებთან საკლავის დაკვლისა და ქადების დაჭრის დროს მიტანილი ერთი ბოთლი არაყი.

საკლავი – დღეობაში, ქორწილში, ქელებში დასაკლავი პირუტყვი, უმთავრესად ცხვარი.

სამაგანძურო – (ხევს.) გუდანის ჯვრის ძირითადი საყმო სამი გვარი: გოგოჭური, არაბული, ჭინჭარაული – მათი ერთობლიობა.

სამამაცო – საკაცო, კერის სათავე, ან მარჯვენა ნაწილი (სადიაცოს (იხ) საპირისპიროდ), სადაც მამაკაცები სხდებიან.

სამეკობროდ – სამეკობროდ, საყაჩალოდ. **მეკობარი** – მეკობრე, მძარცველი.

სასენო (სიტყვა) – სანყენი, საქილიკო, გამკენწლავი.

საყელი (მთის) – გადასასვლელი, ყელი, სადაც ნადირსა და მტერს უსაფრდებინ, უყელებენ.

საყური – საფარი, ჩასასაფრებელი ადგილი, უმთავრესად ნადირ-ფრინველზე ნადირობის დროს.

საცერული – ბერა თითზე (ცერზე) წამოსაცმელი, ჩხუბში გამო-საყენებელი რკინის იარაღი. არის სამგვარი: ა) ბასრ კბილებიანი

– ლაჯია; გ) გალესილ პირებიანი – ლესულა, დ) ბლაგვ პირებიანი – ხვეულა.

საჯალაფო ქვაბი – სპილენძის საშუალო ზომის ქვაბი, ყურიანი, საკიდელზე დასაკიდები, რომელშიც ჯალაფის (ოჯახის) საკმარისი საჭმელი იხარშება; ჩვეულებრივ ხინკლის მოსახარში ქვაბი.

საჯარე – ვაკე ადგილი, მოლი ხატის ახლოს, სადაც პურობა და ლხინი იმართება, სუფრები იშლება რიტუალების ჩატარების შემდეგ; სადაც მლოცავი ხალხი ბარგს აწყობს და ღამეს ათევს. ამ ადგილს იქით ქალები ვერ მივლენ ხატის სიახლოვეს.

სისხლის ძებნა – შურის ძიება, სისხლის აღება.

სნუ (დღევანდელი სნო) – დიდი, ძლიერი სოფელია ყაზბეგის რაიონში; უმთავრესად ლუდუშაურები და მათი განშტოებანი ცხოვრობენ.

სოფლიონი (სოფლივნის) – ფშავლების სოფელია ივრის კუდეში (თიანეთის რაიონი).

სულით იალი – განათლებული, წმინდა.

სწროფავი – სოფელია ფშავში, ქვემო ნაწილში, არაგვის მარჯვენა მხარეს, თვალის პირდაპირ.

ტაბლა – დაბალი გრძელი მაგიდა, რომელიც განწყობილი გამოაქვს ხოლმე დისახლისს და წინ უდგამს სტუმრებს, მამაკაცებს.

ტაგანი – მცირე ზომის ყურიანი კოდი – საწველი.

ტყავგარექცევა – ტყავები იკერებოდა ბენვით შიგნით, ძველებური, უხეში, წინაპრული კი ბენვგარექცევაც იკერებოდა – უმთავრესად თხის ტყავისა. ეპითეტია ძლიერი წინაპრებისა.

ულალავდეს – უგერიებდნენ, ერეკებოდნენ.

ფაფანაგი – ქალის ქულაჯა, ზედატანზე შემოსაცმელი, ჩვეულებრივ მოქარგული.

ფხიტური – მთაა, გუდამაყრიდან (ბაკურხევიდან) ხევსურეთისაკენ (როშკისაკენ) გადასასვლელი.

ქაჯია – ცხვრის წვივის ძვალი. მისი ხელით გადამტვრევა ვაჟკაცობად ითვლებოდა.

ქინძი – კვლიავა, ველური ქინძი, საუკეთესი სუნელი, განსაკუთრებით ხინკლის.

ქუჯევა – კაცის სახელია, მაღაროსკარში ცხოვრობდნენ, ფშავში.

ლაჯია – (იხ. საცერული).

ყაზარა – (?) „ყაზარასავით რომ გაბერილხარ“.

ყარნიკა – შალის, მტკიცედ ნაქსოვი შემოსაცმელი, უსახლებო მოსასხამი, ქისტებიდან გადმოღებული.

ყევარი – ორი უღელი ხარი. ჩვეულებრივ მონდაენი (იხ.) ყევარი ხარით ხნავდნენ მთაში, კერძოდ ფშავში.

ყელი – მთაზე, გორზე ჩადაბლებული ადგილი, გადასასვლელი, უღელტეხილი.

შანაყარი – ოჯახის მიერ შეფარებული უცხო ადამიანი, ოჯახის წევრად მიღებული უთვისტომო, ყარიბი.

შუაფხორი – (იგივე, შუაფხო) – სოფელია უკანაფშავში, ცენტრი. ორწყლიდან, ფშავისა და ხევსურეთის არაგვების შესართავიდან, ხუთ კმ-ზე.

ჩარგლისკარი – არაგვის ქალა, სადაც ჩარგლის ხევი, ჩარგლურა უერთდება არაგვის ქალას, არაგვს, საიდანაც ჩარგალი იწყება.

ჩახედვებული – ღრმა ჭრილობა, რომელიც ტვინამდე ან ორგანიზმის შიგნით ღრუმდეა ჩასული.

ჩიკა – ხის სამფენა პატარა სკამი.

ცაბაურთა – სოფელია უკანაფშავში, შუაფხოს (იხ) თავზე, არაგვის მარჯვენა, მხარეს, მაღლა მთაზე.

ციცა – კატა. აქ: ხევსურებს მეზობელი ტომები, განსაკუთრებით ფშავლები, ზედმეტსახელად ციცეებს ეძახიან.

ძალლისმჭამელი – გოგოჭურთ დასტურ-ხევისბრებს ხატისათვის ნადუღარ ლუდიან სპილენძის ქვაბში ღამე ძალლი ჩახრჩობიათ. ეს დაუმალაით ხალხისთვის მეორე დღეს, ის ლუდი მათთვისაც უსმევიათ და თავადაც უსვიათ. ეს საიდუმლო მაინც გაუგია ხალხს და გოგოჭურებისათვის ძალლის მჭამლები შეურქმევიათ.

წალალვა (ხევს.) – გაგზავნა. „შვილნი წავლალენ სათიბზედა.“

წერა, წერილა – მკის დროს სამი ძნა ერთმანეთზე აყუდებული გამოშრობის მიზნით, სანამ ხუთულად ააგებენ.

წილობა – ხატში ქადის, ხორცის ან სხვა რამის ნაწილი, ნაჭერი. ქადის წილობას – მეოთხედს ხევისბერი იტოვებდა დამწყალობნებისას, ქადების დაჭრისას.

წინკარი – ხის წვრილი ტოტი.

ჭიჭახევა – პატარა ხევი, ნაკადული, რომელიც ვაჟას სახლს ჩამოუდის მარცხნივ. „ჭიჭა“ (პატარა), ზანიზმი უნდა იყოს ფშავ-ხევსურულში – ხევსურეთში ერთ პატარა ტანის კაცსაც ერქვა „ჭი-ჭა იმედა“.

ხევისბერი – თემის თავკაცი, უმთავრესად ხატობა-დღეობებში რიტუალების ჩამტარებელი, მონმინდარი, მლოცავ ხალხს ამწყალოებს, დიდებას წარმოთქვამს, ზარებს რეკავს, საკლავებს კლავს, ქადებს ჭრის.

ხვეულა – (იხ. საცერული).

ხაჭონყალა – ცივ წყალში გახსნილი ხაჭო. უმთავრესად სათიბზე, სამწყემსურში ყოფნის დროს საჭმელია, ხმელა პურის მეტი როცა არა ჰქონდათ რა. ჯამში გაიკეთებდნენ ხაჭონყალას და შიგ პურს ჩაიჩიქავდნენ.

ხოკერი – ხის (ბალამნარას, თელის, ცაცხვის) ქერქისაგან ყაპყატოთი შეკერილი და ძირგამონული დაბალი კასრი, რომელშიც უმთავრესად დაჩეჩილი მატყლის ფთილებს, ტარ-ფარტენას აწყობდნენ.

ხონჩა – ხის (უმთავრესად თელის) მოგრძო და ბრტყელი ჭურჭელი, რომელზეც ხინკალს ამოიღებენ ხოლმე და სუფრაზედაცი იმითვე მიაქვთ.

ჯალაფი – ოჯახი; ცოლი.

ჯლრდე – გროვად მიყრილი, მიხერგილი (რქები, ძვლები და სხვ.)

სარჩევი

არწივთა საბუდარები.....	4
ჯიშჩამომავლობა.....	12
მშობლები.....	24
დაბადება.....	34
თელავი.....	40
თბილისი.....	52
გორი.....	58
ტოლათსოფელი	77
პეტერბურგი და კვლავ ჩარგალი.....	82
იურისტობაზე მეოცნებე.....	89
ოთარშენი. ცოლის შერთვა.....	99
დიდთონეთი.....	104
და ბოლოს მაინც ჩარგალი.....	130
ვაჟას ძმები.....	139
ა) გიორგი.....	139
ბ) ბაჩანა.....	145
გ) თედო.....	155
დ) სანდრო.....	168
ვაჟა და მუზა.....	181
იმედას მხრიდან „ნათესავეები“.....	198
„ივერიასთან“ დაუმძრახება.....	207
ძალად ლხინი.....	214
ვაჟა ჩუბინი და მონადირე.....	223
ტყისთვის ბრძოლა მეტყვევებთან.....	228
საქვეყნო გულისტკივილი.....	247
ვაჟა და არტისტობა?.....	254
კეკეს დაღუპვა. თამარი.....	259
ვაჟას შვილები.....	267
ა) თამარი.....	268
ბ) ლევანი.....	270
გ) გულქანი.....	312
1905 წლის რევოლუციის იმედი და უიმედობა.....	319
დანუნებული ენა.....	346
ვაჟას „შეცდომების“ გასწორება.....	366

ვაჟას კრიტიკოსები.....	368
უქალღობა.....	374
არც მთაში, არც ბარში.....	377
ვაჟას ქომაგნი.....	395
ავადმყოფობა, იუბილე და აღსასრული.....	409
დამონმებული ლიტერატურის სია.....	434
ლექსიკონი.....	437

They say, when Walt Disney read Vajha-Pshavela's (Luka Razikasvili's) "Singers of Nature", he cried out: "Who is this man, who is this genius, why I haven't heard anything about him?"

Today his name isn't unknown; Vajha Pshavela is famous almost all over the world as an incomparable poet and great humanist, the thinker of the world level.

He lived at the end of the XIX th century and created his original poems in a most beautiful part of Georgia-Pshavi. His pseudonym is derived from his native region (Vajha-Pshavela means a man pearen's from Pshavi). He earned his living by a peasant's work and lived in poverty. In Georgia they often compare his fate to that of the famous Scottish poet Robert Burns.

Vajha-Pshavela's most national, most originale creative work is nourished with mytology and folklore of the highlanders. That's why his poetry is for eternity and at the same time understandable for everybody.

To embody his philosophyc ideas and ideas common to all mankind, he uses episodes describing the life of highlanders, customs which were his customs as well, If you are not aware off all these, his creative work will be inconceivable for you.

My book is the first ettempt to describe Vajha-Pshavela's life. I think the narrative of the man (i.e.me), who was brought up among the same mountains, and in the same corner of Georgia where the poet lived, won't be uninteresting for the reader.

Уолт Дисней прочитав произведение Важа-Пшавела-"Певцы природы"- воскликнул:"Кто он и откуда этот гений! Почему я ничего не знал о нём!"

Сегодня Важа-Пшавела (Лука Разикашвили), выдающийся поэт и писатель Грузии, известен всему миру, как несравненный певец природы, большой гуманист и мыслитель мирового значения.

Важа-Пшавела жил и творил в конце XIX века, в одном из прекрасных уголков Грузии - Пшави. Важа-Пшавела его псевдоним (человек из Пшави). Он как истинный крестьянин своим трудом содержал семью. Почему его судьбу сравнивают с судьбой большого шотландского поэта Роберта Бернса.

Национальное, самобытное творчество Важа-Пшавела основано на мифологии и фольклоре горцев. Его поэзия вневременная, поэтому понятно всему человечеству. философские воззрения и общечеловеческие проблемы он воплотил опираясь на эпизоды быта горцев, на их обычаи. Поэтому без знания всего этого, без знания жизни самого Важа-Пшавела часто невозможно понять его творчество.

Эта книга - первая попытка описания жизни Важа-Пшавела. небезинтересно знать читателю, что автор данной книги-тоже горец, выросший в тех же местах, где жил и творил Важа-Пшавела.

Gigi Khornauli

The life of Vajha-Pshavela

დაიბეჭდა გამომცემლობა “ეროვნული
მწერლობის” სტამბაში. მხატვრის ქ. №4

ტელ.31-70-47

32-73-62

E.mail

litandart@yahoo.com

vaja.otarashvili@yahoo.com

თბილისი. 2008